

THEOLOGIA DOGMATICO-POLEMICA,

QUA

ADVERSUS VETERES NOVASQUE HAERESES

EX

SCRIPTURIS, PATRIBUS, ATQUE ECCLESIASTICA HISTORIA,

CATHOLICA VERITAS

DEFENDITUR.

AUCTORE

P. CAROLO SARDAGNA

SOCIETATIS JESU,

IN EPISCOPALI LYCEO AD D. PAULI RATISBONÆ

THEOL. DOGMATICO-POLEMICÆ PROF. ORD.

ET EXAM. SYNODALI.

TOMUS IV.

COMPLECTENS

TRACTATUM IV. DE PECCATIS, BONIS OPERIBUS,

ET LIBERO ARBITRIO.

Editio Secunda.

POLOCIAE

TYPIS COLLEGII SOC. JESU. 1810.

CENSURA ET APPROBATIO.

Traſtatus iſte Theologiæ Dogmatico-Polemicæ de Peccatis, bonis Operibus, & Libero arbitrio nihil Orthodoxæ fidei & Chriſtianis moribus adverſum continet, ac ſolidis omnino nititur fundamentis. Quapropter merito Luce publica donabitur. Datum in Curia Episcopali Ratiſbonenſi die XXVI. Julii, 1770.

ADAMUS ERNESTUS,
Episc. Abilenæ, Suffrag. &
Præſes Conſiſt. Conſ. Int.
Actual. & Cathedr. Eccles.
Canonicus Capitularis, m. p.



JOANNES BAPT. KLEIRL.
SS. Theol. & J. U. Licent. Con-
ſil. Eccl. Aſſ. Director Car.
Authrte Aplca & Curia Episc.
publ. ac juratus Notarius,
m. p.



493914

K. 594/87



INDEX CONTROVERSIARUM,

quæ

in Tractatu IV. de Peccatis, Bonis operibus,
& Libero Arbitrio continentur.

ARTICULUS I. DE PECCATO ORIGINALI, EJUSQUE POENIS.

CONTROVERSIA I.

AN EXISTAT PECCATUM ORIGINALE. AB ADAMO PER GENERATIONEM IN EJUS POSTEROS TRANSFUSUM? Num. 1.

CONCLUSIO I. Datur peccatum originale, ab Adamo per generationem in ejus posteros transfusum. 3.

QÆSITUM I. An originale peccatum veram & propriam peccati rationem habeat? 10.

II. An unicuique ex posteris Adæ sit proprium? 11.

III. An per naturalem generationem in singulos posteros derivetur, etiam filios fidelium? 12.

IV. An alia peccata Adami, præter illud inobedientiæ; aut etiam parentum in filios & nepotes ipsorum deriventur? 13.

V. Quandonam peccatum originale in prolem transfundatur? 14.

CONTROVERSIA II.

DE NATURA ET FORMALI RATIONE PECCATI ORIGINALIS. 33.

CONCLUSIO I. Peccatum originale non est substantia mala, a Diabolo producta. 39.

CONCLUSIO II. Concupiscentia, seu pronitas ad malum, non est peccatum originale. 41.

T. IV. Theol. Dogm. Pol.

A

CON.

✠ ✠ ✠

CONTROVERSIA III.
DE POENIS PECCATI ORIGINALIS. 52.

CONCLUSIO I. Mors corporis est poena peccati originalis. 53.

CONCLUSIO II. Concupiscentia rebellis est mala, atque a peccato originali profiscitur. 55.

CONCLUSIO III. Exclusio ab æterna gloria est poena peccati originalis. 57.

QUÆSITUM I. An parvuli sine baptismo decedentes, quamvis priventur vita æterna, quæ consistit in visione intuitiva Dei, fruuntur tamen naturali quadam beatitudine? 59.

II. An ita priventur visione intuitiva Dei, ut nullum exinde dolorem patiantur? 60.

III. An æterno igne sint cruciandi apud inferos in carcere damnatorum? 62.

CONTROVERSIA IV.
AN B. VIRGO DEIPARA ABSQUE ORIGINALI MACULA CONCEPTA FUERIT? 73.

CONCLUSIO. B. Virgo absque originali macula concepta est, atque in primo Conceptionis suæ instanti sanctificata est. 76.

QUÆSITUM I. An antiquus sit Immaculatae Conceptionis cultus in Ecclesia Dei? 89.

II. An pia sententia probabilitatis limites excedat? 90.

III. An fieri possit, ut pia sententia quocunque tempore a Sede Apostolica damnetur tanquam hæretica, vel peccaminosa? 92.

IV. An ratum & honestum sit votum tuendi usque ad sanguinem immaculatum Deiparae conceptum? 95.

APPENDIX.
DE DEBITO PROXIMO ET REMOTO PECCATI ORIGINALIS IN DEIPARA. 121.

ARTICULUS II.
DE PECCATO PERSONALI, EJUSQUE POENIS.

CONTROVERSIA I.
AN BEATISSIMA VIRGO SEMPER IMMUNIS FUERIT AB OMNI PECCATO PERSONALI? 126.

CONCLUSIO. Beatissima Virgo toto vitæ suæ tempore ab omni personalis peccati labe, ex speciali Dei privilegio, semper fuit immunis. 127.

QUÆ

✠

QUÆSITUM. An B. Virgo, eoquod in gratia fuerit confirmata, habuerit potentiam peccandi? 132.

CONTROVERSIA II.

AN DEUS SIT AUTHOR PECCATI? 144.

CONCLUSIO. Deus non est author peccati. 146.

CONTROVERSIA III.

AN PECCATA VENIALIA ET MORTALIA DIFFERANT INTRINSECE, ET EX NATURA SUA? 168.

CONCLUSIO. Peccata mortalia & venialia differunt inter se intrinsece; & ex natura sua, non autem ex sola relatione ad prædestinationem, vel statum renatorum. 170.

QUÆSITUM. Undenam desumenda sit differentia peccati venialis a mortali? 173.

CONTROVERSIA IV.

AN PER QUODLIBET PECCATUM MORTALE AMITTANTUR FIDES, SPES, ET CHARITAS? 180.

CONCLUSIO I. Justus amittere potest charitatem, & gratiam sanctificantem: immo per quodlibet peccatum mortale eam amittit, ita ut desinat esse justus. 181.

CONCLUSIO II. Fides potest quidem simpliciter amitti; non tamen amittitur sicut charitas per quodlibet peccatum mortale. 185.

CONCLUSIO III. Spes Theologica non amittitur per quodlibet peccatum mortale. 189.

QUÆSITUM. Per quodnam peccatum Fides & Spes amittantur? 190.

CONTROVERSIA V.

AN, ET QUIBUS POENIS APUD INFEROS TORQUEANTUR, QUI IN STATU PECCATI MORTALIS EX HAC VITA DECEDUNT? 199.

CONCLUSIO I. Etiam in lege gratiæ & amoris datur Infernus. 200.

CONCLUSIO II. Infernus, seu damnatorum carcer, est locus materialis, determinatus, ac subterraneus. 201.

CONCLUSIO III. Dammati igne vero & proprie dicto torquentur apud inferos. 202.

CONCLUSIO IV. Non tantum peccata publica, sed etiam occulta per poenitentiam in hac vita nondum remissa, in altera vita inferorum cruciatibus puniuntur. 207.

CONCLUSIO V. Animæ in statu peccati mortalis ex hac vita decedentes, statim ad inferos amandantur. 208.

CONCLUSIO VI. Poenæ damnatorum apud inferos sunt æternæ, nullum umquam finem habituræ. 209.

- ✠
- QUÆSITUM I.** An ignis inferoræ ejusdem sit naturæ & speciei cum elementari nostro, an diversæ? 205.
- II.** Qua ratione ignis corporeus agere possit in Spiritum? 206.

ARTICULUS III. DE MERITO ET BONIS OPERIBUS.

CONTROVERSIA I.

AN HOMO JUSTUS, DIVINA GRATIA ADJUTUS, EFFICERE POSSIT OPERA VERE BONA? 227.

CONCLUSIO. Homo justus, gratia Dei adjutus, potest efficere opera vere ac perfecte bona. 228.

CONTROVERSIA II.

AN BONA OPERA JUSTORUM, VIRIBUS GRATIÆ ELICITA, MERENTUR BEATITUDINEM ÆTERNAM? 237.

CONCLUSIO. Opera bona justorum, viribus gratiæ supernaturalis elicitæ, merentur Beatitudinem æternam. 246.

QUÆSITUM I. An justî bonis operibus æternam beatitudinem de condigno mereantur, an tantum de congruo? 249.

II. An fiducia, quam justî in Deo constituunt, non ex fide, sed etiam ex bonis meritis nascatur? 250.

III. Utrum liceat fiduciam aliquam ponere in propriis meritis? 251.

CONTROVERSIA III.

AN LICEAT BONUM AGERE INTUITU MERCEDIS ÆTERNÆ? 259.

CONCLUSIO. Licitum est Bona agere intuitu mercedis æternæ. 260.

CONTROVERSIA IV.

AN BONA OPERA SINT NECESSARIA AD SALUTEM CONSEQUENDAM? 269.

CONCLUSIO I. Opera bona sunt necessaria ad obtinendam salutem. 272.

CONCLUSIO II. Opera bona ad salutem consequendam necessaria sunt, non tantum ratione præsentiæ, sed etiam efficientiæ. 274.

CONTROVERSIA V.

DE ORATIONE. 279.

CONCLUSIO I. Per solam Orationem salus æterna obtineri nequit. 283.

CONCLUSIO II. Oratio ad salutem est necessaria. 285.

CONCLUSIO III. Deus orantibus multa largitur, quæ absque oratione non concederet. 289.

CON.



CONCLUSIO IV. Licitum & honestum est orare non pro omnibus in genere tantum, sed etiam in specie pro aliquo determinato. 291.

CONCLUSIO V. Oratio, etiam privata, recte peragitur in Templis, ut pote loco aptissimo ad orandum, & decentissimo. 293.

CONCLUSIO VI. Quædam determinate a Deo peti debent, ut vita æterna, eaque quæ ad illam conducunt. 297.

CONTROVERSIA VI.

DE HORIS CANONICIS. 301.

CONCLUSIO I. Horarum Canoniarum usus, ab Ecclesia Ministris publicis præscriptus, saluberrimus, antiquissimus est, Deoque gratissimus. 305.

CONCLUSIO II. Consuetudo canendi in Templis Horas Canonicas antiquissima est, iustissimisque de causis ab Ecclesia introducta. 309.

CONTROVERSIA VII.

DE JEJUNIO ECCLESIASTICO. ET DELECTU CIBORUM. 317.

CONCLUSIO I. Abstinencia a carnibus, tamquam natura sua immunda, ac pro omni tempore a Deo prohibitis, impia ac superstitiosa est. 325.

CONCLUSIO II. Jejunium ipsum, & abstinencia a carnibus quamvis de se licitis, si ordinetur ad fidem supernaturalem, est opus bonum, utile, ac Deo placens. 327.

CONCLUSIO III. Ecclesia præcipiens fidelibus jejunium, obligat illos in conscientia, ac sub gravi peccato ad jejunandum: neque jejunium præcipiendo excedit limites suæ potestatis. 330.

CONCLUSIO IV. Præceptum jejunii non peccatores tantum, sed etiam justos comprehendit. 336.

CONCLUSIO V. Ecclesia recte atque utiliter præcepit Fidelibus jejunium, & abstinenciam a carnibus. 337.

CONCLUSIO VI. Jejunium recte ad eum etiam finem refertur, ut per illud, tamquam per bonum opus mercedem a Deo promereamur, & Deo satisfaciamus pro peccatis. 339.

ARTICULUS VI.

DE LIBERO HOMINIS ARBITRIO,
ET STATU NATURAE PURAE.

CONTROVERSIA I.

QUÆNAM LIBERTAS NECESSARIA SIT AD LIBERUM HOMINIS ARBITRIUM? 348.

CONCLUSIO. Ad liberum arbitrium non sufficit libertas a coactione; sed requiritur libertas a quacunque necessitate antecedente, & inimpedibili. 358.

CON.



CONTROVERSIA II.

AN AD MERENDUM VEL DEMERENDUM IN STATU NATURÆ LAPSÆ REQUIRATUR LIBERTAS INDIFFERENTIÆ? 375.

CONCLUSIO. Ad merendum vel demerendum etiam in statu naturæ lapsæ requiritur liberum arbitrium, seu libertas indifferentiæ. 376.

CONTROVERSIA III.

AN DELECTATIO RELATIVE SUPERIOR IN SYSTEMATE JANSENII TOLLAT LIBERTATEM, QUÆ IN STATU NATURÆ LAPSÆ REQUIRITUR AD MERITUM, VEL DEMERITUM? 391.

CONCLUSIO. Necessitas licet voluntaria & mutabilis, quæ juxta Jansenium oritur ex delectatione superiore, relativa & indeliberata, tollit libertatem, quæ in statu naturæ lapsæ requiritur ad merendum, vel demerendum. 399.

CONTROVERSIA IV.

AN ETIAM IN STATU NATURÆ LAPSÆ DETUR LIBERTAS INDIFFERENTIÆ? 417.

CONCLUSIO. Etiam in statu naturæ lapsæ habet homo liberum arbitrium, seu libertatem a quacunque antecedente & impedibili necessitate, tam quoad actiones civiles, quam morales, pias & salutares. 420.

CONTROVERSIA V.

AN S. AUGUSTINUS HOMINEM OB PECCATUM ADAMI LIBERO ARBITRIO SPOLIATUM FUISSE DOCUERIT? 441.

CONCLUSIO. S. Augustinus constanter docuit, homini etiam in præsentis statu naturæ lapsæ inesse libertatem ab omni necessitate simplici & antecedente. 447.

CONTROVERSIA VI.

AN HOMO POTUERIT A DEO CREARI, QUIN PER GRATIAM SANCTIFICANTEM ELEVARETUR AD FINEM SUPERNATURALEM? 465.

CONCLUSIO. Homo potuit a Deo creari, quin per gratiam sanctificantem elevaretur ad finem supernaturalem. 474.

CONTROVERSIA VII.

AN DEUS POTUERIT HOMINEM INNOCENTEM CONDERE, MORBIS, MORTI, ALIISQUE VITÆ MISERIS OBNOXIUM? 493.

CONCLUSIO. Deus potuisset hominem innocentem condere, morti, morbis, ac doloribus obnoxium. 494.

CONTROVERSIA VIII.

AN DEUS POTUERIT HOMINEM INNOCENTEM CONDERE CUM ALIQUA SALTEM REBELLIONE CONCUPISCENTIÆ? 506.

CONCLUSIO. Potuit Deus hominem innocentem condere cum aliqua saltem rebellionem concupiscentiæ. 510.

THEO.



THEOLOGICÆ
DOGMATICO-POLEMICÆ
TRACTATUS IV.
DE PECCATIS, BONIS OPERIBUS,
ET LIBERO ARBITRIO.

ARTICULUS I.
DE PECCATO ORIGINALI, EJUSQUE
POENIS.

CONTROVERSIA I.

AN EXISTAT PECCATUM ORIGINALE, AB ADAMO
PER GENERATIONEM IN EJUS POSTEROS TRANS-
FUSUM?

CONTRA PELAGIANOS, ANABAPTISTAS, ZWINGLIUM,
SOCINIANOS.

I. *Peccatum* in genere, est libera Divinæ Legis trans-
gressio, aut, ut illud S. Augustinus describit Lib. *Quid & quoluplex sit peccatum?*
XXII. contra Faustum, Cap. XXVII. factum, vel di-
cium, vel concupitum aliquid contra æternam legem.
Aliud est originale, personale aliud. Nomine peccati
Originalis intelligitur labes quædam, quæ hominem na-
turali via generationis ab Adamo descendentem ipso
sux originis momento ita inquinat, ut tamquam veri
nominis peccatum, eundem hominem Deo exosum red-
dat, & variis hujus vitæ calamitatibus obnoxium: tum
etiam a cœlesti beatitudine, nisi Baptismo eluatur, ex-
clu-

eludat. *Personale peccatum* in quo ab originali discrepet, optime explicat S. Anselmus Lib. de Conceptu Virginali, & Originali peccato, Cap. I. *Est peccatum, quod quisque trahit cum natura in ipsa sua origine, & est peccatum, quod non trahit cum ipsa natura, sed ipse facit illud, postquam est persona discreta ab aliis personis. Illud quod trahitur in ipsa origine, vocatur originale: quod potest etiam dici naturale; non quod sit ex essentia naturæ, sed quod propter ejus corruptionem cum illa assumitur. Peccatum autem, quod quisque facit, postquam persona est, hoc est sui juris & arbitrii, personale potest nominari, quia vitio personæ fit. Porro peccatum personale actuale dicitur, quando actu committitur; habituale vero, quod quidem commissum est, actu autem neque existit amplius, neque a Deo remissum est, sed moraliter permanet. Dividitur etiam in mortale, ac veniale. Veniale dicitur, quod non dissolvit amicitiam Dei cum homine, quodque impossibile non est cum charitate, sed solum fervorem ejus minuit: neque excludit a cælesti beatitudine, sed solum retardat illius ascensionem. Mortale est illud, quod hominem Deo reddit odibilem, dignumque æterna pœna, mortem asserens animæ spirituales, privando illam gratia sanctificante, in qua spiritualis animæ vita consistit.*

*Hæresis
Pelagii.*

2. Originale peccatum aperta fronte primus infiri ausus est Pelagius e Scotia oriundus, professione Monachus. Marius Mercator in Commonitorio affirmat, hausisse ipsum erroris principia a Rufino quodam Syro Presbytero, Theodori Mopsuesteni discipulo, quem Henricus Card. Norisius Lib. I. Hist. Pelagianæ, Cap. II. & Natalis Alexander in Historia Ecclesiastica Sæculi IV, Cap. VI. Artic. XXXIII. Aquilejensem illum putant fuisse, celebrem Hieronymi obtrectatorem, a longa in Oriente XXV. annorum commoratione Syrum dictum. Pelagius itaque ab originis noxæ impugnatione errorum fuorum initium duxit, docuitque I^{mo} peccatum Evæ & Adami ipsis tantummodo nocuisse, non posteris; credebatque absurdum hoc satis.

satis cohonestari, si diceret, nocuisse etiam posteris,
 sed exemplo tantum: ream etiam effecisse eorum pro-
 paginem, sed imitatione; atque hinc dictum fuisse,
 peccasse in Adam omnes, tametsi re ipsa delictum pro-
 pagatum non fuerit, nisi in ipsa transgressione, ad
 primorum parentum imitatores. II. Mortem omnium
 hominum, qui ex Adamo trahunt originem, natura-
 lem esse hominis conditionem, & ipsum Adamum, eti-
 amsi non peccasset, fuisse moriturum. III. Homines
 nunc nasci, qualis conditus fuit Adamus, hoc est, ut
 ipse Pelagius contendebat, sine virtute, & sine vitio.
 IV. Necefsarium esse parvulis baptismum, non quidem
 ut peccatum eis originale remitteretur, cujus existen-
 tiam ille negabat; sed quia per illum parvuli initian-
 tur Deo, qui parvulos quos condendo fecerat bonos,
 innovando cum baptizantur, facit esse meliores. V.
 Parvulos sine baptismo decedentes, extra regnum Dei
 fructuosos vita quadam beata atque æterna, originalis
 innocentie merito. Quid vero Pelagius beatæ atque
 æternæ vitæ nomine intellexerit, an supernaturalem
 felicitatem, quæ in clara atque intuitiva Dei visione
 consistit; an vero mere naturalem, omnis doloris ac
 tristitiæ expertem, liquidum atque exploratum non
 est. Atque hæc fuere præcipua Pelagiani erroris ca-
 pita circa noxam originariam. Postea Pelagiani, Ca-
 tholicorum argumentis oppressi, admisere tandem, ut
 testatur S. Augustinus Lib. IV. contra duas Episto-
 las Pelagianorum, Cap. II. & IV, Adamum non fuisse
 moriturum, si non peccasset, & post peccatum, mor-
 talem effectum, genuisse mortales filios. Unde confi-
 teri ceperunt, mortem corporis trahi ex Adamo per
 generationem, non vero mortem animæ, sive peccatum.
 Pelagianam insaniam, ab Augustino, atque a Catholi-
 ca Ecclesia Apostolico mucrone confossam, ab inferis
 excitarunt posteriorum temporum Novatores, Albigen-
 ses, Ulricus Zwinglius, Sociniani, atque hos inter Jo-
 annes Phereponus, seu Clericus, quem renovati Pela-
 gianismi merito reum agit Laminus Pritanius,

seu

feu Ludovicus Anton. Muratorius in Libro de Ingeniorum moderatione.

*Existentia
originalis
peccati
ostenditur
ex Script.*

3. Conclusio. Datur peccatum Originale, ab Adamo per generationem in ejus posteros transfusum. Prob. I. Authoritate Scripturarum. Job Cap. XIV. dicitur: *Quis potest facere mundum de immundo conceptum semine?* Quem locum sic vertunt LXX. Interpretes: *Nemo mundus a sorde, nec infans, cujus est unius diei vita super terram.* Ubi manifeste S. Job loquitur non de fordibus corporum infantilium, quas emundare possunt homines, sed de fordibus peccati; non personalis, cujus capaces non sunt infantes, sed originalis, quas solus Deus mundare potest. II. David Psalmo L. ait: *Ecce enim in iniquitatibus conceptus sum, Et in peccatis concepit me mater mea.* Quo loco Sanctus Rex non loquitur de peccato parentum, quod illi admiserint, cum generationi operam darent: ex sancto enim conjugio, non ex adulterio, aut fornicatione fuerat progenitus; legitimi autem matrimonii usum peccatum non esse, certum est ex fide. III. Ad Rom. Cap. III. v. 23. ait Apostolus: *Omnes enim peccaverunt, Et egent gloria Dei.* Ad Rom. Cap. V. v. 12. *Propterea sicut per unum hominem peccatum in hunc mundum intravit, Et per peccatum mors, Et ita in omnes homines mors pertransiit, in quo omnes peccaverunt.* II. Ad Cor. Cap. V. v. 14. *Quoniam si unus pro omnibus mortuus est, ergo omnes mortui sunt, Et pro omnibus mortuus est Christus.* Ad Ephes. Cap. II. v. 3. *Eramus natura filii iræ, id est naturaliter, vel originaliter.* Ex his locis, ac præcipue ex illo ad Rom. Cap. V. v. 12. hoc argumentum instruo. Apostolus l. c. ait omnes homines morti obnoxios esse, eoquod omnes peccaverint. Ergo asserit dari peccatum originale, quo omnes homines infecti sunt. P. C. Infantes ex hac vita sapissime decedunt. Ergo necesse est eos aliquo peccato maculari, cujus causa mortem subeant. Atqui peccatum hoc esse nequit personale, cujus per ætatem capaces non sunt. Ergo est originale. Confirm. Apostolus mortem vocat

stipem.

stipendium peccati: vultque per id significare, ideo omnes homines mori, quia omnes peccarunt. Ergo si originale peccatum ab infantibus excludatur, aut ipsi morituri non essent, aut certe argumentum Apostoli infirmum foret, atque elumbe. Neque dicas, sermonem ibi esse dumtaxat de morte corporis: Siquidem Apostolus l. c. perpetuam antithesin instituit inter mortem, quæ est per inobedientiam Adami, & inter vitam, quæ est per obedientiam Christi. Ergo sicut ea vita, quæ est per Christum, primario ac directe refertur ad vitam animæ: ita illa mors, quæ est per Adamum, primario ac directe referenda est ad mortem animæ.

4. Prob. II. *Authoritate Patrum, qui ante exor-* *Patribus.*
tam Pelagianam hæresin floruerunt. S. Justinus Martyr in Dialogo cum Tryphone scribit, Christum in Jordane baptizatum fuisse, *generis hominum causa, quod Adami opera, præter privatam ac propriam unius cujusque culpam, deliquerat, Et in mortem, serpentisque fraudem incidisset.* S. Irenæus Lib. V. adv. Hær. Cap. XVII. *Delevit chirographum, debita nostra, affigens illud Cruci, uti quemadmodum per lignum facti sumus debitores Deo, per lignum accipiamus debiti remissionem.* Tertullianus Lib. de Anima, Cap. XL. *Omnis anima eousque in Adam censetur, donec in Christo recenseatur: tandiu immunda, quamdiu recenseatur: Peccatrix autem, quia immunda.* S. Cyprianus Epist. LIX. ad Fidum: *Infans recens natus nihil peccavit, nisi quod secundum Adam carnaliter natus, contagionem mortis antiquæ prima nativitate contraxit.* S. Hilarius in Explicatione Psal. CXVIII. de S. David scribit: *Scit se sub peccati origine, Et sub peccati lege esse natum.* S. Ambrosius in Apologia David, si-ve in Psalm. L. Cap. XI. *Antequam nascamur, maculamur contagio: Et ante usuram lucis, originis ipsius excipimus injuriam, in iniquitate concipimur.* S. Gregorius Nazianz. Orat. III. de pace: *Totus lapsus sum, atque ex primigeni hominis inobedientia, Et diaboli fraude condemnatus sum.* Similia habent S. Athanasius Serm. in illud,

lud, *Omnia mihi tradita sunt.* S. Basilius Hom. I. de Jejunio, & in Expositione Psal. XXXII. S. Cyrillus Jerosol. Catech. II. S. Siricius Epist. I. ad Himerium, Cap. II. S. Hieronymus Comment. in Cap. VI. Oseæ. S. Chrysostomus Homil. ad Neophytos &c. Jure itaque optimo scripsit Augustinus Pelagianorum malleus, Lib. III. de peccat. meritis & remis. Cap. VI. *Non aliud* (de peccato originali) *ex quo Christi Ecclesia constituta est, divinarum Scripturarum tractatores scripserunt: non aliud a Majoribus acceperunt, non aliud posteris tradiderunt.* Vide Card. Bellarminu Lib. IV. de Amissione gratiæ, & statu peccati, Cap. V. & Natalem Alexandrum Disert. XXI. in Hist. Ecclesiast. Sæculi V.

Conciliis.

5. Prob. III. Autoritate Conciliorum, & Pontificum. Pelagianam blasphemiam damnarunt S. Innocentius I. in Epist. ad Patres Synodi Carthaginensis & Milevitane. S. Zosimus in Epistola tractoria ad Episcopos totius orbis, cujus fragmentum exstat apud S. Augustinum Epist. CXC. ad Optatum, Cap. VI. Num. XXIII. & apud S. Prosperum Lib. contra Collatorem, Cap. V. Num. XV. S. Cælestinus in Epist. ad Episcopos Galliarum. S. Leo M. Epist. LXXXVI. ad Nicetam Aquilejensem. S. Gregorius M. Lib. VII. Epist. LIII. ad Secundinum. Idem error damnatus est a Palæstina Synodo Episcoporum XIV. Diospoli, in qua errores suos voce tenus execratus est Pelagius, a Carthaginensi Episcoporum LXVIII. A. 416. Præsidente Aurelio Carthaginensi Episcopo, a Milevitana LXI. Episcoporum, a CPolitana sub Attico, ab Antiochena sub Theodoto ejusdem Urbis Episcopo, a Carthaginensi plenaria sub Aurelio CCXVII. Episcoporum A. 418. ab Ephesina Oecumenica A. 431, a Toletana VI. Can. I. Arausicana II. Canone II. quem iisdem fere verbis innovavit Tridentina Synodus Sess. V. Can. II. *Si quis Adæ prævaricationem sibi soli, & non ejus propagini asserit nocuisse, & acceptam a Deo sanctitatem & justitiam quam perdidit, sibi soli, & non nobis etiam eum perdidisse, aut inquinatum illum per inobe-*

inobedientiæ peccatum, mortem & pœnas corporis tantum in omne genus humanum transfudisse, non autem & peccatum, quod mors est animæ, anathema sit: cum contradicat Apostolo dicenti: *Per unum hominem peccatum intravit in mundum, & per peccatum mors; & ita in omnes homines mors pertransiit, in quo omnes peccaverunt.* Vide Joannis Garnerii Dissertationem II. de Synodis habitis in causa Pelagianorum, vivente S. Augustino.

6. Prob. IV. Ratione Theologica, eaque multiplici. Ima petitur ex morte Christi pro omnibus obita. Christus Redemptor est & Salvator omnium hominum, etiam parvulorum. I. ad Timoth. Cap. II. *Dedit semetipsum redemptionem pro omnibus.* Ad Rom. Cap. VIII. *Pro omnibus tradidit illum.* I. ad Timoth. Cap. IV. *Qui est Salvator omnium hominum.* I. Joan. Cap. II. *Ipse est propitiatio pro peccatis nostris, non pro nostris autem tantum, sed etiam pro totius mundi.* Ergo omnes, etiam parvuli, erant mortui. Ergo omnes peccato erant infecti, cui soli adscribi potest mors animæ. Atqui parvuli non sunt maculati peccato personali. Ergo Originali. Hinc recte ait S. Augustinus Lib. I. de peccat. meritis & remis. Cap. XXIII. *Quis audeat dicere, non esse Christum infantium salvatorem, nec redemptorem? Unde autem salvos facit, si nulla in eis est originalis ægritudo peccati? Unde redimit, si non sunt per originem primi hominis venundati sub peccato?*

*Ex morte
Christi pro
omnibus.*

7. IIda petitur ex natura Baptismi. Baptismus ex institutione Christi abluit, abstergit, mundat, remittit, ut patet ex communi baptismi formula tum parvulis tum adultis adhibita, quæ ætate Pelagii erat hujusmodi: *Ego te baptizo in remissionem peccatorum, in nomine Patris, & Filii, & Spiritus Sancti, Amen.* Ergo parvuli dum baptizantur, liberantur a peccatis. Atqui non liberantur ab actualibus, quæ cadere nequeunt in parvulos rationis usu carentes. Ergo ab originali; alias mentiretur Ecclesia parvulos in remissionem peccatorum baptizando. Pelagiani ut ab his difficultatibus laqueis sese expedirent, ajebant, in remissionem peccato-

*Ex natura
Baptismi.*

catorum baptizandos esse infantes, non quod expiandi sint in baptismo peccato originis, quod nullum esset; sed, ne immutando cum parvulis baptismi formulam, & reticendo cum illis peccatorum remissionem, quæ cum adultis exprimitur, diversa baptismatis genera, unum pro parvulis, alterum pro adultis, non servata eadem cum utrisque baptismi formula, statui viderentur. Contra Pelagiana hæc subterfugia exstat Canon II. Concilii Africæ plenarii Carthagine habiti A. 418. qui est hujusmodi: *Placuit, ut quicumque parvulos recentes ob uteris matrum baptizandos negat: aut dicit, in remissionem quidem peccatorum eos baptizari, sed nihil ex Adam trahere originalis peccati, quod lavacro regenerationis expiatur; unde sit consequens, ut in eis forma baptismatis in remissionem peccatorum, non vera, sed falsa intelligatur; anathema sit.*

Atque ejusdem necessitate.

8. III^{ta} desumitur ex necessitate Baptismi. Omnes, parvuli æque ac adulti, indigent baptismo, ut ad Regnum Cælorum, & vitam beatam perveniant, juxta illud Joan. Cap. III. *Nisi quis renatus fuerit ex aqua & Spiritu Sancto, non potest introire in regnum Dei.* Ergo parvuli ante baptismum obnoxii sunt peccato, quod ipsos ab æterna vita excludit. Atqui obnoxii non sunt peccato personali. Ergo Originali. P. C. Nemo in hac providentia ab æterna vita ac regno Dei excluditur, atque æternæ damnationi addicitur, nisi ob solum peccatum, cujus stipendium juxta Apostolum est mors corporis & animæ. Ergo cum parvuli absque baptismo decedentes excludantur a regno Dei, eos peccato infectos esse oportet. Reponebant Pelagiani, parvulos baptizari, non ut peccatum aliquod ipsis remitteretur, aut ut æternam vitam consequerentur, ipsis etiam absque baptismo aliunde debitam; sed ut regnum ingrederentur cælorum, solis baptizatis promissum. Verum si Pelagiani per vitam æternam, parvulis aliunde debitam, felicitatem supernaturalem, claræque Dei visionem extra cælum intelligebant, oppido fallébantur. Ut enim S. Augustinus scribit Serm. CCXCIV. alias XIV. de verbis Apostoli, Cap.

III. *Hic error aversandus ab auribus, exstirpandus a mentibus. Hoc novum in Ecclesia, prius inauditum est, esse vitam æternam præter regnum cælorum, esse salutem æternam præter regnum Dei. Quod si vero de naturali quadam beatitudine loquebantur, æterna mors magis quam vita compellari debuisset; eo quod naturalis illa beatitudo intuitivam Dei visioem, atque amorem supernaturalem excluderet, in quibus vita beatæ animæ consistit.*

9. IV^{ta} petitur ex cæremoniis Baptismi. Universa *Ac cære-*
Ecclesia Dei, jam inde ab antiquissimis ac primis temporibus, exorcismum & exsufflationem adhibuit in baptismo parvulorum æque ac adultorum, quibus immundus Spiritus a baptizandis abigitur, ut docent S. Cælestinus in Epist. I. ad Episcopos Galliarum Cap. XII. S. Augustinus Lib. VI. contra Julianum, Cap. II. & Lib. II. de peccato Originali Cap. XL. Ergo Ecclesia sensit, parvulos ante baptismum peccato inquinatos esse, ideoque dæmonis potestati subdi; non enim servi dæmonum efficimur, nisi per peccatum. Hinc S. Augustinus Lib. II. Operis imperfecti, Num. CLXXXI. scribit: *Propter hoc Et infantes cum baptizantur, eruantur de potestate tenebrarum: alioquin cum magna injuria Dei, sicut jam diximus, Et sæpe dicendum est, exorcizatur Et exsufflatur imago Dei, si non ibi ille exorcizatur, Et exsufflatur princeps mundi, qui mittitur foras, ut sit illic habitatio Spiritus Sancti.* Ergo juxta perpetuum & constantem Ecclesiæ universæ sensum parvuli nascuntur originali peccato infecti.

10. Quæres I. An originale peccatum veram ac propriam peccati rationem habeat? R. Quamvis originale peccatum nobis non sit voluntarium voluntate physica & personali, sed tantum morali, propriam tamen & veram habet rationem peccati; non personalis, sed in genere ipectati. Hinc Tridentinum Sess. V. Can. V. ait: *Siquis per Jesu Christi Domini nostri gratiam, quæ in Baptismate confertur, reatum originalis peccati remitti negat; aut etiam asserit non tolli totum id, quod*

*Originale
peccatum
veram habet
rationem
peccati.*

quod veram & propriam peccati rationem habet: sed illud dicit tantum radi, aut non imputari; anathema sit. Quo loco Concilium etsi non directe definiat, peccatum Originale veram & propriam habere rationem peccati, id tamen tamquam certum & indubitatum supponit.

*Unicuique
ex posteris
Adæ est
proprium.*

11. Quæres II. An originale peccatum unicuique ex posteris Adæ sit proprium? R. affirmative. Tridentinum enim Sess. V. Can. III. asserit, originale peccatum *inesse unicuique proprium*. Et Sess. VI. Cap. III. docet, homines, *dum concipiuntur, propriam injustitiam contrahere*. Et sicuti error est asserere nos esse justos, non justitia nobis propria & inhærente, sed justitia unius Christi: ita etiam error est asserere, infantes esse injustos seu peccatores, non peccato unicuique proprio & inhærente, sed peccato unius Adæ; eo quod *peccare* simpliciter denotet actuale peccatum, quod nullum fuit in parvulis, sed solum in Adamo. Hinc male propterea apud Catholicos vapulant Albertus Pighius, & Ambrosius Catharinus, qui opinabantur, peccatum originis esse illud unum unius Adæ peccatum, quod ille libera voluntate commisit, cujus reatu constringantur ejus posterii, indeque peccatores denominentur.

*Ac per
naturalem
generatio-
nem in sin-
gulos deri-
vatur.*

12. Quæres III. An peccatum Originale per naturalem generationem in singulos posteros derivetur, etiam filios fidelium? R. contra Zwinglium, Calvinum, Bucerum, Vermilium, Bullingerum &c. affirmative, excepta tamen B. Virgine Maria, quæ per speciale privilegium, ut Controversia IV. ostendemus, ab originali noxa præservata est, quamvis per naturalem generationem originem duxerit ab Adamo. Prob. asseritio I^{mo}. Authoritate Scripturarum. David filius hominis fidelis & justus Psal. L. ait: *Ecce enim in iniquitatibus conceptus sum, & in peccatis concepit me mater mea*. Paulus de genere Israël ex Tribu Benjamin, scribit ad Ephes. Cap. II. *Et eramus natura filii iræ, sicut & cæteri*. II. Authoritate Patrum, S. Cypriani Epist. LIX. ad Fidum, S. Ambrosii in Apologia David, S. Hieronymi in Epist. ad Latam, S. Augustini Lib. II. de

de peccato originali, Cap. XL. Lib. I. de Nuptiis & concupisc. Cap. XVIII. XIX. XX. Lib. VI. contra Julianum, Cap. II. & III. III^{io}. Authoritate Concilii Milevitani Can. II. S. Siricii Epist. I. ad Himerium, atque ipsius Ecclesiæ Catholicæ, quæ semper maxime cavit, ne fidelium filii absque baptismo decederent. Aliud dicendum est de Christo, qui, quamvis verus homo fuerit, originis tamen noxam contrahere non potuit in sui conceptione: quippe qui non ex maritali congressu, sed ex sola Virgine matre, virtute Spiritus Sancti, conceptus est.

13. Quæres IV. An alia peccata Adami, præter illud inobedientiæ, aut etiam parentum in filios & nepotes ipsorum deriventur? R. negative. Ratio est, quia nulli ex parentibus, sed soli Adæ in terrestri paradiso commissæ fuit a Deo justitia & sanctitas in posteris transfundenda. Et quamvis S. Augustinus in Enchiridio, Cap. XLVI. scribat: *Parentum quoque peccatis parvulos obligari, non solum primorum hominum, sed etiam suorum, de quibus ipsi nati sunt, non improbabiler dicitur*: Idemque asseruerint S. Leo M. Epist. LXXXVI. ad Nicetam, & S. Gregorius M. Lib. XV. Moralium, Cap. XXII; intelligendum id tamen est non de contagione culpæ, sed de communicatione pœnæ, cum citent verba illa Exodi XX. *Qui reddis peccata patrum in filios in tertiam & quartam generationem*. Et Apostolus sæpe diserte testetur, unum, Adæ nimirum, fuisse delictum, quod omnes homines perdidit: *Unius delicto multi mortui sunt. Unius delicto mors regnavit. Per inobedientiam unius hominis peccatores constituti sunt multi*. Idem summa consensione SS. PP. testantur, S. Irenæus Lib. V. adv. Hær. Cap. XVII. S. Cyprianus Epist. LIX. ad Fidum. S. Chrysost. Hom. XL. in I. ad Cor. S. Hieronymus Lib. III. adversus Pelagianos &c.

14. Quæres V. Quandonam peccatum originale in prolem transfundatur? R. Originale peccatum actu & formaliter in prolem transfundi eo temporis momento, quo anima rationalis corpori unitur. Sola enim creatura rationalis capax est peccati, seu personalis,

Non tamen alia Adami aut parentum peccata.

Transfunditur, quando anima rationalis corpori unitur.

feu originalis; sicuti sola illa capax est gratiæ sanctificantis, in cujus privatione consistit peccatum originale, ut suo loco dicetur. Cæterum etsi originale peccatum proprio jure ad animam pertineat, non ad corpus, nihilo tamen minus totus homo dicitur peccator: quemadmodum licet cæcitas non sit nisi in solo oculo, & surditas nisi in aure, homo tamen dicitur cæcus, vel surdus.

Argumenta contraria refutantur.

Pelagianis neque Scripturarum, 15. Objicitur I. Autoritas Scripturarum. Ezechielis Cap. XVIII. dicitur: *Filius non portabit iniquitatem patris.* Ergo non datur peccatum originale. II^{do}. II. ad Cor. Cap. V. ait Apostolus: *Omnes nos manifestari oportet ante tribunal Christi, ut referat unusquisque propria corporis, prout gessit, sive bonum, sive malum.* Ergo cum nullus puniatur, nisi ob delicta personalia, commentitia est noxa originalis. III. Ad Rom. Cap. IV. v. 15. dicitur: *Ubi enim non est lex, nec prævaricatio.* Atqui parvuli non acceperunt legem. Ergo nulla est in eis prævaricatio, nullum peccatum. R. I. D. A. Si parvuli per novam generationem, id est, per lavacrum baptismi transferantur ab illo patre ad alium, a primo ad secundum Adam, quod teste Augustino Lib. VI. contra Julianum, Cap. XXV. ibi vaticinatur Ezechiel, C. A. Secus, N. A. R. II. C. A. N. C, aut potius suppositum, quod parvuli absque baptismo decedentes alienam portent iniquitatem. Peccatum enim originale, quamvis ab Adamo sit, non est tamen solius Adami peccatum, sed nostrum etiam, unicuique proprium & intrinsecum. Ad II. R. I. Ergo parvuli, post baptismum decedentes, nullum præmium recipient, nec vita æterna donabuntur, eoquod bonum non gesserint in proprio corpore? R. II. Apostolum vel de solis adultis loqui, vel si etiam de parvulis, eos sine baptismo decedentes æterna felicitate privandos propter peccatum ipsis proprium, aliena tamen voluntate commissum; sicuti infantes baptizati æternam gloriam refe-

referunt propter meritum fidei, quam per Ecclesiam exercent. Ad III. D. m. Non acceperunt legem, quam voluntate physice propria transgressi sunt, C. m. Voluntate physice aliena, nempe Adami, moraliter tamen propria, N. m. Parvuli legem divinam transgressi sunt; non quidem per voluntatem malam physice propriam, sed per voluntatem Adami, quæ & ipsorum fuit moraliter.

16. Dices I. Apostolus ad Rom. Cap. V. v. 19. scribit: *Sicut per unius hominis inobedientiam peccatores constituti sunt multi &c.* Ergo peccatum Adami intravit in mundum, non propagatione, sed tantum imitatione. P. C. Si ob Adami inobedientiam homines propagatione constituerentur peccatores, Apostolus non dixisset *multi*, sed *omnes*. Ergo. *Confirm.* I. Si peccatum intrasset in mundum per generationem, Paulus non dixisset, *per unum hominem*, sed per duos homines; cum generatio duos requirat. *Confirm.* II. Verba Apostoli ad Rom. Cap. V. v. 12. *In quo (Adamo) omnes peccaverunt*, mendose reddita sunt, cum in Græco textu dicatur, *quatenus*, vel *eoquod omnes peccaverunt*. Ergo ruit primum fundamentum nostræ assertionis. R. C. A. N. C. Ad probat. N. A. In Scripturis sæpe omnes dicuntur multi. v. g. Genes. Cap. XVII. *Patrem multarum gentium posui te*; cum tamen Cap. XXII. dicatur: *In semine tuo benedicentur omnes gentes*. Matth. Cap. XXVI. *Hic est enim sanguis meus novi testamenti, qui pro multis effundetur in remissionem peccatorum*. Apostolus vero I. ad Timoth. Cap. II. ait: *Qui dedit semetipsum redemptionem pro omnibus*. Præterea Apostolus in eodem Capite utrumque dixit, & multos, & omnes. v. 12. *Et ita in omnes homines mors pertransiit, in quo omnes peccaverunt*. v. 18. *Igitur sicut per unius delictum in omnes homines in condemnationem &c.* Et II. ad Cor. Cap. V. *Quoniam si unus pro omnibus mortuus est, ergo omnes mortui sunt: Et pro omnibus mortuus est Christus*. Cæterum quod peccatum non imitatione, sed propagatione per unum hominem in hunc mundum intraverit,

probat ex proposito Apostoli. Hic enim tota Epistola ad Romanos ostendit, omnes homines, tam Judæos quam Gentiles, vocatos esse ad Evangelium absque ullis præcedentibus meritis; idque probat ex eo, quia nullus hominum inveniri potest, qui peccatum non habeat ad se ex prima origine derivatum, quique Adamo peccante non peccaverit; nullumque superesse remedium, nisi in fide & baptismo per gratiam Jesu Christi. Ad I. *confirm.* N. A. Præterquam enim, quod vir & mulier, per matrimonium conjuncti, non duo sint sed una caro, Apostolus dicit *per unum hominem*, quia primaria causa peccati Originalis non Eva, sed Adamus fuit, cui soli commissa fuit justitia in posteros traducenda. Ad II^{dam} *confirm.* R. I. N. A. S. Chrysostomus, Theophylactus, Oecumenius, græcæ linguæ peritissimi, diserte explicant *in quo Adamo*. Similiter exposuisse S. Hilarium Pictaviensem testatur S. Augustinus Lib. IV. contra duas Epistolas Pelagianorum, Cap. IV. R. II^{do}. N. C. Sive enim, *in quo*, vel *quatenus* legatur, probationis robur non infringitur. Apostolus enim l. c. dicit omnes homines, etiam parvulos, morti esse obnoxios, eoquod omnes peccaverint, cum mors sit stipendium peccati. Ergo cum parvuli sæpe in ipsa infantia moriantur, peccato aliquo maculantur; non personali: ergo originali.

17. Dices II. Ad Rom. Cap. V. v. 15. scribit Apostolus: *Sed non sicut delictum, ita & donum. Si enim unius delicto multi mortui sunt: multo magis gratia Dei & donum in gratia unius hominis Jesu Christi in plures abundavit.* Ergo Apostolus non loquitur de peccato, quod per generationem, sed per imitationem in posteros transfunditur. P. C. Apostolus ait plures fuisse, qui gratiam Christi receperunt, quam qui mortui sunt per Adæ peccatum. Ergo juxta Apostolum non datur peccatum per generationem in omnes posteros transfusum. R. C. A. N. C. Ad *probat.* N. A. Verba illa, *multo magis in plures*, non significant excessum justorum ultra peccatores, ut manifeste colligitur ex textu Græco, quo hæc Epistola a B. Paulo conscripta est, ubi legi-

tur

tur πολλοις, five in multos; sed multitudinem donorum ac bonorum, quæ hominibus per gratiam Christi collata sunt. Sensus itaque citati textus est iste: Non sicut delictum, ita & donum est: Nec sicut Adam uno peccato omnes perdidit, ita & redemptio Christi, quibus fuerit applicata, ab uno solo peccato liberat; sed a multis, quæ Adami posterius addiderunt primi parentis peccato: id est, Gratia Christi non ab originali tantum, verum etiam a personalibus noxis eos liberat.

18. Dices III. Ad Rom. Cap. V. v. 14. ait Apostolus: *Regnavit mors ab Adam usque ad Moysen etiam in eos, qui non peccaverunt in similitudinem prævaricationis Adæ.* Ergo sola mors corporis, non autem peccatum ab Adamo trahitur. R. C. A. N. C. Apostolus enim, ut probaret etiam ante legem Mosaicam fuisse in mundo peccatum originale, quamvis homines solo lumine naturæ instructi, & fide ac doctrina Legis destituti non existimarent se illi obnoxios esse, ait mortem sævisse in omnes Adami posteros, quamvis propria voluntate, & cum clara cognitione peccati non peccaverint sicut Adam; quia nimirum illo etiam tempore viguit in mundo peccatum originale, cui omnes obnoxios fuisse certo constat, & colligitur ex effectu & pœna ejusdem peccati, nempe ex morte. Ex quo patet, textu citato comprobari ab Apostolo, non fuisse originariam noxam.

19. Dices IV. I. ad Cor. Cap. VII. v. 14. scribit Apostolus: *Sanctificatus est enim vir infidelis per mulierem fidelem, & sanctificata est mulier infidelis per virum fidelem: alioquin filii vestri immundi essent, nunc autem Sancti sunt.* Ergo saltem fidelium filii originale peccatum non contrahunt. R. C. A. N. C. Apostolus non loquitur ibi de vera, intrinseca, & supernaturali sanctitate, sed solum de improprie dicta, extrinseca, & civili, quali sanctitate ad Rom. Cap. XI. v. 16. dixit totam massam populi Israëlitiæ esse Sanctam. Ait itaque Apostolus, virum infidelem per mulierem fidelem sanctificari, morali quadam denominatione, & quasi aspergine extrinsecæ sanctitatis, partim quia maritus est fide-

lis conjugis, & una caro cum illa: partim quia non impediendo illam in sua fide & religione, sed benevole cum ipsa vivendo, quasi viam sternit sibi ad veram sanctitatem, ut scilicet per preces, merita, monita, & exempla fidelis conjugis paulatim etiam ipse convertatur, & Sanctus fiat. Atque idcirco filios ex hoc matrimonio susceptos Sanctos vocat, id est, mundos & legitimos, qui Matris industria facile possunt baptizari, in fide instrui, atque ita vere sanctificari.

*Neque
Chrysostomi.*

20. *Objic. II. Autoritate S. Chrysostomi. S. Doctor Hom. XVII. in I. ad Cor. scribit: Quid igitur faciam, inquis, propter illum (Adamum) perego? Minime propter illum. Neque enim tu sine peccato permansisti, quod si non idem peccatum, tamen aliud commisisti. Et Hom. XXIV. in Epistolam ad Ephesios: Corruptibile nobis corpus, sed incorruptibilis anima. Ne igitur & ipsam corrumpamus. Hoc primum primi hominis peccatum fecit; quod autem post lavacrum fit, etiam animam corrumpere potest. Ergo S. Chrysostomus docuit ex peccato Adami trahi quidem mortem corporis, non autem animæ. R. I. cum S. Augustino Lib. I. contra Julianum, Cap. VI. Ita ne ista verba Sancti Joannis Episcopi audes tamquam e contrario tot taliumque sententiis Collegarum ejus opponere, eumque ab illorum concordissima societate sejungere, & eis adversarium constituere? Absit, absit hoc malum de tanto viro credere aut dicere. Absit, inquam, ut CPolitanus Joannes de baptismo parvulorum, eorumque a paterno chirographo liberatione per Christum, tot ac tantis coepiscopis suis, maximeque Romano Innocentio, Carthaginensi Cypriano, Cappadoci Basilio, Nazianzeno Gregorio, Gallo Hilario, Mediolanensi resistat Ambrosio -- Hoc sensit, hoc credidit, hoc didicit, hoc docuit & Joannes. Vera dixisse Augustinum liquet ex Hom. X. in Epist. ad Rom. in qua S. Chrysostomus scribit: Liquet, quod non ipsum peccatum, quod a legis transgressione ortum est, sed illud quod ab Adam inobedientia, ipsum illud, inquam, peccatum erat, quod omnia perdebat. Et quenam rei hujus probatio fuerit? Nempe quod homines ante legem interirent. Hom.*

IV.

IV. in I. ad Corinth. *Deus in regenerationis lavacro mentem gratia tangit, radicale peccatum evellit.* Et in Epistola ad Olympiam. *Quando Adam peccavit, illud grave peccatum omne genus hominum in commune damnavit.* R. II. S. Chrysostomum utroque loco sermonem habere de jam baptizatis, qui, cum jam in baptismo abluti fuerint a sordibus originariæ noxæ, damnationis causam frustra in Adamum rejiciunt; non alterius, nisi propriæ voluntatis vitio damnandi, nec animam morte peccati corrupturi, si baptismalem gratiam diligenter conservent.

21. Neque majus Catholicis negotium facefsunt alii textus S. Chrysostomi, quibus Pelagiani evincere conabantur, rejectum fuisse ab illo originale peccatum. Sic Hom. XXXIX. in I. ad Cor. loquitur S. Chrysostomus de morte peccati non qualicunque, sed irreparabili, atque peccatum Adami & posterorum ejus non esse irreparabile, sicut peccatum Angelorum: mortem quidem, quæ a peccato Adami ortum suum habuit, ineluctabilem esse, ac vitari non posse; at non ita peccatum, cum Noe, Abraham, & Job in Scripturis justi prædicentur. In Homilia ad Neophytos negat infantes inquinatos esse peccato, nimirum personali, seu actuali; refellit enim ibi S. Doctor exemplo parvulorum baptizatorum eos, qui dicebant in Baptismo condonari solum peccata personalia per condonationem extrinsecam, sine infusione gratiæ sanctificantis. Denique Hom. X. in Epist. ad Rom. significare vult S. Chrysostomus, per unius personalem inobedientiam non posse alios constitui actu & personaliter peccatores; minime autem negat, sed potius diserte asserit, posse alios constitui per alienam inobedientiam habitualiter peccatores, id est, dignos odio Dei, & pœnæ æternæ obnoxios, ut patet consideranti locum illum superiori numero laudatum.

22. Objic. III. *Authoritas aliorum Patrum. Clemens Alexandrinus Lib. III. Stromatum ait: Dicant ergo nobis, ubi fornicatus est infans natus, vel quomodo sub Adæ cecidit execrationem, qui nihil operatus est?* Neque aliorum Patrum auctoritas suffragatur.

II.



II. Tertullianus Lib. de Baptismo, Cap. XVIII. *Veniant ergo (parvuli ad baptismum) dum adolescunt; veniant dum discunt, dum quo veniant docentur; fiant Christiani, cum Christum nosse potuerint. Quid festinat innocens ætas ad remissionem peccatorum?* III. Origenes Lib. V. Commentar. in Epistolam ad Rom. scribit, mundum, in quem Apostolus ait peccatum intrasse, esse terrenos & carnales homines, ac mortem peccati per imitationem, non per propagationem in omnes homines grafsatam esse. IV. S. Gregorius Nyssenus in Oratione de infantibus præmatura morte abreptis exclamat: *O altitudo! puellulus infans, simplex, omnis malitiæ expers, sanctitate, quæ per purgationem contingit, non indigens.* V. Theodoretus, præterquam quod in Libris hæreticarum fabularum non meminerit eorum, qui originale peccatum negarunt, Commentario in Cap. V. Epistolæ ad Rom. scribit: *Non enim propter primi hominis peccatum, sed propter suum unusquisque mortis decretum suscipit.* Ergo. Ad I. respondet Bel-larminus Lib. IV. de Amissione gratiæ, Cap. IX. citatis verbis probabilius contineri objectionem Julii Casiani hæretici, qui generationem malam esse docebat, atque idcirco nuptias damnabat. Contra Natalis Alexander Dissertat. VIII. in Hist. Eccles. Sæculi II. censet, Clementem Alexandrinum quæstionem de peccato originali ibi non attingere, sed agere dumtaxat contra hæreticos, qui liberorum procreationem esse execrationem effutiebant. Negat autem Clemens infantes cadere sub Adami execrationem ob id quod generatio mala sit & peccatum, non autem ob id quod peccatum originale non contrahatur ab illis. Unde fate-tur quidem conceptum infantem in peccatis; sed negat ipsum in peccato esse, id est, conceptum esse per actionem, quæ peccatum sit, aut, ut Basilidiani asse-rebant, qui animas ante corpora creatas fuisse doce-bant, in illa anteriori vita actuali peccato maculatum esse, quod in suum deinde corpus intulerit. Caterum quod Clemens Alexandrinus originale peccatum admi-serit, patet tum ex silentio Pelagianorum, qui eum

num-

numquam adduxere testem & patronum sui erroris; tum ex testimonio S. Athanasii, qui dogma istud in Ecclesia Alexandrina receptum fuisse testatur; & ipsius Clementis verbis, qui Lib. I. Pædagogi, Cap. VI. de Baptismo scribit: *Tincti illuminamur: illuminati in filios adoptamur; adoptati perficimur; perfecti immortales reddimur. Multis autem modis vocatur hoc opus, Gratia, illuminatio, perfectio, & lavacrum. Lavacrum quidem, per quod peccata abstergimus, gratia autem, qua remittuntur pœnæ, quæ peccatis debentur.* Ad II. R. a Tertulliano parvulos vocari *innocentes*, eoquod peccato careant personali, quamvis originali sint inquinati. Putabat autem Tertullianus baptismum parvulorum, citra mortis periculum, ad adultiorem ætatem differendum esse, ut tunc majori cum fructu reciperetur: quem errorem jam Sæculo III. in Africano Concilio, ut ipse S. Cyprianus Epist. LIX. ad Fidum testatur, Ecclesia damnavit, Sæculo autem XVI. ab inferis iterum excitavit Anabaptistæ. Ad III. R. I. Origenem non litteraliter, sed allegorice, quod ipsi familiare est, Apostolum ibi interpretari. R. II. Origenis a V. Synodo damnati auctoritatem, hac præcipue in re, exigui esse momenti; cum teste S. Hieronymo Pelagii doctrina Origenis ramusculus fuerit. Non desunt quidem viri eruditi, qui Origenem hac in re Catholice sensisse autumant; ea tamen sunt Origenis principia, quæ Originalis noxæ existentiam haud modice labefactare videntur. Nam ad hujus vitæ misérias, citra divinæ justitiæ, fidelitatis ac bonitatis reprehensionem admittendas, non ad originis demerita cum Catholica Ecclesia recurrit; sed in alia superiori vita homines peccasse fingit, quorum postea criminum animæ in corpora, tamquam ergastula, recens detrusæ merito pœnas darent. Vide Card. Norisium Hist. Pelag. Lib. I. Cap. I. Ad IV. R. S. Gregorium Nyssenum loqui de infantibus jam baptizatis, qui ab originaria noxa mundati peccatorum personali-um capaces non sunt. Ad V. R. Quacunque demum de causa Theodoretus hæresis Pelagianæ non meminerit, Catholicam tamen de peccato originis sententiam

in

in suis libris propugnavit. In Epitome enim divinarum Decretorum, Cap. XII. hæc scribit: *Superat benignitatis munificentia justitiam.* Justitia namque decretum cum unus peccasset, universum genus morti tradidit: divina autem misericordia, cum omnes homines essent sub maledicto, & peccati laqueis essent irretiti, per unius justitiam dedit omnibus salutem. Neque obstat textus in objectione allatus, si quidem is ex asse Catholicus est. Homines enim non propter primi parentis peccatum extrinsecus dumtaxat imputatum; sed propter suum, id est, propter peccatum ab Adamo traductum, quod carnali propagatione unius cujusque proprium evadit, mortis decreto subjacere asserit Theodoretus. Cum itaque l. c. & peccatum, & mortis debitum ab Adamo ad totum genus humanum pervasisse asserat, & in omnes homines mortem pertransiisse, quatenus omnes peccaverunt, peccatum originale agnovit, admisitque. Quæ hic ex facto Zosimi Romani Pontificis in causa Cælestii objici possent, solvimus Tractatu III. de Ecclesia, Articulo III. Controversia VII. Num. 444.

*Frustra
rationem.*

23. Objic. IV. Ratio. Omne peccatum debet esse voluntarium. Atqui originaria noxa homini recens generato non est voluntaria. Ergo originaria noxa non est verum peccatum. P. m. Parvuli recens nati carent rationis usu. Ergo peccatum illis non est voluntarium. *Confirm.* Omne peccatum est factum, dictum, vel concupitum contra legem Dei. Atqui infantes recens nati nec facere, nec dicere, nec concupiscere aliquid possunt contra legem Dei. Ergo. R. D. M. Omne peccatum personale, seu actuale debet esse voluntarium, C. M. Originale, subdist. Debet esse voluntarium voluntate physice propria, N. M. Moraliter tantum propria, & physice aliena, C. M. & D. m. Originaria noxa non est recens generato voluntaria, voluntate physice propria, C. m. Moraliter propria, N. m. *Ad prob.* C. A. D. C. ut prius. Voluntarium ad rationem actionis malæ necessario requiritur, non autem ad rationem reatus, seu maculæ: Qui enim actionem malam voluntate libera posuit, reatum & maculam, nolens etiam, pec-

peccando contrahit. Jam vero in infantibus recens natis non datur actio mala, quia peccato personali seu actuali carent; sed solus reatus sive macula, eos Deo exosos reddens, & a consecutione beatitudinis impediens tamquam filios adulterinos ob inobedientiam primi parentis, quæ secundum moralem æstimationem fuit etiam inobedientia posterorum. Ergo non requiritur, ut peccatum originale sit voluntarium nobis voluntate physice propria. *Ad confirm.* C. M. D. m. ut prius. Infantes recens nati non possunt dicere, facere, aut concupiscere aliquid contra legem Dei, voluntate physice propria, C. m. Moraliter propria, & physice aliena, N. m.

24. Dices I. Parvuli non potuerunt vere ac proprie peccare in Adamo. Ergo. P. A. Quando Adamus divinum violavit præceptum, posteri illius nondum existebant. Ergo peccare non potuerunt Adamo peccante. *Confirm.* Nullum traxere peccatum ab Eva omnium matre. Ergo neque ab Adamo omnium patre. R. N. A. Apostolus ad Rom. Cap. V. scribit: *In quo omnes peccaverunt*, quia nimirum continebantur in Adamo tamquam in capite morali, & persona illos representante, vi decreti divini quoad violationem vel observationem solius præcepti de non comedendo fructu arboris scientiæ boni & mali. *Ad probat.* D. A. Posteriores nondum existebant physice, & secundum suam entitatem, C. A. Moraliter, N. A. Adamus, licet unus in se, moraliter erat omnis homo per naturalem generationem ex ejus lumbis proditurus, quia omnes homines representabat in ordine ad observationem mandati divini. *Ad confirm.* C. A. N. C. Solus Adamus, non autem Eva, constitutus a Deo fuit tamquam caput morale omnium hominum in ordine ad observationem mandati divini de non comedendo fructu. Hinc sola Adamus voluntas fuit etiam moraliter voluntas posterorum. Et quamquam Ecclesiastici Cap. XXV. dicatur: *A muliere initium factum est peccati, & per illam omnes morimur*: id tamen intelligendum est de causa impulsiva

tantum, quia Eva suadendo Adamum impulit in peccatum, quo peccante omnes peccavimus.

25. Dices II. Peccatum, ab Adamo commissum, fuit ei condonatum priusquam filios gigneret, juxta illud Sapientiae Cap. X. *Hæc (Sapientia) illum, qui primus formatus est a Deo pater orbis terrarum, cum solus esset creatus, custodivit. Et eduxit illum a delicto suo.* Ergo non potuit peccatum transfundi in posteros. Idem a fortiori dici potest de parentibus jam baptizatis. P. C. Nemo potest communicare quod non habet. Ergo cum parentes baptizati non amplius sint inquinati peccato originali, non possunt illud in prolem transfundere. *Confirm.* Si per naturalem generationem parentum transfunderetur, deberet censeri vitium naturale. Atqui hoc dici nequit. P. m. Si vitium foret naturale, tunc Deo adscribi posset omnium naturalium rerum authori. Ergo. R. D. A. Fuit ei condonatum, ut erat peccatum Adami personale, C. A. Ut erat peccatum posterorum, N. A. & Consec. Peccatum, quod commisit Adam tamquam caput morale totius humani generis, fuit quidem physice unum, sed tamen moraliter multiplex, pro numero hominum qui ab Adamo per viam naturalis generationis erant prodituri. Condonari igitur potuit, prout peccatum est unius hominis, & personale, quin condonatum fuerit, ut erat peccatum omnium posterorum. *Ad probat.* D. A. Nemo potest communicare tamquam vera causa, quod non habet, C. A. Tamquam conditio sine qua non, N. A. & Consec. Vera causa peccati originalis est voluntas Adami, prout erat etiam moraliter nostra; parentes vero non sunt vera illius causa & origo, sed tantum conditio sine qua non, instrumenta ac veluti canales, per quos peccatum a primo parente transmittitur: ac per generationem efficiunt, ut filii ipsorum censeantur esse membra generis humani, quæ in Adamo tamquam in principio continentur. Ex quo patet, posse a parentibus, etiam baptizatis, transfundi in filios peccatum originale, quamvis ipsi illo careant. S. Augustinus Sermone CCXCIV. alias XIV. de verbis Apo-

Apostoli, qui est de baptismo parvulorum, Cap. XVI. ait: Quando dicunt (Pelagiani) Si de peccatore peccatores nati sunt, quare non de baptizato jam fidei, cui remissa sunt universa peccata, iusti nascuntur? Cito respondete: Ideo de baptizato non iustus nascitur, quia non eum generat (de Spiritu) unde regeneratus est, sed (de concupiscentia) unde generatus est. --- Miraris quare peccator nascitur de semine iusti: non te delectat mirari, quare oleaster nascatur de semine olivæ? Et Lib. I. de Nuptiis & concupiscentia, Cap. XVIII. Propter hanc ego (concupiscentiam) ut etiam de iustis & legitimis nuptiis filiorum Dei, non filii Dei, sed filii sæculi generentur: quia & ii qui generant, si jam regenerati sunt, non ex hoc generant ex quo filii Dei sunt, sed ex quo adhuc filii sæculi. Accedit, quod peccatum originale non sit res aliqua positiva, quam per se parentes, cum generant, debeant in filiis, tamquam causæ principales producere; sed res sit negativa, privatio nempe iustitiæ originalis, ut Controversia II. explicabimus: atque eatenus solum parentes originale peccatum in filios transfundant, quatenus generatione efficiunt, ut sint membra illius totius specifici, cuius Adam fuit caput morale. Ad confirm. D. A. Deberet censeri vitium naturale, id est, pars vel proprietas naturæ humanæ, N. A. Quatenus a natiuitate trahitur, & omnibus Adami posteris inest, propter abusum libertatis, nisi quis ex speciali privilegio præservetur, C. A. N. C. Deus naturam condidit bonam; sed de opere Dei quod non habebat culpam, nata est culpa hominis per liberam prævaricationem Adami, qui constitutus erat caput morale omnium hominum. Culpa igitur non Deo, sed abusui libertatis adscribenda est.

26. Dices III. Absque ullo solido fundamento dicitur, Deum in voluntate Adami conclusisse voluntatem omnium posterorum. Ergo. R. N. A. S. Hieronymus hanc Dei ordinationem colligit ex Cap. VI. Osee: *Ipsi autem sicut Adam transgressi sunt pactum, ibi prævaricati sunt in me.* S. Augustinus vero Lib. XVI. de

de Civit. Dei, Cap. XXVII. ex illo Genesis Cap. XVI. v. 14. *Marcus, cujus præputii caro circumcisa non fuerit, delebitur anima illa de populo suo: quia pactum meum irritum fecit.* Cæterum a posteriori luculentius id evincitur. Hoc ipso enim, quod Deus nobis sufficienter revelaverit, omnes posteros in Adamo peccasse, sufficienter declaravit; in voluntate Adami conclusam fuisse omnium posterorum voluntatem; cum alio modo explicari nequeat originaria noxa in omnes posteros transfusa. Deus itaque independenter a consensu Adami, cum id commendare magis videatur supremum Creatoris in creaturas omnes dominium, justitiam originalem, tamquam donum totius naturæ humanæ, in Adamo reposuit, ea lege, ut voluntas ipsius habenda esset pro voluntate posterorum, quantum ad observationem vel transgressionem præcepti, ex quo pendebat conservatio vel amissio justitiæ originalis: eo fere modo, quo Magistratus civilis, in ordine ad bonorum dispositionem, alligat voluntatem pupilli voluntati tutoris. Ut autem in re omnium maxima atque gravissima Adamus consultius de suo, totiusque posteritatis statu decerneret, atque a peccando magis detereretur, verisimile est, hanc Dei constitutionem ipsi divinitus patefactam, atque intellexisse, personam se atque sortem omnium futurorum hominum sustinere, maximoque scelere se fore obstricturum, si ut morale omnium caput, & ut persona communis & publica peccato suo totam posteritatem obstringeret.

27. Dices IV. Si Adam nocuisset his qui non peccaverunt, & Christus prodesse debuisset his qui non crediderunt: commune enim malum commune poscebat remedium. Igitur quemadmodum his non profuit Christus, ita illis non nocuit Adam. R. Christus adversus peccatum originis, ejusque præcipuum effectum, instituit remedium, quod de se prodest omnibus. Cum infantes baptisate lustrantur, juvat Christus etiam illos, qui non credunt nisi per fidem parentum: unde quemadmodum per fidem illorum in baptismo purgantur, ita etiam eorum peccato fuerunt contaminati.

Tri-

Tribuitur peccatum nihil committenti, uti fides non respondenti.

28. Dices V. Subjectum peccati est sola anima. Ergo cum anima non generetur a parentibus, sed a solo Deo creetur, per naturalem generationem contrahi non potest peccatum originale. R. C. A. N. C. Originale peccatum licet non in carne, sed in anima propriam sedem habeat, ad contrahendum tamen illud ex Adamo simul cum natura, non opus est ut animæ posterorum ex primi parentis anima propagentur veluti per traducem, sicuti caro propagatur ex carne: sed satis est, ut posterius ipsi, corpore & anima constantes, per veram & naturalem carnis generationem originem trahant ex Adamo. Nam hoc ipso tamquam veri & naturales filii Adæ concipiuntur privati iustitia & sanctitate, quam acceperant in primo parente, & per ipsius prævaricationem amiserunt; ac proinde concipiuntur in peccato originali. Enim vero ut homo vere ac proprie dicatur generari ex homine, & esse proprius ac naturalis filius ipsius, non est necesse animam filii ex patris anima generari; sed satis est quod generetur corpus, æque ponantur in materia dispositiones, quibus positus a Deo tamquam authore naturæ infunditur anima, ex qua simul cum corpore consurgit homo. Augustino equidem propagatio animarum per traducem quandoque magis idonea videbatur ad explicandam hanc Pelagianorum difficultatem de propagatione peccati originalis. Verum, præterquam quod Ecclesiasticum dogma, animas a solo Deo creari, propagatio hæc animarum posterorum ex anima Adami ad explicandam difficultatem illam nihil admodum prodesse videtur. Imò, quia cum Adam Cainum genuit, pœnitentiam de peccato suo jam egerat, ac proinde tunc ejus anima peccato vitata non erat, etsi corpus manserit fomite vitatum. Neque fideles parentes, cum generant filios suos, animam habent peccato originali infectam. II^{do}. Si anima filii ex anima patris, a qua propagatur, originariam noxam contrahit; contrahe-

ret

ret etiam ex illa peccata alia personalia, quibus non raro fordescit, cum filius generetur.

*Sanctita-
tem Matri-
monii.*

29. *Objic. V. Sanctitas Matrimonii.* Si peccatum originale per naturalem generationem propagatur in posteros, Matrimonium non esset Sacramentum, sed impius contractus, ejusque usus graviter foret illicitus. Atqui hoc manifeste falsum est. Ergo. P. M. Matrimonium esset causa peccati. Ergo. P. A. Sine usu conjugii non contraheretur peccatum originale. Ergo matrimonium est illius causa. R. N. M. Originariae noxae vera causa est sola voluntas Adami, ut moraliter nostra. *Ad prob. N. A.* *Ad hujus prob. C. A.* N. C. Ex eo, quod originale peccatum absque usu conjugii non contrahatur, id unum sequitur, matrimonium respectu peccati originalis esse conditionem sine qua non; quia Adamus eos solum repræsentavit, qui ab eo per generationem naturalem erant descenduri. Originale itaque peccatum sequitur ex generatione, non tanquam ex causa, sed mera conditione sine qua non, & quidem mere per accidens; in statu enim innocentiae fuisset usus conjugii, & tamen non fuisset peccatum originale.

30. Dices. Parentes, dum generant prolem, faciunt ut illa sit rea peccati originalis. Ergo tenentur abstinere ab usu conjugii. P. C. Usus conjugii multiplicat peccata, quia homines generantur peccato infecti, atque innumeris malis, aeternae morti atque odio Dei proles obnoxia redditur. Ergo matrimonii usus graviter illicitus foret. R. D. A. Faciunt ut proles sit rea peccati originalis in hoc sensu, ut peccatum actu committat, N. A. Ut peccatum pridem in Adamo commissum contrahat, subdist. Ita ut hoc ipsum sequatur per se ex generatione tanquam ex causa, N. A. Tanquam ex conditione sine qua non, & mere per accidens, C. A. N. C. Proles voluntate moraliter propria, nimirum voluntate Adami, jam dudum peccatum hoc commisit, antequam nasceretur: parentes vero generando prolem efficiunt, ut sit membrum totius illius specifici, cujus Adam fuit caput morale. *Ad probat.*

D. A.

D. A. ut prius, & N. C. Malum, quod incurrunt parvuli contrahendo peccatum originale, non est tantum, ut iis expediret potius non existere, quam concipi in peccato originali; quia infans per baptismum facile ab eo liberari, atque æternam consequi salutem potest.

31. *Objic. VI. Perfectio Dei.* Decretum includendi in voluntate Adami voluntates posterorum derogat Sanctitati, Bonitati, ac Justitiæ Dei. Ergo est commentitium. Ergo non datur peccatum originale. P. A. Derogat Sanctitati, quia peccatum Adami tali modo Deo potius, quam Adami posteris essettribuendum. Bonitati adversatur, quia Deus Adami lapsum prævidens, illum non debuisset tamquam caput morale constituere, aut saltem efficacem gratiam dare debuisset, quæ consensum post se traheret. Denique Justitiæ divinæ derogat, quia Deus absque consensu nostro, immo ignorantibus nobis, hoc virtuale pactum cum Adamo iniisset, nosque ob actionem malam, ab Adamo elicitam absque consensu nostro, acerbissime puniret. Ergo. R. N. A. *Ad probat.* iterum N. A. Deus in voluntate Adami inclusit voluntates posterorum, non ea intentione, ut eo peccante peccarent; sed ex sincero affectu, ut in Adamo præceptum observante censi possent & ipsi præceptum observare, & sic observando mererentur justitiam originalem. Ergo peccatum Adami nullo modo Deo tribui potest. Neque decretum hoc derogat infinitæ Dei bonitati; alias Deus absque bonitatis suæ detrimento nullum permittere posset peccatum, omnibusque subministrare teneretur gratias efficaces, quibus homines cooperaturos esse prævidet. Deus itaque occulto quidem, sed justo judicio Adami lapsum permisit, ut ex hoc majus bonum eliceret, divinasque perfectiones suas humano generi manifestaret. Immo hoc ipsum decretum, seu virtuale pactum bonitatem Dei quam maxime commendat. Cum enim ageretur de donis supernaturalibus, humanæ naturæ prorsus indebitis in nos transferendis, benignitate sua conditionem exegit, quæ erat observatu facillima, nempe unius dumtaxat & facillimi præcepti obedientiam, a

*Ac Dei
perfectio-
nes obtin-
dunt.*

primo parente præstandam, quem propterea Deus tot gratiæ donis & auxiliis cumulaverat, atque ab internis impedimentis expedierat. Ex quo consequitur, decretum hoc non modo commodum nobis, verum etiam æquissimum fuisse, cum Deus, supremus creatorum omnium Dominus, quamcunque pro libito suo exigere conditionem potuerit pro derivanda in nos justitia originali, cujus alioquin homines suapte natura expertes nasci deberent, tametsi nemo umquam peccasset.

32. Dices. Princeps terrenus injuste ageret, subditum ad mortem damnando propter scelus hominis v. g. apud Indos constituti, eoquod subditi voluntatem, eo non consulto, immo ignorante, alligaverit voluntati scelesti illius hominis. Ergo a pari. R. C. A. N. C. & paritatem. Disparitas petenda est tum ex eo, quod longe excellentius Deo in creaturas omnes dominium competat, quam terreno Principi in subditos: tum etiam ex eo, quod Princeps damnando ejusmodi subditum ad mortem, spoliet illum jure quod habet ad vitam & fortunas conservandas. At vero Deus privans homines justitia originali, ac visione intuitiva summi Boni ob peccatum, quod in Adamo commiserunt, nullam eis infert injuriam, eoquod illi nullum jus habebant ad ea bona; quia justitia originalis, & visio intuitiva Dei sunt dona supernaturalia, & naturæ rationali de se prorsus indebita, quamvis eadem nullo peccato inquinata foret.

CONTROVERSIA II.

DE NATURA ET FORMALI RATIONE PECCATI ORIGINALIS.

CONTRA ILLYRICUM, LUTHERUM, ET CALVINUM.

Natura peccati Originalis est explicatu difficilis. 22. Quam explorata apud Catholicos est existentia peccati Originalis, tam explicatu difficilis semper visa est ejusdem peccati natura. *Antiquo peccato*, aiebat Augustinus Lib. de Moribus Ecclesiæ, Cap. XXII, nihil

nihil est ad prædicandum notius, nihil ad intelligendum secretius. Hinc magna dissensio, & opinionum varietas orta est inter Scholasticos, quarum præcipuas citra disputationem enumerabimus, refutatis prius Novatorum circa præsentem materiam erroribus.

34. Prior est Illyrici, alter Protestantibus omnibus communis. Mathias Illyricus, secta Lutheranus, vir ad monstra excogitanda natus, in plurimis libris quos de natura originalis peccati conscripsit, asserit peccatum originale esse ipsammet animæ rationalis substantiam, ipso Adami peccato substantialiter vitiatam, & ex imagine Dei, quam in creatione acceperat, in imaginem diaboli transformatam, qua proclivis sit ad omnem impietatem; adeo ut per se nihil aliud possit, quam Verbum Dei contemnere, Deum odio habere, atque omnia peccatorum genera perpetrare. Ut autem absurda, quæ ex hac sententia consequuntur, facilius declinare posset, asserit hominem dupliciter considerandum esse, Physice, & Theologice. Physicum hominem appellat, quatenus a Philosophis consideratur ut animal rationale: Theologicum vero, quatenus secundum nobiliorem sui partem, nempe mentem, capax est divinæ legis ad finem ultimum proprie pertinentis. Jam vero hominem Physicum eundem etiam post peccatum Adami perseverasse concedit; Theologicum vero hominem ait fuisse corruptum, & emortuum amissione illius formæ, secundum quam factus fuerat ad imaginem Dei. Atque hac ratione si homo consideretur, non negat ipsum esse diversæ speciei ante & post corruptionem.

*Illyrici
singularis
error.*

35. Mitius errarunt Henricus Gandavensis, Robertus Holckot, Gregorius Ariminensis, alique antiquiores Scholastici, peccatum Originale explicant per quasdam morbidas seu vitiosas qualitates físicas. Aiebant enim ex libidine & infecta carne generantium, a primo parente usque ad ultimum, per semen derivari in carnem proles morbidam quamdam qualitatem ipsi inhærentem: ex hac autem morbida carnis qualitate obvenire & imprimi animæ, simul atque infunditur corpori,

*Veterum
Scholasti-
corum opinio.*

pori, morbidam aliam qualitatem ipsi propriam. Et in priori quidem qualitate reponebant originale peccatum tamquam in radice; posteriorem vero dicebant esse formaliter ipsum originale peccatum, quia sola anima est subiectum capax peccati. In huiusmodi etiam qualitatibus morbidis constituebant hi auctores habitualement ipsam concupiscentiam tam in corpore quam in anima.

*Error
Protestan-
tibus com-
munis.*

36. Alter error, Protestantibus omnibus præter Illyricum communis, statuit originale peccatum esse formaliter ipsam concupiscentiam, seu hæreditariam quamdam naturæ nostræ corruptionem & pravitatem, quæ nos iræ divinæ, & damnationis æternæ reos faciat, & præterea origo sit reliquorum omnium flagitiorum, quæ ad Galat. Cap. V. *Opera carnis* vocantur. Hanc naturæ pronitatem ad malum, ut sit nobis imputabilis ad culpam, docent non constitui ex defectu rectitudinis alicujus, sive perfectionis talis, quæ soleat per Christi gratiam in hac vita hominibus restitui, ut sentiunt Catholici; sed consistere in defectu integræ justitiæ, qualem habuit initio Adamus, & qualis nunquam restituitur homini in hac vita: ac proinde in hominibus quantumcunque etiam justis & baptizatis hæreere semper hoc peccatum originale, quamdiu in hac vita versantur; hoc tamen discrimine, quod concupiscentia, seu pronitas hæc ad malum, quamvis ei non accedat consensus voluntatis, in non baptizatis sit verum peccatum: odio Dei ac pœna æterna dignum: renatis vero non imputetur ad peccatum, ob figmentum illud justitiæ imputativæ Christi.

*Catholi-
corum Do-
ctrinæ seu
sententiæ.*

37. Quadruplex est potissimum Catholicorum Doctorum, de peccati Originalis natura atque essentia, opinio. Ima est Toleti, Lugonis, Cornelii a Lapide &c. asserentium, peccatum originale esse ipsam actualem inobedientiam Adæ, qua præceptum non edendi de vetito fructu arboris scientiæ boni & mali, tamquam morale omnium nostrum caput, est transgressus, prout hæc moraliter perseverat in posteris, in ordine ad reddendum nos rationabiliter Deo exosos, usquedum per

con-

condignam satisfactionem, vel per condonationem deleatur. II^{da} sententia est S. Augustini, constituentis peccatum originale in concupiscentia seu pronitate naturæ ad malum, ut nobis a primo instanti infusionis animæ in corpus, ad vituperium, odium & supplicium æternum imputabili, non per se præcisè, sed per reatum ab ea distinctum & separabilem, nimirum per aversionem a Deo, & privationem gratiæ sanctificantis: qui reatus proinde per baptismum tollitur, sola manente concupiscentia, quæ tunc desinit nobis esse imputabilis, simulque desinit esse peccatum propriè ac vere tale. III^{ta} opinio est Sancti Thomæ aliorumque, peccatum originale in quodam toto constituentium, resultante ex concupiscentia veluti parte materiali, & privatione justitiæ originalis velut parte formali. IV^{ta} denique opinio, priori non absimilis, est Suarii Vasquii, Valentis, Bellarmini, Raynaudi &c., qui formalem peccati originalis rationem consistere ajunt in privatione justitiæ originalis propter actualem prævaricationem Adæ, in quo omnes eramus. Cum vero justitiæ originalis tria complectatur, I. perfectam subjectionem voluntatis ad Deum per gratiam sanctificantem, II. integram subordinationem virium inferiorum ad rationem, III. obedientiam corporis ad animam, per quam incorruptibile corpus animam nulla premit molestia: per justitiam originalem, cujus privatio formaliter est peccatum originale, citati authores aliud non intelligunt, nisi gratiam sanctificantem, quæ erat pars potissima & primaria in originali justitia, quippe quæ vere & propriè reddit hominem justum, & Deo acceptum. At vero privatio integræ subordinationis virium inferiorum ad rationem, & obedientiæ corporis ad animam, ad originalis peccati naturam spectare nullo modo potest. Quia cum per gratiam, quæ in Baptismate confertur, non restituatur nobis ista virium animæ subordnatio & obedientia corporis, privatio hujuscemodi nihil habet de culpa originali: secus per gratiam baptismalem non tolleretur totum id, quod veram & pro-

propriam rationem peccati habet. Qui est error a Tridentino Concilio damnatus Sess. V. Can. V.

38. Quod si quis hujus IV^{te} sententiæ patronis obiciat, privationem hujus justitiæ dici non posse peccatum originale, Imo. Quia magis rationem habere videtur effectus & pœnæ peccati. II^{do}. Quia peccatum originale tali modo Deum authorem haberet, cum privatio gratiæ sanctificantis sit a Deo subtrahente influxum, quo conservabatur justitia originalis. Respondent illi ad I. eam esse effectum ac pœnam peccati actualis, quod in Adamo præcessit; non vero peccati originalis, quod in posteris illius est habituale. Ad II. ajunt, Deum non esse authorem peccati originalis, eoquod privatio gratiæ sanctificantis sit quidem a Deo physice, tamquam a causa universali cessante conservare supernaturalem illum habitum; sed non moraliter tamquam a causa particulari determinante secundam. Ergo privatio gratiæ originalis non est a Deo, sed a voluntate primi parentis tamquam a propria causa emanat.

Peccatum originale non est substantia mala a diabolo producta.

39. Conclusio I. Peccatum originale non est substantia mala, a diabolo producta. Prob. I. Autoritate Scripturarum. Joannis Cap. I. dicitur: *Omnia per ipsum facta sunt, & sine ipso factum est nihil.* Ergo nullius substantiæ productio adscribi potest diabolo, sed soli Deo. I. ad Timoth. Cap. IV. ait Apostolus: *Omnis creatura Dei bona est.* Ergo malam illam substantiam Deus non creavit, qui nullo modo author peccati esse potest. Ergo peccatum originale esse non potest substantia mala, cum illam neque Deus, neque diabolus producere, aut a semetipsa existere illa potuerit. II. Autoritate Patrum, qui Marcionitas & Manichæos execrati sunt, quod hæretici illi docerent, malam esse substantiam, quam non fecisset Deus, & quæ in homine fons esset & origo omnium peccatorum, Ex innumeris pauca nobis sufficiant Patrum testimonia. S. Basilius in Orat. quod Deus non sit author malorum, ait: *Non imagineris propriam esse aliquam substantiam mali; nam malitia non est aliquid subsistens.* S. Gregorius

gorius Nazianz. in Orat. in sanctum lavacrum: *Crede nullam mali esse essentiam, nec per se subsistere, nec a Deo creatam.* S. Epiphanius Hær. XXXVII. *Malum aliquando non erat, neque radix ulla fuit malitiæ, neque malum est quiddam per se subsistens.* S. Hieronymus in Epist. ad Ctesiphontem: *Numquam a me audies malam esse naturam.* S. Augustinus Serm. I. in Psalm. LXVIII. *Quia per iniquitatem homo lapsus est a substantia, in qua factus est, (iniquitas quippe ipsa non est substantia; non enim iniquitas est natura, quam formavit Deus, sed iniquitas est perversitas quam fecit homo,) venit Filius Dei ad limum profundi, & infixus est; & non erat substantia in qua infixus est. Omnia per ipsum facta sunt, & sine ipso factum est nihil. Naturæ omnes per ipsum factæ sunt, iniquitas per ipsum facta non est; quia iniquitas facta non est.* Neque per hoc Illyricus a Manichæorum errore se purgat, quod mali naturam neque sempiternam, neque absque principio fuisse fateatur; siquidem cum Manichæis admittit aliquam substantiam esse malam, & non a Deo, sed a diabolo procreatam: quod peccatorum nostrorum causa non sit liberum arbitrium, sed substantia illa mala. III. Ex sequelis. Sequeretur enim ex errore hoc absurdissimo, Imo peccatum originale non auferri per baptismum, cum in illo nulla auferatur forma substantialis. II^{do}. Nullam fore carnis resurrectionem. Si enim resurgeret eadem substantia hominis, quæ per mortem destructa est, resurgeret etiam peccatum, quod certo falsum est: Si vero alia substantia produceretur, non erit vera resurrectio ejusdem carnis, sed nova productio. III^{io}. Æternum non fore hominis præmium, vel supplicium; si enim non idem resurget qui cecidit; neque idem coronabitur qui in agone certavit, aut idem punietur qui in certamine defecit. Vide Bellarminum Lib. V. de Amis. Grat. Cap. II.

40. Fictitia pariter qualitas illa morbida, quam adstruunt Gandavensis, Ariminensis, alique veteres Scholastici, penitus rejicienda est. Nam I. dici non potest,

Qualitas morbida exsufflatur.

potest, undenam emanarit illa in semen primi parentis, quæ per successivas generationes in ejus posteros traducta est. Non ab ipso Adami peccato; secus cur alia aliorum parentum peccata non imprimunt ipsorum semini ejusmodi qualitates, in posteros traducendas? Non a Deo, quia Deus author peccati non est. Non a diabolo, quia hic non agit in corpora, nisi per motum localem applicando activa passivis. Non ab esu pomi vetiti, quia docente Augustino Lib. XIV. de Civit. Dei, Cap. XII. *Esca illa non erat mala, nec noxia, nisi quia prohibita*. Non demum a serpente, ut quidam fabulabantur, sub cujus specie diabolus Evam seduxit; nam etsi quorundam serpentum flatus noceat hominum corporibus, animæ tamen nocere non potest. II. Quamvis admitteretur in carne qualitas illa morbida, fieri tamen non posset, ut ob conjunctionem cum infecto corpore anima ex natura sua spiritualis inde contrahat qualitatem illam morbidam, quæ ipsam peccato inficiat: res enim corporea non ita agere potest in Spiritum, ut ei peccatum imprimat. III. Vel qualitas illa morbida inhærens animæ omnino deleteretur per baptismum, vel adhuc manet quoad substantiam in renatis? Si manet: ergo per gratiam in baptismo collatam non tollitur omne id, quod veram & propriam rationem habet peccati: qui error est a Tridentino damnatus. Si vero deleri dicatur: ergo cum qualitas illa morbida nihil aliud sit, quam concupiscentia, post baptismum non manet eadem concupiscentia quoad substantiam, quæ erat prius ante baptismum. At concupiscentiam simpliciter manere in baptizatis eadem Tridentina Synodus fatetur, & quotidiana experientia demonstrat.

41. Conclusio II. Concupiscentia, seu pronitas ad malum, non est peccatum originale. Prob. Concupiscentia antecedens, (de hac enim sola loquimur, eoquod consequens juxta omnes fit peccatum actuale,) non est peccatum vere ac proprie tale. Ergo non potest esse peccatum originale. P. A. Imo. Autoritate Scripturarum. Ecclesiastici Cap. XVIII. dicitur:

Post

Concupiscentiam non esse peccatum originale ostenditur variis argumentis.

Post concupiscentias tuas non eas. Ex quibus verbis ita argumentatur S. Augustinus Lib. V. contra Julianum, Cap. III. *Frustra dictum est, post concupiscentias tuas non eas, si jam quisque reus est, quod tumultuantes, Et ad mala trahere nitentes sentit eas.* B. Jacobus in sua Epistola Catholica, Cap. I. scribit: *Unusquisque tentatur a concupiscentia sua abstractus Et illectus.* Deinde concupiscentia cum conceperit, parit peccatum: peccatum vero cum consummatum fuerit, generat mortem. Quibus verbis concupiscentia clare distinguitur a peccato, sicut causa ab effectu, ut observat S. Augustinus Lib. VI. contra Julianum, Cap. XV. *In his verbis partus a pariente discernitur; pariens enim est concupiscentia, partus peccatum.* Sed concupiscentia non parit, nisi conceperit; nec concipit, nisi illexerit, hoc est, ad malum perpetrandum obtinuerit volentis assensum. II. Autoritate Patrum. S. Chrisostomus Hom. XVII. in Matth. ait: *Non simpliciter dixit, qui concupiverit; sed qui viderit mulierem ad concupiscendum, id est, qui concupiscentiam sibi consciverit, quique nullo omnino cogente, quiescenti animæ feram illam subito immiserit.* Hoc enim non jam naturæ est, sed propriæ desidiæ. S. Augustin. Lib. I. de Nuptiis & concupiscentia, Cap. XXIII. *Nam ipsa quidem concupiscentia jam non est peccatum in regeneratis, quando illi ad illicita opera non consentitur, atque ut ea perpetrent, a regina mente membra non dantur: ut si non fit quod scriptum est, Non concupisces; fiat saltem quod alibi legitur, Post concupiscentias tuas non eas: Sed quia modo quodam loquendi peccatum vocatur, quod Et peccato facta est, Et peccatum si vicerit facit; reatus ejus valet in generato: quem reatum Christi gratia per remissionem omnium peccatorum in regenerato, si ad mala opera ei quodam modo jubenti non obediat, valere non sinit.* Sic autem vocatur peccatum, quia peccato facta est, cum jam in regeneratis non sit ipsa peccatum: sicut vocatur lingua locutio, quam facit lingua; Et manus vocatur scriptura, quam facit manus. Itemque sic vocatur peccatum, quia peccatum si vincit facit: sicut vocatur frigus pigrum, non quod a pigris fiat, sed quod pigros

gros faciat. III. Ratione Theologica. Ad peccatum requiritur advertentia & libertas indifferentiæ. Ergo cum concupiscentia antecedens prævertat advertentiam rationis, neque liberum nobis sit ejus motibus carere, concupiscentia esse nequit peccatum vere ac proprie tale.

Atque ex
natura bap-
tismi.

42. Denique invictè stabilitur conclusio argumento ex natura baptismi petito. Concupiscentia remanet in baptizatis. Atqui nullum peccatum remanet in baptizatis. Ergo concupiscentia non est peccatum. P. m. I. Autoritate Scripturarum. Ad Rom. Cap. VIII. ait Apostolus: *Nihil damnationis est iis, qui sunt in Christo Jesu*; quia nimirum cum nullum habeant peccatum, hoc ipso nulla est in ipsis causa, ob quam condemnentur. I. Joan. Cap. I. *Sanguis Jesu Christi Filii ejus emundat nos ab omni peccato*. II. Autoritate Patrum. S. Hieronymus in Epist. ad Oceanum scribit: *Quomodo justificati sumus, & sanctificati, si peccatum aliquod in nobis relinquitur?* S. Augustinus Lib. I. contra duas Epistolas Pelagianorum, Cap. XIII. *Dicimus baptismus dare omnium indulgentiam peccatorum, & auferre crimina, non radere*. S. Gregorius M. Lib. IX. Epist. XXXIX. ad Theodistam: *Si qui sunt, qui dicunt, peccata in baptismo superficie tenus dimitti, quid est hac prædicatione infidelius, in qua ipsum fidei Sacramentum festinant solvere? In quo principaliter ad cœlestis munditiæ mysterium anima ligatur, ut absoluta radicitus a peccatis omnibus soli illi inhæreat, de quo Psalmista ait: Mihi adhærere Deo bonum est*. Neque dicant Novatores, peccata in baptismo tegi, non imputari: Scripturæ enim dicunt, fieri per baptismum veram peccatorum remissionem: condonari non solum debitum pœnæ, verum etiam maculas ablui, purgari, deleri, tolli.

Et doctrina
Tridentina.

43. Ex quibus manifeste elucet, quam consentanea divinis Scripturis sit, atque antiquissimis Ecclesiæ Patribus doctrina Tridentinæ Synodi, quæ Sess. V. Can. V. ita statuit: *Si quis per Jesu Christi Domini nostri gratiam, quæ in baptismo confertur, reatum originis*

lis peccati remitti negat; aut etiam asserit non tolli totum id, quod veram & propriam peccati rationem habet; sed illud dicit tantum radi, aut non imputari; anathema sit. In renatis enim nihil odit Deus; quia nihil est damnationis iis, qui vere consepulti sunt cum Christo per baptismum in mortem. --- Manere autem in baptizatis concupiscentiam, vel fomitem, hæc Sancta Synodus fatetur, & sentit; quæ cum ad agonem relicta sit, nocere non consentientibus, sed viriliter per Jesu Christi gratiam repugnantibus non valet: quin immo qui legitime certaverit, coronabitur. Hanc concupiscentiam, quam aliquando Apostolus peccatum appellat, Sancta Synodus declarat, Ecclesiam Catholicam numquam intellexisse peccatum appellari, quod vere & proprie in renatis peccatum sit; sed quia ex peccato est. & ad peccatum inclinatur. Siquis autem contrarium senserit, anathema sit.

Argumenta contraria refutantur.

44. Objicitur I. contra I. Conclusionem, Auctoritas Scripturarum. Scriptura peccatum originale describens utitur verbis substantiam significantibus. Ergo peccatum originale est substantia. P. A. Genes. Cap. VIII. dicitur: *Sensus enim & cogitatio humani cordis in malum prona sunt ab adolescentia sua.* In Hebraico textu dicitur: *Figmentum cordis humani malum est ab adolescentia sua*, id est, ipsa cordis substantia mala est. Ad Rom. Cap. VI. *Vetus homo noster crucifixus est, ut destruat corpus peccati.* Eodem Cap. v. 12. *Non ergo regnet peccatum in vestro mortali corpore, ut obediat concupiscentiis ejus.* Confirm. I. Christus II. ad Cor. Cap. V. dicitur *peccatum*. Sed Christus est substantia. Ergo peccatum est substantia. Confirmat. II. Homines ad Ephes. Cap. II. dicuntur *natura filii iræ*. Ergo peccatum est natura: ergo est substantia. R. I. Ergo confusio & febris erunt etiam substantia, eoquod Psalmo LXVIII. dicitur: *Operuit confusio faciem meam.* Et Lucæ Cap. IV. de Christo: *Et stans super illam (Socrum Simonis) imperavit febre, & dimisit illam.* R. II. N. C. Scriptura locis citatis figurate & metaphorice loquitur.

*Illyricus
frustra
provocat
ad Scri-
pturas.*

tur. Sic figmentum cordis non dicitur ipsa cordis substantia, sed cogitatio, quæ a corde fingitur: per hominem veterem significatur vetus vita, quæ agitur in peccatis, sicut per hominem novum vita nova, quæ virtutibus exornatur: & per corpus peccati congeries & multitudo peccatorum denotatur, quam male vivendo contraximus. Peccatum in corpore regnare dicitur, quando concupiscentia ardentius incitata consensum voluntatis eblanditur. Ad I. *confirm.* D. M. Christus dicitur peccatum, id est, víctima pro expiatione peccati, C. M. In alio sensu, N. M. Ad II. *confirm.* C. A. N. C. Homines dicuntur natura filii iræ, non quod ipsum peccatum sit natura; sed quia a nativitate, & per naturalem propagationem peccatum originale tradueitur.

*Et ratio-
nem.*

45. *Objic. II. Ratio.* Peccatum originale est radix omnium peccatorum. Atqui radix omnium peccatorum est cor, seu anima hominis. Ergo peccatum originale est anima hominis. Ergo est substantia. P. M. Ad Rom. Cap. VII. ait Apostolus: *Peccatum operatum est in me omnem concupiscentiam.* Ergo est radix omnium peccatorum. *Confirm.* Illud est peccatum proprie dictum, quod est divinæ legi contrarium. Atqui natura humana per peccatum vitata, est divinæ legi contraria. Ergo natura humana est peccatum. R. I. N. C. Argumentatio est illegitima, eoquod medius terminus numquam distribuatur; similisque huic: Diabolus est mendax. Mathias Illyricus est mendax. Ergo Mathias Illyricus est diabolus. R. II. N. M. Nam Adamus & Eva, omnesque Angeli mali in actuale peccatum inciderunt, quamvis originali peccato caruerint. Adde, quod homines etiam in statu naturæ integræ peccare potuissent, & multi absque dubio peccassent. Ad *probat.* R. per illa verba Apostoli non intelligi peccatum originale, sed fomitem, sive concupiscentiam, quæ per metonymiam peccatum dicitur, eoquod sit causa peccati actualis, & effectus peccati originalis. R. III. D. m. Cor, seu anima hominis est radix omnium peccatorum, eo modo quo peccatum originale est radix,

dix, N. m. Diverso modo, C. m. Esse fontem & radicem peccatorum, convenit animæ, peccato originali, concupiscentiæ, & diabolo, sed modo diverso. Anima est fons peccatorum per modum principii activi & determinantis: peccatum originis dici potest fons & radix peccatorum per modum removentis obstaculum; cum enim peccatum originale formaliter sit privatio justitiæ originalis, removet obstaculum peccati, id est, gratiam sanctificantem. Concupiscentia dici potest fons peccatorum per modum causæ extrinsece proponentis objectum voluntati: quo modo etiam diabolus, hominum tentator, nominari poterit fons peccatorum. Ad *confirm.* D. m. Natura humana est contraria legi divinæ propter peccatum ipsi inhærens, C. m. Est contraria legi divinæ propter se ipsam, & propriam substantiam, N. m. & Conseq.

46. Dices. Homo per peccatum amisit imaginem Dei, & induit imaginem diaboli, juxta illud Joan. Cap. VII. *Vos ex patre diabolo estis.* Ergo mens hominis fuit in aliam substantialiter transformata. P. C. Peccatum corrumpit animam. Ergo quemadmodum vinum in acetum convertitur, & lac in caseum, ita etiam mens hominis mutata est in imaginem diaboli. R. D. A. Homo per peccatum amisit imaginem Dei accidentalem, quæ consistit in donis supernaturalibus, C. A. Imaginem Dei substantialem, quæ consistit in anima rationali, quæ spiritualis est, intellectu & voluntate prædita, N. A. & Conseq. Homines mali dicuntur esse ex patre diabolo, non natura, sed imitatione. Ad *prob.* D. A. Peccatum corrumpit animam proprie, id est, essentiam animæ, N. A. Metaphorice, quatenus gratiam sanctificantem adimit, quæ est vita spiritualis animæ, C. A. N. C. & paritatem. Vinum & lac res sunt naturaliter transmutabiles, ac veræ corruptioni obnoxie: contra vero anima est substantia spiritualis, materiæ ac corruptionis expers.

47. Objic. III. contra II. Conclusionem, Auctoritas Scripturarum. Ad Rom. Cap. VI. scribit Apostolus: *Non regnet peccatum in vestro mortali corpore.* Ex-

go cum per peccatum Apostolus intelligat concupiscentiam, concupiscentia est peccatum. Atqui non est actuale, eoquod ob noxam primi parentis naturæ obvenit. Ergo est originale. *Confirm.* Ad Rom. Cap. VII. dicitur: *Video aliam legem in membris meis, repugnantem legi mentis meæ, & captivantem me in lege peccati.* Ex quo hoc formatur argumentum. Lex membrorum, seu concupiscentia repugnat legi Dei. Sed quod repugnat legi Dei, est peccatum proprie tale. Ergo concupiscentia est peccatum proprie tale. R. C. A. D. C. Concupiscentia est peccatum proprie tale, N. C. Improprie, quia est effectus peccati originalis, & ad peccata actualia inclinatur, C. C. Peccatum in Scripturis sæpius accipitur nunc pro culpa, nunc pro pœna, nunc etiam pro causa peccati, aut illius expiatione. Sic Deuteronomii Cap. IX. dicitur: *Peccatum autem vestrum, quod feceratis, id est, vitulum arripiens, igne combustum.* Osee Cap. IV. dicuntur Sacerdotes comedere *peccata populi*, id est, oblationes pro expiatione peccatorum. Et ad Rom. Cap. VII. *Quid ergo dicemus? lex peccatum est?* id est, lex ergo causa peccati est? Ad *confirmat.* T. M. N. m. Homo sæpe repugnat legi Dei, nec tamen homo peccatum est, sed causa peccati. Concupiscentia, cui non accedit consensus voluntatis, repugnat legi mentis, non ut actio recedens a regula, cum posset & deberet regulæ congruere; sed ut lex contraria impellens ad malum. Illud autem, *Captivantem me in lege peccati*, exponit S. Augustinus Lib. I. de Nuptiis & concupiscentia, Cap. XXX, ubi docet concupiscentiam dici captivantem, id est, captivare conantem, vel captivantem secundum carnem, non secundum mentem.

48. Dices I. Transgressio legis est verum peccatum. Sed concupiscentia est transgressio. Ergo. P. m. Apostolus ad Rom. Cap. VII. ait: *Peccatum non cognovi nisi per legem: nam concupiscentiam nesciebam, nisi lex diceret, Non concupisces.* Ergo. R. C. M. D. m. Concupiscentia sumpta pro actu voluntario & deliberato hominis

minis concupiscentis, est transgressio legis, C. m. Sumpta pro primis motibus, quibus resistit ratio, vel pro ipsa ad hos motus proclivitate, N. m. Ad *probat.* R. Apostolus l. c. loquitur de motibus concupiscentiæ deliberatis, quos Judæi perversis Phariseorum opinionibus imbuti, putabant peccato carere, nisi in actum externum prodirent.

49. Dices II. Ad Rom. Cap. VII. pergit Apostolus: *Scimus enim, quia lex spiritualis est; ego autem carnalis sum, venundatus sub peccato.* Hoc loco Paulus non loquitur de lege prohibente actiones voluntarias, quam tunc Spiritu Sancto plenus utique servabat. Ergo loquitur de concupiscentia nobis insita per peccatum Adæ. Ergo lex *Non concupisces*, extendit se etiam ad motus concupiscentiæ indeliberatos. Ergo concupiscentia antecedens, quia repugnat legi, peccatum est. R. concesso primo enthymemate, Nego II^{dam} Consequentiam, vel D. C. Ergo lex *Non concupisces*, extendit se ad motus concupiscentiæ indeliberatos, ita ut lex nos obliget ad illos non sentiendos, N. C. Ad illis non consentiendum, C. C. Præceptum *Non concupisces*, media simul & finem comprehendit. Media sunt resistere concupiscentiæ motibus, eisque numquam assentiri, numquam cedere: atque hæc ita obligant, ut qui id non fecerit, continuo reus existat. Finis est concupiscentias funditus extirpare, atque id efficere, ut nullus in carne motus oriatur contra rationem. Hunc autem finem lex proponit, ut intelligamus quo sit nobis Deo juvante tendendum; non vero ut rei simus, si id non faciamus, quod facere in nostra potestate non est, & quod ad felicitatem futuræ vitæ, non ad obligationem præsentis pertinet. Apostolus itaque l. c. non vult significare, legem spirituales non servari a justificatis, quatenus opus est ad vitandum peccatum; sed non servari quantum ad quamdam perfectionem, quæ est finis præcepti, ac propterea proprie non est in præcepto. Vide Card. Bellarminum Lib. V. de amissione gratiæ, & statu peccati, Cap. X.

Non Augustinus.

50. Objic. IV. Autoritas S. Augustini. S. Augustinus docet concupiscentiam in non regeneratis reum facere hominem, & debitorem æterni supplicii. Ergo juxta S. Doctorem est verum peccatum. Ergo idem dicendum est de concupiscentia etiam post baptismum, cum eadem omnino maneat, nec per baptismum aufertur. P. A. Lib. I. de Nupt. & concupisc. Cap. XXXII. scribit: *Hæc itaque remissio peccatorum quamdiu non fit in prole, sic ibi est lex ista peccati, ut etiam in peccatum imputetur, id est, ut etiam reatus ejus cum illa sit, qui teneat æterni supplicii debitorem.* R. D. A. Reum facere hominem reatu, qui ab ipsa concupiscentia oritur, & in ipsa fundatur, quasi habere concupiscentiam præcise fit reum esse, N. A. Reatu, qui oritur & fundatur in peccato originali, quocum concupiscentia in non renatis conjuncta est, C. A. N. C. Concupiscentia juxta mentem S. Augustini non alio modo peccatum est in non renatis, quam v. g. cæcitas peccatum est in eo, qui sibi ipse effodit oculos. Cæcitas autem in hoc casu non est peccatum per se, & ratione fui: nam esse cæcum præcise, non est aliquid homini imputabile ad vituperium & pœnam, & Deo odibile; sed ratione alterius tantum, nempe voluntariæ effossionis oculorum; per hoc enim homo vere dignus est vituperio, pœna & odio Dei, quod sua gravi culpa cæcus sit. Quemadmodum igitur cæcitas sublato, quo facta est, reatu per condonationem culpabilis effossionis oculorum, non aliam amplius habet rationem, quam defectus & carentiæ perfectionis naturalis: ita etiam concupiscentia sublato, quo facta est, reatu per condonationem peccati, a nobis Adami voluntate commissi, non aliam amplius habet rationem, quam languoris, infirmitatis & pœnæ. Vide Simonnet Institut. Theol. Tractatu V. de Peccatis, Artic. VIII. Disputatione V. ubi pluribus rem hanc illustrat.

Non ratio Theologica.

51. Objic. V. Ratio. Motus concupiscentiæ, etiam indeliberati, sunt illiciti. Ergo lege divina prohibentur. II. Quod per se trahit ad malum, eadem lege prohibetur, qua prohibetur ipsum malum. Atqui concupi-

cupiscentia, quantumvis involuntaria, per se trahit ad malum. Ergo. III. Deus odio prosequitur concupiscentiam, quæ remanet in baptizatis, nosque ipsi tenemur illam odisse. Ergo concupiscentia est peccatum. P. C. Deus nihil odit nisi peccatum. Ergo. IV. Concupiscentia non est a Deo. At omnis justa pœna est a Deo. Ergo concupiscentia non est tantum pœna, sed etiam culpa. V. Si concupiscentia non esset peccatum, posset expeti propter aliquem bonum finem. Atqui non potest expeti. Ergo. VI. Christus per omnia nobis similis factus absque peccato, non assumpsit concupiscentiam. Ergo concupiscentia est peccatum. R. ad I. D. A. Sunt illiciti, quia non licet eos pati, N. A. Quia non licet eis obedire, C. A. N. C. Ad II. D. M. Si illud, quod trahit ad malum, sit in nostra potestate, ut eo careamus, C. M. secus N. M. Atqui in nostra potestate non est, non experiri motus inordinatos ad malum impellentes. Ad III. C. A. N. C. Deus odio habet concupiscentiam, nosque ipsi tenemur eam odisse, non quia peccatum est, sed quia aliquid inordinatum est, & ad peccatum incitat. Ad *prob.* D. A. Deus nihil odit nisi peccatum, odio redundante in personam, C. A. Aliter, N. A. & Conseq. Ad IV. R. Imo. Retorquendo. Mors corporis non est a Deo, *Quoniam Deus mortem non fecit.* Sapientiæ Cap. I. v. 13. At omnis justa pœna est a Deo. Ergo mors non est solum pœna, sed etiam culpa. R. II^{do}. D. M. Concupiscentia non est a Deo, quatenus est ordinata propensio ad bonum sensibile, N. M. Quatenus est inordinata propensio ad malum alliciens, subdist. Non est a Deo positive, quatenus nempe Deus non fuit author peccati, cujus effectus est concupiscentia, C. Non est a Deo quasi negative, quatenus Deus in ultionem peccati abstulit originalem justitiam, quæ carnem spiritui subiciebat, N. M. Ad V. N. M. Quia concupiscentia ad peccatum allicit, nullus honestus finis excogitari potest, ob quem a nobis expetatur. Ad VI. C. A. N. C. Christus eadem de causa non assumpsit concupiscentiam, ex quâ assumere noluit ignorantiam, licet & il-

T. IV. Theol. Dogm. Polem. D la,

la, si sit omnino involuntaria, peccatum non sit. Nimirum concupiscentia & ignorantia repugnabant plenitudini gratiarum ac donorum, quæ Christo debebantur, nihilque ad redemptionem nostram proderant.

CONTROVERSIA III.

DE POENIS PECCATI ORIGINALIS.

CONTRA PELAGIANOS.

Pelagianorum error.

52. Pelagiani præterquam, quod originariam noxam in posteros Adami traduci inficiarentur, docebant concupiscentiam malam non esse, nec partum peccati, sed a natura provenire: Adamum conditum fuisse mortalem, ideoque etiamsi non peccasset, fuisse corpore moriturum; atque ita mortuum esse, non merito culpæ, sed conditione naturæ: Nasci infantes eodem statu, quo erat Adam ante peccatum, eosque baptismo illustrari, non ut condonentur peccata, sed ut morientes possint admitti in regnum Dei. Pelagianum hunc errorem de mortali conditione Adami adoptavit Joannes Mercerus (Le Mercier) Calvinianus, qui in Commentario in Genesin de Adamo scribit: *Mors ei molesta non fuisset, nec iræ Dei signum ex peccato, ut hodie: sed dulcis quædam & suavis animæ a corpore separatio, vel commutatio potius & translatio in solidissima & æterna gaudia.* Zwinglius, Pelagianis longe audacior, in Declarat. de peccato originali ad Urbanum Rhesium docuit, probabile esse, per Christum universam naturam humanam ita esse restitutam, ut etiam filii infidelium, sine baptismo decedentes, salventur: id autem non solum probabile, sed etiam certum esse de filiis fidelium. Quem errorem, circa filios fidelium, secuti sunt Calvinus, Bucerus, Vermilius &c.

Mors corporis est pœna peccati originalis.

53. Conclusio I. Mors corporis est pœna peccati Originalis. *Probat,* Adamus si in innocentia sui status perseverasset, numquam mortuus fuisset. Ergo mors corporis, morbi &c. sunt pœna inobedientiæ Adami, & peccati Originalis. P. A. I. Autoritate Scriptura.

pturarum. Sapientię Cap. I. v. 13. dicitur: *Deus mortem non fecit, nec latatur in perditione vivorum.* Et Cap. II. v. 23. *Quoniam Deus creavit hominem inextinguibilem, & ad imaginem similitudinis suę fecit illum. Invidia autem diaboli mors introivit in orbem terrarum.* Ad Rom. Cap. V. v. 12. *Per unum hominem peccatum in mundum hunc intravit, & per peccatum mors, & ita in omnes homines mors pertransiit, in quo omnes peccaverunt.* Et Cap. VIII. v. 10. *Corpus quidem mortuum est propter peccatum, Spiritus vero vivit propter justificationem.* Denique si Adamo, etiam absque peccato, aliquando moriendum fuisset, inepta fuisset comminatio Dei ante prævaricationem Adę facta Gen. Cap. II. v. 17. *In quocunque die comederis ex eo, morte morieris.* Probat.

II. Authoritate Conciliorum. Milevitanum, seu potius Carthaginense Can. I. ita statuit: *Placuit, --- ut quicumque dixerit, Adam primum hominem mortalem factum, ita ut sive peccaret, sive non peccaret, moreretur in corpore, hoc est, de corpore exiret, non peccati merito, sed necessitate naturę; anathema sit.* Arausicanum II. Cap. II. *Siquis soli Adę prævaricationem suam, non & ejus propagini asserit nocuisse: aut certe mortem tantum corporis, quę pœna peccati est, non autem & peccatum, quod mors est animę, per unum hominem in omne genus humanum transiisse testatur, injustitiam dabit Deo, contradicens Apostolo dicenti: Per unum hominem intravit in mundum &c.* Similia habet Tridentinum Sess. V. Can. I. Probat.

III. Authoritate Patrum. S. Augustinus Lib. XIII. de Civit. Dei, Cap. XV. *Unde constat inter Christianos veraciter Catholicam tenentes fidem, etiam ipsam nobis corporis mortem, non lege naturę, quia nullam mortem homini Deus fecit, sed merito inflictam esse peccati: quoniam peccatum vindicans Deus, dixit homini, in quo tunc omnes eramus, Terra es, & in terram ibis.* S. Fulgentius Lib. de Incarnat. Cap. XII. *Nisi præcessisset in peccato mors animę, numquam corporis mors in supplicio sequeretur. --- Homo in terram carne non irret, si terra peccando non feret.*

54. Cæterum immortalitas, quam habuit Adamus ante prævaricationem, quamque habuissent posteri, si in statu innocentia perseverassent, non erat natura humana debita, sed dono Conditoris concessa: neque fuisset plena atque perfecta, quæ moriendi necessitatem excluderet, qualem Beati post resurrectionem corporum sortientur; sed cujus beneficio non morerentur quidem re ipsa, sed mori tamen possent, si aut peccarent, aut extra Paradisum collocati a ligno vitæ prohiberentur, ut explicat S. Augustinus Lib. VIII. de Genesi ad litteram, Cap. V. Homo itaque in statu innocentia immunis fuisset a morte violenta, partim per prudentiam naturalem, vi cujus plurima vitæ pericula evitare potuisset: partim per specialem Dei providentiam, avertentis ea pericula, quæ humana industria caveri non poterant. A naturali autem morte ac morbis immunem præstitisset fructus de ligno vitæ opportune adhibitus, qui temperamentum corporis vel ad optimum statum reduceret, si per reliqua alimenta fuisset non nihil alteratum: vel omnino præservaret, ne umquam ad statum præternaturalem perveniret.

Concupiscentia rebellis est mala.

55. Conclusio II. Concupiscentia rebellis est mala, atque a peccato originali proficiscitur. Dixi concupiscentia *rebellis*, qualem modo miseri experimur. Concupiscentia enim, prout est ordinata propensio ad bonum sensibile, est bona, atque a Deo, locumque habuisset etiam in statu innocentia. Nomine itaque concupiscentia *rebellis* veniunt actus illi inordinati appetitus inferioris, tam irascibilis quam concupiscibilis, quibus incitamur ad malum, aut retardamur a bono, & qui in nobis oriuntur citra advertentiam rationis, atque accedente etiam ea advertentia perdurant, tametsi voluntas eisdem positive resistat. Probatur jam prima pars Conclusionis Imo Authoritate Scripturarum. Apostolus ad Rom. Cap. VII. ait: *Malum adjacet mihi, perficere autem bonum non invenio. Ubi per malum adjacens nihil aliud intelligi potest, quam concupiscentia carnis, quam etiam eodem capite vocat legem membrorum, & legem peccati. I. ad Cor. Cap. IX.*

ait

ait Apostolus se castigare, & in servitutem redigere corpus suum. Et II. ad Cor. Cap. XII. ter se rogasse Dominum, ut auferatur a se stimulus carnis. Ergo concupiscentia rebellis est mala; bonum enim a se numquam remove conatus est Apostolus. S. Joannes Epist. I. Cap. II. ait, concupiscentiam carnis non esse ex Patre, sed ex mundo. Ergo cum non sit a Deo, a quo est omne bonum, non est bona. II. Authoritate Patrum, Cypriani, Ambrosii, Hilarii, Chrysostomi, ac præcipue B. Augustini passim in libris suis adversus Pelagianos. III. Ratione manifesta. Concupiscentia rebellis inclinatur hominem ad peccatum, & spiritui adversatur. Ergo rebellis concupiscentia, qualem nos experimur, est mala.

56. Probatur etiam altera pars Conclusionis. Imo. *Atque a peccato originali proficiatur.* Authoritate Scripturarum. Apostolus ad Rom. Cap. VII. describens pugnam carnem inter & spiritum ait: *Si autem quod nolo, illud facio: jam non ego operor illud, sed quod habitat in me peccatum.* Ergo concupiscentia rebellis, seu indeliberati illi motus contra rationem insurgentes, sunt effectus peccati Adami. Ergo ante peccatum non dabatur hæc rebellio. Præterea Apostolus sapius concupiscentiam vocat *legem peccati*. Genes. Cap. II. legimus de primis nostris parentibus: *Erat autem uterque nudus, & non erubescabant.* Hujus rei causam Patres assignant, quod ii tunc carerent pudenda illa rebellionem membrorum, ob quam nunc erubescimus, si nudi conspiciamur. II. Authoritate Patrum, præcipue S. Augustini, qui Lib. IV. contra Julianum, Cap. ult. de Adamo scribit: *Gratia quippe Dei magna ibi erat, ubi terrenum & animale corpus bestialem libidinem non habebat.* Et Lib. II. de peccatorum meritis & remis. Cap. XXII. *Hanc ergo (obedientiam) priusquam violassent, placebant Deo, & placebat eis Deus: & quamvis corpus animale gestarent, nihil inobediens in illo adversum se moveri sentiebant.* Faciebat quippe hoc ordo justitiæ, ut quia eorum anima famulum corpus a Deo acceperat, sicut ipsa eidem Domino suo, ita illi corpus ejus obedi-

obediret, atque exhiberet vitæ illi congruum sine ulla resistentia famulatum. Hinc & nudi erant, & non confundebantur.

*Exclusio
ab æterna
gloria est
pœna pec-
cati Orig-
inalis.*

57. Conclusio III. Exclusio ab æterna gloria est pœna peccati originalis. Prob. Imo. ex Scripturis. Joannis Cap. III. ait Christus: *Nisi quis renatus fuerit ex aqua & Spiritu Sancto, non potest introire in regnum Dei.* Ergo peccatum originale, quod in baptismo remittitur, cujusque tantum capaces sunt parvuli, est obex æternæ gloriæ. Ergo exclusio ab æterna gloria est effectus peccati originalis. II. Autoritate Conciliorum Diospolitani, Carthaginensis, Milevitani, quorum meminit S. Augustinus Lib. II. de Anima & ejus origine, Cap. XII. *Novellos hæreticos Pelagianos justissime Conciliorum Catholicorum & Sedis Apostolicæ damnavit autoritas, eoquod ausi fuerint non baptizatis parvulis dare quietis & salutis locum, etiam præter regnum cælorum.* III. Autoritate Patrum, præcipue S. Augustini, qui Lib. III. de Anima & ejus origine, Cap. IX. scribit: *Noli credere, nec dicere, nec docere, infantes antequam baptizentur morte præventos, pervenire posse ad originalium indulgentiam peccatorum, si vis esse Catholicus.* Et Cap. XIII. *Noli credere, nec dicere, nec docere, aliquos eorum, qui sine baptismo Christi ex hac vita emigraverint, interim non ire in regnum cælorum, sed in paradysum; postea vero in resurrectione mortuorum etiam ad regni cælorum beatitudinem pervenire, si vis esse Catholicus.* Et Epistola XXVIII. nunc CLXVI. ad S. Hieronymum: *Quisquis dixerit, quod in Christo vivificabuntur etiam parvuli, qui sine Sacramenti ejus participatione de vita exeunt, hic profecto & contra Apostolicam prædicationem venit, & totam condemnat Ecclesiam: ubi propterea cum baptizandis parvulis festinatur & curritur, quia sine dubio creditur aliter eos in Christo vivificari omnino non posse.* IV. Ratione Theologica. Æterna gloria est hæreditas filiorum adoptivorum Dei. Atqui peccato originali inquinati, quamdiu hoc non remittitur, non sunt filii adoptivi Dei. Ergo æterna gloria non est illorum hæreditas.

Ergo

Ergo peccatum originale hominem ab æterna gloria excludit quamdiu non fuerit remissum. P. m. Filii adoptantur a Deo per gratiam sanctificantem. Ergo cum peccatum originale sit privatio justitiæ originalis, & gratiæ sanctificantis, peccato originali inquinati non sunt filii adoptivi Dei.

48. Atque hæ præcipuæ sunt peccati originalis pœnæ; qui enim reliquam malorum illuviem, quæ ex originali peccato, tamquam ex Lernæo fonte derivata, totum humanum genus inundavit, penitus cupit cognoscere, Bellarminum adeat, Lib. VI. de Amissione gratiæ & statu peccati, Cap. IX. & sequentibus. Cæterum has inter tres præcipuas peccati Originalis pœnas discrimen aliquod notandum est. Mors corporis perinde ac concupiscentia rebellis non tantum sunt pœna peccati originalis a singulis contracti, verum etiam sunt effectus proximus peccati primi parentis, ob quod justissime meruit, ut ipse & sua posteritas spoliarentur a Deo dono gratuito immortalitatis, & subjectionis appetitus sentientis ad voluntatem & rationem. Sicut homo perduellis meretur, ut ipse sui que filii ac nepotes priventur donis acceptis a regia liberalitate: & ideo deletus, vel etiam non contracto originali peccato, adhuc maneret homo morti & concupiscentiæ obnoxius; quia hæc dona Dei erant specialia, a dono gratiæ sanctificantis discreta, & inconnexa, ex merito tamen primi parentis una cum ipsa gratia sanctificante in posteros transfundenda. At vero exclusio ab æterna gloria non est effectus proximus peccati primi parentis, sed proxime consequitur ipsum solum originale peccatum a singulis contractum, nempe privationem gratiæ sanctificantis. Quam ob rem etsi contingat plene remitti originale peccatum, quin remittatur debetum moriendi, & carendi concupiscentia rebeli; non tamen contingit simpliciter remitti peccatum originale, quin remittatur pœna exclusionis ab æterna gloria: hæc enim remissio non fit, nisi per infusionem gratiæ sanctificantis, quæ jus homini confert ad gloriam, tamquam filio adoptivo Dei. Vide Benedictum Piazza

in

in Causa Immaculatæ Conceptionis, in Apparatu ad Causam, Artic. I. Paragr. III.

Parvuli sine baptismo decedentes non fruuntur naturali beatitudine.

59. Quæres I. An parvuli sine baptismo decedentes, quamvis priventur vita æterna, quæ consistit in visione intuitiva Dei, fruuntur tamen naturali quadam beatitudine? R. hanc Pighii & Catharini sententiam, a Pelagianis placitis non adeo remotam, perabsurdam esse, omnique fundamento destitui. Prob. assertio I. Qui in æternum damnandi sunt, nulla prorsus beatitudine sunt fruituri; eoquod damnatio sit maxima miseria, beatitudo vero sit status omnium bonorum aggregatione perfectus. Sed parvuli sine baptismo decedentes æternum damnandi sunt. Ergo. P. m. Parvuli per solum baptismum liberantur ab æterna perditione, seu damnatione. Ergo qui sine baptismo decedunt, æternum damnandi sunt. P. A. Patres Concilii Carthaginensis in Epistola Synodica ad S. Innocentium I, quæ inter Augustinianas est XC, nunc CLXXV, scribunt: *Quicumque negat, parvulos per baptismum Christi a perditione liberari, & salutem percipere sempiternam, anathema sit.* Et S. Augustinus Lib. I. de Anima & ejus origine, Cap. IX. *Non baptizatis parvulis nemo promittat inter damnationem regnumque cælorum, quietis vel felicitatis cujuslibet, atque ubilibet quasi medium locum. Hoc enim eis etiam hæresis Pelagiana promisit.* II. Parvuli illi sunt vasa iræ, sub potestate & imperio dæmonis, antequam baptizentur, ut manifestum est ex doctrina Patrum ac præcipue Augustini, qui frequenter id tum alibi sæpius, tum Lib. VI. contra Julianum, Cap. V. inculcat: *Verum est, quod antiquitus veraci fide Catholica prædicatur & creditur per Ecclesiam totam, quæ filios fidelium non exorcizaret, nec exsufflaret, si non eos de potestate tenebrarum, & a principe mortis erueret.* Ergo non fruuntur beatitudine naturali decedentes sine baptismo, sed infelices erunt & miseri. III. Parvuli sine baptismo decedentes æternum includentur in carcere aliquo subterraneo ac tenebricoso. Ergo beati esse non poterunt. P. A. autoritate Patrum, ac Scholæ Principum, S. Tho-

Thomæ, S. Bonaventuræ, Alensis, Scoti &c. Atque ipsius Florentinæ Synodi, quæ Sess. ultima in Decreto fidei definivit, *Illorum animas, qui in actuali peccato mortali, vel solo originali decedunt, mox in infernum descendere, pœnis tamen disparibus puniendas.* Neque ulla est ratio, ob quam ex eo loco post universalis iudicii diem dicantur liberandi; cum post hanc vitam non sit locus misericordiæ, sed justitiæ. Quod si dicas, post universale iudicium transferendos esse super terram. R. Fabulam hanc nulla Scripturarum, aut Patrum autoritate fulciri; tuncque probabilius omnia elementa suum situm naturalem repetitura esse: sicque aqua, quæ initio terram ambiebat, revertetur ad pristinum locum, a quo iubente Domino recesserat, ut terra esset commoda habitatio hominum, & animalium.

60. Quæres II. An parvuli sine baptismo decedentes ita priventur visione intuitiva Dei, ut nullum exinde dolorem etiam internum patiantur? R. negative. Prob. assertio I. Autoritate S. Augustini, qui Tract. LXVII. in Joannem scribit: *Proinde respuendi sunt (Pelagiani) a corde Christiano, qui putant ideo dictum multas esse mansiones, quia extra regnum cœlorum erit aliquid, ubi maneant beati innocentes, qui sine baptismo ex hac vita emigrarunt, quia sine illo in regnum cœlorum intrare non potuerunt. Hæc fides non est fides; quia non est vera & Catholica fides.* Et Lib. I. de Anima & ejus origine, Cap. IX. ait, parvulis non baptizatis nullum quietis vel felicitatis cujuslibet quasi medium locum inter damnationem regnumque cœlorum promittendum esse. Atqui quiete illa fruerentur parvuli non baptizati, si ne internum quidem animi dolorem ex jactura cœlestis beatitudinis persentiscerent. II. Ratione, quam assignat S. Augustinus Lib. VI. contra Julianum, Cap. X. *Si hoc eis non erit malum (exclusio a regno cœlesti) non ergo amabunt regnum Dei tot innocentes imagines Dei. Si autem amabunt, & tantum amabunt, quantum innocentes amare debent regnum ejus, a quo ad ipsius imaginem creantur, nihilne mali de hac ipsa separatione patientur?*

Sed dolorem internum patientur.

61. Neque dicas I. Parvulos sine baptismo decedentes non pati pœnam sensus, ideoque neque internum dolorem. II. Eos justum Dei iudicium in sua calamitate agnoscere, adeoque dolorem omnem abstergi ob privationem regni cœlestis. III. Ex amissione beatitudinis nullum dolorem percepturos, eoquod forte ignoraturi sint se illam amisisse. IV. Deum singulari providentia dolorem omnem ab eorum animis remoturum. Nam ad I. R. Dolor animi ex beatitudinis privatione ortus, proprie ac directe a Deo non infligitur, sicut dolor ortus ex pœna sensus; sed per se & naturaliter ex ea sequitur. Ad II. N. C. Sic animæ in purgatorio, quamvis cognoscant se justo Dei iudicio acerbissimas pœnas luere, acerrimo tamen discruciantur dolore ob retardatam beatitudinem, quin de Deo conquerantur. Ergo a pari. Ad III. N. A. Parvuli cognoscent dari aliquam beatitudinem, eamque se amisisse; quia cognoscent naturam suam, & in ea naturale desiderium summi Boni adipiscendi ab Authore naturæ inditum esse non ignorabunt. Præterea omnino certum est, parvulos interfuturos esse ultimo iudicio, eoquod Christus omnium vivorum & mortuorum sit iudex; idque Scriptura frequenter asserat, nullo facto discrimine. Ergo non ignorabunt excludi se propter peccatum originale ab æterna felicitate. Ad IV. N. A. Si Deus non impedit, quo minus parvuli in hac vita dolores patiantur, qui ex amissione justitiæ originalis sequuntur; neque impediturus censi debet dolorem, qui post mortem naturaliter consequetur cognitionem amissæ beatitudinis.

Eos æterno igne cruciari docuit Augustinus.

62. Quæres III. An parvuli sine baptismo decedentes æterno igne sint cruciandi apud inferos in carcere damnatorum? R. Quæstionem hanc non adeo facilem & expeditam esse, ut quidam opinantur. Eosdem æterno igne cruciandos esse sensit B. Augustinus. Ex multis S. Doctoris locis unicum feligo. Exprobraverat Augustino Julianus Eclanensis, Pelagianæ factionis signifer, tamquam absonam prorsus, absurdamque sententiam, quam piorum aures ferre omnino

non

non possent, id est, parvulis non baptizatis æternum deberi incendium propter peccatum originale. Hic admonebat locus, ipsaque res postulabat, ut, si Augustinus non fuisset in ea sententia, quam sibi Julianus exprobraverat, illatam sibi calumniam repelleret, palamque faceret, se non docere, parvulos non baptizatos originalis peccati causa æterno esse addictos incendio, sed in æterna duntaxat animi tristitia futuros de amissione Dei summi Boni, finisque ultimi, quo uno anima conquiescat. Sed secus omnino accidit: suam esse objectam sibi a Juliano sententiam agnovit Augustinus, admirationemque Juliani, tamquam de opinione incredibili, verbis illis compressit Lib. III. Operis imperfecti contra Julianum, Num. CXCIX. *Si non eruitur a potestate tenebrarum, & illic remanet parvulus; quid miraris in igne æterno cum diabolo futurum, qui in Dei regnum intrare non finitur? An quia Pelagiani nescio quem parvulis non baptizatis, præter Dei regnum, quietis & vitæ æternæ locum præparant, ideo Christi erit falsa sententia: Qui crediderit, & baptizatus fuerit, salvus erit; qui autem non crediderit, condemnabitur?*

63. Idem, Augustino duce, post exortam Pelagii hæresin magno consensu asseruerunt Latini Patres: ^{Aliique} Author Hypognostici; S. Avitus Viennensis in ^{Patres} Carmine ad Sororem Fuscina; XV. Episcopi African ^{post illum} Provinciæ Byzacenæ in Sardinia exules in Lib. de Incarnatione & Gratia, Cap. XXX., quem illorum nomine scripsit S. Fulgentius Ruspensis. Idem S. Fulgentius Lib. de Fide ad Petrum, Cap. XXVII. S. Gregorius M. Lib. IX. Moralium, Cap. XII. S. Isidorus Hispalensis Lib. I. Different. Num. XXVI. S. Anselmus Lib. de Conceptu virginali & originali peccato, Cap. XXII. & Ælredus Abbas in Anglia Sæc. XII. Lib. I. Speculi charitatis, Cap. XV. Quibus accedere videtur S. Hieronymus in Dial. III. contra Pelagianos, qui ad querimoniam illam Pelagianorum contra Catholicos, quod parvulis sine baptismo decedentibus, juxta eorum placita, æternæ miseriæ cruciatus præparentur, nil aliud respondet, quam omnes homi-
nes,

nes, aut antiqui propagatoris Adam, aut suo nomine teneri peccato obnoxios.

*De quo-
rum mente
vix potest
ambigi.*

64. Equidem multi non desunt Theologi, qui Augustinum aliosque Patres mitius interpretantur, dicuntque, durum illud vocabulum *ignis* quandoque mollius pro quovis sive corporis, sive animi dolore a Patribus adhiberi. At vero verba Patrum, si rite considerentur, clariora mihi videntur, quam ut hanc interpretationem admittant: neque facile mihi suadere possum, quod ignis significatus in ea sententia: *Ite maledicti in ignem æternum, qui paratus est diabolo, & Angelis ejus*, cujus sententiæ effectus, juxta Augustinum, futura sit sempiterna damnatorum combustio in igne æterno, communis parvulis decedentibus absque baptismo, accipiatur ab illo pro tristitia quavis & ægritudine animi.

65. Neque felicius rem conficiunt illi, qui ipsum Augustinum de pœnis parvulorum dubium hæsisse evincere conantur I. ex Epistola illius XXVIII. nunc CLXVI. ad Hieronymum, ubi sic loquitur: *Cum ad pœnas ventum est parvulorum, magnis, mihi crede, coarctor angustiis, nec quid respondeam, prorsus invenio.* II. Ex Enchiridio, Cap. XCIII. & Lib. I. de peccat. meritis & remis. Cap. XVI, ubi dicit parvulos *in damnatione omnium mitissima futuros.* III. Ex Lib. III. de Lib. arbitrio, Cap. XXIII. *Non enim metuendum est, ne vita esse potuerit media quædam inter recte factum atque peccatum, & sententia judicis media esse non possit inter præmium atque supplicium.* Ad I. enim facile responderi potest, id unum ab Augustino affirmari, quod in hypothesis creationis animarum, sive posito, quod per traducem non propagentur, explicare ipse non valeat, quomodo parvuli sine baptismo decedentes in hac vita multis pœnis temporaneis, in altera vero pœna æterna puniantur. Ad II. R. S. Augustinum non loqui de futura parvulorum pœna secundum se spectata; sed facta comparatione cum pœna adultorum, qui communi peccato originis addiderunt singularia crimina, quæ scientes prudentesque libero suæ voluntatis arbitrio mali-
tiose

tiose admiserunt. Ad III. R. S. Augustinus Lib. de Dono perseverantiæ, Cap. XII. scribit, se olim Presbyterum libros de libero arbitrio, quos laicus Romæ inchoaverat, in Africa confecisse, nempe ante annum 395. Quare etiamsi ante Episcopatum suum de parvulorum pœnis dubitasset, minime tamen sequitur, eum circa pœnas illas semper fluctuasse: potuit enim postea proficere, & proficiendo veritatem investigare, quam antea ignoraverat. Verum, hoc etiam omisso, ajo Augustinum l. c. loqui de supplicio in genere, non in specie: noluisseque hanc de pœnis parvulorum quæstionem tunc instituere, quia hoc minime necessarium erat ad refellendum errorem Manichæorum, duarum naturarum, boni scilicet & mali, permixtionem asserentium, ut ipse testatur S. Augustinus Lib. de Dono perseverantiæ, Cap. XII, ubi sic ulterius pergit: *Abstine ut causam parvulorum sic relinquamus, ut esse nobis dicamus incertum, utrum in Christo regenerati, si moriantur parvuli, transeant in æternam salutem; non regenerati autem transeant in mortem secundam.* Quid autem mortis secundæ nomine intelligatur, ipse S. Augustinus sæpe diserte docuit Lib. XIX. de Civit. Dei, Cap. XXVIII. in Enchiridio Cap. XCII, & Lib. VI. Operis imperfecti contra Julianum, Num. XXXI., ubi ait: *Est etiam mors, quæ in Apocalypsi mors secunda dicitur, qua & corpus & anima igne cruciabuntur æterno; quam minatur Dominus ubi dicit, Eum timete, qui habet potestatem & corpus & animam perdere in gehennam.* Quamvis ergo multæ mortes inveniantur in Scripturis; duæ tamen sunt præcipuæ, prima & secunda: prima est, quam peccando intulit primus homo; secunda est, quam judicando illaturus est secundus homo. Vide Card. Henricum Norisium in Vindiciis Augustinianis. Laurentium Alticotium in Summa Augustiniana Parte IV. Quæst. I. Artic. IV. Edmundum Simonnet in Institut. Theolog. Tract. V. de Peccatis, Disput. V. Artic. XII.

66. Benignam sententiam, quæ parvulos sine baptismo decedentes a pœna sensus, sive cruciatibus inferni

*In benig-
norem
partem*

*propen-
dent SS.
Nazian-
zenus &
Nyssen.*

ni absolvit, docuit uterque Gregorius, Nazianzenus, & Nyssenus, Augustino antiquiores. Nazianzenus Orat. XL. in Sanctum Baptisma de infantibus sine baptismo ex hac vita decedentibus scribit: *Postremi denique nec cœlesti gloria, nec suppliciis a iusto iudice efficiuntur, ut pote qui, licet baptismo consignati non fuerint, improbitate tamen careant, atque hanc iacturam passi potius fuerint, quam fecerint. Neque enim quisquis dignus supplicio non est, protinus honorem quoque meretur: quemadmodum nec quisquis honore indignus est, statim etiam pœnam promeretur.* S. Gregorius Nyssenus in Orat. de iis, qui præmatura morte abripiuntur: *Immatura mors infantium neque in doloribus ac mœstitia esse eum, qui sic vivere desiit, intelligendum esse nobis suggerit.* Citari etiam solet S. Ambrosius in Caput V. Epistolæ ad Rom. Verum cum liber ille non ab Ambrosio, sed ab Hilario Diacono Luciferiano Schismatico conscriptus fuerit, nullam habet auctoritatem.

Ac communior Theologorum gravi ratione subnix.

67. Nazianzeni ac Nysseni sententiam a Sæculo XII. ad nostra usque tempora fere omnes Theologi, ac Scholæ Principes secuti sunt, Petrus Lombardus Magister sententiarum, S. Thomas, S. Bonaventura, Scotus, aliique: adeo ut Augustinianam sententiam paucissimi tantum propugnarent, Gregorius Ariminensis nempe, Joannes Diedo, Michael Paludanus, Joannes Poncius, Florentius Conrius Archiepiscopus Thuamensis, Franciscus Macedo, Henricus Cardinalis Norisius; reliqui vero tantum non omnes Theologi per VII. jam sæcula benignam sententiam docuerint, doceantque, Innocentium III. secuti, qui Extrav. Cap. *Majores* de Baptismo, & ejus eff. ait: *Pœna originalis peccati est carentia visionis Dei; actualis vero peccati pœna est gehennæ perpetuæ cruciatus.* Communissimæ huic Theologorum auctoritati suffragatur consensus fidelium, qui ægre admodum audiunt, parvulos sine baptismo decedentes mitti in ignem æternum cruciandos. Neque rationibus suis destituitur hæc sententia. Ut enim alias omittam, durum valde, ac divinæ bonitati contrarium videtur, ob pec-

peccatum voluntate physice aliena commissum tot animas sempiternis inferorum cruciatibus mancipari, cum tamen immunitas ab his pœnis videatur creaturæ rationali naturaliter debita, quamdiu personali peccato non est inquinata. Omnium enim iudicio crudeliter agere censeretur Rex ille, qui ob parentis peccatum, cuius nullo modo conscii, nec voluntate physice propria participes fuerunt filii, eos non modo beneficiis regia liberalitate concessis privaret, quod æquitati minime repugnat; verum etiam capitali afficeret supplicio. Quare quod Deus posteros Adami in pœnam peccati originalis gratia sanctificante spoliavit, eosque morti, morbis, aliisque hujus vitæ miseris obnoxios velit, facile capio, cum immunitas ab his malis donum sit supernaturale, naturæ humanæ de se prorsus indebitum, atque ex mera Dei liberalitate Adamo concessum. At vero quod Deus homines ob solum peccatum originale sempiternis addicat inferorum cruciatibus, difficulter adducor ut credam, eoquod immunitas ab illis videatur esse creaturæ rationali, omnis personalis noxæ experti, naturaliter debita. Itaque, spectatis omnibus, benigna sententia probabilior mihi videtur; quamvis ob gravissimam sententiæ contrariæ auctoritatem, eam nullius erroris arguam, suamque illi probabilitatem minime denegem.

Argumenta contraria refutantur.

68. Objicitur I. contra I. Conclusionem, Infirmitas argumenti ex Scripturis petiti. Locus ille Gen. Cap. II. *In quocunque die comederis ex eo, morte morieris*, intelligendus non est de morte corporis, sed de morte solius animæ. Ergo ex illo loco nihil evincitur. P. A. auctoritate S. Gregorii Magni, qui Lib. V. Epist. XIV. locum illum exponit de morte animæ. R. N. A. Deus enim dixit Adamo post prævaricationem, Gen. Cap. III. *In sudore vultus tui vesceris pane, donec reverteris in terram de qua sumptus es: quia pulvis es, & in pulverem reverteris*. Ergo damnavit eum ad illam pœnam,

Adversarii frustra obtendunt infirmitatem nostri argumenti

nam, quam ei comminatus fuerat ante prævaricationem. Atqui non damnavit animam natura sua immortalem, ad mortem, sed corpus. Ergo comminatus fuit Adamo mortem corporis. Ad *probat.* D. A. Ita ut S. Gregorius mortem corporis excludat, N. A. Ut eam præsuponat, C. A. N. C. Proprie ac stricte si loquamur, mors animæ non est effectus peccati, sed ipsum peccatum, quod ex natura sua mors animæ nuncupari potest, ac debet.

69. Dices. Adam non eo die, quo comedit de fructu vetito, sed post triginta & nongentos annos mortuus est. Ergo locus ille intelligi non debet de morte corporis. P. C. Si de morte corporis intelligendus foret, Adam eadem die, qua fructum vetitum gustavit, mori debuisset; dicitur enim, *In quocunque die comederis ex eo, morte morieris.* Ergo. R. C. A. N. C. Ad *prob.* N. A. Citato loco mors fumitur pro necessitate moriendi. *Eo quippe die*, ait S. Augustinus Lib. XIII. de Civit. Dei, Cap. XXIII, *mutata in deterius vitiataque natura, atque a ligno vitæ separatione iustissima, mortis in eis etiam corporalis necessitas facta est, cum qua nos necessitate nati sumus.* Hinc Symmachus citata verba ita interpretatus est: *Quocunque die comederis de ligno hoc, mortalis eris.* Quam interpretationem laudant S. Hieronymus Lib. Quæst. Hebraic. in Genesin, Cap. II. & Theodoretus Quæst. XXXVIII. in Genesin.

Rationem.

700. Objio. II. Ratio. Corpus Adami constabat ex elementis perpetuo inter se pugnantis. Ergo tandem aliquando moriendum illi fuisset, etiamsi non peccasset. Ergo mors corporis non est pœna peccati, sed naturali hominis conditioni est tribuenda. R. C. A. D. C. Ergo moriendum illi tandem aliquando fuisset, si consideretur nuda naturæ conditio, C. C. Supposita gratuita promissione Dei, qua Adamo non peccanti immortalitatem corporis pollicitus fuerat, N. C. Atque hac ratione vere dicimus, mortem fuisse Adamo pœnam admisi criminis: nisi enim peccasset, in illo felici statu permanens a morte fuisset immunis. Quem
admo.

admodum Sauli, ante electionem & promotionem ad regnum, pœna non erat regno carere; at postquam regno potitus est, magna profecto fuit pœna & ipsum & filios regno privari.

71. *Objic. III. Sequela.* Si Adam a Deo immortalis creatus fuisset, sequeretur eum v. g. aquis suffocandum non fuisse, si in illas præcipitem se egisset: neque moriturum, quamvis omni cibo abstinuisset. Atqui hæc perabsurda & incredibilia sunt. Ergo. R. N. M. Adam id agendo graviter peccasset, tentando Dominum, Deique mandatum transgrediendo, qui Gen. Cap. II. præcepit ei dicens: *Ex omni ligno paradisi comedere.* Cum igitur ex observantia mandatorum Dei penderet immortalitas primi hominis, Adamus absque rationabili causa amittendæ vitæ periculo proximo se exponens, atque a cibis ad hunc finem a Deo paratis abstinens, graviter deliquisset, mortique, quam Apostolus stipendium peccati vocat, haud dubie succubuisset.

72. *Objic. IV. Mors B. Mariæ Virginis.* Beatissima virgo Deipara, quamvis juxta comminissimam veramque Catholicorum Doctorum sententiam peccatum originale numquam contraxerit, a morte tamen non fuit immunis. Ergo mors corporis non est pœna peccati originalis. R. C. A. N. C. B. Virgo Deipara mortis debitum non persolvit ob peccatum quod contraxit; sed ob peccatum Adami, prout illud erat personale, ac physice proprium Adami; cum mors sit effectus proximus peccati ipsius primi parentis, ob quod justissime meruit, ut ipse & sua posteritas spoliarentur a Deo dono gratuito immortalitatis. Vide dicta superius Numero 58.

CONTROVERSIA IV.

AN BEATA VIRGO DEIPARA ABSQUE ORIGINALI
MACULA CONCEPTA FUERIT?

73. Equidem hæc controversia, quam pertractandam suscepimus, supremo Ecclesiæ judicio nondum ita decisa est, ut contrariæ sententiæ patroni aut hæreticis

T. IV. Theol. Dogm. Pol.

E

ad-

adnumerari, aut aliqua Theologica censura perstringi a nobis possint, aut debeant: quia tamen hanc passim a Dogmaticæ Theologiæ tractatoribus solide propugnatam invenio, operæ pretium esse existimavi illustrem hanc ac pervagatam quæstionem Theologiæ Polemicæ Studiosis paulo uberius exponere, ut Mariana gloria splendidius emicet, tantaque pulchritudine illecti, omnes Divinam Matrem, perfectissimum illud Sanctissimæ Trinitatis Opus, ac Sacrarium, intimo cordis affectu prosequantur, atque unice in oculis gerant.

Prænotanda.

74. Ne in limine quæstionis offendamus, notandum est duplicem distingui hominis conceptionem. Una est inchoata ac feminalis, quæ aliud non est, quam coagumentatio materiæ in utero matris, aptæ ad inchoandum fœtum. Altera est consummata, quæ vitalis seu animalis dicitur, quando nimirum in corpusculum jam factis præparatum ad eliciendas vitales operationes, infunditur a Deo creante rationalis anima: atque idcirco animatio etiam appellatur. In præsentī itaque controversia non loquimur de conceptione inchoata ac feminali; cum enim sola anima sit capax peccati, certum atque exploratum est, peccatum originale ante creationem animæ rationalis a nemine contrahi posse: sed tantum sermo nobis est de conceptione consummata ac vitali; an videlicet Dei Genitricis anima in primo instanti creationis atque infusionis in corpus, fuerit ex speciali Dei gratia ac privilegio, intuitu meritorum Jesu Christi, a macula originalis peccati præservata. Dixi I. *In primo instanti creationis atque infusionis.* Quod enim in secundo instanti, aut saltem ante nativitatem mundata fuerit, facile etiam a contrariæ sententiæ patronis admittitur, eoquod Ecclesia Nativitatem B. Mariæ velut sanctam colat. II. *Ex speciali Dei gratia ac privilegio, intuitu meritorum Christi.* Cum enim Deipara per ordinariam generationis viam ex Adamo ortum traxerit, certumque sit, Christum omnium hominum, nullo excepto, redemptorem esse, necessario dicendum est, Beatissimam Virginem de se, præscindendo a speciali

Dei gratia, & meritis Christi Domini, obnoxiam futuram fuisse peccato originali.

75. Neque dicas cum Erasmo Roterodamo, totam hanc de immaculata B. Virginis conceptione quæstionem, inutilem esse ac supervacaneam, eoquod parum aut nihil intersit, si dicatur B. Virginem exiguo tempore, aut etiam unico momento peccato originali maculatam fuisse, ac postea mundatam. Ut enim nihil dicam de summis Pontificibus & Ecclesiæ Præsulibus, Doctõribus, universi Catholici orbis Academiis, de Imperatoribus, Regibus, Principibus, qui omnes in Immaculatæ Conceptionis tutelam & cultum ea qua valent authoritate, studio, animique contentione incumbentes, illam gravissimi momenti rem esse factis ipsis abunde contestantur, optabilius Beatæ Virgini fuisset concipi filiam adoptivam Dei, & non servam diaboli vel unico etiam temporis momento, quam concipere hominem Filium Dei naturalem, & esse Dominam Angelorum. Quis igitur inficias ibit, gravissimi momenti esse quæstionem hanc, fuerit ne a tanto malo immunis sanctissima Dei Genitrix?

76. Conclusio. Beatissima Virgo absque originali macula concepta, atque in primo creationis suæ instanti sanctificata est. Prob. I. Authoritate Ecclesiæ. Universalis Ecclesia cultum publicum, Sacrificium & Officium Canonicum præcipit & exhibet in honorem Sanctitatis Conceptionis B. Mariæ, seu in honorem ipsius Deiparæ, ratione sanctitatis in primo instanti suæ creationis. Ergo Deipara in primo creationis suæ seu animationis instanti fuit sancta, adeoque peccatum originale non contraxit; cum illud in eodem instanti stare non possit cum gratia sanctificante: alioquin duo contradictoria in eodem instanti darentur, gratia sanctificans nempe, ejusque privatio. P. A. Authoritate Pontificum, præcipue Alexandri VII. paulo inferius adducenda, atque ex ipsis verbis divini Officii, quod ea die recitandum est. *Cum jucunditate Conceptionem B. Mariæ celebremus. Gloriosæ Virginis Mariæ Conceptionem dignissimam recolamus. Sentiant omnes tuum juvamen, qui-*

Immunitas B. V. M. a culpa originali ostenditur authoritate Ecclesiæ,

cunque celebrant tuam Sanctam Conceptionem. P. C. Certum est, Ecclesiam instituere & decernere non posse cultum sacrum & religiosum, præcipue Sacrificii & Officii divini, publice & universaliter exhibendum in honorem alicujus personæ tamquam Sanctæ, quæ Sancta vere non fuerit, sed peccato infecta: alias præciperet cultum materialiter saltem superstitiosum; siquidem cultum religiosum illi decerneret, qui cultu dignus non est. Ergo cum Ecclesia universa die VIII. Decembris Marianæ Conceptioni cultum exhiberi decreverit per Officii divini recitationem, & Missæ celebrationem, Mariana Conceptio vere Sancta est, atque ab origina-
ria noxa immunis.

Quæ sicut Nativitas, ita etiam B. M. Conceptioni publicum cultum deferret 77. Quanti ponderis sit hoc argumentum, luculenter colligitur ex S. Augustino, qui Sermone II. in Nat. S. Cypriani scribit: *Quando natus est, ignoramus; & quia hodie passus est, natalem ejus hodie celebramus: sed illum diem non celebraremus, etsi nossemus: Illo enim die traxit originale peccatum; isto autem die vicit omne peccatum.* Patres & Doctores posteriorum temporum Nativitatem B. Mariæ Sanctam, atque a peccato immunem fuisse ex eo potissimum evincunt, quod Ecclesia nativitatem B. Mariæ celebret. S. Ildephonsus Toletanus, aut ut Mabillonio & Lucæ Acherio videtur, S. Paschasius Radbertus Lib. de Parturitione Virginis scribit: *Enim vero si non beata esset & gloriosa, (Nativitas B. Mariæ) nequaquam ejus festivitas celebraretur ubique ab omnibus; sed quia tam solemmniter colitur, constat ex Autoritate Ecclesiæ, quod nullis, quando nata est, subjacuit delictis.* S. Bernardus Epist. CLXXIV. ad Canonicos Lugdun. *Non fallitur omnino Sancta Ecclesia, Sanctum reputans ejus natiuitatis diem, & omni anno cum exultatione universæ terræ votiva celebritate suscipiens.* S. Thomas III. Parte, Quæst. XXVII. Art. II. *Ecclesia celebrat Nativitatem B. Virginis: non autem celebratur festum in Ecclesia, nisi de aliquo Sancto. Ergo B. Virgo in ipsa sua natiuitate fuit Sancta: fuit ergo in utero sanctificata.* S. Bonaventura in III. Sententiarum, Dist. III.

III. Quæst. I. Art. III. *Dicendum, quod pro indubitato habet hoc Ecclesia, videlicet quod B. Virgo fuerit in utero sanctificata: Et illud ex hoc patet, quod ejus Nativitatem tota Ecclesia celebrat; quod non faceret nisi sanctificata esset.* Eidem fundamento institerunt Petrus de Tarantasia, postea Innocentius V. in III. Dist. III. Quæst. I. Art. I. Henricus Gandavenss Tom. II. Quodlib. XV. Quæst. XIII. Alexander de Ales III. parte Summæ Theologicæ, Membro II. Quæst. IX. Art. IV. Durandus a S. Portiano in III. Sentent. Dist. III. Quæst. II. aliique. Ex quo manifeste colligitur, etiam si aliqui Patres, vel Doctores negassent immaculatum Virginis conceptum, hodie tamen si viverent, viderentque festum Conceptionis, perinde ac Nativitatis, vel Assumptionis, ab universa Ecclesia celebrari, eos absque ulla dubitatione, ob manifestam doctrinæ consecutionem, sententiam nostram ut certissimam fore amplexuros.

78. Prob. II. *Authoritate Patrum, apud quos quamvis hæc propositio disertis verbis non reperiatur, B. Virgo caruit peccato originali: eoquod hæc quæstio nondum exorta fuerit; certatim tamen, Patres præcipue Græci, Beatissimam Virginem vocant Immaculatam, omni semper macula carentem, omnibus modis Sanctam, Cherubinīs ac Seraphinis longe puriorem, solam sine omni peccato, terram numquam maledictam &c.* Quæ verba significant eam non veniali tantum, verum etiam originali peccato caruisse; alias non esset sola sine omni peccato, cum etiam infantes baptizati nulla culpa personali sint inquinati: neque esset immaculata, siquidem originali noxa fuisset vitata; cum apud Latinos, atque antiquum Græcum interpretem in Psalm. CXVIII. apud S. Chrysostomum Tomo V. immaculatus is dicatur, *qui omni scelere, flagitio Et sorde liber est.* Neque Angelis fuisset purior, qui nec originali, nec personali peccato umquam fuere inquinati. Integrōs Patrum textus exhibet Benedictus Piazza in præclaro Opere, cui titulus: *Causa Immaculatæ Conceptionis B. V. Mariæ*, Actione II. Artic. III. Ex Latinis Patribus duo tantum testi-

*Authori-
tate Pa-
trum.*

testimonia profero. S. Ambrosius Sermone XXII. in Psalm. CXVIII. de B. Virgine scribit: *Virgo per gratiam, ab omni integra labe peccati.* S. Augustinus Lib. de Natura & Gratia, Cap. XXXVI. postquam docuit, ex peccato originali factum esse, ut nemo etiam sanctissimus, sit absque omni peccato actuali, ab hac communi sorte excipit Beatissimam Virginem his verbis: *Excepta Sancta Virgine Maria, de qua, propter honorem Domini, nullam prorsus, cum de peccatis agitur, haberi volo questionem. Inde enim scimus, quod ei plus gratiæ collatum fuerit ad vincendum omni ex parte peccatum, quæ concipere ac parere meruit, quem constat nullum habuisse peccatum.*

*Præcipue
S. Augu-
stini.*

79. Neque dicas, Augustinum hic a solis peccatis personalibus B. Virginem excipere. Nam I. hæc exceptio, *cum de peccatis agitur*, est omnino generalis. II. Virgini, ait, plus gratiæ collatum fuisse ad vincendum omni ex parte peccatum. Atqui Deipara non omni ex parte peccatum vicisset, siquidem aliquando peccatum originale contraxisset. III. B. Virginem ait excipiendam esse *propter honorem Domini.* Honor autem Domini non minus originalis, quam personalis culpæ immunitatem in Matre sua postulare videtur. IV. S. Augustinus ex peccato originali colligit ac deducit illam impotentiam moralem, quæ inest singulis hominibus, vitandi omnia & singula peccata venialia. *Propterea*, inquit Lib. V. contra Julianum, Cap. XV. *nihil est hominum, præter ipsum, (Christum) qui peccatum non fecerit grandioris ætatis accessu; quia nullus est hominum, præter ipsum, qui peccatum non habuerit infantilis ætatis exortu.* Ergo cum eam gratiam B. Virgini collatam fuisse concedat, qua omni ex parte vinceret peccatum actuale, sive personale, supponit pariter, negatam ei non fuisse gratiam illam, qua vitaret peccatum originale.

*Autori-
tate Tri-
dentini.*

80. Prob. III. Autoritate Conciliorum. In Tridentino plerique Patres, teste Ambrosio Catharino in Disputatione pro veritate Immaculatæ Conceptionis

tionis, suffragium suum dederunt, ut speciale Decretum ederetur de Immaculata B. V. Conceptione. Editum tamen non fuit ob instantissimas preces paucorum Episcoporum, & Theologorum O. P. Sessione autem V. ad finem Decreti de peccato originali addita fuit hæc declaratio: *Declarat tamen hæc sancta Synodus, non esse suæ intentionis comprehendere in hoc Decreto, ubi de peccato originali agitur, Beatam & immaculatam Virginem Mariam, Dei Genitricem; sed observandas constitutiones felicitis recordationis Sixti Papæ IV. sub pœnis in eis constitutionibus contentis, quas innovat.* Hæc declaratio, quamvis in antiquioribus aliquot sex primarum Sessionum editionibus non inveniatur, legitima tamen, atque unanimi Patrum omnium consensu approbata, ut testantur Ambrosius Catharinus l. c. Dominicus Sotus Commentario in Epist. ad Romanos Cap. V. Alphonsus Salmeronius, ac Petrus Canisius, qui omnes Concilio interfuerunt; legiturque in editione Mediolanensi anni 1548, atque in Romana totius Concilii editione jussu & autoritate Pii IV. adornata, omnibusque posterioribus editionibus. Jam vero Tridentina Synodus per hanc B. Virginis exceptionem declaravit, suæ intentionis non esse Dei Genitricem comprehendere in illa sua generali doctrina, ex Scripturis, Patribus, Conciliis, & Ecclesiæ judicio eruta de peccato originis in omne genus humanum transfuso, ac per regenerationis lavacrum expiando. Sensit ergo Concilium ea omnia facta tectaue manere, tametsi B. Virgo excipiat: secus Tridentinum declarationem illam adjiciendo, Catholicam Scripturarum, Patrum, Conciliorum, & Ecclesiæ de originali peccato doctrinam, quam in eo Decreto se tradere profitetur, minus sincere & integre nobis exposuisset. Unde fit per hanc Tridentini Concilii declarationem erepta esse adversariis arma omnia, quibus immaculatam Deiparæ Conceptionem ex Scriptura, Patribus, & Ecclesiæ judicio folide impugnare queant; magnumque piæ sententiæ emolumentum accessisse, quod Tridentinum Constitutiones Sixti IV. innovaverit, ac confirmaverit.

*Et Pontifi-
cum, Sixti
IV.*

81. Prob. IV. Autoritate Pontificum. Sixtus IV. A. 1476. Constitutionem edidit, cujus initium, *Cum præcelsa meritorum insignia*, in qua Conceptionis festum autoritate sua solemniter instituit, nondum authentica atque indubia Sedis Apostolicæ autoritate firmatum, easdemque devote festum Conceptionis celebrantibus concessit indulgentias, quas lucrari possunt fideles festo Corporis Christi, Missamque & Officium peculiare designavit cum hac oratione: *Deus, qui per immaculatam Virginis Conceptionem, dignum Filio tuo habitaculum præparasti; concede quæsumus, ut sicut ex morte ejusdem Filii tui prævisa, eam ab omni labe præservasti: ita nos quoque mundos ejus intercessione ad te pervenire concedas.* Atque hæc oratio per centum fere annos a Sixti IV. ad Pii V. usque tempora in Ecclesia Catholica usurpata est. A. 1482. altera Constitutione, *Grave nimis gerimus, & molestum*, damnavit & reprobavit Sixtus IV. hujusmodi assertiones eorundem Prædicatorum, & aliorum quorumlibet, qui affirmare præsumerent, eandem Sanctam Romanam Ecclesiam de spiritali dumtaxat conceptione & sanctificatione ejusdem Virginis gloriosæ festum celebrare; & eos, qui crederent & tenerent, eandem Dei Genitricem ab originalis peccati macula in sua conceptione præservatam fuisse, propterea alicujus hæresis labe pollutor fore. Atque, ut in tertia Constitutione A. 1483. ejusdem ferme tenoris additur, *vel mortaliter peccare, aut Officium Conceptionis celebrantes, seu hujusmodi sermones audientes alicujus peccati reatum incurrere; utpote falsas & erroneas; & a veritate penitus alienas: editosque desuper libros prædictos id continentes, quoad hoc autoritate Apostolica, tenore præsentium reprobamus, & damnamus.* Prædicatores dein Verbi Dei, qui ausu temerario docuerint has propositiones damnatas veras esse, aut dictos libros pro veris legere, tenere, vel habere præsumpserint, vult excommunicationem incurrere Sedi Apostolicæ reservatam. Simili pænæ ac censuræ subjicit eos, qui ausi fuerint asserere, contrariam opinionem tenentes, videlicet gloriosam Virginem Mariam cum originali pecca-

*peccato fuisse conceptam, hæresis crimen, vel peccatum in-
cuerrre mortale; cum nondum sit a Romana Ecclesia & Apo-
stolica Sede decisum.*

82. S. Pius V. A. 1568. Conceptionis festum in *S. Pii V.*
Romano Breviario & Ecclesiastico Calendario stabiliter
collocavit inter alia festa, ab Ecclesia Dei universa di-
vinis Officiis de præcepto celebranda. Officium vero
Conceptionis sub Sixto IV. editum suppressit, data Fran-
ciscanis Patribus tantummodo facultate illud recitandi;
non quod in eo aliquid reprobatione dignum invenerit,
sed ut omnia ad pristinum morem reduceret, &
conformem toti Ecclesiæ præciberet publicarum pre-
cum rationem: eo enim tempore varia circumfereban-
tur de Conceptione B. Virginis Officia, Leonardi de
Nogarolis, Bernardini de Bustis, Francisci Quignonii,
Roberti Gaguini &c. Ex tot igitur Officiis peropportu-
num judicavit S. Pius V. primævum illud seligere,
& recitandum præscribere, quod Abbati Helsino cæli-
tus præscriptum fuerat, juxta ritum & formam Nati-
vitatatis, mutato tantum *Nativitatis* nomine in *Conceptio-
nis*. Quapropter S. Pius V. non obscurasse, sed illu-
strasse censendus est cultum Conceptionis. Sicut enim
Ecclesia in festo Nativitatis B. Mariæ non illius sancti-
ficationem, quocunque demum tempore contigerit, de-
votè celebrat, sed ipsam ejus Nativitatem tamquam
sanctam colit: ita etiam in festo Conceptionis non ce-
lebrat sanctificationem B. Mariæ pro quacunque tem-
poris differentia, sed ipsam ejus Conceptionem tam-
quam sanctam & immaculatam veneratur.

83. Paulus V. A. 1616. sub pœnis & censuris in *Pauli V.*
Bulla Sixti IV. contentis gravissime omnibus prohibuit,
ne quis audeat in publicis concionibus, lectionibus,
conclusionibus, & aliis quibuscunque actibus publi-
cis asserere, quod eadem Beatissima Virgo fuerit conce-
pta in peccato originali. Gregorius XV. A. 1622, *Gregorii XV.*
quia scandala, dissensiones ac discordiæ in populo Chri-
stiano ortæ sunt ob sententiam piæ contrariam, ampli-
avit & extendit Decretum Pauli V. etiam ad privata
colloquia & scripta, *Mandans & præcipiens omnibus &
singulis*

singulis supradictis, ne de cætero, donec articulus hujusmodi a Sede Apostolica definitus, vel per Sanctitatem suam & Sedem Apostolicam fuerit aliter ordinatum; neque etiam in sermonibus & scriptis privatis audeant asserere, quod eadem Beatissima Virgo fuerit concepta cum peccato originali; nec de hac opinione, affirmative aliquo modo agere, seu tractare: exceptis tamen, quibus a Sancta Sede Apostolica fuerit super hoc specialiter indultum. Indulsit autem Dominicanis eodem anno 1622. XXVIII. Julii, Ut in quibuscunque privatis eorum colloquiis, seu conferentiis, inter se dumtaxat, & non inter alios, aut cum aliis, de materia ejusdem Conceptionis B. M. V. disserere & tractare, absque ullo pœnarum, in dictis Decretis contentarum incursu, libere & licite possint. Idem Gregorius XV. sub gravissimis pœnis censurarum &c. omnibus & singulis personis Ecclesiasticis, tam sæcularibus quam regularibus præcepit, ut in Sacrosancto Missæ Sacrificio, ac divino Officio celebrandis, tam publice quam privatim, non alio quam *Conceptionis* nomine uti debeant. Dominicani enim voci *Conceptionis* aliam subrogaverant, nempe *Sanctificationis*: quo facto satis ostendebant, non coli a se animationem B. Mariæ, sed mundationem illius a peccato originali per gratiam sanctificantem.

84. Jam vero ex Gregoriano hoc Decreto colliges
 I^{mo}. Contrariæ sententiæ humanum omne commercium interdictum esse, omnemque illi ademtam esse facultatem seu publice seu privatim, seu voce seu scripto comparendi: ita ut sola pia sententia tam publice quam privatim, tam ore quam calamo, semper & ubique audiatur. II. Quod contraria sententia non debuisset tam rigido silentio mulctari, siquidem illa Ecclesiasticæ disciplinæ & Christianæ pietati omni ex parte foret consentanea. III. Quod Gregorius XV. præcipiens, ut in divinis Officiis ac Missæ Sacrificio *Conceptionis* nomine omnes utantur, hoc ipso præcipiat, ut omnes ipsam Deiparæ Conceptionem, utique tamquam sanctam & immaculatam venerentur & celebrent; cum nemini fas sit, in iis præsertim quæ ad religiosum

sum cultum spectant, aliud in ore, aliud in mente & corde habere, simulando se colere quod revera non colit. IV. Absurde omnino ab aliquibus dici, *Conceptionis* nomen esse indifferens ad utramque sententiam: aut nomine *Conceptionis* intelligi *Sanctificationem*, quocunque demum instanti eadem contigerit. Hac namque ratione omnes Pontificum sanctiones eludi facile possent, comminiscendo, aliam verbis significationem a Pontificibus tributam fuisse. Numquid enim absurdum non est dicere, vocabularium Ecclesiasticum a Gregorio XV. reformatum fuisse, nomenque Conceptionis, quod antea primam B. Virginis animationem significabat, in divinis Officiis longe aliud significare coepisse, quin Pontifex clare & expresse fideles moneret de mutato a se Conceptionis significatu, ne eos in errorem induceret? Numquid si Conceptio sanctificationem pro quocunque instanti significaret, non inepte egisset Gregorius, adversariis severissime prohibendo, ne amplius verbo Sanctificationis, sed Conceptionis in Missa & Officio utantur? Numquid Catholicos Reges Philippum III. & IV. insigniter non ludificasset Gregorius, qui per Oratorem suum postulaverant a Pontifice, ut in celebrando Mysterio Conceptionis omnes juberentur ritum, vocem, & sensum Ecclesiae usurpare, nec cuiquam in posterum liceret sub sanctificationis, aut alterius cujusquam vocis varietate ab ea discrepare?

85. Alexander VII. A. 1661. Constitutionem edidit, cujus initium est, *Sollicitudo omnium Ecclesiarum.* In hac Pontifex ita loquitur: *Nos considerantes . . . volentesque laudabili huic pietati, & devotioni, & festo, ac cultui secundum illam exhibito in Ecclesia Romana, post ipsius cultus institutionem nunquam immutato, Romanorum Pontificum Prædecessorum nostrorum exemplo favere; nec non tueri pietatem & devotionem hanc colendi & celebrandi Beatissimam Virginem, præveniente scilicet Spiritus Sancti gratia, a peccato originali præservatam . . . Constitutiones & Decreta a Romanis Pontificibus Prædecessoribus nostris,*

Et Alexandri VII.

stris, & præcipue a Sixto IV, Paulo V, Gregorio XV. edita in favorem sententiæ asserentis, animam B. Mariæ Virginis in sui creatione, & in corpus infusione, Spiritus Sancti gratia donatam, & a peccato originali præservatam fuisse, nec non & in favorem festi, & cultus Conceptionis ejusdem Virginis Deiparæ secundum piam istam sententiam, ut præfertur, exhibiti; innovamus, & sub censuris & pœnis, in eisdem Constitutionibus contentis, observari mandamus. Hac itaque Constitutione declarat Alexander, non ea definiendo tamquam Ecclesiæ dogmata, sed ita asserendo, ut pro certis atque exploratis apud fideles sint habenda, Imo. Romanam Ecclesiam olim celebrasse festum Conceptionis, ut immaculatæ, & ab originali peccato immunis. II. Hoc festum, & hunc cultum Conceptionis olim exhibitum in Ecclesia Romana, post ipsius cultus institutionem, numquam immutatum fuisse: Objectum festi Conceptionis, quod Romana Ecclesia celebrat, ipsam esse Deiparæ, ab originali peccato præservatæ, Conceptionem immaculatam, quod Catholicus Rex Philippus IV. in libello supplici enixe postulabat a Pontifice declarari. Quatenus, aiebat, declarare dignetur suo speciali decreto, motivum, seu objectum prædictæ festivitatis esse, & fuisse gratiam primi instantis, in quo creata fuit Sanctissima Virginis anima, ab originali peccato præservata. III. Sanctam Apostolicam Sedem, per Romanos Pontifices, prædecessores suos, sensui & cultui Immaculatæ Conceptionis, secundum piam sententiam, constanter favisse, atque in hunc scopum Conceptionis festum instituisse, Officium ordinasse, Indulgentias concessisse, Religiosos Ordines & Confraternitates approbasse, vocem tam publicam quam privatam adversariis eripuisse, divinaque Officia sub uno Conceptionis titulo ac nomine celebrari jussisse. Illud præterea observo, si quid in Constitutionibus ac Decretis, Prædecessorum suorum conniventia, datum fuisset contrariæ sententiæ, Alexandrum VII. hac sua Constitutione innovare ac confirmare minime voluisse, dataque opera idcirco abstinuisse a clausula illa, quam
Pau-

Paulus V. & Gregorius XV. adjecerunt, *de præjudicio contrariæ sententiæ non inferendo, præterquam quoad supra disposita.*

86. Prob. V. Autoritate Theologorum & Academicarum. A Sæculo XIII, quo primum in Scholis agitari cœpit hæc quæstio, ad Sæculum usque XV. præter Henricum Gandavensem, Ægydium Columnam, Durandum a S. Portiano, Alvarum Pelagium, & Gregorium Ariminensem, qui in adversariorum castris militarunt: piam sententiam invicte propugnarunt Joannes Duns Scotus, Petrus Aureolus, Franc. de Mayronis, Joannes Bafsolius, Guilielmus de Rubione, Petrus de Aquila Scotellus, Thomas de Argentina, Franc. Martini, Petrus de Alliaco, Joannes Charlier Gersonius, Joannes de Segovia, Alphonsus Tostatus, Nicolaus Cusanus, Guilielmus Vorri longus, Nicolaus Orbellus, Dionysius Richel Carthusianus, Jacobus de Valentia, Gabriel Biel, Pelbartus de Temesvar, Ambrosius Spiera, Marsilius ab Inghen, Joannes Trithemius. Priorem sententiam immaculatæ Conceptioni adversantem retractarunt, piæ adhærentes, B. Albertus Magnus in Bibliis Marianis, & in Quæstionibus super *Misus est*, Quæst. XXXI. & Quæst. CLXXVII. Petrus Paludanus Enarratione I. in Evangelia de Tempore, part. Hyem. S. Bonaventura Serm. I. & II. de B. V. M. & parte II. Opuscul. de VII. gradibus contempl. Richardus de Media villa Lib. de Conceptione B. V. ut refert Wadingus Lib. de Scriptoribus Ord. Minorum, Nicolaus Lyranus in Cap. IV. Libri III. Esdræ, & in Cap. IV. Epist. I. ad Thessalon. Joannes Baconius in IV. Sentent. Dist. II. Quæst. II. Art. III. & IV. Richardus Armacanus Serm. de Conceptione B. M. Avenione habito in Conventu Carmelitarum A. 1342. ut testatur Thomas Waldensis Tomo III. de Sacramentalibus, Cap. LXXXIX. Cuinam sententiæ S. Thomas Doctor Angelicus adhæserit, paulo inferius examinabimus. A Sæculo XV. ad nostra usque tempora, nullos invenire est Theologos alicujus nominis, nisi solos, etsi non omnes, Sacri Ordinis Prædicatorum Magistros, Capreolum,

*Au-
thoritate
Theo-
logorum.*

lum, Turrecrematam, Bandellum, Cajetanum, Spinam &c. qui adversus immaculatum Virginis conceptum calumum strinxerunt.

*Et Academia-
miarum.*

87. Theologos Marianæ innocentiae vindices secuta sunt Academia. Parisiensis Facultas Theologica jam Anno 1387. Joannis de Montesono O. P. XIV. solemni ritu proscripsit propositiones, quatuorque ex illis, nempe X. XI. XII. XIII. quibus significabatur, *B. Virginem non contraxisse originale peccatum, esse expresse contra fidem, vel contra Sacram Scripturam*, pronuntiavit esse revocandas, tamquam falsas, scandalosas, & piarum aurium offensivas, ac presumptuose assertas. A. 1497. eadem sacra Facultas Parisiensis solemni juramento se obstrinxit defendendi semper Conceptionem B. M. V. ab originali peccato immunem; statuitque neminem deinceps Facultatis sacra Collegio adscribendum esse, nisi se hujus religiosæ doctrinæ strenuum propugnatorem semper pro viribus futurum simili juramento profiteretur. Academia Coloniensis A. 1499. hanc ipsam doctrinam suis præscripsit. A. 1501. Academia Moguntina. A. 1617. Complutensis, Compostellana, Cæsaraugustana, Granatensis, Toletana &c. nemini Theologicum gradum conferre decreverunt, nisi tactis Evangeliiis promitteret, reciperet, sponderetque, se piæ sententiæ semper adhesurum, eamque pro viribus propugnaturum. Idem a reliquis Academicis Germaniæ, Italiæ, Galliæ, Belgii, Hispaniæ, Lusitaniæ, Poloniæ, Hungariæ, facilitatum est; adeo ut vix ulla sit in toto Catholico orbe Academia, quæ immaculatum Virginis conceptum tuendum sibi, propugnandumque non proposuerit. Quanti autem sit ponderis communissima ac gravissima hæc Theologorum, atque Universitatum autoritas, nemo est qui ignoret. Vide Benedictum Piazza tota Actione VII.

*Ex consue-
tudo uni-
versali Fi-
delium.*

88. Prob. VI. ex communissimo sensu ac fere universali Fidelium. Immaculatum Virginis conceptum non Academia solum tuentur ac Theologi, verum etiam Pontifices, Episcopi, Clerus, Imperatores, Reges, Principes, Senatus, Populus: Omnes sacri Ordines,
Domi-

Dominicanos si demas, Benedictinus, Carthusianus, Cisterciensis, Cælestinus, Præmonstratensis, Augustinianus, Seraphicus, Carmeli, & Societatis Jesu &c. Adeo ut in hac causa merito locum habeat illa S. Augustini sententia Epist. VII. nunc CXLIII. ad Marcellinum: *Neque enim ut videamus quam hoc sit verum, Scripturarum autoritas necessaria est, ac non sensus ipse communis ita verum esse perspicua ratione proclamat, ut quisquis contradixerit, dementissimus habeatur.* Et Epist. XCIX. nunc CLXIV. ad Evodium: *Ecclesia fere tota consentit: quod eam non inaniter credidisse credendum est, undecunque hoc traditum sit, etiamsi canonicarum Scripturarum hinc expressa non proferatur autoritas.* Quanti faciendus sit fidelium consensus, satis ostendit Joannes Cassianus Lib. I. de Incarnatione Christi, Cap. VI. scribens: *Sufficere ergo solus nunc ad confutandam hæresin deberet consensus omnium: quia indubitatae veritatis manifestatio est autoritas universorum; Et perfecta ratio facta est, ubi nemo dissentit: ita ut, qui contra hoc sentire nitatur, hujus prima statim fronte non tam sit audienda assertio, quam damnanda perversitas.* Quia præjudicium secum damnationis exhibuit, qui iudicium universitatis impugnat: *Et audientiae locum non habet, qui a cunctis statuta convellit.* Profecto verisimile non est, permissurum fuisse Spiritum Sanctum, ut universa ferme Ecclesia in re tanti momenti decipiatur: immo credendum est, ex illius inspiratione hunc universorum ferme fidelium sensum affectumque mansisse. Neque hujus auctoritatem infirmat perpaucorum dissensus: ubicunque enim communi consilio & deliberatione res agitur, quod omnes fere, paucissimis tantum exceptis, sentiunt atque decernunt, id omnium simpliciter consilio ac deliberatione ratum sanctumque habetur. In iis quippe rebus, quarum iudicium ab aliqua universitate pendet, universitas non arithmetice, sed moraliter æstimanda est. Cum igitur Christus suam & Spiritus Sancti præsentiam universæ promisit Ecclesiae, ne in rebus ad fidem & religionem spectantibus a vero aberraret, de Ecclesia locutus est uni-

universa, non arithmetice sed moraliter æstimata; ne sua promissio cavillationibus pateret, & deludi facile posset. Præterea si obnoxius foret errori hujusmodi communis Catholicæ Ecclesiæ sensus, cui perpauci tantum resistunt, argumentum ex eo deductum nullam umquam haberet vim ad refellendos novos errores in Ecclesia Dei subortos. Dicerent enim eorum authores & sectatores, nondum ab Ecclesiæ communione aperta defectione separati, contrarium sibi non esse unanimum totius Ecclesiæ sensum, cum & ipsi sint pars Ecclesiæ. Plura argumenta congerunt Theologi Marianæ gloriæ vindices, a quibus consulto abstinemus, ne nimis prolixi simus. Vide Card. Cælestinum Sföndrati in Innocentia vindicata.

Antiquitas cultus Immaculatæ Conceptionis.

89. Quæres I. An antiquus sit Immaculatæ Conceptionis cultus in Ecclesia Dei? R. affirmative. Et quidem in Græca Ecclesia celebratam fuisse Conceptionem Deiparæ jam Sæculo V. clare colligitur ex Typico S. Sabbæ Abbatis, id est, ex ordine recitandi Officium per totum annum; die enim IX. Decembris signatur *Conceptio S. Annæ, Matris Deiparæ*, quo nomine Græci intelligunt conceptionem activam S. Annæ, & passivam Deiparæ. Sæculo VII. S. Andreas Cretensis Canones & Triodia composuit pro Ecclesiasticis Officiis Græcorum. Primus horum Canonum hunc habet titulum: *Die IX. Decembris Conceptio Sanctæ, ac Dei Avicæ Annæ. Tuam hodie, Religiosa Anna, celebramus conceptionem, quod absoluta sterilitatis vinculis, eam utero conceperis, quæ eum potuit capere, qui nusquam capi potest.* Sæculo IX. plures a Patribus Græcis habitæ sunt orationes, sive homiliæ ad populum de immaculata Conceptione B. M. nempe a Georgio Nicomediensi, S. Petro Argorum Episcopo, & Leone VI. Philosopho, Imperatore CPolitano. Sæculo X. Conceptionem B. M. in universa Ecclesia Græca solemnem fuisse patet ex Menologio, jussu Basilii junioris ante annum 984. conscripto, in quo V. Idus Decembris, more Græcorum, notatur *Conceptio S. Annæ Matris Genitricis Dei.* Sæculo XII. Marianæ Conceptionis Festum in to-

to Navarra regno sanctum ratumque fuisse ostenditur ex Collectaneis de Vita & veneratione S. Veremundi Abbatis apud Bollandi Continuatores in Actis SS. Tomo I. Martii. Solemnitatem hanc in Anglia celebriorem fuisse constat tum ex Epistolis Nicolai Monachi ad Petrum Abbatem Cellensem: tum ex Vita Gaufridi Abbatis Monasterii S. Albani, qui, teste Matthæo Paris, Conceptionem Deiparæ in cappis festive celebrari statuit. In Gallia quoque, præcipue in Ecclesia Lugdunensi propagatum fuisse hunc cultum, testatur Epistola S. Bernardi CLXXIV. ad Canonicos Lugdunenses. Idem de Flandria, Hannonia, Diocesisibus Namurcensi & Leodiensi, ac finitima Germania ostendunt diplomata Principum, ac instrumenta authentica. Sæculo XIII. S. Bonaventura Magister Generalis Seraphici Ordinis, Pisis in Comitibus Generalibus Anno 1263, teste Wadingo Tom. II. Annal. Ord. Minorum, *statuit, ut hæ novæ festivitates admitterentur in Ordine, videlicet Conceptionis B. V. Mariæ, Visitationis ejusdem &c.* Sæculo XIV. Statuto Synodali Ecclesiæ Cameracensis, & Concilii Provincialis Londinensis mandatum est, ut tamquam festivum & solemne celebraretur Festum Conceptionis, idemque præscriptum est a Synodo Suefionensi Anno 1334. Celebrabatur pariter Avenione Festum Conceptionis a Romana Curia cum frequentia Cardinalium, solemni Missa & sermone in Ecclesia Fratrum Carmelitarum, ut testatum reliquerunt insignes duo Carmelitani Theologi Joannes Baconius, & Franc. Martini. Eandem Conceptionem ab Universitatibus quoque Parisiensi, Oxoniensi, & Cantabrigiensi celebratam fuisse, edito in hanc rem decreto, refert idem Baconius Tomo II. in Lib. IV. Sentent. Dist. II. Quæst. IV. Art. III. Anno 1378. Synodus Cæsaraugustana decrevit, ut Festum Conceptionis B. M. tam ab Ecclesiasticis quam a populo quot annis celebraretur, quiescendo ab omni opere servili. A. 1388. Fratres Prædicatores in Galliis adacti fuerunt, Regis autoritate, ad propositiones Joannis de Montessono publice revocandas, & Festum Conceptionis B. M.

celebrandum, ut refert Spondanus Tomo I. Continuation. Annal. Ecclesiast. Baronii, ad annum 1387. Num. VII. Anno 1394. Joannes I. Aragoniæ Rex idem Festum in omnibus regnis suis ac provinciis celebrari iussit. Sæculo XV. Synodus Basileensis, quæ lucidum quandoque intervallum habuit, Sess. XXXVI. Festum Conceptionis B. M. ab universa Ecclesia celebrandum constituit. Sixtus IV. Anno 1476, hujus festivitatis institutioni Apostolicæ firmitatis robur adjecit, edita Consuetudine, *Cum præcelsa &c.* Missam quoque & Officium, propria ac peculiaria, pro eo festo devotius celebrando instituit; & hæc recitantibus vel audientibus easdem prorsus indulgentias, & peccatorum remissiones largitus est, quas Urbanus IV. Missam, & Horas Canonicas in Festo Corporis Christi recitantibus, vel audientibus indulserat. Sæculo XVI. Anno 1568. S. Pius V. Festum Conceptionis Deiparæ in Calendario Breviarii Romani a se reformati collocandum mandavit; eique Officium instar Officii Nativitatis ejusdem B. Virginis assignavit, atque ab omnibus Ecclesiasticis recitari iussit. Sæculo XVII. Anno 1602. Clemens VIII. Conceptionis Festum ad ritum duplicis majoris, Anno vero 1693. Innocentius XII. ad ritum duplicis secundæ classis cum Octava evexit, atque ab universa Ecclesia servari mandavit. Sæculo XVIII. Anno 1708. Clemens XI. Conceptionem Deiparæ inter festo dies de præcepto ab universa Ecclesia servandos retulit. Anno 1742. Benedictus XIV. die Immaculatæ Conceptioni sacro Capellam Pontificiam in Liberiana Basilica quot annis in perpetuum celebrari constituit. Fusius hæc enarrat Benedictus Piazza in Causa Immaculatæ Conceptionis B. M. V, Actione III. Articulo II. Paragr. I.

Pia sententia est strictè moraliter certa.

90. Quæres II. An pia sententia probabilitatis limites excedat? R. piam sententiam non modo probabilem, aut opposita probabiliorem, verum etiam strictè moraliter certam esse, adeo ut omne prudens dubium de opposito excludat, ut patet expendenti probationes, & rationum momenta, quibus sententiam nostram

stram communivimus. Pia etenim sententiæ aperte suffragatur authoritas Ecclesiæ, Festum Immaculatæ Conceptionis solemnitè instituentis ac celebrantis: favor Patrum, Tridentini Concilii, ac Pontificum Romanorum a Sixto IV. ad nostra usque tempora: consensus non populorum modo, verum etiam Doctorum, Academicarum, Religiosorum Ordinum, atque Episcoporum: pietas singularis omnium ordinum erga immaculatam Deiparæ conceptionem: invicta cum Assumptione & Nativitate B. Mariæ paritas. Quæ omnia certitudinem pariunt, non illam quidem fidei propriam, vere tamen ac stricte Theologico-moralem.

91. Neque dicas I. Si paritas rite institui posset inter Festum Conceptionis & Nativitatis, eum qui Deiparam absque macula conceptam fuisse negat, erroris ac temeritatis arguendum esse, æque ac qui sanctam fuisse ejus Nativitatem it inficias. II. Contrariæ sententiæ, cui omnis probabilitas adimitur, censuram inuri, contra Pontificias Constitutiones. Nam R. ad I. Inter illam de sancta Nativitate, atque hanc de Immaculata Conceptione B. Mariæ sententiam hoc tantum discrimen intercedere, quod Theologi sententiam Nativitatis sanctitati contrariam temeritatis & erroris impune damnare possint: at vero opinionem immaculato conceptui adversantem nulla Theologica censura afficere valeant, Sede Apostolica justis de causis id graviter prohibente. Hæc tamen prohibitio certitudini piæ sententiæ minime officit; quia non impedit, quominus Sedes Apostolica præcipiat colere, & universalis Ecclesia colat, non tamquam mere probabilem, sed tamquam simpliciter veram, Marianæ Conceptionis sanctitatem, quam Alexander VII. Anno 1662. in disputationem, vel in dubium revocari severissime prohibuit. Ad II. R. Dum contrariam sententiam absolute improbabilem dicimus, nullam ei censuram inurimus, quia improbabilitas non est censura Theologica.

92. Quæres III. An fieri possit, ut pia sententia *Neque amplius a Sede Apostolica* quocunque tempore a Sede Apostolica damnetur tamquam hæretica, vel peccaminosa? R. negative. *de Apostolica dam-* Cum

*non potest
tamquam
hæretica,
vel pecca-
minosa.*

enim Sixtus IV. damnaverit tamquam falsum, erroneum, & a veritate penitus alienum, quod pia sententia fit hæresis, vel materiam contineat peccati mortalis: hoc ipso definivit tamquam certum, certitudine falsæ conclusionis Theologicæ propria, quod sententia docens, Dei Genitricem ab originalis peccati macula in sui Conceptione præservatam fuisse, non sit hæresis, nec materiam contineat peccati mortalis. Ergo pia sententia numquam damnari potest a Sede Apostolica, tamquam hæretica vel peccaminosa: neque contraria unquam definiri potest tamquam de fide. P. A. Damnatio unius propositionis, servata proportionem, est definitio alterius contradicentis. Ergo sicut hoc ipso, quod Ecclesia damnet propositionem aliquam tamquam hæreticam, alteram contradicentem definit tamquam de fide: ita hoc ipso, quod Ecclesia damnet aliquam propositionem tamquam erroneam, alteram contradicentem definit tamquam conclusionem Theologicam, cui error opponitur.

93. Probatur etiam Conseq. Imi enthymematis. Judicium Pontificis in ferendis censuris propositionum, ad fidem vel mores spectantium, est infallibile; non solum quando declarat propositionem aliquam esse hæreticam, verum etiam quando declarat propositionem aliquam esse erroneam vel scandalosam. Ergo judicium Sixti IV. retractari amplius non potest. P. A. tum ex constanti Theologorum doctrina, qui oppositum censent falsum esse & erroneum: tum etiam ratione solidissima. Ecclesia Pastorem suum ex Cathedra loquentem semper tenetur audire, cum de rebus ad fidem & mores spectantibus ab eo instruitur. Si ergo Pontifex in iis aliquando erraret, tota in errorem induceretur Ecclesia, quod fieri non posse certo nobis constat ex Christi promissionibus. Id ipsum in præsentia materia admitti debet etiam ab illis, qui solius Romani Pontificis judicium infallibile non esse autumant ante acceptionem Ecclesiæ: Siquidem Oecumenica Synodus Tridentina has ipsas Sixti IV. Constitutiones approbavit, atque innovavit Sessione V.

94. Neque dicas, ex Sixtina Constitutione nihil evinci, quod in illa excommunicationis sententiam ipso facto incurrere dicantur etiam illi, qui ausi fuerint asserere, contrariam opinionem tenentes, videlicet gloriosam Virginem Mariam cum originali peccato fuisse conceptam, hæresis crimen, vel peccatum mortale incurrere. Hæc enim censura non cadit in ipsam asseritionem, quæ a Sixto IV. damnata non fuit ut falsa, erronea, aut a veritate aliena, sicut damnata fuit assertio adversariorum; sed cadit in assertores, qui hac pœna a Pontifice mulctantur, quod in hoc Religionis negotio Judicis munus sibi arrogent; cum tamen pia sententia nondum sit a Romana Ecclesia decisa.

95. Quæres IV. An ratum & honestum sit votum tuendi usque ad sanguinem immaculatum Deiparæ conceptum? R. affirmative. Prob. assertio I. Votum hoc versatur circa rem stricte moraliter certam, atque indubitata, quæ cum Religione nostra connectitur. Ergo objectum hujus voti pertinet ad virtutem Religionis, præscindendo etiam a voto. Ergo votum hoc non potest non esse Deo acceptum. II. Licitum, honestum ac Deo gratum est votum fundendi sanguinem pro virginitate tuenda: mortem oppetendi ex charitate in obsequio peste infectorum: moriendi in servandam patris, vel matris vitam. Ergo cum certum sit, cultum Immaculatæ Conceptionis esse pium, & virtutis opus, votum illam tuendi etiam fuso, si opus fuerit sanguine, honestum est, Deoque acceptum. III. Defendenti piam sententiam non aliunde imminere potest periculum amittendæ vitæ, nisi ab homine perditissimo, qui in contemptum voti, & legis Pontificiæ (neque enim alia mens prudenter præsumi potest,) mortem intentet, nisi serio ille asserat, B. Virginem in peccato originali conceptam fuisse. Quo casu, cum hic contemptus sit intrinsece malus, mors utique ab omnibus est eligenda. IV. Qui hoc votum emisit, firmissime sibi persuadet, piam sententiam esse veram. Ergo si metu mortis impulsus, B. V. Mariam in originali peccato conceptam fuisse diceret, contra mentem loque-

Votum illam tuendi usque ad sanguinem est pium et laudabile.

loqueretur, falsum crimen Sanctissimæ Dei Genitrici affingeret, ac veluti falsum testimonium in eam diceret. Præstat autem millies vitam dare, quam eandem mendacio, falsa criminatione, aut falso testimonio turpiter redimere. Atque hæc ratio ostendit, non solum voventi, sed etiam cuicunque firmiter piæ sententiæ assentienti obligationem impositam esse, eam defendendi usque ad sanguinem, defensione scilicet negativa, id est, eam non abnegandi.

Argumenta contraria refutantur.

Adversarii frustra ad Scripturas provocant.

96. Objicitur I. Autoritas Scripturarum, quæ absque ulla limitatione asserunt omnes peccasse. Ad Rom. Cap. III. *Omnes peccaverunt, & egent gloria Dei.* Et Cap. V. *In quo (Adamo) omnes peccaverunt &c.* R. I. Gen. Cap. III. omnibus mulieribus in Eva dicitur: *Multiplicabo ærumnas tuas, & conceptus tuos: in dolore paries filios.* Ecclesiastici Cap. XL. *Omnia quæ de terra sunt, in terram convertentur.* Jacobi Cap. III. *In multis offendimus omnes.* III. Reg. Cap. VIII. v. 46. *Non est homo, qui non peccet.* Proverb. Cap. XXIV. *Septies cadet justus, & resurget.* Ecclesiastis Cap. VII. v. 21. *Non est enim homo justus in terra, qui faciat bonum, & non peccet.* I. Joan. I. v. 8. *Si dixerimus quoniam peccatum non habemus; ipsi nos seducimus, & veritas in nobis non est.* Neque tamen ullus adversariorum asserere audet, B. V. Mariam puerperii dolores expertam esse, corpus illius in cineres redactum esse, aut peccatis personalibus inquinatam fuisse. Igitur si textus hi in sensu accomodo sumuntur, cur non & illi, qui originariam noxam in omnes homines fuisse diffusam asserunt? R. II. Si textus hi etiam B. Virginem includerent, Tridentinum nullam habuisset rationem non comprehendendi in suo Decreto de peccato originali B. Virginem: neque Ecclesia Festum instituisset Immaculatæ Conceptionis. Cujusnam autem auctoritate magis standum est in interpretandis Scripturis, Ecclesiæ ne universalis, an paucorum Theologorum,

a quorum sententia totus propemodum orbis Catholicus abhorret? Certe universales hæ Scripturarum propositiones non includunt omnia omnino individua. illud præsertim, quod, ut juridica utar phrasi, speciali nota dignum est, quodque, vel ob solam Matris Dei dignitatem, exceptionem meretur.

97. Dices I. Juxta Scripturas Christus pro omnibus mortuus est, & dedit semetipsum redemptionem pro omnibus. Ergo etiam Deipara mortua est, & a Christo redempta. Atqui si absque originali peccato concepta est, neque mortua, neque redempta fuisset a Christo. Ergo. R. C. A. D. C. Ergo Deipara a Christo redempta non est, redemptione reparativa, seu remissiva peccati, C. C. Redemptione præservativa, N. C. Quemadmodum B. Virgo a personalibus peccatis, ita etiam ab originali redempta est, redemptione mere præservativa, quæ longe nobilior & excellentior est reparativa, eoquod a pluribus malis liberet. Porro ne quis divisionem hanc redemptionis in reparativam ac præservativam, velut novam, atque in favorem piæ sententiæ a posterioribus Theologis excogitatam eriminetur, clare eam in Scripturis ac S. Augustino exprimi ostendimus. Psalmo CXLIII. v. 10. dicitur: *Qui redemisti David servum tuum de gladio maligno: eripe me.* Ubi Regius Psaltes loquitur de gladio Goliathi, a quo cæsus quidem non fuit, fuisset tamen cadendus, nisi Deus ictum avertisset. Porro sermonem ibi esse de gladio Goliathi, ostendit ipse titulus Psalmi, qui inscribitur, *adversus Goliath.* Psalmo LXXXV. v. 13. dicitur: *Quia misericordia tua magna est super me: Et eruisti animam meam ex inferno inferiori.* In quem sane infernum numquam decedit David; erat tamen præcipitandus, nisi Deus ipsum ab hoc lapsu præservasset. S. Augustinus Enarratione in Psalm LXXXV. scribit: *Nescio quis habens causam molestam, mittendus erat in carcerem: venit alias, defendit eam: gratias agens quid dicit? Eruisti animam de carcere. Suspendendus erat debitor, solutum est pro eo: liberatus dicitur de suspendio. In his omnibus non erant; sed quia talibus meritis agebantur,*

ut

ut nisi subventum esset, ibi essent, inde se recte dicunt liberari, quod per liberatores suos non sunt permisi perduc. Similia habet Lib. de Natura & Gratia, Cap. LXVII. & Lib. II. Confessionum, Cap. VII. Agnovit eam etiam S. Thomas II^{da} II^{da} Quæst. CVI. Art. II.

98. Dices II. Ille omnium iudicio censeretur hæreticus, qui doceret, aliquem determinatum hominem non contraxisse peccatum originale, eoquod Scriptura contrarium de omnibus hominibus testetur. Ergo etiam piæ sententiæ patroni saltem non conformiter Scripturis loquuntur, quando ab hac labe Deiparam eximunt. R. cum Bellarmino Lib. IV. de Amis. gratiæ, & statu peccati, Cap. XVI. N. A. & Conseq. Fides Catholica id solum requirit, ut credamus, omnes homines qui per carnalem generationem ex Adamo nascuntur, ex eodem trahere originale peccatum, nisi forte singulari privilegio a communi lege quis excipiat. Proinde cum ad singulos descenditur, non erit continuo hæreticus, qui hunc aut illum hominem in peccato originali conceptum fuisse negaverit: sed tamen temere id negabit, & jure præsumetur hæreticus, nisi probabiles attulerit rationes, cur singulare illud privilegium in hunc vel illum hominem convenire censuerit. At vero piæ sententiæ patroni solidissimis atque invictis rationibus innocentiam Virginis comprobant, cum tamen pro aliis ne probabiles quidem afferri queant.

Et Patres. 99. Objic. II. Autoritas Patrum. Patres Græci & Latini, præcipue Augustinus, passim solum Christum a peccato originali excipiunt: carnem B. Virginis vocant carnem peccati: Deiparam ajunt a Christo sanctificatam, mundatam, purgatam fuisse. Ergo piæ sententiæ Patribus tam Græcis quam Latinis adversatur; R. præter dicta Num. 78. ex Patribus primorum X. sæculorum, quos longissima serie recensere solent adversarii, ne unicum quidem reperiri, qui vel expresse tradat, Deiparam originali peccato infectam fuisse, vel id ab anterioribus Patribus traditum esse referat. Testimonia itaque Patrum ab adversariis referri solita, qui-

quibus dicitur, solum Christum a peccato originali excipi, asserimus in sensu accommo accipienda, atque ab ipsis etiam adversariis limitanda esse. Idem quippe Patres dicunt, non tantum omnes homines, præter solum Christum, concipi, verum etiam nasci cum peccato: solum Christum non ab originali tantum, verum etiam a personali peccato immunem esse. Atque hanc doctrinam tamquam inconcussum fidei Catholicæ dogma tradunt; oppositam vero tamquam hæresin manifestam explodunt, ut patet ex S. Augustino Lib. II. de peccat. meritis, Cap. XXXV. Lib. VI. contra Julianum, Cap. IV. & S. Fulgentio Lib. de Fide ad Petrum, Cap. XXVI. Quis autem adversariorum dicere audeat, Nativitatem Deiparæ sanctam non fuisse, B. Virginem peccata actualia commisisse, piam sententiam hæreticam esse, præcipue cum Sixtus IV, & Concilium Tridentinum hanc ipsam assertionem erroneam esse declaraverint, & a veritate penitus alienam? Patres igitur tantummodo contra hæreticos contendebant, juxta legem communem omnes homines, præter Christum, subesse peccato originali, & solum Christum ratione suæ Conceptionis, eoquod non ex commercio viri & mulieris natus fuerit, ab eo incurrendo fuisse immunem, immo ab ipso etiam debito illud incurrendi. Sic autem intellecta ejusmodi testimonia piam sententiam non tangunt. Non enim dicimus B. Virginem ex communi lege, aut ratione suæ Conceptionis; sed ex privilegio & gratia singulari, ob merita Christi, exemptam fuisse a noxa originali.

100. Porro hanc fuisse mentem Patrum colligitur I. ex errore Pelagianorum, quem nervis omnibus evertere conabantur Patres. Pelagiani enim non contendebant, ex singulari Dei privilegio, unum aliquem hominem, præter Christum, originariam noxam non contrahere; sed ex ipsa lege naturæ nullum hominem revera nasci aut concipi cum peccato originali. Satis ergo erat Patribus asserere, omnes homines, præter Christum, spectata lege communi & naturali eorum propagatione ex Adamo, contrahere peccatum originale, Colli-

*Quorum
mens ex
errore Pe-
lagii, &
scopo est
dignoscen-
da.*

Colligitur id II. ex scopo, ad quem collineabant Patres in adstruendo peccato originali: nempe ut contra Pelagianos gratiæ Dei hostes evincerent, Christi redemptionem, & gratiam Dei per Christum omnibus omnino necessariam esse, ut a peccati captivitate liberentur. Cum igitur Augustinus alique Patres omnes homines, præter unum Christum, peccato subijciunt, de subjectione & captivitate loquuntur sive in re sive in debito, quam omnes homines incurrunt, præter unum Christum, qui solus virtute suæ conceptionis redemptione non indiguit. Ergo cum Beatissima Virgo, quamvis originale peccatum non contraxerit, redemptione indiguerit præservativa, Patres nullam habere rationem asserendi, quod eadem originali peccato actu aliquando fuerit inquinata. Vide Ven. Petrum Canisium Lib. I. de Maria Deipara, Cap. VII.

101. Quod si quæras, cur ergo Augustinus expressis verbis ac dilucide B. Virginem a peccato originali immunem fuisse non asserit? R. I. Cur ergo Augustinus de peccato originali agens, totque alios sanctos viros originali peccato inquinatos memorans, nunquam in eorum numero ponit Virginem Beatissimam? cum tamen id Augustini causæ maxime opportunum fuisset. Nam & istâ originali peccato corruptâ, nulla amplius Pelagianis ratio superfuisset alios, ac præcipue filios Patriarcharum excipiendi. R. II. Deiparam id circo ab Augustino nominatim non excipi, tum quia jam semel pro semper eam exceperat Lib. de Natura & Gratia, Cap. XXXVI. *Excepta Sancta Virgine Maria, de qua propter honorem Domini nullam prorsus, cum de peccatis agitur, haberi volo quæstionem*: tum ne Deiparam sæpius nominatim excipiendo Pelagianis ansam daret cavillandi, dicendique, legem illam non esse universalem.

Quo sensu
carnem
Deiparæ
carnem
peccati vo-
carint.

102. Patres, quando carnem Deiparæ appellant *carnem peccati*, intelligi nec possunt, nec debent de formali originis peccato. I. Quia peccatum originis non est in carne, sed in anima. II. Quia carnem peccati appellant, priusquam anima in ipsam infusa fuerit, ut patet

patet ex S. Augustino Lib. II. de peccat. meritis & remis. Cap. XXXVI. III. Quia iidem Patres hanc appellationem carni Deiparæ convenisse significant ipso etiam Dominicæ Incarnationis tempore, ut loquuntur S. Augustinus Lib. II. de peccat. meritis & remis. Cap. XXIV. & S. Fulgentius Lib. de Incarnatione & Gratia, Cap. VI: neque tamen ullus Patrum censuit, B. Virginem usque ad id tempus originali peccato infectam fuisse. Igitur per carnem peccati nihil aliud intellexere, quam carnem per carnalem concupiscentiam ex femine utriusque parentis propagatam: quæ concupiscentia effectus est peccati originalis, & nisi singulare Dei privilegium intercedat, via est, qua transfundatur in factum, cum primum animatur, peccatum originale. Sicut igitur in Scripturis ipsa concupiscentia peccatum dicitur, quia ex peccato est, & ad peccatum inclinat: ita etiam caro Deiparæ per concupiscentiam parentum propagata, *caro peccati* a Patribus appellatur.

103. Neque negotium nobis aliquod facessit, quod Patres Deiparam sanctificatam fuisse a Deo dicant, mundatam, purgatam: aut quod indiguerit sanctificatione, mundatione aut purgatione. Quando enim Patres dicunt B. Virginem vel absolute, vel in utero Matris sanctificatam, commode intelliguntur de sanctificatione, prout illa est motus in sanctitatem, de non Sancto negative in Sanctum, hoc est, de sanctificatione, quæ illi contigit in primo animationis suæ instanti, ita ut simul existere cœperit, & esse sancta, ac proinde ab originali peccato immunis. Cum vero Patres indicant, B. Virginem sub ipsum Dominicæ Incarnationis tempus sanctificatam fuisse, necessario intelliguntur de sanctificatione, quæ sit motus de minori in maiorem sanctitatem. Quare falsum omnino est, quod hæc vox *Sanctificatio* ex sua propria notione denotet præcedens peccatum quod deleat, ut optime jam observarunt S. Thomas III. Parte, Quæst. VII. Art. IX. ad II. & Alexander de Hales III. Parte Summæ Theologicæ, Quæst. IX. memb. I. Artic. II. Aliàs quomodo Christus

Et Deiparam sanctificatam, ac mundatam fuisse asseruerint?

stus de se ipso dicere potuisset Joan. Cap. X. v. 36. *Quem Pater sanctificavit?* Eadem pariter ratione, qua sanctificatio, multiplex quoque est emundatio, vel purgatio. Una, quæ quod immundum erat, a præjacentibus fordibus mundat: altera quæ de non mundo negative facit mundum, hoc est, quæ, quod simpliciter non erat, facit ut mundum & purum existat. Tertia denique emundationis & purgationis species est, promotio a minori ad majorem munditiam, seu perfectionem. Præterea dupliciter potest quis emundatione indigere: uno modo, ut mundetur a fordibus, quibus jam inquinatus erat: alio modo, ut præservetur a fordibus, quibus contrahendis erat obnoxius. Et qui hoc modo purgatur, vere ac proprie a fordibus emundatus dicitur: sicut qui præservatur ab imminente captivitate, vere ac proprie a captivitate redemptus dicitur. Ubique igitur Patres Deiparam mundatam vel purgatam fuisse dicunt, rectissime intelliguntur vel de illa emundationis specie, quæ ipsam de non munda negative fecerit mundam, vel de munda mundiozem; vel certe de mundatione præservativa, quæ ipsam a labe alioquin incurrenda præstiterit illæsam. Atque id circo Mariam *præpurgatam* & *præmundatam* fuisse asserunt S. Gregorius Nazianzenus Orat. XXXVIII. in Christi Nativit. S. Germanus CPolitanus in Theoria rerum Ecclesiasticarum, Tomo X. Biblioth. PP. & S. Nicephorus CPolitanus in Epistola ad Leonem III. Papam.

104. Dices. Vincentius Bandellus de Castro novo CCC. testimonia Patrum, & antiquiorum Doctorum contra piam sententiam allegavit in suo libro de singulari puritate & prærogativa Conceptionis Christi. Melchior Canus fidenter ponuntiat, Sanctos omnes, qui in hujus rei mentionem inciderunt, uno ore asseverasse, B. Virginem in originali peccato conceptam fuisse. Idem ante Canum affirmaverat Cardinalis Cajetanus. Ludovicus Antonius Muratorius, Estensis Bibliothecarius, qui sub ementito nomine Lamindi Pritanii, Lampridii, & Valdesii delitescit, sancte testatur, se exquisivisse

in

in scriniis Patrum, & ne unum quidem reperisse piæ sententiæ assertorem. R. Vincentium Bandellum plurimos in eo libro adduxisse Patrum textus absque delectu, temere vitiatos ac corruptos, aut certe ad evincendum maculatum B. Virginis conceptum nequaquam idoneos. Hinc mirandum non est, Cajetanum, & Canum, Bandelli malis artibus deceptos, conficta ac vitiata Patrum testimonia pro veris & genuinis habuisse. Caterum quæ Estensis Bibliothecarius, facta diligenti pervestigatione, nescio quo fato, in Patrum scriniis reperire non potuit testimonia, felicius a pluribus Theologis inventa sunt, atque a Benedicto Piazza in Causa Immaculatæ Conceptionis, Actione II. Artic. III. atque Act. VI. Art. II. ordine chronologico omnium conspectui exposita.

105. Objic. III. Authoritas S. Bernardi, & S. Anselmi Cantuariensis. S. Bernardus, cum Lugdunenses Caonici in Galliis Anno 1136. solemni ritu Festum Immaculatæ Conceptionis celebrarent, gravem ad eos Epistolam dedit, ordine CLXXIV, eosque ob novum hunc in ea Ecclesia cultum reprehendit scribens: *Ante quidem apud aliquos errorem compereram; sed dissimulabam, parcens devotioni, quæ de simplici corde, & amore Virginis veniebat. Verum apud sapientes, & in famosa, nobilique Ecclesia, & cujus specialiter filius sum, superstitione deprehensa, nescio an sine gravi offensa etiam vestri omnium dissimulare potuerim.* Demum de ipsa Conceptione disserens, *Restat, ait, ut post conceptum, in utero jam existens, sanctificationem accepisse credatur; quæ, excluso peccato, sanctam fecerit Nativitatem, non tamen & Conceptionem.* II. S. Anselmus Cantuariensis Lib. II. Cur Deus homo, Cap. XVI. scribit: *Virgo ipsa, unde assumptus est (Christus,) est in iniquitatibus concepta, & in peccatis concepit eam Mater ejus; & cum Originali peccato nata est: quia & ipsa in Adam peccavit, in quo omnes peccaverunt.* Ergo.

Adversariis non favet S. Bernardus.

106. R. I. S. Bernardum l. c. non loqui de conceptione vitali, seu animatione fœtus, quam solam

san-

sanctam & immaculatam fuisse contendimus; sed de primo conceptu hominis, cum videlicet parentum sanguis in materno utero commiscetur, & primæ fibræ ducuntur humani fœtus. Patet id I. ex primorum Scholasticorum consensu, Alexandri de Hales, B. Alberti Magni, S. Thomæ, ac S. Bonaventuræ, qui citata S. Bernardi verba ad eum dumtaxat scopum adducunt, ut probent B. Virginem ante animationem sanctificari non potuisse. Atque ita Bernardum intellexere quam plurimi etiam recentiores, Bivarius, Manriquez, Sfondrati, Piazza, Sianda in Lexico polemico &c. Patet id II. ac præcipue ex toto contextu citatæ Epistolæ, in qua S. Bernardus ita argumentatur: Si B. Virgo fuit Sancta in sua conceptione, vel quia fuit sanctificata ante primum instans organizationis, vel in primo instanti organizationis. Non primum; nam B. Virgo non potuit ante primum instans sanctificari, quia nondum existebat: non secundum affirmari potest; quia primum instans organizationis fuit illud ipsum, quo parentes B. Virginem generarunt: non potuit autem B. Virgo sanctificari eo instanti, quo parentes eam generarunt, quia cum libidine generarunt. Ubi manifeste vides Bernardum loqui de conceptione feminali, totumque argumentum subruere dicendo, B. Virginem neque ante primum instans, neque in ipso instanti organizationis fœtus; sed in primo instanti animationis, seu infusionis animæ in corpus fuisse sanctificatam; eoquod ante animationem nec peccatum, nec sanctitatem habere potuerit, cum peccatum & sanctitas non corpus inanime, sed animam, seu hominem ex corpore & anima compositum afficiant. Proinde non coli a nobis Conceptionem feminalem B. Mariæ, sed formalem & vitalem. Vide Simonnet Tract. V. de Peccatis, Disp. V. Art. VII.

107. R. II. S. Bernardus idcirco præcipue reprehendit Canonicos Lugdunenses, quod inconsulta Romana Ecclesia, quæ illo tempore Conceptionem non celebrabat, Festum hoc instituerint. *Nam si sic videbatur, inquit, consulenda erat prius Apostolicæ Sedis a-*
thori.

thoritas, & non ita præcipitanter atque inconsulte paucorum sequenda simplicitas imperitorum. Præterea in eadem Epistola scribit: *Hæc mihi de illa cantat Ecclesia, & me eadem docuit decantare. Ego vero, quod ab illa accepi, securus & teneo, & trado. Accepi sane ab Ecclesia illum diem cum summa veneratione colendum, quo assumpta de sæculo nequam, & cælis quoque intulit celebritatem gaudiorum. Sed & ortum Virginis didici nihilo minus in Ecclesia, & ab Ecclesia indubitanter habere festivum atque sanctum, firmissime cum Ecclesia sentiens, in utero eam accepisse, ut Sancta prodiret. Si ergo nostris temporibus viveret S. Bernarpus, cerneretque Conceptionem Deiparæ ab universali Ecclesia celebrari, ut suo ævo Festum Nativitatis & Assumptionis, numquid eam indubitatam haberet, numquid eam securus & teneret, & traderet?*

108. Ad II. R. Allagata verba, non ut a se, sed ut a Bosone suo collocutore & discipulo in eum modum inquirente & argumentante prolata scribit S. Anselmus. Et quamvis ipse respondendo verba illa non corrigat, non ideo tamen illa approbat, sed præmittit; tum quia scopus ejus erat ostendere, Christum ab originali peccato immunem esse, quantumvis etiam de Matre peccatrice conceptus foret: tum quia, ipso nesciente, ab aliquibus festinanter descriptus est liber ille, antequam ultimam ei manum admoveret. Idcirco subjungit S. Anselmus pag. 74. Operum suorum editionis Gerberonianæ: *Plura, quæ tacui, inseruissem, & addidissem, si in quiete & congruo spatio illud mihi edere licuisset.*

Nec Anselmus.

109. Objic. IV. Autoritas S. Thomæ, & Scholæ Thomisticæ. S. Thomas sæpissime suis in libris adversatur piæ sententiæ. In III. Sentent. Dist. III. Art. II. scribit: *Esse sine peccato dicitur esse proprium Christo, quia nec originali, nec actuali peccato fuit unquam infectus. Virgo autem Mater ejus fuit quidem peccato originali infecta, a quo, antequam nasceretur fuit mundata; sed ab actuali peccato omnino fuit immunis.* III. Parte, Quæst.

Neque S. Thomas.

XXVII. Artic. II. *Sanctificatio B. Virginis non potest intelligi ante animationem, nec in instanti animationis, sed post animationem; aliter enim non incurrisset maculam peccati originalis, Et per consequens non indignisset redemptione facta per Christum.* In Expositione Salutationis Angelicæ scribit: *Christus excessit B. Virginem in hoc, quod sine peccato originali conceptus Et natus est; Beata autem Virgo in originali peccato concepta fuit, sed non nata.* II. Sententiam S. Thomæ universa tuetur schola Thomistica. Ergo pia sententia plurimos habet adversarios, ideoque dici non potest stricte moraliter certa. R. S. Thomas pluribus locis Deiparam ab originaria noxa immunem fuisse docet verbis adeo disertis, ut aliam interpretationem omnino respuant. In I. Sentent. Dist. XLIV. Quæst. unica, Art. III. ad III. *Puritas intenditur per recessum a contrario, Et ideo potest aliquid creatum inveniri, quo nihil purius esse potest in rebus creatis, si nulla contagione peccati inquinatum sit: Et talis fuit puritas B. Virginis, quæ a peccato originali Et actuali immunis fuit: fuit tamen sub Deo, in quantum erat in ea potentia ad peccandum.* Parte II. Opusculorum, Opusculo LXI. de Dilectione Dei & proximi, Cap. XXVII. *Facit ergo summus artifex in ostentationem plenioris artis suæ, speculum unum, clarissimo (scilicet Angelico) clarius, Seraphico tersius, Et purius; Et tantæ puritatis, ut purius intelligi non posset, nisi Deus esset, Personam scilicet Virginis Gloriosissimæ, de quo (speculo) Anselmus: Decebat, ut illius conceptio Hominis de Matre purissima fieret, ea puritate, qua major sub Deo nequit intelligi. Atqui si B. Virgo maculam originalem juxta S. Thomam contraxisset aliquando, purior Angelis non foret, possetque aliquid illa purius excogitari.* In Cap. III. Epistolæ ad Galatas, Lect. VI. scripsit S. Doctor: *Mulierem ex omnibus non inveni, quæ omnino a peccatis immunis esset, ad minus originali, vel veniali. Excipitur purissima, Et omni laude dignissima Virgo Maria, quæ omnino a peccato immunis fuit, originali, Et veniali.* Ita antiquiores editiones tantum non omnes habent, quamvis hæc verba

ba in editione Antuerpiensi Anni 1591. & in recentioribus omiffa fuerint. Pia igitur fententia merito dicenda est niti authoritate S. Thomæ: iique omnes, qui in verba Doctoris Angelici iurarunt, piam fententiam tuendo, de utroque, de B. Virgine nimirum, ac de S. Thoma præclare mereri poterunt: neque enim S. Thomas majori fide dignus est, cum Virginem videtur damnare, quam cum eam absolvit.

110. Caterum ne adversarii S. Thomam fibi contradixiffe, aut priorem fententiam revocaffe dicant, ajo textus omnes specie tenus contrarios, qui ex S. Thoma afferri folent, facile conciliari poffe. Nam I. quando S. Thomas dicit Deiparam conceptam fuiſſe in peccato originali, loquitur de conceptione feminali, non vitali. Multi enim antiquiorum Theologorum cenſebant, originale peccatum prius eſſe in fortu inanimato, quam in anima; non quidem per effectum ſuum primarium, qui eſt privatio gratiæ, ſed quoad alios quorum corpus capax eſt, concupiſcentiæ nimirum, maledictionis ac virtutis infectricis, ut patet ex S. Bernardo, S. Anſelmo, atque ipſo S. Thoma, qui III. Parte Quæſt. XIV. Art. III. ad I. ait: *Dicendum quod caro Virginis concepta fuit in peccato originali, & ideo hos defectus contraxit.* Ergo cum nos loquamur de ſola Conceptione formali, ſeu vitali, S. Thomas nobis non eſt contrarius. II. S. Thomas multis locis ait B. Virginem contraxiſſe peccatum originale, non reipſa & in ſe, ſed in debito; aſſertionem enim ſuam probat ex eo, quia ſecus Deipara non indiguiſſet redemptione. Ergo cum S. Thomas ſenſerit ad indigentiam redemptionis ſatis eſſe neceſſitatem, ſeu debitum contrahendi peccatum originale, ut patet ex Ima IIde Quæſt. CVI. Art. II. & in IV. Sentent. Diſt. XLIII. Quæſt. I. Art. IV. ad III, doctrina iſta S. Thomæ intelligenda eſt de peccato a Deipara contracto tantum in debito. III. S. Thomas, quando in III. Parte, Quæſt. XXVII. Art. II. ſanctificationem Deiparæ ait contigiſſe poſt animationem, non intelligit poſterioritatem temporis, ſed naturæ: quia cum ſubjectum proprium gratiæ

tia sanctificantis sit creatura rationalis, infusio gratiæ sanctificantis semper est posterior infusione animæ. Si vero locus ille de posterioritate naturæ non intelligendus esset, inepta foret S. Doctoris illatio. Ex eo namque, quod sanctificatio Deiparæ non fuerit prior tempore ad animationem, perperam inferitur, quod fuerit determinate posterior ad animationem; dari enim potest medium inter hæc duo extrema, nempe quod fuerit simul tempore cum ipsa animatione.

III. Præterea non inanis suspicio est, textus illos, qui ex Operibus Doctoris Angelici contra piam sententiam afferuntur, aliquorum malitia vitiatos fuisse. Ut enim nihil dicam de Ægydio Columna, Sancti Thomæ discipulo, qui castigatorium conscripsit in corruptorem librorum Thomæ Aquinatis, Wilhelmus, Richardus Klapöel, Hervæus Natalis, Guilhelmus Mefselech, Johannes Parisiensis, Guilhelmus Bollionius, Cambertus de Primatiis, omnes ex Ordine Prædicatorum, calamos acuerunt contra corruptores Sancti Thomæ. Profecto omnibus exploratum est, multis ac maximis fraudibus ab aliquibus impugnata fuisse Immaculatam Deiparæ Conceptionem. Conficta fuere miracula, quibus contractam fuisse a B. Virgine originariam noxam comprobabatur: subornatæ revelationes, simulatæ Angelorum & Deiparæ apparitiones, incisa dormientibus stigmata, voces occultis e parietibus velut e nubibus missæ, aliæque quæ a Spondano memoriæ prodita sunt ad Annum 1508. Hæc, pluraque alia vide apud Cælestinum Card. Sfondrati in Innocentia vindicata, Paragr. XI.

Sed quamvis liberaliter adversariis daretur, textus ex S. Thoma afferri solitos, corruptos non fuisse, ac difficulter aliam interpretationem admittere; ex duobus tamen S. Thomæ principiis per solidissimam ac legitimam argumentationem certo deducitur, Conceptionem Deiparæ sanctam fuisse atque immaculatam, eo sensu, quo a piæ sententiæ patronis asseritur. Immo legitur III. Parte, Quæst. XXVII. Art. I. *Ecclesia celebrat Nativitatem B. Virginis: non autem celebratur Festum*
in

in Ecclesia, nisi pro aliquo Sancto. Ergo Beata Virgo in ipsa sua nativitate fuit Sancta. Fuit ergo in utero sanctificata. Subinfero. Ergo cum Ecclesia juxta piam sententiam celebret Conceptionem vitalem, Deipara in primo instanti infusionis animæ in corpus fuit Sancta, adeoque maculam originalem numquam contraxit. Alterum principium habetur II^{da}. II^{da}. Quæst. X. Artic. XII. Maximam auctoritatem habet Ecclesiæ consuetudo, quæ semper est omnibus æmulanda. Et magis standum est auctoritate Ecclesiæ, quam auctoritate Augustini, & Hieronymi, vel cujuscunque Doctoris. Subinfero. Atqui certum est, quod Ecclesia magis faveat piæ sententiæ, quam adversariorum, quibus perpetuum ac rigorosum silentium imposuit. Ergo, vel ipso S. Thoma judice, præponenda est pia sententia.

112. Ad II. N. A. Quamvis satis multi ex Ordine Prædicatorum, præsertim prioribus sæculis, piam sententiam impugnaverint: non defuerunt tamen in hoc celeberrimo Ordine magni nominis Theologi, qui immaculatum Virginis conceptum strenue propugnarunt. Horum, licet non omnium, indiculum exhibemus. B. Albertus Magnus in Bibliis Marianis, & in Quæstionibus super *Misus est*, Quæst. XXXI. S. Thomas in I. Sentent. Dist. XLIV. Quæst. unica, Art. III. ad III, & alibi, ut diximus Num. CIX. Jacobus de Voragine Serm. VII. de Annuntiatione, Tom. I. Serm. de SS; & Serm. III. de Assumptione Tom. II. Nicolaus de Gorran Enarratione in Cap. I. Lucæ v. 28. Joannes a S. Geminiano Concione VI. Armandus de Bello Visu Collatione IV. de Conceptione B. V. Petrus Paludanus Enarratione I. in Evangelia de Conceptione B. M. part. Hyem. Serm. de Tempore. Robertus Holkot Anglus, Comment. in librum Sapientiæ, in Caput XIII. Lectione CLXI. Joannes Thaurer in Sermonibus de Tempore Sermon de Festo Purificationis B. M. Joannes Bromiardus in Summa prædicantium, Artic. IV. Num. XXVIII. S. Vincentius Ferrerius III. parte Sermonum de Sanctis, in Sermon de Conceptione B. M. Joannes Herolt,

*Plures ex
Schola
Thomistica
piæ senten-
tiæ adhe-
serunt.*

seu Discipulus, de Sanctis Serm. V. de Conceptione
 B. M. Leonardus Matthæi de Utino in Sanctuario,
 Serm. de Nativitate B. M. Guilhelmus Pepin Lib.
 de imitatione Sanctorum, & Lib. de Secretis secreto-
 rum. Joannes Viguerius in Institutionibus ad Na-
 turalem & Christianam Philosophiam, Cap. XVIII. Pa-
 ragr. V. de peccato originali, & in Commentario in
 Epist. ad Romanos, parte III. Cap. V. Ambrosius
 Catharinus quatuor opuscula edidit pro immacula-
 ta Conceptione, Tridentum ad Concilii Patres mitten-
 da. Dominicus Soto Comment. in Cap. V. Epist.
 ad Rom. & Lib. IV. Sentent. Dist. V. Quæst. unica,
 Art. II. Petrus Dore in Imagine virtutis, Cap. I. &
 II. Ludovicus Granatensis duabus disertissimis
 concionibus pro Festo Conceptionis, quæ extant To-
 mo I. Concionum. S. Ludovicus Bertrandus in
 Serm. de purissima Conceptione B. Virginis, habito
 Valentia, quem ex ipso autographo descriptum habemus
 apud Nierembergium in Exceptionibus Conc.
 Tridentini, Cap. XXIV. Bartholomæus Medina
 Comment. in III. partem S. Thomæ, ad Quæst. XXVII.
 Art. II. Antonius Navarro Tomo I. Sermonum de
 Sanctis, Sermone de Conceptione. Vincentius Ju-
 stinianus Antistius in Tractatu de Immaculata
 Conceptione SSmæ V. M, in quo scribit, a S. Domini-
 co usque ad sua tempora, Sanctos magnosque viros
 sui Ordinis piæ sententiæ adstipulatos esse, omnesque,
 quotquot sua ætate Dominicanos Concionatores audivit,
 Immaculatam Virginis Conceptionem coram populo præ-
 dicasse. Hieronymus de Lanuza in V. Tomo Ho-
 miliarum super Evangelia, pro Evangelio Festi Conce-
 ptionis. Alphonsus de Cabrera Tomo I. Consi-
 derationum super Evangelia in Adventu. Stephanus
 Mendez Tomo I. de dignitate Matris Dei, Lib. III.
 Cap. XLI. Nicolaus Coeffetau in Tabella inno-
 centiæ & gratiarum. Seraphinus Capponi a Por-
 recta, & Joannes a S. Thoma Commentar. in Sum-
 mam S. Thomæ. Natalis Alexander, qui Tomo
 VIII. Hist. Eccles. Cap. III. Art. XXIII. Scholio IV.

Fratres suos ita alloquitur: *Author sum Fratribus meis Prædicatoribus, ut depositis antiquæ & jam antiquatæ opinionis præjudiciis, cujus tenebras Spiritus Sanctus dispulit (etsi nondum ita plene ac perfecte, ut quæstio ista sit in fidei luce per divinam revelationem Ecclesiæ factam constituta,) communem, piam & Ecclesiasticam sententiam, ac devotionem erga Immaculatam Deiparæ Virginis Conceptionem amplectantur, prædicent, ac propagare studeant. Horum numerum augent quotquot Dominicani jam duobus aut tribus sæculis abhinc Doctoris Theologi insignia consecuti sunt in Catholicis fere omnibus Academicis, quæ neminem ad litterarios gradus admittunt, nisi piam sententiam se defensurum juret.*

113. *Objic. V. Autoritas Clementis XI. Hic in celebri Constitutione Anno 1708. edita, qua Deiparæ Conceptionem ut Festum de præcepto ab omnibus observari præcipit, non appellat Festum Immaculatæ Conceptionis, sed Festum Conceptionis B. M. V. Immaculatæ. Ergo Ecclesia colit quidem Immaculatam Virginem, neutiquam vero Immaculatam Conceptionem. Confirm. Cum Bulla Clementis XI. in quadam Italiæ civitate iterum impressa esset verbis aliquot immutatis, Ut Festum Immaculatæ Conceptionis B. V. Mariæ &c. vehementer ea de re conquestus est Pontifex, ac die XII. Octobris Anno 1709. Ordinario loci mandavit, ut eos acriter reprehenderet, qui typis eam Bullam ita imprimendam curaverant, eamque eum in modum impressam suppressi jussit, & luce publica prohiberi. Ergo. R. C. A. N. C. Ecclesia juxta declarationes & constitutiones Pontificum, ac verba divini Officii, colit B. Virginem non a personali tantum, sed etiam ab originali peccato semper immunem, cultu ab ejus institutione numquam immutato: colit Conceptionem ut Sanctam: ergo colit Conceptionem Immaculatam. Si enim Conceptio vitalis Deiparæ in primo instanti fuisset maculata, neque sancta, neque dignissima appellari posset, falsaque forent illa divini Officii verba: Gloriosæ Virginis Mariæ Conceptionem dignissimam recolamus. Sentiant omnes*

Quam neque Clementis XI. autoritas

omnes tuum juvenem, quicumque celebrant tuam Sanctam Conceptionem. Certe Innocentius XI. Anno 1678. Officium parvum Immaculatæ Conceptionis, quod Raymundus Capisuccus S. Palatii Migister proscripserat, quia apocrypham indulgentiam continebat, non tantum in integrum restituit, & imprimi concessit; verum etiam sponte sua mandavit, ut in novis ejusdem Officii parvi editionibus ad illa verba primæ orationis, *Ut qui nunc tuam Sanctam Conceptionem devoto affectu recolo*, pro majore expressione adderetur: *Ut qui nunc tuam Sanctam, & Immaculatam Conceptionem &c.* Ad confirm. C. A. N. C. Ut enim observat Prosper Lambertinus, postea Benedictus XIV. in suo Commentario de Festis Deiparæ, vocem Immaculatæ Clemens XI. non ad Conceptionem, sed ad B. Virginem referri voluit, ut appareret, ipsum, cum de præcepto observari eam solemnitate juberet, noluisse hanc controversiam supremo ac irrefragabili judicio definire. Hinc mirum non est, quod hanc verborum transpositionem agre tulerit; cum apice non immutato standum sit verbis præscriptis in Constitutionibus Pontificiis, nec immiscenda sint alia pro libito, etiamsi pia & vera.

Neque sequela infirmas.

114. Objic. VI. Sequela. Si pia sententia esset moraliter certa, adversariorum vero improbabilis, sequeretur adversarios peccare gravissime. Atqui hæc sequela sub gravibus pœnis a Pontificibus prohibita est. Ergo. P. M. Qui virum honestum, absque probabili fundamento, adulterii aut alterius criminis arguit, omnium judicio graviter peccare censetur. Ergo etiam qui absque probabili fundamento Deiparam asserit originale peccatum contraxisse, gravissimam illi infert injuriam. R. D. M. Si adversariis videatur ipsorum sententia improbabilis, sicut eadem improbabilis videtur piæ Sententiæ assertoribus, C. M. Si appareat ipsis vere probabilis, aut probabilior, N. M. Potest contingere, ut adversariis, si qui hodie dum dantur, ad generalia Patrum & Scripturarum dicta attendentibus, Magistorum suorum præjudicio præoccupatis, piæ vero sententiæ fundamenta non satis ponderantibus, videatur

tur probabile, in primo instanti infusionis animæ in corpus fuisse Deiparam originali noxa inquinatam. Hinc nos neminem judicamus, aut peccati mortalis reum arguimus, omne iudicium Deo reliquentes. Quod si vero piam sententiam palam reprehenderent, aut in dubium vocare præsumerent, non video qua ratione a peccato mortali, gravique Pontificiarum Constitutionum contemptu excusari queant.

115. Objic. VII. Infirmas Imæ nostræ probationis. Quamvis Ecclesia Festum Conceptionis celebret, certum tamen non est, eam in præcipiendo hoc cultu errare non posse. Ergo pia sententia ex hoc capitenon est moraliter certa. P. A. Quamvis S. Joannes Baptista in originali peccato conceptus, ab eoque tunc primum mundatus fuerit, quando Deipara Elisabetham invisit; Ecclesia tamen Græca solemniter celebravit Conceptionem S. Joannis Baptistæ die XXIII. Septembris, idque Festum Latinis omnibus Martyrologiis vetustioribus, Hieronymi nempe, Bedæ, Adonis, Usuardi, Notckeri, Rabani, inscriptum fuit. Immo Melitæ, atque in aliis Ecclesiis a sacro Ordine militari S. Joannis pendentibus, hodie adhuc celebratur. Ergo. R. N. A. Ad probat. R. quod Ecclesia Græca Conceptionem S. Joannis Baptistæ numquam celebraverit ut sanctam, sed respectu tantum Mysteriorum ad ipsam spectantium, v. g. revelationis ab Angelo factæ Zachariæ &c. At vero Deipara Conceptionem utraque Ecclesia, Latina & Græca, ut sanctam & immaculatam in semet ipsa celebrat. Ecclesia Latina, ac præcipue Romana, Mater & Magistra omnium Ecclesiarum, sacro cultu divinisque Officiis numquam celebravit Conceptionem S. Joannis Baptistæ, quamvis in Martyrologiis annuntiata fuerit tamquam res memoratu digna his verbis: *Conceptio S. Joannis Baptistæ*. Quod de cultu Conceptionis S. Joannis additur Melitæ, atque in aliis Ecclesiis Melitensium Equitum, apertæ falsitatis arguit P l a z z a Act. III. Num. CLXXXVII.

116. Dices I. Quamvis Ecclesia coleret damnatum ut Sanctum, nullus adhuc error formalis in cultum

*Vindica-
tur robur
argumen-
ti, quod ex
authorita-
te Ecclesiæ
petitur.*

tum ipsum caderet. Ergo multo minus id fieret, quamvis Ecclesia Conceptionem Deiparæ peccato originali inquinatam coleret ut Sanctam; cum ab Ecclesia definita non fuerit pia sententia. P. A. Pia intentio Fidelium ultimato fertur in Deum, cujus causa damnatum illum ut Sanctum venerarentur. Ergo proprie non coleretur damnatus. *Confirmat.* Deus adoratur in justis. Ergo fieri non potest, ut error formalis cadat in ipsum cultum. R. N. A. Ad *prob.* C. A. N. C. Cultus noster interior & exterior directe & proxime fertur in illum ipsum Sanctum singularem, quem Ecclesia singulariter, absolute, ac determinate, absque conditione vult coli, ut patet ex Bullis Canonizationum. Si ergo hic singularis homo revera Sanctus non esset, sed damnatus: qui eum coleret, damnatum reipsa coleret, ac proinde error formalis in ipsum cultum caderet. Ad *confirm.* D. A. Quatenus hæc Sanctorum veneratio secundum voluntatem Dei est, C. A. Ita ut hæc adoratio, sive cultus ad solum Deum terminetur, non vero ad hominem justum, N. A. & Conseq. Certe nisi negare velimus Sanctos a nobis coli cultu dulci, admittendum est cultum nostrum directe ac proxime in Sanctos ferri.

117. Dices II. Fideles tenentur adorare hostias, quæ tamquam consecratæ exponuntur: rite colunt reliquias Sanctorum, licet careant certitudine stricte tali, quod hostiæ illæ sint rite consecratæ, quod reliquiæ illæ Sanctorum sint genuinæ. Ergo etiam ab Ecclesia obligari possunt ad colendam Immaculatam Conceptionem, licet certum non sit, eam fuisse immaculatam. R. C. A. N. C. Nam I. Ecclesia numquam præcipit hanc determinatam hostiam esse adorandam, has determinatas reliquias esse colendas; sed tantum adorandas esse hostias rite consecratas, colendasque esse genuinas Sanctorum reliquias. Obligatio igitur adorandi singulas hujusmodi hostias, aut colendi Sanctorum reliquias, quæ communiter pro genuinis habentur, oritur partim ex fide, qua firmissime credimus in quavis hostia rite consecrata contineri Christum, honestum ac
pium

pium esse cultum reliquiarum: partim ex dictamine rectæ rationis præscribentis, illam hostiam esse habendam pro consecrata, illas reliquias pro genuinis, de quarum consecratione, veritate aut identitate, nullum prudens dubium occurrit. Quare si quis error intervenire, non is tribui posset Ecclesiæ, quæ nihil de singularibus hostiis aut reliquiis judicat; sed imbecillitati mentis nostræ, cujus prudentia non semper est conjuncta cum veritate. Contra vero Ecclesia præcipit, ut die VIII. Decembris, juxta piam sententiam, colatur Conceptio Deiparæ ut sancta, adeoque ut immaculata: declaravitque per Alexandrum VII. objectum hujus cultus esse Beatissimam Virginem in primo instanti animationis suæ, præveniente Spiritus Sancti gratia, ab originali præservatam, prohibens per Gregorium XV, ne quis alio in posterum nomine utatur, quam Conceptionis. Ergo si Conceptio non fuisset sancta, error hic Ecclesiæ tribuendus esset. II. Etsi hostia quam adorant fideles, non esset consecrata, aut reliquæ non forent genuinæ, nullus error formalis in cultum ipsum interiorem caderet, sed error dumtaxat materialis immisceretur in exteriori cultu. Ratio est, quia species Eucharisticæ, & reliquæ Sanctorum, sunt res inanimes, nullamque ex se excellentiam habent: hinc per se, & secundum se non sunt capaces adorationis aut cultus; sed tantum ut conjunctæ cum Christo, vel cum eo cujus sunt, eum scilicet in iis apprehendendo. Ergo in eis adoramus Christum, aut Sanctos ut materiam proximam & terminum adorationis; cultusque noster interior, dirigens omne opus exterioris adorationis, in solum Christum, vel Sanctos illos tendit, & notam tantum exteriorem honoris & submissionis speciebus illis, aut reliquiis servamus. Contra vero Deipara ab originali peccato præservata in primo instanti animationis suæ, ex se maximam habet excellentiam: per se, & secundum se est cultu digna, nosterque animus servitutis & submissionis ad illam terminatur. Ergo error formalis in ipsum cultum interio-

teriolem caderet, siquidem illa ab originali noxa non fuisset præservata.

118. Dices III. Argumentum nostrum probat nimium; nimirum piam sententiam posse omnino credi fide divina, præscindendo etiam ab omni privata revelatione. Ergo nihil probat. P. A. Juxta communissimam Theologorum sententiam fide divina credi potest, eum qui rite canonizatus fuit a Romano Pontifice, esse in cælo; eoquod Pontifex errare non possit, quando omnibus fidelibus præcipit cultum alicujus Sancti. Ergo cum Romani Pontifices omnibus fidelibus præceperint cultum Conceptionis Deiparæ, juxta piam sententiam fide divina credi potest, Deiparam esse sine macula conceptam. R. N. A. Ad *prob.* R. ideo fide divina credi posse eum qui rite canonizatus est, Sanctum esse, ac visione intuitiva Dei in cælis frui, quia Pontifex in Canonizatione ultimum ac definitivum judicium tulit, quod talis sit Sanctus, & cum Christo in cælis regnet. Contra vero, Pontifices præcipiendo ut Festum Conceptionis ab omnibus celebretur, numquam tulere ultimum ac definitivum judicium, quod Deiparæ sine originali labe concepta fuerit: immo protestati sunt, nolle se per hoc quidquam definire.

119. Dices IV. Fide divina credendum est, non posse a Pontifice universæ Ecclesiæ præcipi cultum superstitiosum. Atqui si Conceptio B. Virginis non fuisset immaculata & sancta, Pontifices præcepissent universæ Ecclesiæ cultum superstitiosum, seu cultum Mysteriorum, quod numquam contigit. Ergo. R. D. M. non posse præcipi cultum formaliter superstitiosum, illicitum & inhonestum, C. M. Materialiter superstitiosum, subdist. Si objectum illius cultus a Pontifice definia-
tur, C. Si mere declaratum sit, non vero decum, N. M. Et sic dist. minore, N. C. Cultum materialiter superstitiosum a Pontifice præcipi non posse, quamdiu objectum illius cultus suprema atque ultimata sententia non definivit, equidem juxta communissimam Theologorum sententiam, stricte moraliter certum est, non tamen de fide est. Cum igitur Pontifices, præcipue
Ale-

Alexander VII, præcise tantum declararint, minime autem definierint objectum cultus qui Immaculatæ Conceptioni defertur, asserimus piam sententiam stricte moraliter certam esse, non vero de fide.

120. Dices V. Potest probabiliter dici, quod Ecclesia non colat ipsam Conceptionem formalem Deiparæ; sed quod ex ea occasionem tantummodo sumat Deo gratias agendi ob beneficia B. Virgini collata. Ergo ex eo quod Ecclesia Festum Conceptionis Deiparæ celebret, nihil evincitur. P. A. Si Ecclesia coleret Festum Conceptionis formalis, non illud celebraret die VIII. Decembris, sed longe serius. Cum enim anima rationalis formellis infundatur LXXX. primum die a conceptione, sequitur, Deiparam aut XII. fere mensibus in utero B. Annæ fuisse, quod prorsus insolitum atque incredibile est: aut Conceptionem vitalem Februario circiter mense contigisse. Ergo. *Confirmat.* Quamvis Ecclesia colat B. Virginem ad Nives, de Monte Carmelo, de Mercede &c. hi tamen tituli non evaserunt indubitati. Ergo quamvis etiam Ecclesia colat Conceptionem Deiparæ, hujus tamen sanctitas non idcirco est indubitata. R. I. Ergo etiam idem dici poterit de Festo Nativitatis, Assumptionis &c.? R. II. id omnino gratis consingi, neque absque temeritatis nota dici posse post tot editas Summorum Pontificum Constitutiones, in quibus objectum hujus cultus perspicue declaratur. Ad *prob.* N. A. & Consequ. Ecclesia posset Festum Conceptionis formalis VIII. Decembris colere, quamvis illa eadem die non contigerit: quemadmodum celebrat Festum Visitationis II. Julii, licet ex S. Luca aperte colligatur (siquidem juxta communissimam ac fere unanimem Catholicorum Doctorum sententiam, Annuntiationi diem XXV. Martii tribuamus) eandem contigisse Martio exeunte. Consequentia autem cum ratione addita negatur, partim ob auctoritatem Ecclesiæ ea die Conceptionem celebrantis, & revelationem Helsino Abbati factam: partim ob auctoritatem illustrium Medicorum, qui factum humanum vel ipso primæ conceptionis die, vel proximis saltem diebus,

anima rationali donari asserunt. Quæ si etiam ambigua essent, nonne Ecclesia potuit VIII. die Decembris Conceptionem Deiparæ formalem celebrare, eoquod ipsi certo non constet, qua demum die contigerit? Ad *confirm.* O. A. N. C. Etiam si hi tituli falsi forent, non tamen coleretur falsa sanctitas; eoquod Ecclesia non colat illos titulos, sed tantum ex illis occasionem sumat colendi Deiparam. Contrà, si Deiparæ Conceptio maculata fuisset, Ecclesia celebrando Conceptionem, coleret sanctitatem falsam, & peccatum.

A P P E N D I X.

DE DEBITO PROXIMO ET REMOTO PECCATI ORIGINALIS IN DEIPARA.

Quid sit debitum remotum, et proximum? 121. Quæres I. An Virgo Beatissima debitum remotum non habuerit contrahendi peccatum originale. II. An non etiam proximum? Debitum *remotum* est obligatio orta ex naturali descensu ab Adamo prævaricatore, vi cuius descensus omnes, qui ita nascuntur, præscindendo a speciali Dei privilegio & gratia, per se comprehensi fuissent sub pacto illo virtuali a Deo cum Adamo inito. Debitum *proximum* est obligatio, seu necessitas proxima habendi maculam originalem in instanti animationis, orta ex alligatione nostrarum voluntatum ad voluntatem Adami prævaricatoris. Unde si voluntas Deiparæ alligata fuisset voluntati Adami, & comprehensa sub generali illo pacto, eo ipso habuisset debitum proximum contrahendi maculam originalem; licet dein in primo instanti Conceptionis vitalis, seu formalis, per infusionem gratiæ sanctificantis, fuisset præservata, ne peccato illo inficeretur: atque eo ipso moraliter peccasset in Adamo; non tamen peccatum originale contraxisset nascendo, utpote speciali gratia præventa.

Deipara debitum habuit remotum contrahendi originale. 122. His præmissis R. ad I. affirmative. Videtur hoc sine errore negari non posse, esseque omnino necessarium ad salvandas Scripturas, & indigentiam redemptionis: neque ulla datur ratio Deiparam eximen-
di

di a debito remoto. Nam Deipara, non minus ac cæteri homines, descendit ex Adamo per ordinariam viam generationis: & nisi ex Christi meritis fuisset exempta, debuisset cum cæteris intrare pactum: fuit ergo conditione naturæ obnoxia peccato Adæ contrahendo. Neque propterea Mariana gloria obscuratur; debitum enim remotum non importat verum defectum moralem, sed mere naturalem: nec magis pudendum est hoc modo esse debitorem, quam esse filium suorum parentum.

123. Ad II. R. ipsos piæ sententiæ patronos hac in re discordes esse. Suarius, Bellarminus, Vasquius, Azorius, Tannerus, Theophilus Raynaudus, Simonnet, Antoine &c. ajunt Deiparam a debito proximo eximi non posse, his ducti rationibus. Imo. Scriptura ait omnes in Adamo mortuos esse, omnesque in illo peccasse. II. Hoc privilegium nihil profuisset B. Virgini; quia debitum proximum non est defectus moralis, sed mere naturalis, & macula extrinseca: sicut non est vitium morale progigni ex stirpe ignobili, vel quondam perduelli. III. Si Adam non peccasset, Deipara accepisset gratiam sanctificantem & justitiam originalem vi hujus pacti cum Adamo initi, non fecus ac alii homines. Ergo illius voluntas fuit alligata voluntati Adami. IV. Quando Deus per suum decretum voluntates nostras voluntati Adami alligavit, & Deiparam excepit, nulla adhuc existebant merita Christi. Ergo non fuisset a pacto illo exempta propter merita Christi, adeoque propter illa non fuisset redempta, seu præservata. *Confirm.* Decretum alligativum & permissivum peccati Adami factum est ante prævisionem peccati, ac multo magis ante decretum mittendi Christum, qui missus non fuisset, si Adam non peccasset. Ergo vel Deipara in signo priori ad decretum illud mittendi Christum comprehensa erat in illo generali pacto, sicque debitum proximum contraxerat: aut si inclusa non fuit, id non erat ex meritis Redemptoris, pro illo signo nondum decreti.

Atque etiam proximum, fuxta alios quos.

*Quod ta-
men alii
multo pro-
babilius
negant.*

124. Contrà Ambrosius Catharinus, Cornelius Mus-
sus Bituntinus Episcopus, Salmeronius, Granado, Sa-
lazar, Nierembergii, Thyrsus Gonzalez, ac commu-
nissima Doctorum, præcipue Societatis Jesu, jam a ses-
qui sæculo, Deiparam a debito proximo absolvunt,
hisque nituntur rationibus. I. Debitum proximum con-
ciliari non potest cum ea puritate adeo commendata a
SS. Augustino, Anselmo, & Thoma, qui dicunt Mari-
am omni ex parte vicisse peccatum: ea puritate nituis-
se, qua major sub Deo nequit intelligi: nihil purius
esse illa in rebus creatis; facile enim excogitari pos-
set major puritas, nimirum Angelica. II. Debitum
proximum est vera macula, verum peccatum in Ada-
mo moraliter commissum, vera rebellio contra Deum,
in quam voluntate moraliter propria consensit, qui
talis debitor est, ac præcipuum malitiæ caput in pec-
cato originali. III. Hæc alligatio Deiparæ nec erat op-
tabilis, nec conveniens: non optabilis, quia ut futu-
ra Mater Verbi Divini, longe majores præstantiores-
que gratias acceptura erat in primo vitalis Conception-
is suæ instanti, quam eidem promereri potuisset Ada-
mus. Igitur alligata fuisset voluntati imperfectiori, &
exposita periculo proximo peccati mortalis, absque
ulla spe lucri, seu commodi. Non erat conveniens;
quia decere non videtur, ut Domina subjiceretur fer-
vo, & Dei Genitrix, ac Regina Angelorum subderetur
capiti multo inferiori, nempe Adamo. IV. Omnes præ-
rogativæ ad gratiam sanctificantem spectantes, ex qui-
bus nullus sequitur processus in infinitum, tribuendæ
videntur Deiparæ, juxta regulam Petri Cellensis,
Lib. IX. Epist. IX. scribentis: *B. Virgini concedenda
sunt omnia privilegia, quæ ei fuisse negata positive & ef-
ficaciter non probatur, -- & presumptionibus standum, do-
nec probetur contrarium.* Regulam hanc ratam habuit
S. Thomas in III. Sentent. Dist. III. Quæst. I. Art.
I. *Credendum omnino, ei (Beatissimæ) collatum esse, quid-
quid conferri potuerit.*

125. Facile itaque adversariorum argumentis satis-
fieri posse existimant. Ad I. Respondent, hos & simi-
les

les textus verificari in sensu accomodo, exceptis nimirum individuís speciali nota dignis. Quod si ipsi adversarii textus illos in sensu accomodo non sumant, sequeretur, contra illorum mentem, non modo debitum proximum, sed ipsam etiam originalem culpam in primo animationis instanti a Deipara fuisse contractam. Ad II. Respondent, licet non sit moralis macula ex Adamo perduelli per naturalem generationem descendisse; magnam tamen moralem indecentiam esse, in Adami perduellionem consensisse, sicque peccatum physice alienum moraliter proprium sibi fecisse: quæ omnia in debito proximo involvuntur. Ad III. Negant A. & Conseq. Antecedens quidem, quia, ut superius diximus, hæc alligatio, etiam quoad partem favorabilem, neque erat Deiparæ optabilis, neque conveniens. Consequentiam vero negant, quia quamvis fuisset in hoc pacto comprehensa quoad partem favorabilem, non ideo sequitur comprehensam etiam fuisse quoad partem odiosam. Ad IV. Resp. C. A. D. C. Non fuisset a pacto illa exempta propter merita Christi actu tunc posita, C. Aliquando ponenda, & tunc jam prævisa, N. C. Ad *confirm.* Cum in Deo non detur nisi unicum ac simplicissimum Decretum, realiter & virtualiter indivisum, ajunt in primo signo rationis, seu juxta nostrum concipiendi modum, Christum absolute decretum fuisse ut Redemptorem, antequam prævideretur peccatum Adam absolute futurum, & voluntates nostræ alligarentur voluntati Adæ. Deus itaque, juxta hanc responsionem, prælucente scientia simplicis intelligentiæ, ac scientia media de libertate Christi, Adami, Deiparæ &c. hoc vel simili modo decernere concipitur: *Volo Christum cum hac libertate merendi mittere in carne passibili, in remedium peccati, quod prævideo ab Adamo fore committendum, si ipsum producerem, caput morale posterorum constituerem, præceptum ei imponerem, & hanc libertatem conferrem. Atque hunc Adamum volo producere in tempore, & hunc posterorum numerum, & in isto hanc quoque Virginem Mariam. Decerno etiam Adamum caput morale posterorum, quorum voluntates alli-*

go ipsius voluntati in ordine ad observationem vel transgressionem præcepti, quod ei imponere volo, de non comedendo poma: excipio tamen hanc Virginem Mariam, quam Matrem Christi cum hoc gratiarum cumulo eligo, & quidem ob merita ejusdem Christi Redemptoris: volo Adamo conferre hanc libertatem, & permittere ipsius peccatum. Verum uberiores hujus rei discussionem Theologia Speculativa tractatoribus relinquimus, contenti præcipua hujus quæstionis momenta indicasse.

ARTICULUS II. DE PECCATO PERSONALI, EJUSQUE POENIS.

CONTROVERSIA I.

AN BEATISSIMA VIRGO SEMPER IMMUNIS FUERIT
AB OMNI PECCATO PERSONALI?

CONTRA PROTESTANTES.

*Hostes
Deipara*

126. Sæctarii plerumque consueverunt Virginem illam maledico dente lacerare, quæ cunctas hæreses sola interemit in universo mundo. Nostrorum temporum Novatores, ne a proavorum fuorum femita defleant, impie sentiunt, Beatam Virginem, instar aliorum hominum, sæpius peccasse actualiter. Ita nominatim Calvinus in Harmonia Evangelica in Cap. I. Lucæ, & in Antidoto Conc. Tridentini. Lutherus in postilla majore Evangelii Dom. III. post Epiphan. & alibi. Joannes Pomeranus in Cap. XLIV. Jeremiæ. Georgius Major in Evang. Dom. I. post Epiphan. Lossius in Cap. II. Lucæ. Sarcerius in Cap. I. Lucæ. Jacobus Schenckius; Anton Corvinus, Brentius, Centuriatores Magdeburgici &c. ut refert Ven. Petrus Canisius in Præfat. Libri de Maria Virgine. Solus e Catholicis Doctoribus Gregorius Ariminensis in II. Sentent. Dist. XXX. Quæst. II. Artic. I. ausus est dicere, B. Virginem interdum venialiter peccasse, ne illam fateretur fuisse a peccato originali immunem; quia juxta Augustini

stini regulam, nullus est in peccato originali conceptus, qui non interdum venialiter peccaverit. Contra vero Sanctissimam Dei Genitricem toto vitæ suæ tempore ab omni eujusunque personalis peccati, etiam levissimi, forde immunem prorsus fuisse, tamquam rem exploratam de qua nefas sit dubitare, & omnes reliqui Theologi docent, & omnes Catholici credunt; præsertim posteaquam Concilium Tridentinum Sess. VI. Can. XXIII. hanc esse traditionem Ecclesiæ declaravit his verbis: *Siquis hominem semel justificatum dixerit - - posse in tota vita peccata omnia, etiam venialia vitare, nisi ex speciali Dei privilegio, quemadmodum de B. Virgine tenet Ecclesia; anathema sit.*

127. Conclusio. Beatissima Virgo toto vitæ suæ tempore ab omni peccati personalis labe, ex speciali Dei privilegio, semper fuit immunis. Prob. I. Auctoritate Scripturarum. Gen. Cap. III. v. 15. Deus ait ad serpentem: *Inimicitias ponam inter te & mulierem; & semen tuum & semen illius: tu insidiaberis calcaneo ejus, & ipsa conteret caput tuum.* Per mulierem illam S. Cyprianus, S. Epiphanius, S. Augustinus, Theodoretus, Ven. Beda, Rupertus Tuitiensis Abbas, S. Bernardus, Petrus Blesensis, alique Patres Deiparam intelligunt: per ejus semen, Christum; per serpentem, diabolum; per semen diaboli, infideles, & impios Christianorum hostes. Ergo dicendum est Deiparam ab omni personali labe semper immunem fuisse, non mortali tantum, sed etiam levissima. P. C. Si B. Virgo peccato personali inquinata fuisset, non ipsa contrivisset semper caput serpentis; sed contrita fuisset a serpente. Ergo. Canticorum Cap. IV. v. 7. dicitur: *Tota pulchra es amica mea, & macula non est in te.* Quæ verba ad B. Virginem pertinere, inferius in solutione objectionum ostendemus. Luca Cap. I. v. 28. *Et ingressus Angelus ad eam, dixit: Ave gratia plena, Dominus tecum.* Ergo cum Deipara plena fuerit gratia sanctificante; habuit etiam gratiam præservantem ab omni labe peccati. Ut enim verbis utar S. Petri Damiani Hom. in Nativ. B. V. M. *Quid sanctitatis, quid justitiæ, quid re-*
T. IV. Theol. Dogm. Polem. H ligio.

Immunitas B. V. M. ab omni peccato personali ostenditur ex Scripturis.

ligionis, quid perfectionis singulari huic Virgini deesse potuit, quæ totius divinæ gratiæ charismate plena fuit? Sic namque ab Angelo, dum solutaretur, audivit: Ave gratia plena, Dominus tecum. Quod rogo vitium in ejus mente, vel corpore vindicare sibi potuit locum, quæ ad instar cæli, plenitudinis totius Divinitatis meruit esse sacrarium? Illud præterea observo, quod Angelus non dixerit, Deiparam gratia implendam esse, posteaquam conceperit Unigenitum Dei Filium, sed eam jam actu gratia plenam esse: Dominum non tantum cum illa futurum, sed actu esse, ac fuisse semper speciali providentia illi assistendo, gubernando, instruendo, ac defendendo illam; impediendo, ne diabolus umquam gloriari posset, se cum illa fuisse.

*Patribus
Græcis.*

128. Prob. II. Autoritate Patrum, Græcorum & Latinorum. S. Dionysius Alexandrin. in Epist. Synodica contra Paulum Samosatenum de Christo ait: *Matrem incorruptam, a pedibus usque ad caput benedictam servavit.* S. Ephraem Syrus in Orat. de Sancta Dei Genitrice: *Immaculata, & intemerata, incorrupta, & prorsus pudica, atque ab omni sorde ac labe peccati alienissima Virgo, Dei Sponsa, & Domina nostra.* S. Proclus CPolitanus in laudatione S. Dei Genitricis Orat. VI. *Ipsa est penetrabile innocentiae sacrarium, ipsa sanctificatum Dei Templum.* S. Sabbas in Menæis Græcorum, die II. Januarii, Ode III. de B. Maria scribit: *In te, quæ nulli umquam culpæ affinis fuisti, spem omnem meam repono. Nemo, ut tu Domina, inculpatus est æque, nec, præter te, incontaminatus quisquam. O nævo nulli subiecta!* S. Sophronius Jerosolymitanus in Epistola Synodica ad Sergium CPolitanum, quæ a CPolitana III. Synodo Generali fuit approbata, asserit B. Mariam ab omni contagione ac macula liberam fuisse corpore, anima, & intellectu. S. Andreas Cretensis Tomo XII. Bibl. Maximæ PP. in encomio Zonæ Dei Genitricis, eam vocat peccato omni ac sorde sublimiorem, & terrenum nihil habentem. S. Joannes Damascenus Orat. II. de Assumpt. *Ad hunc paradisum serpens aditum non habuit, ubi falsæ divinitatis*

nitatis cupiditate flagrantes, jumentis comparati sumus. Ipse enim Unigenitus Filius, cum Deus, & ejusdem cum Patre substantiæ esset, ex hac Virgine & pura terra hominem sibi effinxit.

129. Eadem fuit Latinorum Patrum sententia. S. ^{Et Lati-} Ambrosius Enarrat. XXII. in Psal. CXVIII. ait: ^{nis.} Suscipe me (Domine Jesu) non ex Sara, sed ex Maria, ut incorrupta sit Virgo, sed Virgo per gratiam, ab omni integra labe peccati. S. Hieronymus Comment. in Cap. X. Ecclesiastis: Beata terra Ecclesiæ, cujus Rex est Christus, Filius ingenuorum; de Abraham, Isaac, & Jacob, Prophetarum quoque & Sanctorum omnium stirpe descendens, quibus peccatum non fuit dominatum, & ob id vere fuerunt liberi. Ex quibus nata est Virgo liberior, Sancta Maria, nullum habens fruticem, nullum germen ex latere, sed totus fructus ejus erupit in florem. Ergo cum S. Hieronymus progenitores Christi liberos fuisse dicat, eo quod peccatum non sit eis dominatum; Virginem vero eis liberiozem fuisse asserat, satis insinuat nullum in ea simpliciter fuisse peccatum. S. Augustinus Lib. de Nativ. & Gratia, Cap. XXXVI. Excepta itaque Sancta Virgine, de qua, propter honorem Domini, nullam prorsus, cum de peccatis agitur, haberi volo quaestionem. Inde enim scimus, quod ei plus gratiæ collatum fuerit ad vincendum omni ex parte peccatum: quæ concipere ac parere meruit, quem constat nullum habuisse peccatum. S. Fulgentius in Serm. de duplici Nativit. Christi: In secundum hominis Matre gratia Dei & mentem integram servavit, & carnem. S. Ildephonsus Toletanus in Serm. de Assumptione, Deiparam comparat cum Arca veteris Testamenti, supra quam propitiatorium & Cherubim hinc inde obumbrantia figurantur; quia Mariæ nullum intrinsecus obrepsit peccati contagium: sed intus omnis custodia legis, & manna fuit. S. Anselmus Cantuariensis Lib. de Conceptu Virginali, Cap. XVIII. Decens erat, ut ea puritate, qua major sub Deo nequit intelligi, Virgo illa niteret, cui Deus Pater unicum Filium, quem de corde suo æqualem sibi genitum, tamquam se ipsum diligebat, ita

dare disponebat, ut naturaliter esset unus, idemque communis Dei Patris, & Virginis Filius; & quam ipse Filius substantialiter facere sibi Matrem eligebat; & de qua Spiritus Sanctus volebat, & operaturus erat, ut conciperetur ille, de quo ipse procedebat. S. Bernardus Serm. II. de Assumpt. Ut omnino pium est credere, proprium Maria delictum non habuit. Et in Epist. CLXXIV. ad Canonicos Lugdunenses: Ego puto, quod & copiosius sanctificationis benedictio in eam descenderit, quæ ipsius non solum sanctificaret ortum, sed & vitam ab omni deinceps peccato custodiret immunem: quod nemini alteri in natis quidem mulierum creditur esse donatum. Decuit nimirum Reginam Virginum, singularis privilegio sanctitatis, absque omni peccato ducere vitam, quæ dum peccati, mortisque pareret peremptorem, munus vitæ & iustitiæ omnibus obtineret. Antiquissimæ huic Patrum doctrinæ suffragantur Theologi Orthodoxi omnes cum S. Thoma, S. Bonaventura &c.

Authori-
tate Eccle-
siæ.

130. Prob. III. Autoritate Ecclesiæ. Ecclesia, quæ est basis, columna, & firmamentum veritatis, jam a pluribus sæculis celebrat Nativitatem Deiparæ. Ergo hoc ipso sentit, jam tunc fuisse illam in gratia confirmatam, quando nata est; quia Ecclesia non veneratur publico ac solemniter nisi eam sanctitatem, quæ perpetuo est duratura. Præterea Tridentinum Sess. VI. Can. XXIII. declaravit hanc ipsam esse traditionem Ecclesiæ, quod Deipara ab omni peccato, etiam veniali & levissimo, semper immunis fuerit.

Et ratione
Theologi-
ca.

131. Prob. IV. Ratione Theologica ex S. Thoma in III. Parte, Quæst. XXVII. Art. IV. Respondeo dicendum, quod illos, quos Deus ad aliquid eligit, ita præparat & disponit, ut ad id, ad quod eliguntur, inveniantur idonei. --- Beata autem Virgo fuit electa divinitus, ut esset Mater Dei: & ideo non est dubitandum, quin Deus per suam gratiam eam ad hoc idoneam reddiderit, secundum quod Angelus ad eam dicit: Invenisti gratiam apud Deum: Ecce concipies &c. Non autem fuisset idonea Mater Dei, si peccasset aliquando: tum quia honor parentum redundat
in

in prolem: --- tum etiam quia singularem habuit affinitatem ad Christum, qui ab ea carnem accepit, --- tum etiam, quia singulari modo Dei Filius, qui est Dei Sapientia, in ipsa habitavit non solum in anima, sed etiam in utero. Dicitur autem Sap. Cap. I. In malevolam animam non introibit sapientia, nec habitabit in corpore subdito peccatis. Et ideo simpliciter fatendum est, quod B. Virgo nullum actuale peccatum commisit, nec mortale, nec veniale; ut sic in ea impleatur, quod dicitur Cantic. IV. Tota pulchra es amica mea, & macula non est in te. Caterum si cui rationes istæ a D. Thoma allatæ, congruæ quidem, non tamen rem certam atque perspicuam facere videantur, sciat non aliam hic dari posse rationem quæ omnino satisfaciat, quam beneplacitum Dei, in Verbo scripto & tradito nobis manifestatum.

132. Quæres. An B. Virgo, eoquod in gratia fuerit confirmata, habuerit potentiam peccandi? R. cum Theophilo Raynaudo in Diptychis Marianis, Parte II. Puncto IX. Num. XXXV, aliisque, affirmative. Quamdiu enim Deipara fuit in hac vita mortali, non debuit locari extra conditiones status illius, inter quas est flexibilitas arbitrii in utramque partem, atque adeo potestas peccandi. Neque confirmatio in gratia, quæ B. Virgini adhuc viatrici negari nullo modo potest, fuit quasi carentia potestatis peccandi: etenim Apostoli confirmati erant in gratia; & tamen peccare poterant, ac teste Joanne Apostolo, reipsa venialiter peccabant. Quamvis autem non nisi leviter peccarent, tamen non destituebantur potestate peccandi graviter: non quidem in sensu composito cum tali dono gratiæ, ut per se patet, sed in sensu diviso. Igitur confirmatio in gratia consistit in ubertate auxiliorum congruorum, quibus voluntas efficaciter illicitur ad bonum, tametsi eluctabiliter, atque adeo cum potestate peccandi. Ea enim libertas auxiliorum congruorum, juncta divinæ protectioni externæ, sufficientissima est, ut intelligamus hominem in gratia sanctificante firmari, id est, ita in ea stabiliri, ut certo ea non excidat, quamvis posset excidere, si luberet.

*Quamvis
Deipara
potentiam
peccandi
habuerit.*

Argu.

Argumenta contraria refutantur.

*Frustra
obtendunt
adversarii
Scriptura-
rum.*

133. Objicitur I. Autoritas Scripturarum. Ex una parte Scriptura generaliter pronuntiât, quod in multis offendamus omnes: quod omnes habeant peccatum &c. ex altera parte locus a nobis adductus ex Cap. III. Genesis, parum est efficax ad evincendam immunitatem Deiparæ ab omni peccato. Ergo. P. A. In Hebraico textu non legitur *ipsa*, sed *ipse conteret caput tuum*: atque hoc pronomen non refertur ad mulierem, sed ad ejus semen, quod itidem in Hebraico est generis masculini, latine autem vertendum esset *ipsum*, nimirum semen mulieris, id est, Christus conteret caput tuum. R. has Scripturarum generales locutiones intelligendas esse in sensu accomodo; quia Scripturæ loquuntur tantum de eo, quod communiter, generaliter, & per se fieri solet, præscindendo a speciali Dei gratia & privilegio. Ratio id dicendi petitur tum ex Verbo Dei scripto, tum etiam tradito, ex quo in probatione nostra intulimus immunitatem Deiparæ ab omni prorsus peccato. Certe hos generales Scripturarum textus speciali Virginis privilegio non obstare declaravit tum Tridentinum Concilium, tum communissima Patrum sententia. Immo S. Augustinus Lib. de Spiritu & littera, Cap. II. dicit, si quis de aliquo Sancto affirmet, eum numquam peccasse, non propriis viribus, sed gratia & dono Dei, non multum esse cum illo contendendum; sed potius, si id sufficienter ostendat, illi esse gratulandum. Ad alteram Antecedentis partem R. I. *Ipsa* in fæminino, non *ipse* legerunt antiquissimi Patres, Claud. Marius Victorinus Lib. I. in Genes. Alcimus Avitus Lib. III. Carm. Cap. VI. S. Chrysostomus Hom. XVII. in Gen. S. Ambrosius Lib. de Fuga sæculi, Cap. VII. S. Augustinus Lib. II. de Gen. contra Manichæos, Cap. XVIII. & Lib. II. de Gen. ad litteram, Cap. XXXVI. S. Gregorius M. Lib. I. Moral. Cap. XXXVIII. Item Eucherius, Rupertus Tuitiensis, Ven. Beda, Rabanus, & Strabo in hunc locum. S. Bernardus

aus Serm. II. super *Misus est*. Neque repugnat huic lectioni textus Hebraicus, qui ambiguus est, ut ostendit Card. Bellarminus Lib. II. de Verbo Dei, Cap. XII. Atque hanc lectionem retinuit Vulgata nostra, quam si Ecclesiae auctoritatem rejicientes contemnant Protestantes, qui demum ipsi probare poterunt, legitimam se habere Scripturarum versionem? R. II. cum Cornelio a Lapide Comment. in l. c. eundem in utraque lectione sensum exprimi. Nam cum Deus hic opponat, quasi antagonistas, mulierem cum suo femine, serpenti cum suo semine; consequenter vult dicere, mulierem cum suo femine contrituram caput serpentis: sicut e contrario serpens tam mulieris quam feminis ejus calcaneo insidiatur.

134. Dices. Saltem locus ille ex Cap. IV. Canticorum adductus, *Tota pulchra es amica mea, & macula non est in te*, nihil evincit. Ergo. P. A. Quamvis concedatur, Salomonem in Cantico Canticorum figurate loqui, & sub aliis vocabulis alia significare: quæ tamen in illo dicuntur, Patres, alique Scripturarum interpretes, communiter intelligunt de Christo, & Ecclesia sponsa sua. Ergo verba illa intelligi nequeunt de Deipara, sed de Ecclesia. R. N. A. Ad prob. N. C. Idem Scripturæ locus plures habere potest litterales sensus, simul æque ab eodem Spiritu Sancto intentos, ut non obscure indicant S. Hieronymus Comment. in Cap. III. Epist. ad Ephesios, S. Augustinus Lib. XII. Confess. Cap. XXXI. S. Leo M. Serm. IX. de Nativ. Domini, S. Gregorius M. Lib. I. in Ezechielem, Hom. VIII. S. Thomas I. Parte, Quæst. I. Art. X. Nihil ergo vetat, quo minus illa eadem testimonia, quæ de Ecclesia, vel de Christo Domino secundum sensum litteralem accipiuntur, in sensu itidem litterali de Deipara quoque dicta esse intelligantur, quæ Ecclesiae nobilissimum membrum est, & cum ipso Christo tam arcta necessitudine conjuncta, quam est Mater cum Filio. Itaque juxta communem Sacrorum Interpretum sensum canuntur quidem in Cantico Canticorum spirituales nuptiæ Christi & Ecclesiae, ita
tamen

tamen ut etiam de particularibus sponſis, & ſpecialis prærogativæ jure de B. V. Maria, tamquam de ſponſa omnium lectiſſima & dilectiſſima, ſermo ſit. Plures etiam antiqui doctique Interpretes totum iſtud Canticum de ipſa B. Virgine integro commentario explanarunt, Rupertus Abbas Tuitienſis, Alanus Magnus de Insulis, Honorius Auguſtodunenſis, Dionyſius Carthuſianus, aliique.

Et Pa-
trum au-
thorita-
tem.

135. Objic. II. Authoritas Patrum. S. Baſilius Epist. CCCXVII. aſerit Deiparam dubitatione quadam fluctuaſſe moriente Chriſto, & ſcandalo jaçtatam, quando ſupplicio vidit affectum filium. Etenim animam, ait, omnem paſſionis tempore dubitationi cuidam fuiſſe ſubjectam, ſecundum Domini vocem, qui dixerat, Omnes vos ſcandalum patiemini in me. Idem affirmat S. Cyrillus Alexandrinus ſuis in Joannem Commentariis, qui inſuper ſcribit Deiparam a Chriſto Joanni diſcipulo commendatam fuiſſe, ut egregius ille Myſtagogus Myſterii Paſſionis altitudinem recte & idonee Deiparæ explicare poſſet. II. S. Chryſoſtomus Hom. XXVII. & Hom. XLIV. in Matth. explicans illud: *Quæ eſt Mater mea, & qui ſunt Fratres mei?* ſcribit: *Nam quod illa (Deipara) facere inſtituerat, ſupervacaneæ cujuſdam ambitionis erat. Quippe volebat oſtentare populo, ſe filio dominari, & in eum authoritatem exercere: cum nondum de ipſo magnum aliquid imaginatione ſua ſibi proponeret. Ideo in-tempeſtively acceſſit. Ac vide quaſo tam ipſius, quam illorum ſuperbiam.* Similia habet Tertullianus Lib. de Carne Chriſti, Cap. VII. III. S. Chryſoſtomus Hom. IV. in Matth. ait, nuntiatum prius fuiſſe Virgini, conceptum iri in ejus utero filium; ne ſi rei penitus ignara gravidam ſe poſtea deprehendiſſet, in ſummam perturbationem ac metum veniret: *Quippe veriſimile eſt, ſi quid actum eſſet, ignoraret, gravius aliquid in ſe conſulturam eſſe, ac laqueo ferrove ſibi vitam erepturam; quod tantæ ferendæ ignominie impar eſſet.* IV. Idem S. Chryſoſtomus Hom. XXI. in Joan. cauſam aſſert ejusmodi, cur Mater Chriſti ab eo poſtulaverit, ut aquam in

in vinum converteret: *Volebat enim tum de illis bene mereri, tum se ipsam illustriorem per Filium facere, ac fortassis humani aliquid est passa; quemadmodum & fratres illius dicentes, Manifesta te ipsum mundo: nempe cupientes gloriam ex miraculis capere. Propterea durius illis respondit.* Suffragantur Chrysostomo Euthymius in Cap. II. Joannis, & Maximus Taurinensis, qui Hom. I. in Epiphan. Domini propterea temeritatis notam Virgini Deiparæ inurit. R. Cespitationem paucorum Patrum, qui parum commode de Deipara scripserunt, nihil officere certitudini sententiæ nostræ. Illi enim levissimis, ac minime justis, ut paulo post ostendemus, inducti fuere rationibus ad id opinandum; ac communissimæ Patrum sententiæ, præcipue Latinorum, aperte adversantur, ut patet consideranti textus a nobis in probatione allatos, quibus nunc tota Ecclesia suffragatur.

136. Objiuntur III. a Protestantibus prætensi *Prætenso Deiparæ lapsus.* I. B. Virgo dubitavit in fide, quando Gabrielem Archangelum interrogavit, *Quomodo fiet istud?* II. Ex culpabili negligentia filium amisit; perditum nimis sollicitè & anxie inquisivit: inventum arroganter & superbe allocuta est. III. In Cana Galilee ambitiose miraculum a Filio suo postulavit; ideoque acriter ab illo fuit reprehensa. Joan. Cap. II. *Quid mihi & tibi est mulier? nondum venit hora mea.* IV. Ambitiose Filium interpellavit tempore prædicationis, ut ostenderet populo, se Filio suo dominari. V. In morte Christi de illius Divinitate dubitavit, sicut illi prædixerat Simeon Lucæ Cap. II. *Et tuam ipsius animam pertransibit gladius:* & nimis molliter ejus mortem tulit. VI. Certum est, quod Deipara Orationem Dominicam sapius recitaverit, in qua dicitur, *Et dimitte nobis debita nostra*, id est, peccata. Ergo non fuit immunis ab omni peccato. R. hæc crimina infrunita prorsus petulantia Deiparæ affingi, præsertim hoc avo, quo Deiparæ immunitas ab omni peccato personali Ecclesiæ judicio satis videtur eliquata. Ut vero manifestum sit omnibus, quam vana ac futilia, omnique ratione

tione destituta hic a Protestantibus objiciantur, brevi responsione singula singillatim diluamus.

137. Itaque ad I. R. N. A. Deipara nuntianti sibi Angelo conceptum prolis ac partum, credidit; modum tamen, quo res hæc perficienda erat, inquisivit. Nam, quia filii conceptio castitatis voto videbatur contraria, ad se pertinere putavit, quis esset futurus modus talis conceptionis, interrogare, & discere quid officii in eo negotio ipsa esset præstitura. Hanc fuisse mentem & fidem Virginis satis ostendunt verba Elisabeth Lucæ Cap. I. v. 45. *Beata, quæ credidisti: & Patrum encomia, quibus idcirco Deiparam ornant.* S. Irenæus Lib. XIII. adv. Hær. Cap. XXXIII. ait: *Quod Eva alligavit per incredulitatem, hoc Maria solvit per fidem, quæ & altissima Myſteria statim credidit, & sine mora obediendo consensit.* S. Augustinus Serm. CCXC, alias Homil. XLIV. inter L. Cap. V. *Intelligimus Carissimi, quoniam Zacharias, quando ait, Per quid ego cognoscam hoc? Ego enim sum senex, & uxor mea progressa in diebus suis; desperando dixit, non inquirendo; Maria vero quando e contra ait, Quomodo fiet istud, quoniam virum non cognosco? inquirendo dixit, non desperando. Dum interrogavit, de promissione non dubitavit.*

138. Ad II. R. N. A. Christus sine culpa & negligentia Parentum a via deflexit. Lucæ Cap. II. v. 43. *Et non cognoverunt parentes ejus.* Quod eo facilius accidere potuit, quo ipsi minus erant solliciti; quia Filii virtutem, Divinitatem, & sapientiam exploratam habebant, nihilque sine illius voluntate evenire posse certe sciebant; quod satis significant verba illa, non superbiam, ut criminantur Sectarii, sed insignem fidem & charitatem redolentia, Lucæ Cap. II. v. 48. *Fili, quid fecisti nobis sic?* Cum vero exacto unius diei itinere, eum inter notos & amicos Maria & Joseph non invenirent, Jerosolymam regressi sunt, inquirentes illum. Quamvis enim nullius culpæ sibi conscii essent; quia tamen ignorabant, quid in tenera illa ætate Christus agere meditaretur, & an humanæ salutis negotium publice

blice aggredi vellet, merito erant solliciti, cavebantque, quantum in se erat, a Filio non separari. Quod si quæras, cur Christus Mariam & Josephum certiores non fecerit commorationis suæ in Templo, eosque Nazarethum præire non iusserit? R. id neququam a Christo factum esse, quod ab illis impediendum se prævideret, patefacto semel consilio suo; sed ob majus Parentum meritum, uberiusque divinæ gloriæ incrementum. Facta enim apud notos & amicos a Deipara diligenti pervestigatione, primum erat eos cupiditate incendi rei exitum explorandi, & quid demum Christo contigisset: sicque, Deo ita disponente, contigit, ut admirabilis Christi sapientia, quam adeo Jerosolymitani Templi Doctores suspexerant, latius apud Nazarenos dimanaret, non absque proluxa divinæ gloriæ commendatione.

139. Ad III. R. In ea Virginis petitione nullam elucere ambitionem, sed eximiam potius fidem & charitatem; nec verba Christi ullam reprehensionem continere: non enim verbo Matrem objurgavit, qui eam facto honoravit. Christus itaque, ut omnes intelligeremus miraculorum hujusmodi momenta altioris ejusdam providentiæ consilio temperari, (quod etsi Deipara non ignoraverit, non tamen satis ad aliorum usum & utilitatem expresserat,) utque ostenderet, miraculorum faciendorum vim parentum authoritati non esse subjectam, Matri suæ dicenti, *Vinum non habent*, respondit, *Quid mihi & tibi est mulier? nondum venit hora mea*. Quæ verba non semper objurgationem ac reprehensionem significant; sed sæpe indicant, suo iudicio usurum in re aliqua, qui sic loquitur, nec ab alieno arbitrio pendere, aut legem imponi sibi se esse passurum. Certe Mariam illis verbis a Christo reprehensam non fuisse, vel ex eo dignoscitur, quod illa obtinendi beneficii secura, ministros prompte omnia exequi iusserit, quæcunque Jesus dixisset. Quare longe probabilior videtur mihi eorum opinio, qui citata verba ita interpretantur: Quid hoc ad me, vel ad te? si vinum non habent, vino non indigemus: nondum venit

venit tempus, vivente adhuc Præcursore meo Baptista, Divinitatem meam prodigiis comprobandi. *Mulier.* Mulierem vocatam a Christo fuisse Deiparam putat Cæsar Calino *Trattenimento Storico soprai Vangeli, Lib. IV. Cap. X.* eo modo, quo semetipsum Christus vocavit *Filium hominis*: ne forsitan illi, quibus se verum esse Dei Filium manifestaverat, opinarentur, Deum aliquem sub Mariæ schemate latitare, sicque Christum non esse verum hominem, ut pote non ex fœmina natum. Ven. Petrus Canisius Lib. IV. de Maria Virgine, Cap. XVIII. putat, Christum non Matris, quacum illi perbelle semper conveniebat, sed aliorum causa, subaspere ac duriuscule respondisse, ut contra futuros hæreticos hoc responso doceret, se majus habere aliquid, quam quod ex Maria sumpsisset; seque non solum illius, sed & Dei Filium esse: ac divinam quidem naturam sine Matre, sine tempore perfecte sibi constare, ac etiamnum in carne libere operari: ut doceret miraculorum patratorum authoritatem non ab humanis affectibus, neque a Matre quidem, sed a divina virtute pendere, solique Deo adscribendam esse: ut doceret, suum & aliorum, qui negotium Evangelicum probe administratum volunt, proprium esse munus, sepositis carnis affectibus, & affinium parentumque consiliis rejectis, non humana sapere, sed divina curare.

140. Ad IV. R. Nullum ibi peccati vestigium, oburgationem nullam deprehendi. Deipara non materna authoritate sermonem interruptit, non in domum irruit, in qua Filius verba faciebat; sed foris stabat, quærens Filium alloqui, donec quidam de turba Christum interpellantes admonuerunt eum, Matrem, & consanguineos foris expectare. Christus occasione hac utendum ratus, respondens dixit ad illos Lucæ Cap. VIII. v. 21. *Mater mea, & Fratres mei hi sunt, qui verbum Dei audiunt, & faciunt.* Ut circumstantes doceret, propter consanguineos Dei opus intermittendum non esse, potiorique apud se loco esse homines charitatis operibus deditos, quam consanguineos suos, ipsam-

samque Matrem, si solus in ea Maternitatis titulus spectetur.

141. Ad V. R. Hæc absque ullo prorsus fundamento dici: siquidem Simeon gladium illi prædixerat, non infidelitatis & dubitationis, sed compassionis; quia ob mortem Christi summo dolore erat afficienda. Quamvis autem acerbissimo tunc doloris gladio fuerit transfixa, nihil tamen invicta animi fortitudine, & cœlesti robore virginei pectoris indignum egit. Unde exhibendi sunt, qui insanarum matrum pro filiis in pari causa intemperias ad Sacrarium Spiritus Sancti transferre, ac dicere non verentur, Deiparam in morte Filii spasmo correptam, exanimem fere prope Crucem corruisse, unguibus ac digitis genas dein lacerasse, capillos vulsisse, pugnis contudisse pectus, vicina loca vociferationibus atque ejulatu complexisse, multaque in Judæos ac Judam proditorem intorsisse. Perspectum habebat Virgo, hanc esse debitam Deo satisfactionem pro expiandis hominum peccatis: nec aliam ob causam descendisse Verbum divinum in terras, & carne indui voluisse, quam ut per ignominiam Crucis homines e captivitate dæmonis liberaret. Itaque conformabatur agnitæ Dei voluntati, quia gratiæ plenitudinem a Deo obtinuerat: immo ipsa suis manibus, si oportuisset, ad explendam Dei voluntatem, filium crucifigere parata fuisset; quandoquidem virtute & obedientia excellentior erat Abrahamo. Admirabilem hanc Virginitis constantiam egregie pro more suo describit S. Ambrosius Epist. XXV. *Maria Mater Domini ante Crucem Filii stabat. Nullus me hoc docuit, nisi Sanctus Evangelista. --- Sed nec Maria minor, quam Matrem Christi decebat. Fugientibus Apostolis ante Crucem stabat, Et pius spectabat oculis Christi vulnera, quia expectabat non pignoris mortem, sed mundi salutem. --- Hanc imitamini Matres sanctæ, quæ in unico filio dilectissimo tantum maternæ virtutis exemplum edidit.*

142. Ad VI. C. A. N. C. Verba illa, *Dimitte nobis debita nostra*, protulit Deipara pro aliis, ac pro tota Ecclesia: pro se vero gratias potius pro acceptis beneficiis

neficiis agebat, eorumque perpetuam durationem postulabat. Neque majus nobis negotium faceſunt, qui Confefsarium ordinarium S. Joannem Evangeliftam, extraordinarium vero, priori nimirum abſente, S. Jacobum Jerofolymitanum Epifcopum Deiparæ obtrudunt, a quibus in Sacramentali confeſſione expiaretur. Hujus enim perabſurdæ opinionis patroni B. Albertus Magnus ſuper *Miſſus eſt*, Quæſt. XXXIX. XL. XLIII. Dionyſius Carthuſianus Lib. III. de laudibus Deiparæ, Pelbartus de Temesvár Lib. VII. Stellarii, Parte I. Art. II. Cap. III, nimium quantum ab Apoſtolorum ævo remoti fuere; ideoque nullam merentur fidem, cum nullum idoneum teſtem rei hujus ante hac inauditæ proferre valeant. Putant quidem iſti, Deiparæ confeſſionem non fuiſſe peccatorum, ſed beneficiorum Dei, & ſuæ incongruitatis ad magnitudinem eorum, aut tantum ſub conditione ſe accuſaſſe, ſi v. g. in tali opere per negligentiam deliquiſſet. Verum quam incongrue hæc dicantur, nemo non videt. Cui-libet enim exploratum eſt, Sacramentum Pœnitentiæ administrari non poſſe deficiente materia remota, quam peccata perſonalia conſtituunt: ignorantiam vero aſſignare Deiparæ, ut poſſet confiteri; vel dicere eam confeſſam fuiſſe ſolum conditionate, repugnat manifeſte eminentiſſimæ Virginis perfectioni, quæ in omni opere ſuo perfecte cognoscebat, quid ſecundum rectam rationem fieri poſſet, & oporteret: nihilque agebat, quod Deo gratum acceptumque fore certo non exiſtimaret.

Et rationem Theologicam.

143. Objic. IV. Ratio. Deipara habuit fomitem peccati. Ergo experta eſt motus ſensualitatis antevertentes plenam quidem & perfectam, non tamen omnem deliberationem rationis. Atqui hi motus ſemideliberati ſunt peccaminosi, quia levem aliquam malitiam continent. Ergo Deipara non caruit omni peccato perſonali. Antequam respondeam, noto I. quod formes peccati ſit inordinatus motus appetitûs ſentientis, præveniens rationem, inclinans, & alliciens voluntatem ad aliquid contra rectam rationem. Noto II. triplicem

plicem esse Catholicorum Doctorum sententiam. Ima est Alexandri de Hales, qui peccati fomitem in Deipara penitus extinctum fuisse asserit, quam primum in utero matris sanctificata est. IIda est B. Alberti Magni, & S. Thomæ, qui censent, post primam sanctificationem remansisse in B. Virgine peccati fomitem, secundum essentiam, perpetuo tamen ligatum seu impeditum, ne in ullum inordinatum motum prodiret; in secunda vero sanctificatione, quæ contigit in conceptione Christi, fuisse omnino sublatum. IIItia eaque nunc communissima cum Suario, Toletio, Vega, Catharino, Canisio, Vasquio, Valentia &c. tenet, peccati fomitem in Deipara nec ligatum umquam fuisse, quasi revera in illa aliquamdiu manserit; nec etiam extinctum aut sublatum, quasi aliquando in ea præcesserit; sed nullo umquam modo in Virgine extitisse. Ratio tribus his sententiis communis, est voluntas Dei manifestata nobis per Scripturas, & Sanctos Patres, qui dicunt Deiparam immaculatam esse, purissimamque: nihil eam cum terrenis affectionibus commune habuisse, Angelis ac Seraphinis puriorem fuisse &c. Et quamvis Deus, relicto etiam fomite, potuisset omnem culpam impedire in B. Virgine; cum tamen omnia sapientissime & suavissime provideat, & fini idonea media accomodet, longe connaturalius Deiparam ab omni fomite, atque inordinato motu liberam fecit: quia moraliter impossibile est pati inordinatos motus, & ne venialiter quidem ac subreptitie umquam delinquere. Ex his jam habetur responsio ad propositum argumentum. Nego enim Antecedens, & Conseq. Quamvis enim, quod a nobis nequaquam conceditur, datus fuisset aliquando fomes peccati in Deipara, ligatus tamen fuisset, ne in ullum motum inordinatum ac rationi contrarium, etiam semideliberatum, prodiret.

CONTROVERSIA II.

AN DEUS SIT, AUTHOR PECCATI?

CONTRA LIBERTINOS, CALVINUM, ZWINGLIUM,
BEZAM.*Impia No-
vatorum
doctrina.*

144. Simon Magus, hæreticorum omnium Patriarcha, Deum ea ratione peccatorum nostrorum causam esse dixit, quod eam naturam nobis dederit, quæ non possit non peccare. Hinc Vincentius Lerinensis, in aureo suo Commonitorio adversus profanas vocum novitates, de eodem scribit Cap. XXIV. *Quis ante Magum Simonem, Apostolica districtione percussus, a quo vetus ille turpitudinum gurgis, usque in novissimum Priscillianum, continua & occulta successione manavit, authorem malorum, id est, scelerum, impietatum, flagitiorumque nostrorum ausus est dicere Creatorem Deum?* Cerdonistæ, Marcionistæ, Manichæi, eorumque propago Priscillianistæ & Albigenses, primariam peccati causam, Deum malum esse voluerunt. Sæculo II. Florinus, quem edito libro acerrime impugnavit. S. Irenæus Lugdunensis Episcopus, quamvis unicum solummodo Deum, eumque bonum admitteret, ausu tamen plus quam hæretico Deum fecit peccati authorem, teste Eusebio Lib. V. Hist. Eccles. Cap. XIX. Florinum secuti sunt Joannes Wickleffus, Quintinus Sartor Picardus, Libertinorum sectæ conditor, Ulricus Zwinglius, Martinus Bucerus, Petrus Martyr sive Vermilius, Joannes Calvinus, Theodorus Beza, Philippus Melanchton, qui in Cap. VIII. Epist. ad Rom. dicit, sic esse opus Dei Davidis adulterium, & Judæ proditionem, ut Pauli vocatio. Retractavit tamen hanc insaniam Melanchton in libro de Locis communibus.

*A qua ex-
cusari ne-
quit Cal-
vinus.*

145, Equidem Calvinus tum alibi, tum in Admonitione adversus Libertinos longa disputatione probare nititur, Deum non esse authorem peccati, eumque a turpissima hac nota purgare nervis omnibus contendunt Calviniani: sed frustra sunt, atque id solum evincunt, Calvinum pro more suo sibi non constare, ac pugnantia loqui. Cum Quintinistis depugnans,

gnans, negat ille Deum esse authorem peccati: At vero contra Catholicos disputans aperte eam insaniam docet. Certe Lib. I. Institutionis, Cap. XVIII. Paragr. III. antea locutus de gravissimis sceleribus, de incestu Absolonis, de Apostasia decem Tribuum, de rabie Judæorum in Christum furentium, hæc subjungit: *Et jam satis aperte ostendi, Deum vocari omnium eorum authorem, quæ isti Censores volunt otioso tantum ejus permisu contingere.* Præterea manifeste id ex toto Calvinianæ doctrinæ systemate necessario fluxu consequitur. Calvinus enim docet I. Deum non solum velle fieri, sed etiam ab æterno decrevisse, ut fierent quæcunque patrarentur ab hominibus peccata, quamvis non prævisa determinatione voluntatis humanæ; cum juxta Calvinum Deus præsciat futura, quia ipse decrevit ut fierent. II. Deum non solum ab æterno decrevisse, ut patrarentur quæcunque sunt ab hominibus peccata; verum etiam imperasse Satanæ, & improbis hominibus, ut nos ad peccandum inducant: eosque ad hoc a Deo inclinari, urgeri, impelli. Cum enim Deus in impio Calvini systemate, ante omnem prævisionem demeritorum, absolute decreverit aliquibus infligere pœnas æternas: in hac vero providentia nemini hæc pœnæ actu infligantur, nisi ob commissæ peccata, necessarium est, ut Deus reprobos in peccandi necessitatem detrudat; alias periculo se exponeret non obtinendi effectum reprobativi sui decreti. III. Deum operari in mentibus impiorum, & per eos, ut sua instrumenta: ipsum, tamquam primam causam, facere ea omnia, quæ respectu hominum quidem sunt, & dicuntur vera peccata; respectu Dei vero sunt opera bona & justa, eo quod homines mala intentione, Deus autem optima mente, bonoque consilio illa omnia faciat. IV. Deum positive excæcare, indurare homines: eos occulta quadam vi incitare, movere, necessitare ad omnia flagitiorum genera perpetranda. Ex quibus manifesta consecutione deducitur, juxta Calvinum, Deum esse flagitiorum omnium authorem & causam. Ille enim, omnium prudentum judicio, est moralis causa, & prima-

rius author peccati, qui physice & effective, tamquam principale agens, illud ponit: qui incitat, impellit, necessitat ad peccatum: qui utitur creatura tamquam mero instrumento: qui efficaciter procurat, ut quis peccet. Atqui juxta Calvinum, talis est Deus. Ergo juxta Calvinum Deus est moralis causa & author peccati. Vide Card. Bellarminum Lib. II. de Amissione gratiæ & statu peccati, Cap. III. & Becanum, in Manuali Lib. III. Cap. V.

*Deum non
esse pecca-
ti autho-
rem docent
Scripturæ*

146. Conclusio. Deus non est author & causa peccati. Prob. I. Autoritate Scripturarum. Psal. V. v. 5: *Quoniam non Deus volens iniquitatem tu es.* Sapientię Cap. XIV. v. 9. *Odio sunt Deo impius & impietas ejus.* Ecclesiastici Cap. XV. v. 21. *Nemini mandavit impie agere.* Ezechielis Cap. XVIII. v. 23. *Numquid voluntatis meę est mors impii, dicit Dominus?* Osee Cap. XIII. v. 9. *Perditio tua Israel, (id est, ex te,) tantummodo in me auxilium tuum.* I. ad Thessalon. Cap. IV. v. 3. *Hęc est voluntas Dei, sanctificatio vestra.* II. Petri Cap. III. v. 9. *Nolens aliquos perire.* Jacobi Cap. I. v. 13. *Nemo cum tentatur, dicat, quoniam a Deo tentatur: Deus enim intentator malorum est: ipse autem neminem tentat.*

Patres.

147. Prob. II. Autoritate Patrum. S. Justinus in Dial. cum Tryphone ait: *Illud quoque ante docui, Deum non esse causam, cur ii, quorum peccata ante cognita sunt, sive Angeli, sive homines improbi efficiantur; sed sua quisque culpa tales sunt.* S. Irenęus in Lib. adversus Florinum, apud Eusebium Lib. V. Hist. Eccl. Cap. XIX. *Ista dogmata, Florine, ut tecum agam humanius, sanę doctrinę & sententię non sunt. . . . Ista dogmata ne hæretici quidem, qui erant ab Ecclesia exturbati, umquam affirmare audebant. Ista dogmata Presbyteri, qui ante nos fuerunt, quique erant Apostolorum discipuli, minime tibi tradiderunt.* Eusebius Cæsariensis Lib. VI. Præparat. Evang. Cap. V. *Impius profecto judicabitur, immo vero pessimus omnium, qui a Creatore universi alios ad adulteria, alios ad rapinas, alios ad alia vi-*

tia

tia impelli arbitretur. Unde sequitur, aut hæc peccata non esse, aut peccandi causam in Creatorem referri. S. Basilii in Hom. Quod Deus non est author malorum, scribit: *Revera mente & prudentia privatus est, qui dicit Deum non esse. Consimilis vero huic est, & nihilo inferior dementia: qui dicit Deum malorum esse authorem. Equale enim ipsorum peccatum esse judico, propterea quod utrique Deum esse negant; alter quidem omnino non esse dicens, alter vero non bonum esse decernens. Si enim malorum author est, nimirum non bonus est. Quare utrimque negatio est Dei.* S. Augustinus Lib. XIII. de Trinit. Cap. XII. *Modus autem iste, quo traditus est homo in diaboli potestatem, non ita debet intelligi, tamquam hoc Deus fecerit, aut fieri jussit; sed quod tantum permiserit, juxta tamen.* Et Lib. V. de Civit. Dei, Cap. IX. *Sicut omnium naturarum Creator est, ita omnium potestatum dator, non voluntatum. Malæ quippe voluntates ab illo non sunt; quoniam contra naturam sunt, quæ ab illo est.* Idem libros III. scripsit de Libero arbitrio, ea potissimum de causa, ut ostenderet Deum non esse authorem peccati. S. Prosper Aquitanus in Responsione ad Capitula Gallorum, Cap. XIV. *Infidelitas non credentium Evangelio, nequaquam ex Dei prædestinatione generatur. Bonorum enim Deus author est, non malorum.* S. Fulgentius Lib. I. ad Monimum, Cap. XIII. *Potuit Deus, sicut voluit, prædestinare quosdam ad gloriam, quosdam ad pœnam. Sed quos prædestinavit ad gloriam, prædestinavit ad justitiam: quos autem prædestinavit ad pœnam, non prædestinavit ad culpam. Posset enim peccatum aliquod ex prædestinatione Dei esse, si posset aliquis hominum juxta peccare. Nullus autem hominum juxta peccat, quamvis cum Deus juxta peccare permittat.* Idem communi consensu asserunt reliqui Patres, Origenes Lib. IV. contra Celsum. S. Athanasius in Orat. contra idola. S. Epiphanius Hær. LXVI. S. Chrysostomus Hom. III. in Gen. & Hom. XXIII. in Acta Apost. S. Gregorius Nazianz. Orat. I. in Julianum. Theodoretus in Epitome divin. Decret. Cap. de Antichristo. S. Da-

masceus Lib. IV. de Fide Orthodoxa, Cap. XX. Tertullianus Lib. adv. Hermogenem. S. Ambrosius Lib. de Paradiso, Cap. XV. & Lib. II. de Cain & Abel, Cap. IX. S. Hieronymus in Cap. I. Epist. ad Ephesios. S. Gregorius M. Lib. II. Moralium, Cap. XXI. & Hom. IX. in Ezechielem &c.

Concilia.

148. Prob. III. Autoritate Conciliorum. Arausicanum II. Capit. XXIII. ait: *Suam voluntatem homines faciunt, non Dei, quando id agunt, quod Deo displicet. Quando autem id faciunt, quod volunt, ut divinæ serviant voluntati, quamvis volentes agant, illius tamen voluntas est, a quo & præparatur, & jubetur quod volunt.* Et Capit. XXV. *Aliquos vero ad malum divina potestate prædestinatos esse, non solum non credimus, sed etiam si sunt, qui tantum malum credere velint, cum omni detestatione illis anathema dicimus.* Tridentinum Sess. VI. Canone VI. *Siquis dixerit non esse in potestate hominis vias suas malas facere; sed mala opera, ita ut bona Deum operari, non permissive solum, sed etiam proprie & per se, adeo ut sit proprium ejus opus non minus proditio Judæ, quam vocatio Pauli; anathema sit.*

Ac sana ratio id dicat.

149. Prob. IV. Ratione Theologica, eaque multiplici. Ima est. Deus non potest velle, desiderare, aut præcipere id, quod ipsius naturæ omnino contrarium est, quodque ipse maxime execratur. Atqui peccatum naturæ divinæ omnino contrarium est; eoquod natura Dei sit bonitas infinita, peccatum vero summa sit malitia. Ergo cum inter Deum & peccatum nulla sit proportio, sed maxima contrarietas, Deus non potest velle, desiderare, aut præcipere peccatum. II. Deus non potest ex animo velle & desiderare ut fiat id, quod diserte, serio, ac severe prohibet fieri: Deus enim habere non potest voluntates inter se contrarias. Atqui Deus diserte, serio, ac severe prohibet peccata, ut Scripturæ sacræ innumeris locis testantur. Ergo. Neque dicas, Deum velle peccatum, non sub ratione mali, sed ex bono fine: præterquam enim, quod etiam homo peccatum non velit sub ratione mali, quando obje-

objectum voluntatis est turpe, bonus finis neque excusat, neque impedit malitiam voluntatis. Nemo enim potest recte appetere adulterium, aut mendacium, etiamsi bono fine se dicat illud appetere, v. g. ad declinandum gravissimum incommodum. III. Nemo, nisi tyrannus, punit illud, quod ipsius voluntate ac consilio factum est. Atqui Deus punit peccata hominum, & quidem gravissimis suppliciis, tam in hac quam in altera vita. Ergo peccata hominum non sunt voluntate ac consilio Dei. Neque dici potest, Deum punire peccata ad manifestandam justitiam suam: nam hoc Tyrannorum proprium est, eo fine velle alios delinquere, ut possit in iis puniendis libidinem suam explere. IV. Si Deus vellet hominem peccare, sequeretur aperta contradicção, hominem nimirum non peccare quando peccat. Ergo. P. A. Qui voluntatem suam cum divina voluntate conformat, non peccat; eo quod illa actio conformis sit voluntati divinæ, quæ est summa perfectionis regula: ideoque nullatenus peccarunt Judæi spoliantes Ægyptum, sicut Abraham immolare volens filium suum Isaac. Sed qui peccatum committit, conformaret suam voluntatem cum divina; quia juxta Calvinum Deus vult ab illo committi peccatum. Ergo qui peccatum committit, non peccat. Ergo frustra venit Christus in hunc mundum ad peccata tollenda. Ergo peccatum nihil est nisi falsa opinio, ut contendunt Libertini. V. Si Deus vult peccata perpetrari, sequitur, eos qui aliena diripiunt, vel adulteria & homicidia perpetrant, templa & altaria everunt &c. non tantum non peccare, sed bene etiam atque honeste agere: e contrario eos solos peccare, qui hæc fieri prohibent. Nam priores illi conformant se divinæ voluntati; posteriores vero directe obsistunt, quia vetant ea fieri, quæ Deus absolute vult fieri. VI. Si Deus vellet peccata ab hominibus perpetrari, eosque ad peccandum urgeret, impelleret, necessitaret, ipse Deus gravissime peccaret. Atqui hoc implicat. Ergo. P. M. Hæc voluntas Dei foret mala, utpote contraria Sanctitati & essentia Dei, quæ omne peccatum necet.

necessario execratur, & prohibet. Ergo esset peccatimosa: ubi enim est voluntas mala, ibi peccatum est Prob. etiam minor propositio. Peccare est deficere, ac recedere a regula legis æternæ, quæ est ipsa divina Sapiencia. Atqui Deus deficere nequit; alias non esset Ens summum & infinite perfectum: neque recedere potest a divina Sapiencia, quæ cum Deo identificatur. Ergo implicat Deum peccare. Hæc certe tam perspicua, tam evidentia sunt, ut Calviniana hæc doctrina merito amentissimam amentiam, atque insanissimum furor sit appellanda.

Argumenta contraria refutantur.

*Neque
contrari-
um evin-
cunt Scri-
ptura.*

150. Objicitur I. Generatim Autoritas Scripturarum. In Scripturis divinis frequenter occurrunt textus, qui si in litterali sensu sumantur, Deum peccati authorem esse dicunt. Ergo cum Scriptura in sensu litterali sumi debeat, dicendum est, Deum esse authorem peccati. R. I. Retorquendo. In Scripturis clarissimi atque innumeri textus dantur, a nobis Num. CXLVI. laudati, qui probrum hoc a Deo remonent, causamque peccati non aliam designant, quam liberum hominis arbitrium. Ergo cum Scriptura in litterali sensu sumenda sit, dici debet ipsum hominem esse causam peccati. R. II. Nisi Deum etiam velimus humanis affectibus agi, & corporeum esse, Scripturam non in proprio, sed figurato sensu sumendam esse, quando id vel irrefragabilis authoritas, vel ratio manifesta evincit, ut in præsentī controversia accidit. Hinc S. Augustinus Lib. III. de Doctrina Christiana, Cap. XVI. scribit: *Si præceptiva locutio est aut flagitium aut facinus vetans, aut utilitatem aut beneficium jubens, non est figurata. Si autem flagitium aut facinus videtur jubere, aut utilitatem aut beneficentiam vetare, figurata est.* Præterea ex Illustrissimo Scipione Maffeo Hist. Theolog. Lib. I. Cap. III. observo, duriusculas illas Scripturarum locutiones continuo emolliri, si quis noverit hebraicos esse hos modos loquendi, qui aliud sonant, aliud

aliud significant: consuetudinem item omnia Deo tribuendi, tamquam causæ primæ, fecisse ut Hebræi phrasēs adhiberent, quibus non raro Deo videantur adscribi ea, quæ non nisi ab hominum perversitate procedunt. Sapienter S. Augustinus monet Lib. de vera Religione, Cap. L. *Habet omnis lingua sua quædam propria genera locutionum, quæ cum in aliam linguam transferuntur, videntur absurda.* Hebraicum idioma & Syriacam dialectum qui callent, optime norunt quam asperos habeat loquendi modos, quamque ab eorum, qui Occidentis plagas incolunt, cogitandi ratione alienos. Non suppetunt Hebræis verba, quæ certas explicant præcisiones, aut recte distinguant agere & pati: carent non nullis temporibus, neque infrequenter tempus unum alteri furrogant: eodem utuntur vocabulo ad res affines quidem, at differentes: neque desunt iis verba & nomina, quorum significationes complures non diversæ modo sunt, sed etiam oppositæ. Expressiones sæpe adeo sunt hyperbolicæ, ut ad litteram spectatæ mutare videantur significatum; peccatum enim irremissibile idem interdum est, quod difficulter condonabile, odisse idem ac minus amare &c. Novum usque adeo Testamentum, tametsi maxima saltem ex parte Hebraice scriptum non fuerit, Hebraismorum plenum est; tum quod veteris Testamenti effata sæpe repetat: tum quod ab Hebræis concinnatum sit.

151. Objic. II. Prædestinatio impiorum. Deus ab æterno prædestinavit, seu efficaciter decrevit & absolute peccata omnium hominum. Ergo est author peccati. P. A. Gen. Cap. XLV. v. 8. ait Joseph ad fratres: *Non vestro consilio, sed Dei voluntate huc missus sum.* Et Cap. L. v. 19. *Nolite timere: Num Dei possumus resistere voluntati?* Act. Cap. II. v. 23. *Hunc definito consilio & præscientia Dei traditum (Christum) per manus iniquorum affigentes interemistis.* Act. Cap. IV. v. 27. *Convenerunt enim vere in Civitate ista adversus Sanctum puerum tuum Jesum, quem unxisti, Herodes, & Pontius Pilatus cum Gentibus & populis Israel, facere quæ manus*

Prædestinatio impiorum.

tua

tua & consilium tuum decreverunt fieri. Ergo Deus prædestinavit, seu efficaciter & absolute decrevit peccatum fratrum Joseph, & Judæorum. R. N. A. Ad prob. C. A. N. C. Deus prædefinivit protectionem Josephi in Ægyptum, benevolentiam & charitatem illius erga fratres, patientiam Christi, & redemptionem humani generis, supposita malitia fratrum Josephi, & Judæorum, quam ab æterno præsciebat quidem, & permittere decreverat, minime tamen prædefiniverat. Hinc verba Josephi ad fratres hunc habent sensum: Non vestro consilio, sed Dei providentiæ, causam ingressus mei in Ægyptum adscribo; Deus enim malitiam vestram prævisam in bonum usum convertit, ut salvos facerem multos populos, fame alias morituros. Illud vero, *Num Dei possumus voluntati resistere?* ad solum Josephum referendum est, de se in numero multitudinis loquentem ea de re, quæ ad omnes pertinet Deum vere timentes. Hebræus enim textus, cui consonat Græcus & Chaldaus ita habent: *Nolite timere, nam sub Deo ego sum.* Id est, nolite putare, me illatæ injuriæ ultorem futurum; Deum enim timeo, & illi subiectus sum: atque ideo illum imitari, eique obedire debeo. Cum igitur Deus occasione vestri criminis tanta bona mihi contulerit, non possum vobis irasci, ne ingratus erga Deum videar.

152. Dices I. Deus prædefinivit mortem Christi, & redemptionem humani generis. Ergo Deus ab æterno prædefinivit causam mortis Christi. Sed causa mortis Christi fuit peccatum Judæorum. Ergo Deus prædefinivit peccatum Judæorum. P. C. Qui absolute vult effectum aliquem, absolute vult etiam causam, sine qua effectus ille non daretur. Ergo, R. C. A. N. C. Ex antecedente plus non inferitur, quam quod Deus decreverit permittere peccatum Judæorum; minime vero quod illud prædefiniverit, vel præordinarit. Aliud autem est permissio peccati, quæ a Deo ordinatur ad finem bonum, ad manifestandas nempe mortalibus divinas suas perfectiones, justitiam, vel misericordiam; aliud est præordinatio peccati, quæ a Deo fieri non potest,

potest eoquod nequeat velle aliquid turpe & inhonestum. Ad *probat*, D. A. Qui absolute, & nulla facta suppositione vult effectum, vult etiam causam, C. A. Qui facta suppositione, & sub conditione ab alio purificanda vult effectum, hoc ipso vult etiam causam, N. A. Deus juxta nostrum concipiendi modum, post præscientiam peccati Judæorum, quod permittere statuit, prædefiniuit mortem Christi; adeoque non nisi facta suppositione, quod Judæi ex propria malitia sint Christum interfecuri.

153. Dices II. Si Deus peccata non præordinat, sed tantum permittit, hæc permissio fieret Deo nolente, aut volente: si Deo nolente; Deus omnipotens non est, qui peccatum impedire nequeat: si volente; ergo peccata fiunt Deo volente, ut contendit Calvinus. R. Permissio peccati, eoquod sit bona, Deusque illa utatur ad manifestationem divinarum perfectionum suarum, fit Deo volente: peccatum vero ipsum, quia semper malum est omni honestate carens, fit Deo non volente. Quod si inferas: Ergo peccatum ipsum fit Deo nolente. Nego illatum. Inter velle & nolle datur medium, nimirum non velle.

154. Dices III. Si Deus prohibendo peccata non vellet ea fieri, nullum umquam comitteretur ab hominibus peccatum. Atqui plurima committuntur quotidie. Ergo falsum est, quod Deus non velit ea fieri. P. M. Dei voluntati nemo potest resistere. R. D. M. Si Deus non vellet ea fieri, voluntate absoluta & efficaci, id est, si positive nollet ea fieri, C. M. Si Deus non vellet ea fieri, voluntate seria quidem, non tamen efficaci & absoluta, N. M. Deus voluntate seria, & beneplaciti quantum est in se, non vult peccata fieri, sed omnes cupit salvos fieri: non tamen idcirco liberum hominibus adimit arbitrium, quo bene vel male utentes justissime judicentur. Vult igitur Deus aut peccata non fieri; aut si fiant, justissimas pœnas expetere.

155. Dices IV. Deus vult pœnam, quam infligit. Atqui peccatum sæpe est pœna alterius peccati. Ergo
Deus

Deus saepe vult peccatum. P. m. Peccatum saepe esse pœnam alterius peccati testatur S. Augustinus Lib. V. contra Julianum, Cap. V, immo ipse Apostolus ad Rom. Cap. I. v. 28. *Propter quod tradidit illos Deus in reprobum sensum, ut faciant ea quæ non conveniunt.* R. C. M. N. m. Peccatum est pœna alterius peccati improprie tantum ac consecutive, quatenus nimirum Deus in pœnam prioris peccati homini gratiam efficacem denegat, sicque homo a Deo desertus facile iterum in priora scelera relabitur: aut etiam quatenus ex peccato alia mala consequuntur, v. g. tristitia, remorsus conscientiæ, infamia, valetudo infirma &c. quæ omnia veræ pœnæ rationem habent. Quare ipsum peccatum pœna dici non potest ratione sui, sed tantum ratione mali annexi, aut derelictionis & desertionis. Neque quidquam Catholicæ veritati contrarium ex Augustini libris contra Julianum exculpi potest. Augustinus enim Julianum non reprehendit, quod dixerit Deum tradere deserendo; sed I. Quia dixerat Julianus hominem a Deo non deseri in pœnam alterius peccati. II. Quod per ly *deserere* non intellexerit destituere, seu non juvare cadentem, sed permittere ut quis hæreat in desideriis, in quibus jam erat; cum tamen *tradi in desideria* aperte significet, permittere ut in aliquo sint desideria prava, illisque consentiatur. III. Quia Julianus desertionem Dei non accepit pro destitutione auxilii efficaci, sed pro simplici tolerantia & patientia Dei.

Finis creationis eorumdem.

156. Objic. III. Finis creationis impiorum. Deus impios creat ad sempiternum interitum, ut in illis puniendis divinam suam justitiam exerceat. Ergo Deo volente ac decernente fiunt peccata. P. A. Proverb. Cap. XVI. dicitur: *Universa propter semetipsum operatus est Dominus; impium quoque ad diem malum.* Ad Rom. Cap. IX. *An non habet potestatem figulus facere aliud vas in honorem, aliud in contumeliam?* Exodi Cap. IX. v. 16. *Idcirco autem posui te (Pharaonem) ut ostendam in te fortitudinem meam, Et narretur nomen meum in omni terra.* Et ad Rom. Cap. IX. de eodem Pharaone dicitur:

citur: *In hoc ipsum excitavi te, ut ostendam in te virtutem meam.* R. D. A. Deus impios creat ad sempiternum interitum, ante prævisionem absolutam demeritorum, N. A. Consequenter ad illam, C. A. N. C. Alicui ante demeritorum absolutam prævisionem supplicium decernere, non justitia est, sed injustitia: sicut injustitia est sine demerito aliquem suppliciiis afficere, ut docet S. Augustinus Epist. CVI. nunc CLXXXVI. ad Paulinum: *Quemquam immeritum, Et nulli obnoxium peccato si Deus damnare creditur, alienus ab iniquitate non creditur.* Deus igitur dicitur creare impios ad diem malum, quia creat illos cum æterno decreto eos damnandi, sed præsupponente absolutam prævisionem demeritorum, quæ ipse Deus facturus non est, sed solum permisurus: quæ ipse non præparavit, sed solum permittere decrevit ab æterno, ut in tempore justitiam & potentiam suam demonstraret in puniendis malis meritis, quorum non est author, sed justus ultor. Deus fecit vasa quædam in contumeliam ex materia damnata & contumeliosa, non pro voluntate sua, sed pro conditione materia: non antecedenter, sed consequenter ad absolutam demeritorum prævisionem. Nec majorem difficultatem habet illud, quod de Pharaone Exodi Cap. IX, & ad Rom. Cap. IX. dicitur; teste enim Augustino Quæst. XXXII. in Exodum, habet hunc sensum: Ubi primum malus & impius effectus es, potui tibi regnum cum vita eripere: malui tamen in vita te diutius conservare, ut malitia tua, quam non feci, sed solum permisi, uterer ad probationem populi mei, & potentia meæ in tuo supplicio demonstrationem. Deus igitur non facit malos, sed illis utitur ad bonum electorum: neque creat, ut mali sint, sed creatos permittit fieri malos: neque malos effectos patitur ut pejores fiant, & malitiam suam augeant; sed ut vitio suo in malitia obstinati bonos exerceant, vel debito supplicio affecti admoneant, omnesque agnoscant, quanta sit ira & potentia Dei in sceleribus vindicandis.

157. Dices I. Deus non ambiguo fine condidit reprobos. Ergo ab æterno decrevit, ut enormia com-

mit-

mitterent scelera, & in impietate sua perseverarent. R. C. A. N. C. Deus omnes creaturas rationales ad majorem suam gloriam condidit, serio desiderans, quantum est in se, ut omnes ad agnitionem veritatis perveniant, & æternam salutem consequantur. Neque hæc seria Dei voluntas, quamvis affective tantum respectu omnium, non effective efficax fuerit, frustranea dici potest. Siquidem idcirco ex hoc desiderio salutis omnium concessit Deus omnibus gratias vere sufficientes, quibus adjuti æternam salutem consequi omnes possent, si vellent. Quod si vero homines nollent mandata servare, & salutem adipisci, sicque misericordiam Dei commendare: voluit ut justitiam Dei punientis experirentur, fieretque de illis voluntas Dei consequens prævisionem absolutam consummata impietatis eorum, qui neglexerunt implere voluntatem Dei antecedentem eorum demerita. Ad hunc autem finem obtinendum nullo opus est decreto prædefinitivo, quo Deus efficaciter velit scelera patrari; sed sola sufficit præscientia cum decreto permittendi, seu non impediendi ea scelera.

158. Dices II. Deus debuit manifestare hominibus, posito quod creaturas condere voluerit, divinas suas perfectiones, misericordiam præcipue & justitiam. Ergo ab æterno decrevit lapsum & interitum plurimorum hominum. P. C. Si nulla creatura in culpam lapsa fuisset, non esset qui juste puniri, aut misericorditer liberari posset. Ergo Deus ab æterno prædefinire debuit lapsum & interitum plurimorum. R. C. A. N. C. Ad *probat.* D. A. Non esset qui misericorditer liberari posset, liberatione reparativa, C. A. Præservativa, N. A. Quamvis nulla creatura in culpam lapsa fuisset, Deus tamen misericordiam suam apertissime demonstrasset creaturas a lapsu præservando, easque tot beneficiis cumulando: justitiam etiam suam manifestasset coronando bene merentes, & promissiones suas adimplendo. Quin immo justitiam vindictivam luculenter ostendisset comminando prævaricatoribus legis acerbissima supplicia. Quamvis enim nulla creatura, ut-

pote-

pote singulari Dei gratia a peccatis præservata, vindicem Dei manum experta fuisset; ob infinitam tamen Dei minantis & loquentis potentiam atque auctoritatem, nullus dubio locus fuisset, Deum & scelera omnia execrari, & justissimas de illis pœnas, si quæ patrarentur, exacturum esse.

159. Objic. IV. Incitatio ad peccatum. Deus impellit, atque incitat homines ad peccatum, tum per se, tum per alios, quibus tamquam instrumentis utitur. Ergo. P. A. Imo. Lib. II. Regum, Cap. XXIV. dicitur: *Commovit (Dominus) David dicentem in eis: Vade, numera Israel & Judam.* II. Psal. XLIII. *Declinasti semitas nostras a via tua.* III. Lib. III. Regum, Cap. XXII. *Dixit Dominus: (diabolo) Decipies, & prævalebis: egredere, & fac ita.* ... *Dedit Dominus spiritum mendacii in ore omnium Prophetarum.* IV. Matth. Cap. VI. *Et ne nos inducas in tentationem.* V. Lib. II. Regum, Cap. XVI. *Dominus præcepit (Semei) ut malediceret David.* VI. Psal. CIV. *Convertit cor eorum (Ægyptiorum) ut odirent populum ejus.* VII. Lib. III. Reg. Cap. XI. & XII. item Lib. IV. Cap. IX. & X. rebellio Jeroboam contra Roboamum, & Jehu contra Achab dicitur a Deo fuisse. Ergo. R. N. A. in sensu ab adversariis intento. Triplici modo Deus dici potest hominem impellere & incitare in sensu tropico & figurato ad peccatum, ut observant Card. Bellarminus Lib. II. de Amissione gratiæ & statu peccati, Cap. XIII. Et Simonnet Tract. V. de Peccatis, Disput. I. Art. VI. Ac Imo quidem permittendo homines male agere, pravamque eorum voluntatem non impediendo. Cum enim sine permissione Dei nihil fieri possit; ea vero quæ Deus post prævisionem permittere vult, certissime sint eventura, hoc ipso quod peccatum hominis non impediatur, in sensu quodam tropico ac figurato dici potest homines ad peccatum impellere & incitare: sicut tropice indurare aliquem dicitur, quando illum indurari permittit. II^{do} modo Deus improprie ad peccatum inducere dicitur, quatenus voluntates hominum proprio vitio malas, non positive quidem, sed permissive

*Incitatio
ad peccatum.*

sive ordinat ad unum potius malum, quam ad aliud, impediendo ne unum malum faciant, & ut aliud faciant permittendo, seu per occultam & invisibilem operationem illis permittendo, ut hoc modo mali sint, & non alio, ut hoc malum velint, & non aliud. Atque hoc modo Deus ipse dixit, afflictum a se fuisse servum suum Job, Satanam ita alloquens Job. Cap. II. v. 3. *Tu autem commovisti me adversus eum, ut affligerem eum frustra*, quamvis vexationum illarum author fuerit daemon, cui facultatem petenti Sanctum virum vexandi respondit Deus verbis illis Job. Cap. I. v. 12. *Ecce, universa quæ habet, in manu tua sunt; tantum in eum ne extendas manum tuam*. III^o modo Deus per tropum homines ad peccandum provocare dicitur, quatenus malas eorum voluntates, & ad malum sua sponte jam determinatas, ad unum potius malum faciendum quam ad aliud inclinat, non solum permissive, sed etiam positive flectendo ad unum, & detorquendo ab alio: non quidem per actionem, qua physice voluntates illas ad unum malum immediate moveat ac determinet, atque ab alio avertat, (hic enim modus & humanam libertatem tolleret, & Deum faceret peccati authorem) sed occasionaliter, immittendo v. g. bonam aliquam cogitationem, ex qua homo malus occasionem sumit unum malum potius volendi quam aliud, judicandi v. g. melius esse huic nocere quam alteri, huic iniquitati potius serviendum esse quam alteri.

160. Ex his facile respondetur ad textus illos in objectionem allatos. Primi quatuor textus pertinent ad primum compulsionis modum. Deus nimirum ad puniendam populi ac Principum peccata, congruum eis auxilium subtrahendo permisit, ut David numeraret populum, ut Judæi averterentur a viis Domini, ut Achab deciperetur: rogamusque Deum in Oratione Dominica, ne nos deserendo tentationi succumbere permittat. V^{us} textus explicandus est per secundum compulsionis modum. Nimirum Deus voluntati Semei, qui Davidem oderat, atque ad gravissima mala inferenda paratus erat, occulta operatione ad hoc malum Davidi infe-

inferendum viam aperuit, & ad alia præcluserit, non impediendo ne malediceret, & impediendo ne gravius malum inferret. *Quomodo dixerit Dominus huic homini*, scribit S. Augustinus Lib. de Gratia & Libero arbitrio, Cap. XX, *maledicere David, quis sapiens Et intelliget? Non enim iubendo dixit, ubi obedientia laudaretur; sed quod ejus voluntatem proprio vitio suo malam in hoc peccatum judicio suo justo Et occulto inclinavit, ideo dictum est. Dixit ei Dominus. Nam si iubenti obtemperasset Deo, laudandus potius quam puniendus esset, sicut ex hoc peccato postea novimus esse punitum.* VI^{tu}s textus ad tertium compulsionis modum pertinere videtur. Deus Ægyptiorum corda ad odium Israelitarum convertit, non solum permissive, id est, hoc odium non impediendo, sed etiam positive: non quidem Ægyptios per se vel per alios ad odium provocando, sed Israelitis beneficiendo; cum prævideret Deus, Ægyptios inde pro sua malignitate occasionem sumpturos Israelitas acerbius insectandi. Ad VII. R. cum S. Augustino Lib. XVII. de Civit. Dei, Cap. XXI. & XXII. Jeroboam & Jehu in illa defectione non peccasse, fuisseque legitimos Reges, atque a Deo electos. Cum enim Roboam Rex Juda exercitum eduxisset, Israelitas idcirco cum Jeroboamo deleturus, misit Deus Semejam Prophetam, qui Roboamo, & Tribui Juda diceret, III. Reg. Cap. XII. v. 24. *Hæc dicit Dominus: Non ascendetis, neque bellabitis contra fratres vestros filios Israel: revertatur vir in domum suam, a me enim factum est verbum hoc.* Jehu pariter nihil tale cogitans, Elisæi jussu ab uno Prophetarum Rex Israel unctus est, dixitque ad eum Dominus IV. Reg. Cap. X. v. 30. *Quia studiose egisti quod rectum erat, Et placebat in oculis meis, Et omnia quæ erant in corde meo, fecisti contra domum Achab: filii tui usque ad quartam generationem sedebunt super thronum Israel.* Quæ vero habentur Oseæ Cap. VIII. *Ipsi regnaverunt, Et non ex me: principes extiterunt, Et non cognovi, intelligenda sunt de usu regni, non de institutione.*

*Induratio
& excacatio.*

161. *Objic. V. Induratio & excacatio impiorum.* Deus indurat, & excacat peccatores. Ergo Deus est causa peccati. P. A. Exodi Cap. IX. dicitur: *Induravit Dominus cor Pharaonis.* Isaia Cap. LXIII. *Quare errare nos fecisti Domine de viis tuis? indurasti cor nostrum, ne timeremus te?* Ad Rom. Cap. IX. *Cujus vult miseretur, & quem vult, indurat.* Isaia Cap. VI. v. 10. *Excaca cor populi hujus, & aures ejus aggrava, & oculos claude: ne forte videat oculis suis, & auribus suis audiat, & corde suo intelligat, & convertatur, & sanem eum.* Joannis Cap. XII. Propterea non poterant credere, quia iterum dixit Isaia: *Excacavit oculos eorum, & induravit cor eorum.* R. D. A. Deus indurat & excacat peccatores directe ac positive, N. A. Indirecte ac negative, C. A. N. C. Deus est tantum causa permissiva indurationis & excacationis, non impediendo, non miserendo, deserendo illos, a quibus prior desertus est, ut S. August. docet Epistola CV. nunc CXCV. ad Sixtum: *Non obdurat Deus impertiendo malitiam, sed non impertiendo misericordiam.* Et Lib. I. ad Simplicianum, Quæst. II. *Obduratio Dei est nolle misereri: nec ab illo irrogatur aliquid, quo sit homo deterius; sed tantum quo sit melior, non erogatur.* Item Tract. LIII. in Joan. *Sic excacat, sic obdurat Deus, deserendo, & non adjuvando: quod occulto judicio facere potest, iniquo non potest.* Cæcitas mentis consistit in præjudiciis, seu persuasionibus falsis, quibuscum falsa & erronea conscientia naturali necessitate connexa est, & ad quas voluntas ita afficitur, ut præ illis non solum quamlibet verisimilitudinem, sed etiam ipsammet evidentiam contemnat & abjiciat. Durities cordis est affectus pravus, quo voluntas admonitiones divinas tam internas quam externas contemnit, eisque resistit, immo nec eas sentit. Quid ergo cor durum? inquit S. Bernardus Lib. I. de Considerat. Cap. III. *Ipsa est, quod nec compunctione scinditur, nec pietate molitur, nec movetur precibus, minis non cedit, flagellis duratur.* Utraque, tam cæcitas mentis, quam durities cordis, peccatum est gravissimum; eo quod

quod sit affectus pravus, & error gravis ac voluntarius in materia morum, & quidem cum pertinacia: est causa peccati; multa enim ab induratis & excæcatis male fiunt ex culpabili ac voluntaria cæcitate mentis, & duritie cordis: est pœna peccati; quia Deus neminem deserit, nisi in pœnam peccatorum admissorum. *Ad probat.* C. A. N. C. Primi tres textus ex hæcenus dictis facile explicantur. IV^{us} ex Isaia hunc habet sensum: Prædic eos excæcandos, atque indurandos esse; occudent enim Judæi sponte, ac propria malitia, oculos mentis, ne quo forte casu videant veritatem: aures data opera obturabunt, ne audiant veritatem. Vide Tirinum in Cap. VI. Isaia. Postremum locum ex Cap. XII. Evangelii S. Joannis luculenter explicat S. Augustinus Tract. LIII. in Joan. *Dicitur enim nobis: Si non potuerunt credere, quod peccatum est hominis non facientis quod non potest facere?* Ad quod respondet: *Si autem non credendo peccaverunt, potuerunt ergo credere, & non fecerunt. Si ergo potuerunt, quomodo dicit Evangelium: Propterea non poterant credere, quia iterum dixit Isaia, Excæcavit oculos eorum, & induravit cor eorum?.. Hoc autem Propheta prædixit, quia Deus hoc futurum esse præcivit. Quare autem non poterant, si a me quærat, cito respondeo, quia volebant: malam quippe eorum voluntatem prævidit Deus, & per Prophetam prænuntiavit ille, cui abscondi futura non possunt.*

162. Dices I. Si Deus hominem excæcat & indurat deserendo, peccatum merito adscribi potest Deo. Ergo Deus est author peccati. P. A. Homo excæcatus & induratus non tantum non videt veritatem, aut Spiritui Sancto actu resistit, verum etiam non potest videre veritatem, aut divinis inspirationibus cedere. Ergo peccata, quæ committuntur ab excæcatis & induratis, non possunt illis imputari, sed Deo. R. N. A. *Ad probat.* D. A. Non potest videre veritatem, aut divinis inspirationibus cedere, in sensu composito excæcationis & indurationis, C. A. In sensu diviso, N. A. & Conseq. Quamvis homo dum est cæcus & induratus,

T. IV. Theol. Dogm. Polem.

K

non

non possit cernere veritatem, & cedere inspirationi, potest tamen facere sensum divisum, id est, remove-
re cæcitatem & obdurationem, petendo a Deo auxilium; sicque remoto obicē, & videre & cedere poterit. Numquam enim Deus ita destituit hominem, quin saltem juvet illum ad impetrandam gratiam & vires, quibus obduratio tolli possit; saltem quamdiu homo tenetur ad fidem, vel ad justitiam converti, ita ut si hoc non agat, peccet.

163. Dices II. Si homo petendo auxilium remove-
vere potest cæcitatem & obdurationem, judicium Dei, quo aliquos in pœnam præteritorum scelerum indurat & excæcat, erit incertum. Atqui hoc dici non potest. Ergo. R. N. M. Deus non solum deserit, atque hac desertione sua vinci finit ab hostibus eum, qui excæcari & indurari meretur; sed etiam denegat illi gratiam congruentem ejus ingenio ad petendum auxilium, id est, eum non excitat & vocat, quomodo prævidet illi aptum esse, ut sequatur excitantem & vocantem. Et quamvis non deneget auxilium, quo ille absolute possit opem a Deo petere; certissime tamen prævidet, eum auxilio illo ad salutem non usurum esse. Atque ita cujus vult miseretur, & quem vult, certissimo ac justissimo judicio indurat.

Operatio.

164. Objic. VI. Operatio Dei. Deus reipsa operatur & efficit ea quæ mala sunt, tamquam causa principalis. Ergo. P. A. I. Isaia Cap. XLV. v. 7. dicitur: *Ego Dominus, & non est alter: faciens pacem & creans malum. Ego Dominus faciens omnia hæc.* II. Lib. II. Reg. Cap. XII. *Hæc dicit Dominus: Ego suscitabo super te malum de domo tua: & tollam uxores tuas in oculis tuis, & dabo proximo tuo.--- Ego faciam verbum istud in conspectu omnis Israel.* Ergo incestus Absolonis Deum habuit authorem. III. Lucæ Cap. II. dicitur de Christo: *Ecce positus est hic in ruinam, & in resurrectionem multorum in Israel.* Et ad Rom. Cap. IX. dicitur Christus lapis offensionis, & petra scandali. IV. Ad Ephesios Cap. I. *Qui operatur omnia secundum consilium voluntatis suæ.* Ergo si omnia, hoc ipso etiam
pec-

peccata operatur. R. N. A. Ad I. Sermo ibi est de malo pœnæ, non de malo culpæ, ut notant Tertullianus, Origenes, Hieronymus, Damascenus, alique Patres. Ad II. N. C. Nec imperavit, nec suasit Deus tantum scelus Absoloni; permisit tamen ad puniendum Davidem, ut Absolonis voluntas ad multa scelera jam inclinata, in hoc rueret, cohibendo ab aliis. Ad III. R. Christum non fuisse missum in hunc mundum, ut esset causa & occasio ruinæ vel scandali, sed ut esset omnibus causa salutis, quamvis Deus prævideret aliquos, malitia sua, occasionem scandali sumpturos. Quare non lapis ipse a Deo positus, sed voluntaria cæcitas ac perfidia offendentis ruinam generavit. Ad IV. N. C. Scriptura nullibi dicit, Deum operari omnia quæ fiunt in mundo, tam bona quam mala: immo sæpius diserte contrarium docet. Apostolus igitur ait, Deum operari omnia quæ operatur, non temere atque invitum, sed liberrime & prudentissime, ut Deum decet operari.

165. Objic. VII. Influxus Dei. Juxta communissimam Doctorum Catholicorum sententiam, Deus immediate influit in omnes actiones creaturarum, etiam malas. Ergo Deus est causa moralis peccatorum, sicut est causa moralis ac per se actus boni. P. A. Deus co-operatur homini peccanti. Ergo per se est causa peccati. R. C. A. N. C. Quamvis Deus in actiones creaturarum etiam peccaminosas influat, author tamen peccati dici non potest, I. Quia peccatum nec præcipit, nec suadet. II. Quia licet illud impedire possit, non tamen tenetur: cum ex illo plurima bona eruere possit, nimirum manifestationem divinarum perfectionum suarum. III. Quia non immediate libere, neque ex propria determinatione, aut cum inclinatione & jure electionis influit. Hinc licet Deus sub ratione causæ physicæ non magis sit causa actus boni quam mali; sub ratione tamen causæ moralis, cui talis actus imputari potest, est causa actus boni, non vero mali: quia in actus bonos influit cum inclinatione positiva, illos suadet, atque etiam præcipit, quod non facit respectu

actus mali. Ad *probat.* N. A. Cooperari peccanti dicitur ille, qui immediate libere ponit aliquid ad peccatum conducens, quod ipse tamen, quantum potest, tenetur impedire.

166. Dices. Si Deus non immediate libere influit in actiones peccaminosas creaturarum, actio creaturæ deberet esse natura prior ad influxum. Hoc dici nequit. Ergo. P. M. Si actio creaturæ non est natura prior ad influxum, nulla dari potest ratio, cur creatura dicatur determinans, Deus vero determinatus. Ergo. R. N. M. Deus causaliter quidem est determinatus ad concurrendum ex ipsa natura sua, ac per ipsam applicationem omnipotentia; formaliter vero determinatur per ipsam actionem: quæ actio, in quantum est determinatio activa creaturæ, non est determinatione passiva Dei, prior naturâ, sed logice tantum; illam enim ut antecedentem concipimus, eoquod creatura non ideo agat, quia Deus illam absolute & efficaciter vult agere; sed potius ideo cum creatura agit & concurrat Deus, quia creatura vult agere. Ad *probat.* N. A. Ex duabus causis in eundem effectum influentibus illa jure dicitur determinans, in cujus potestate est, posito toto actu primo proximo, agere vel non agere: illa vero, in cujus potestate id tunc amplius non est, dicitur influere ut determinata. Cum ergo, posito toto actu primo proximo, in solius creaturæ potestate sit ponere vel non ponere actum, (Deus enim respectu actus non amplius est immediate liber) habetur ratio aliqua, cur creatura dici queat determinans, Deus vero, juxta nostrum concipiendi modum, determinatus.

167. Ad solvendas alias objectiones, quas afferre quis posset, ut evincat, Deum ob immediatum in actiones peccaminosas influxum authorem esse peccati, ex Philosophia, in qua olim fusius hæc quæstio pertractari solebat, noto I. Deus est causa per se illius tantum actionis, quam ipse immediate libere ponit ex sua electione ac determinatione; non vero illarum, quas mediate libere tantum ponit contra inclinationem suam, atque ex aliena determinatione, quales sunt actiones pec-

peccaminosa. II. Ratione peccati non debet dari causa prima, ac per se: cum peccatum non tam sit actio, quam defectio; sed sola sufficit causa creata, quia hæc sola deficere potest. III. Deus ponit physice determinationem tantum formalem peccati, id est, ipsam actionem, non vero immediate libere, & cum inclinatione. IV. Quamvis Deus immediate libere conferat actum primum proximum, sine quo actio peccaminosa dari non posset, non tamen propterea etiam immediate libere ponit actionem peccaminosam; quia illa non necessario, sed ex libera determinatione creaturæ sequitur ex concursu indifferente. V. Deus concurrit ad peccatum volens negative, id est, permittens; non autem positive, id est, eligens atque intendens peccatum. Neque hic concursus consequenter ad actum primum proximum, qui includit negationem omnis impedimenti inaufertibilis a creatura, ac decreti miraculosi, quo Deus nollet concurrere, amplius liber est Deo. VI. Deus ponit influxum physicum positive, contra suam tamen inclinationem, & ex determinatione creaturæ: peccatum vero positive non vult, neque ad illud determinat; immo neque positive vult concursum suum in actu secundo, qui ipsi displicet, quamvis eum, ex aliena determinatione, contra inclinationem suam ponat. VII. Quamvis Deus conferendo actum primum proximum ad peccatum praveat peccatum esse secuturum, id tamen Deo imputari non potest. 1. Quia Deus habet jus conferendi actum primum proximum. 2. Quia non tenetur peccatum impedire. 3. Quia non concurrit peccatum intendendo. 4. Quia peccatum neque physice, neque metaphysice connexum est cum actu primo proximo, & concursu Dei indifferente. VIII. Concursus Dei ad peccatum in se neque bonus, neque intendibilis est: honeste vero ponitur ac permittitur a Deo; quia illum non ponit immediate libere, sed tantum ut causa universalis, & ad fines optimos suæ providentiæ. IX. Omnipotentia Dei potest cum creatura positive ponere peccatum; quia omnipotentia Dei formaliter sumpta non est potentia imme-

immediate libera: atque hinc denominari non potest moraliter mala, cum illud non eligat libere. Contra voluntas Dei est potentia immediate libera & electiva. Si ergo vellet positive peccatum, dici posset ac deberet moraliter mala.

CONTROVERSIA III.

AN PECCATA VENIALIA ET MORTALIA DIFFERANT
INTER SE INTRINSECE, ET EX NATURA SUA?

CONTRA JOVINIANUM, PELAGIUM, WICKLEFFUM, LUTHERUM, CALVINUM, BAJUM.

Errores 168. Jovinianus Monachus Mediolanensis, novæ hæ-
Novato- resis author, ad finem Sæculi IV. docuit, omnia pec-
rum. cata esse paria, ut clare indicat S. Hieronymus Lib. II. adversus Jovinianum prope finem: *Non tibi habebunt tantas gratias, quos de humili in sublime levas, quantum irascentur, quos propter leve quotidianumque peccatum in exteriores tenebras retrusisti.* Pelagius quolibet peccato justitiam amitti asseruit: cumque negare haud posset, multos in hoc sæculo nequam dari justos, affirmabat posse hominem in hac vita nullum omnino habere peccatum, atque ex his Ecclesiam Christi tamquam membris constitui, ut sit omnino sine macula & ruga. Joannes Wickleffus contendebat omnia peccata, etiam illa quæ a nobis venialia dicuntur, inducere posse mortem æternam; ideoque esse de se mortalia, quamvis eam de facto prædestinatis non inducant, sed solis reprobis. Hanc ipsam insaniam renovavit Calvinus, docens peccata fidelium prædestinatorum, quantumvis gravia & enormia, esse venialia, non tam quia electi sunt, quam quia fidem & charitatem semel acceptam numquam amittunt; reproborum vero peccata, quantumvis levia videantur, esse mortalia, eoquod fide & gratia destituti in omnibus suis actibus gravissime peccent. Contrà Lutherus omnia quidem peccata de se mortalia esse agebat, eaque infidelibus ad mortem æternam imputari; fidelibus autem, sive prædestinati
sive

sive reprobi sint, ex sola Dei misericordia fieri venialia. Michæel Bajus Belga, Theologus Lovaniensis, hanc propositionem statuit inter damnatas a S. Pio V. & Gregorio XIII. ordine XX. *Nullum est peccatum ex natura sua veniale; sed omne peccatum meretur pœnam æternam.*

169. Ex Catholicis Doctoribus propius ad Sectariorum errorem accessere Joan. Gersonius Cancellarius Academiæ Parisiensis, in Tract. de Vita Spirit. Lect. I. Jacobus Almainus Tract. III. Cap. XX, & Joannes Fischerus Episcopus Roffensis in refutatione Lutheri, Art. XXXII. docentes, omnia peccata ex natura sua esse mortalia, quædam vero ex Dei misericordia esse tantum venialia. Verum præterquam quod opinionem hanc suam pertinaciter non defenderint, discrepant etiam a Novatorum errore, I. Quia Deum ajunt indiscriminatim, fidelibus & infidelibus, reprobis & prædestinatis aliqua peccata non imputare ad pœnam æternam. II. Quia fatentur, aliqua peccata, secundum præsentem providentiam, non mereri pœnam æternam, licet absolute eadem pœna a Deo statui potuisset in alia providentia.

170. Conclusio. Peccata mortalia & venialia differunt inter se intrinsece, & natura sua, non autem ex sola relatione ad prædestinationem, vel statum renatorum. Prob. I. Autoritate Scripturarum, quæ dicunt etiam in eximiis justis esse quædam peccata, ob quæ tamen non desinunt esse justi. Proverb. Cap. XXIV. v. 16. *Septies in die cadet justus, & resurget.* Ecclesiastis Cap. VII. v. 21. *Non est enim homo justus in terra, qui faciat bonum, & non peccet.* I. Joan. Cap. I. v. 8. *Si dixerimus quoniam peccatum non habemus; ipsi nos seducimus, & veritas in nobis non est.* Jacobi Cap. III. v. 2. *In multis offendimus omnes.* Ergo peccata venialia & mortalia ex natura sua differunt, non vero ex sola relatione ad prædestinationem, vel ad statum renatorum: alias Adamus, David, ac B. Petrus, qui certe erant fideles & prædestinati, numquam graviter peccassent, quod certe repugnat Scripturis, atque

Ac quorundam Catholicorum.

Venialia differre ex natura sua a mortalibus ostenditur ex Scripturis.

que unanimi Doctorum interpretationi ac sensui. Ipse Christus Dominus Lucæ Cap. VI. quædam peccata comparat rebus levissimis, festucæ & culici: alia gravissimis, camelo & trabi. Matthæi Cap. V. v. 22. ait: *Qui irascitur fratri suo, reus erit iudicio. Qui autem dixerit fratri suo, raca: reus erit concilio. Qui autem dixerit, fatue: reus erit gehennæ ignis.* Ubi distinguit tria peccata iracundiæ, quorum tertium æterna pœna dignum est, ac proinde mortale; reliqua duo non item.

Patribus.

171. Prob. II. Authoritate Patrum. S. Ambrosius Lib. II. de Pœnitentia, Cap. X. scribit: *Sicut Baptisma, ita una pœnitentia, quæ tamen publice agitur: nam quotidiani nos debet pœnitere peccati; sed hæc delictorum leviorum, illa graviorum.* S. Hieronymus Comment. in Cap. VII. Matthæi: *De iis loquitur (Christus) qui cum ipsi mortali crimine teneantur obnoxii, minora peccata fratribus non concedunt; culicem liquantes, & camelum glutientes.* Et in Epist. ad Cælantiam: *Stoicorum quidem est peccatorum tollere differentiam, & delicta omnia paria iudicare, nec ullum inter scelus & erratum discrimen facere. Nos vero etsi multum inter peccata distare credimus, quia & legimus: tamen satis prodesse ad cautionem ducimus, etiam minima pro maximis cavere.* S. August. Lib. de Natura & Gratia, Cap. XXXVIII. *Quia sæpe in levissimis, & aliquando incautis obrepit peccatum; & iusti fuerunt, & sine peccato non fuerunt.* In Enchiridio Cap. LXXI. *De quotidianis, levibus, brevibusque peccatis, sine quibus hæc vita non ducitur, quotidiana fidelium oratio satisfacit. Eorum enim est dicere, Pater noster qui es in cœlis, qui jam Patri tali regenerati sunt ex aqua & Spiritu. Delet omnino hæc oratio minima & quotidiana peccata.* S. Gregorius M. Lib. XXI. Moral. Cap. IX. *Hoc inter peccatum distat & crimen, quod omne crimen peccatum est, non tamen omne peccatum crimen est. Et in hac vita multi sine crimine, nullus vero esse sine peccatis valet.* Ex his manifeste patet, Concilii Tridentini doctrinam Scripturæ & Patribus consentaneam esse, quod Sess. VI. Cap. XI. ita loquitur: *Licet enim in hac*

mor-

mortali vita quantumvis Sancti & iusti in levia saltem & quotidiana, quæ etiam venialia dicuntur, peccata quandoque cadant, non propterea desinunt esse iusti. Nam iustorum illa vox est *humilis & verax*, *Dimitte nobis debita nostra*. Atque eadem Sessione Can. XXV. de Justificatione fundamentum Protestantium evertit. Si quis in quolibet bono opere iustum saltem venialiter peccare dixerit, aut, quod intolerabilius est, mortaliter, atque ideo pœnas æternas mereri: tantumque ob id non damnari, quia Deus ea opera non imputet ad damnationem; anathema sit.

172. Prob. III. Ratione Theologica. Si peccata omnia ex natura sua forent mortalia, non possent prædestinatis, fidelibus, aut etiam indiscriminatim omnibus in hac providentia imputari ut venialia. Ergo ex natura sua & intrinsece differunt. P. A. Si omnia peccata essent ex natura sua mortalia, haberent gravem malitiam fundamentalem. Ergo in omni providentia deberent a Deo, omnibus omnino, sine respectu ad præsentem iustitiam, fidem, aut prædestinationem, gravissime prohiberi; quia in iis quæ pertinent ad jus naturale, Deus vi infinitæ perfectionis suæ prohibere debet intrinsece mala juxta capacitatem & exigentiam materiæ. II. Si omnia peccata essent ex natura sua mortalia, natura humana non solum viribus suis naturalibus relicta, sed etiam gratia sanctificante aliisque donis supernaturalibus instructa, pessime esset constituta. Atqui hoc dici nequit. Ergo. P. M. Haberet necessitatem moralem frequenter excidendi sine suo ultimo; quia homo etiam iustus habet moralem necessitatem frequenter labendi in quædam peccata venialia, juxta illud I. Joan. Cap. I. v. 8. *Si dixerimus, quoniam peccatum non habemus; ipsi nos seducimus, & veritas in nobis non est*. Ergo natura humana esset pessime constituta. Prob. etiam minor propositio. Hic defectus merito refunderetur in sapientiam & providentiam Dei, qui naturam humanam tam male constitueret. Ergo cum nullus defectus cadere possit in Deum, dicendum est, naturam humanam tam male a Deo constitu-

*Ac ratione
Theologi-
ca.*

stitutam non fuisse; adeoque peccata venialia intrinsece atque ex natura sua a mortalibus differre. III. Peccata venialia non excludunt charitatem; alioquin in hominibus justis esse non possent. Ergo ex natura sua non continent malitiam gravem. IV. Si quævis offensio ex natura sua dissolveret amicitiam Dei, eadem ratione dissolveret quamvis aliam amicitiam. Quod enim ex natura rei convenit, semper & ubique convenit. Atqui certum est inter homines amicitiam prudenter non dissolvi ob levissimam offensam. Ergo etiam amicitiam quæ nobis cum Deo intercedit, non dissolvit ex natura sua quælibet culpa.

*Undenam
hæc differ-
entia sit
desumen-
da?*

173. Quæres. Undenam desumenda sit differentia peccati venialis a mortali? R. Cum peccatum in genere sit transgressio legis obligantis, recte hæc differentia desumitur ab oppositione cum lege divina: ideoque mortale peccatum dicitur libera transgressio legis divinæ graviter, sub amissione ultimi finis hominem obligantis; veniale autem transgressio legis divinæ leviter hominem obligantis. Itaque per peccatum mortale homo simpliciter avertitur a Deo, tamquam a fine ultimo, ac consequenter finem suum ultimum implicitè saltem constituit in creatura: per peccatum autem veniale non avertitur simpliciter a Deo, neque finem suum ultimum homo in creatura constituit: paratus est quippe illa quæ inordinate diligit, & in quibus venialiter peccat, potius dimittere, quam a Deo separari.

Argumenta contraria refutantur.

*Protestan-
tes frustra
pro se ad-
ducunt
Scriptu-
ras.*

174. Objic. I. Autoritas Scripturarum. Deuter. Cap. XXVII. dicitur: *Maledictus omnis qui non permanet in sermonibus legis hujus.* Atqui etiam illé qui a nobis venialiter peccare dicitur, non permanet in omnibus, quæ scripta sunt in libro legis hujus, cum Deuter. Cap. VI. v. 5. scriptum sit: *Diliges Deum tuum ex toto corde tuo, & ex tota anima tua, & ex tota fortitudine tua.* Ergo ille est maledictus, seu æterna pœna dignus. II. Ezechielis Cap. XVIII.

XVIII. *Anima, quæ peccaverit, ipsa morietur.* Et ad Rom. Cap. VI. *Stipendia peccati mors.* III. Jacobi Cap. II. *Quicumque offendat in uno, factus est omnium reus.* IV. Matth. Cap. V. *Qui solverit unum de mandatis istis minimis, minimus vocabitur in regno cælorum, id est, non intrabit in regnum cælorum.* Ergo omnia peccata excludunt a cælo, adeoque peccata omnia sunt ex natura sua mortalia. V. Joan. Cap. XIII. Christus ait Petro: *Si non laverò te, non habebis partem mecum.* Augustinus vero per hanc lotionem intelligit purgationem a peccatis venialibus. R. I. Ergo Deus peccata illa imputat etiam fidelibus & prædestinatis etiam in hac providentia, cum illi nullibi excipiantur? R. II. per sermones legis intelligi præcepta in illo capite tradita, quibus sub gravi omnes obligantur: vetatur autem ibi idololatria, homicidium, adulterium &c. Quare in forma R. C. M. D. m. Qui venialiter peccat, non permanet in omnibus, quæ quemlibet graviter obligant, N. m. In omnibus quæ sub levi tantum obligant, C. m. & N. C. Qui venialiter peccat, agit quidem contra perfectionem charitatis, substantiam tamen hujus præcepti servat: efficaciter enim paratus est omni potius bono creato carere, atque omne malum perpeti, quam Deum graviter offendere. Ad II. R. Ezechielem & Apostolum loqui de peccatis gravibus, quæ gratiam & vitam spiritualem adimunt, ut patet ex contextu. Ad III. eadem est responsio. Ideo autem omnium reus dicitur qui in uno offendit, tum quia omnia mandata ad mandatum dilectionis revocantur: tum quia ad evadendam æternam mortem caterorum mandatorum observantia non sufficit, si vel unicum præceptum grave violetur, quin noxa illa seria pœnitentia eluatur. Ad IV. C. A. N. C. Nam I. loco cit. non dicitur tantum, *qui solverit*; sed additur: *Et docuerit sic homines.* Grave autem peccatum est, Verbum Dei scienter corrumpere etiam in minimis. II. Minima mandata hic vocantur, non absolute, sed comparate ad graviora, & finistram Scribarum interpretationem ac mentem, apud quos nimirum grave erat adulterium, atque amicorum

corum odium; leve autem concupiscentia uxoris alienæ, & odium inimicorum, quamvis utique lethalia essent peccata. Ad V. R. lotionem illam pedum figuram fuisse lavacri Sanguinis Christi, quo mundandæ erant animæ: ideoque Christum sub gravi præcepisse Petro, ut pedes sibi lavari pateretur. Quod si verocitata verba cum SS. Augustino & Bernardo intelligantur de spiritali lotionem a peccatis venialibus, præsertim quia subjungitur: *Qui lotus est, non indiget, nisi ut pedes lavet*, ajo ejusmodi peccata neminem simpliciter excludere a regno cælorum, sed solum ad tempus, quod ad sui purgationem exigunt.

Patres.

175. Objic. II. Authoritas Patrum. S. Basilius in Quæstionibus brevioribus ad Monachos, Quæst. CCXCIII. scribit: *Primo quidem scire illud convenit, differentiam hanc majorum & minorum (peccatorum) nunquam in novo Testamento reperiri; siquidem una est & eadem sententia adversus quælibet peccata, cum Dominus dixerit: Qui facit peccatum, servus est peccati.* II. S. Chrysostomus in Homilia, seu Sermone de levium peccatorum periculis ait, *peccata, licet levia, occidere, & inducere contemptum Dei.* III. S. Augustinus Tract. I. in Epist. S. Joannis scribit: *Ista levia quæ dicimus, noli contemnere: Si contemnis, quando appendis; expavesce, quando numeras. Levìa multa faciunt unum grande: multæ guttæ implent flumen: multa grana faciunt massam.* IV. Idem Lib. IX. Confessionum, Cap. ult. *Væ etiam laudabili vitæ hominum, si remota misericordia discutias eam.* V. Idem Lib. II. de peccat. meritis & remis. Cap. III. *Quis enim cum aliqua spe adipiscendæ salutis æternæ de hac vita migraret, manente illa sententiâ, quod quicumque totam legem servaverit, offendat autem in uno, factus est omnium reus, nisi post paululum sequeretur, --- Superaxaltat autem misericordia judicio?* VI. Alii Patres peccatum veniale sæpissime vocant *gravissimum malum.* R. ad I. S. Basilius citatis verbis id unum negat, mortalis & venialis peccati differentiam in eo sitam esse, ut peccata mortalia dicantur vitanda, venialia vero non vitanda, sed

sed negligenda; ut faciunt illi, qui majora peccata declinant, minora autem, perinde ac si nihil referret, committunt. Qua in re seipsos splendide decipiunt: cum Sacra Scriptura indiscriminatim deterreant nos a quolibet peccato, tamquam a malo præ cæteris temporalibus fugiendo. Ad II. R. S. Chrysostomus, qui differentiam peccatorum venialium & mortalium eadem Homilia in sensu Catholico admittit, vult solum verbis citatis, quod venialia hominem saltem remote disponant ad gravia peccata, & mortem animæ. Ad III. eadem est responsio: multa siquidem venialia unum faciunt grave peccatum, non formaliter, sed dispositive, juxta illud Ecclesiastici Cap. XIX. *Qui spernit modica, paulatim decidet.* Ad IV. R. S. Augustinum loqui ibi de acerbissimis pœnis purgatorii. Ne quis enim miretur, quod pro Matre sua Monica oret, cuius sanctitatem antea adeo commendaverat, ait justorum vitam quantumvis laudabilem vix ac ne vix quidem, si divina misericordia removeatur, carere culpis venialibus, acerbissima purgatorii pœna expiandis. Ad V. N. C. Sensus citati textus est: Cum ad æternam damnationem unicum sufficiat peccatum grave, nemoque certo sciat, se nullum tale admisisse, aut si admisit, illud a Deo sibi condonatum esse; neminem omnino cum spe beatitudinis assequendæ mori posse, nisi sciret Deum esse infinite misericordem. Certe quæ circa præsentem materiam mens fuerit Augustini, satis ostendunt textus a nobis in probatione adducti, tum etiam ille ex Lib. III. contra duas Epistolas Pelagianorum, Cap. III. *Quidam ergo filii sæculi hujus sunt, & tamen filii diaboli non sunt. Quamvis enim diabolus sit author & princeps omnium peccatorum; non tamen filios diaboli faciunt quæcunque peccata. Peccant enim & filii Dei, quoniam si dixerint se non habere peccatum, seipsos seducunt.* Ad VI. D. A. Peccatum veniale vocant gravissimum malum, si comparetur cum alio malo etiam gravissimo, quod peccatum non est, C. A. si comparetur cum gravi peccato, N. A. & Conseq.

*Paritates
varias.*

176. *Objic. III. variaz paritates. I. Nullum peccatum veniale a pura creatura deleri potest satisfactio-
ne condigna. Ergo etiam nullum peccatum veniale
sufficenter puniri potest pœna finita & temporali. II.
Minima opera bona supernaturalia merentur juxta Ca-
tholicos vitam æternam. Ergo etiam minima peccata
merentur pœnam æternam. III. Posito, quod respectu
civis honestæ fortunæ furtum unius floreni sit graviter
peccaminosum, qui florenum illi subducit, reatum in-
currit æternæ damnationis. Ergo etiam qui eidem fu-
ratur crucigeros LVII, quia modicissima est distantia.
IV. Qui pestem aut mortem deliberate & advertenter
sibi optat, peccat graviter contra charitatem. Ergo
etiam qui veniale committit, hoc ipso graviter pec-
cat; quia gravissimum sibi damnum infert promerendo
pœnas purgatorii, & impediendo ad tempus visionem
beatificam. R. ad I. paritatem, C. A. N. C. Per nullum
obsequium a pura creatura præstitutum Deus tantum
honorari potest, quantum inhonoratus fuit per levem
etiam offensam; quia valor obsequii decrescit partim
ex infinita dignitate Dei, cui illud exhibetur, partim
ex vilitate personæ satisfaciens. Contra vero satis-
factio non imminuitur ex infinita dignitate Dei punien-
tis, aut vilitate creaturæ patientis. Ergo pœna tem-
poralis æquare potest culpam venialem. Ad II. R. Imo.
retorquendo. Opera illa ex natura sua, præscindendo
a gratuita promissione Dei, non merentur vitam æter-
nam. Ergo neque levia peccata ex natura sua meren-
tur pœnam æternam. R. II. C. A. N. C. Meritum boni
operis fundatur præcipue in munificentia Dei, gratia
sanctificante, ac meritis Christi per gratiam nobis ap-
plicatis. Contra vis demeritoria unice fundatur in ma-
litia operis, quæ non est infinita. Ad III. C. A. N. C.
Rationem additam distingo. Est modicissima distan-
tia in consideratione physica, C. In consideratione
morali, in qua non attenditur ad solum excessum se-
cundum se, sed prout cum aliis partibus summam gra-
vem constituit, N. Ad IV. C. A. N. C. Pœnæ purga-
torii, & dilatio visionis beatificæ respective ad Deum
& vi-*

& vitam æternam sunt leve aliquid; potestque quaecunque hoc damnum ab homine facile reparari per dolorem & congruam satisfactionem: pestis vero, aut mors respectivè ad vitam, cujus homo non est dominus, sed usufructuarius, sunt quid gravissimum, nullaque arte reparari amplius potest damnum a morte illatum. Præterea qui mortem aut pestem sibi optat, agit contra legem Dei graviter obligantem; præceptum vero graviter obligans ad vitanda peccata venialia non datur. Hæc enim obligatio gravis esset, noxia, & imprudens; quia ad evitandum minus malum imposeret necessitatem moralem incurrendi malum absque comparisone majus, scilicet peccatum mortale, & pœnas inferni; eoquod moraliter impossibile fit vitare omnia peccata venialia.

177. Objic. IV. Dominium Dei. Deus, ut absolutus Dominus, potest hominem innocentem sempiternis inferorum cruciatibus addicere. Ergo multo magis reum peccati venialis. *Confirm.* Quod veniale remittatur, est ex gratia Dei. Ergo posset non remitti: ergo posset semper puniri; folique Dei misericordiæ adscribendum est, quod non semper puniatur pœna æterna. R. N. A. Deus, ut supremus Dominus, nihil potest agere quod aliis divinis perfectionibus, nimirum infinitæ Bonitati præjudicat. Innocentem autem hominem æterna pœna mulctare, eumque in moralem necessitatem conjicere Deum odio habendi, ac blasphemandi, non alia de causa quam quia Deo ita libet, impexam sapit atque horridam crudelitatem, ut ipse S. Augustinus animadvertit Lib. III. contra Julianum, Cap. XVIII. *Bonus est Deus, justus est Deus: potest aliquos sine bonis meritis liberare, quia bonus est: non potest quemquam sine malis meritis damnare, quia justus est.* Ad *confirm.* D. A. Est gratia Dei, debita tamen ex suppositione gratiæ sanctificantis, quæ exigit aliquando remissionem peccati, & quæ per peccatum veniale non destruitur, C. A. Omnino indebita filiis adoptivis, Dei gratia sanctificante ornatis, N. A. & Conseq. Quod si forte peccatum veniale non remittatur damnatis, atque

que etiam æternum puniatur in inferno, quia conjunctum est cum mortali; id non oritur ex natura peccati venialis, sed per accidens ob statum damnati propter mortale.

Ad naturam peccati.

178. *Objic. V. Natura peccati.* Peccatum veniale est contemptus Dei. Ergo continet malitiam gravem. P. A. Ideo mortale peccatum est contemptus Dei, quia immediate est contra amicitiam Dei, & mediate contra Deum. Atqui etiam veniale est immediate contra amicitiam Dei, & mediate contra Deum. Ergo etiam veniale peccatum est contemptus Dei. P. m. Veniale peccatum minuit amicitiam Dei. Ergo est contra amicitiam Dei. R. N. A. Cum peccato veniali stare potest amor & appetitatio Dei super omnia quæ dissolvere possunt amicitiam Dei: neque homo per illud avertitur a fine suo ultimo: nam licet venialiter peccans Deum actualiter non respiciat ut finem ultimum, sed in bono creato quiescat; huic tamen bono ita adhæret, ut non propterea velit amittere amicitiam Dei. Ergo peccatum veniale non est contemptus Dei vere ac proprie talis. *Ad probat. C. M. N. m.* Veniale peccatum non est contra amicitiam Dei simpliciter, sed contra familiaritatem Dei, quæ est perfectissima amicitia. *Ad hujus prob. D. A.* Minuit amicitiam Dei præhabitam, minuendo gratiam per quam sumus amici Dei, N. A. Minuit amicitiam Dei habendam, impediendo nempe actus perfectiores, quibus augeretur gratia, aut etiam disponendo ad perdendam Dei amicitiam, C. A. N. C. Neque sequitur idcirco peccatum veniale continere gravem malitiam; quia non datur obligatio gravis ad illos actus perfectiores, vel ad augendam gratiam, aut ad cavendas omnes occasiones remotas perdendæ Dei amicitia.

179. *Dices.* Peccatum veniale est majus malum quam pœna æterna. Ergo hanc pœnam meretur P. A. Potius deberemus eligere infernum, quam peccatum veniale. Ergo. *Confirmat.* Peccatum veniale infinitam Dei Majestatem offendit. Ergo est malitiæ infinitæ. R. L. D. A. Est majus malum pœna æterna quoad suam
enti-

entitatem spectata, quæ est malum creaturæ; peccatum vero malum Deo, adeoque ordinis superioris, C. A. Est majus malum respectu nostri, & prout pœna æterna inducit moralem necessitatem committendi gravissima peccata, hominemque avertit ab ultimo fine, N. A. Profecto si pœna æterna consideratur connexa cum hac morali necessitate Deum blasphemandi, & odio habendi, est majus malum peccato veniali. R. II. N. C. Non ideo culpæ levissimæ debetur maxima pœna, eoquod culpa sit majus malum pœna æterna: sed solum debetur pœna proportionata, ita ut gravi culpæ gravis pœna, graviori gravior, levi autem levis respondeat pœna: qualis, omnium judicio, non censetur pœna æterna, quantumvis remissior & minus acerba. Ad *probat.* R. Neutrum eligendum esse, cum iste casus possibilis non sit, quo aliquis ad vitandas pœnas inferni indigeat peccato, aut ut, pro hac saltem providentia, ad vitandum peccatum indigeat pœnis inferni: peccatum enim neque est medium ad vitandas pœnas inferni, neque pœnæ inferni de facto ordinatæ sunt a Deo tanquam medium ad vitandum peccatum. Quod si dicas, Sanctos optasse potius inferni pœnas, quam peccato veniali Deum offendere. R. eos considerasse inferni pœnas ut contradistinctas, & intentionaliter saltem separatas a peccato, ac morali illa necessitate Deum odio habendi, & blasphemandi: seculis sibi ipsis contradixissent. Ad *confirm.* D. A. Offendit infinitam Dei Majestatem graviter, N. A. Leviter, C. A. N. C. Peccatum mortale non est malitiæ simpliciter infinitæ; quia creatura numquam habet perfectissimam cognitionem Dei, & malitiæ peccati. Ergo multo minus peccatum veniale malitiam continet simpliciter infinitam.



CONTROVERSIA IV.

AN PER QUODLIBET PECCATUM MORTALE AMITTANTUR FIDES, SPES, ET CHARITAS?

CONTRA JOVINIANUM, BEGUARDOS, LUTHERUM, CALVINUM, JANSENIANOS &c.

Errores. 180. Jovinianus, teste S. Hieronymo Lib. II. adversus eundem, docuit justitiam, atque adeo gratiam & charitatem semel habitam amitti non posse; adeoque hominem semel justum, semper esse justum. Beguardi & Beguinae ut patet ex Clementina Cap. *Ad nostrum* de Hæreticis, asseriebant, hominem in hac vita eam consequi perfectionem posse, ut gratiam & charitatem amittere amplius nequeat. Insaniam hanc re novarunt Sæculo XVII. Quietistæ, ut patet ex propositione LVII. damnata Michæelis de Molinos: *Per contemplationem acquisitam pervenitur ad statum non faciendi amplius peccata; nec mortalia, nec venialia.* Lutherus & Calvinus hac in re non omnino inter se conveniunt. Lutherus ait charitatem non amitti, nisi per solum infidelitatis peccatum; Calvinus vero contendit, fidem & charitatem semel vere acceptas, a prædestinatis nulla ratione posse amitti: reprobos vero fidem & charitatem numquam vere habuisse. Ambo tamen in hoc conveniunt, fidem ac spem a charitate separari non posse; ac veluti vanam irrident distinctionem fidei formatæ & informis, gemina ducti ratione. Prima est; quia existimant veram fidem præcipue sitam esse in persuasionem, qua certo quis confidit, propter merita Christi omnia peccata sibi remissa esse, donatamque gratiam & charitatem. Quare cum hæc persuasio illorum judicio verissima sit, putant hanc fidem non posse a gratia & charitate sejungi. Altera ratio est, quia nemo persuadere sibi potest se esse in gratia, si conscientiam habeat peccati mortalis. Cum igitur eam persuasionem dicant esse fidem, hoc ipso negant fidem posse cum peccato mortali consistere, adeoque destitui posse charitate. Eadem quoque est Jansenianorum doctrina, quæ Protestantium. Jansenius Lib. V. de Gra-

Gratia-Salvatoris, Cap. V. scribit, *nullam esse religionem veram, aut cultum Dei, sed simulationem tantum, & larvam ejus, nisi Deus sincere & caste, hoc est, gratis & propter seipsum ex vera charitate diligatur.* Et Lib. V. Cap. IX. *Spem Christianam deprimunt, qui eam subtrahunt charitati, & quodam sinceritatis adulterio puritatem divinæ & gratuite charitatis in concupiscentiæ amorem, aut in mercenariæ cupiditatis fœditatem vertunt.* Quesnellus propositione LVII. per Bullam *Unigenitus* damnata ait: *Totum deest peccatori, quando deest spes: & non est spes in Deo, ubi non est amor Dei.* Et propositione LVIII. *Nec Deus est, nec religio, ubi non est Charitas.*

181. Conclusio I. Justus amittere potest charitatem & gratiam sanctificantem: immo per quodlibet peccatum mortale eam amittit, ita ut desinat esse justus. Prob. I. Authoritate Scripturarum. Ezechielis Cap. XVIII. *Cum averterit se justus a justitia sua, & fecerit iniquitatem, morietur in eis.* Joan. Cap. XV. *Si quis in me non manserit, mittetur foras sicut palme, & arescet.* Matth. Cap. XXIV. *Qui autem perseveraverit, hic salvus erit.* I. ad Cor. Cap. X. *Qui se existimat stare, videat ne cadat.* I. ad Cor. Cap. IX. *Castigo corpus meum, & in servitutem redigo; ne forte cum aliis prædicaverim, ipse reprobus efficiar.* Apocal. Cap. II. *Habeo adversum te, quod primam charitatem tuam reliquisti. Memor esto itaque unde excideris.* Ergo si justus potest a justitia sua averti: si qui in Christo olim fuit per charitatem, potest foras mitti & arescere: si justus timere jubentur lapsum &c. justus potest amittere charitatem, ac desinere esse justus: immo eam amittit per quodlibet peccatum mortale; quia omne mortale dicit aversionem a summo Bono, & conversionem ad creaturas, quod sine contemptu Dei & charitatis jactura accidere nequit.

*Charitas
per quod-
libet mor-
tale amittitur.*

182. Prob. II. Authoritate Patrum. S. Cyprianus Tract. de Lapsis ait: *An ingemiscit & plangit, cui vacat cultum prætiosæ vestis induere, neque indumentum Christi, quod perdidit, cogitare?* S. Hieronymus Lib. II.

contra Jovinianum: *Si susceperimus Christum in hospitio nostri pectoris, illico fugamus diabolum: si peccaverimus, Et per peccati januam ingressus fuerit diabolus, illico Christus recedit. Unde Et David post peccatum, Redde mihi, ait, lætitiā salutaris tui, scilicet quam peccando amiserat.* S. Augustinus Lib. de Prædestinatione Sanctorum, Cap. XIV. *Quare aliis concedatur, ut ex hujus vitæ periculis dum justi sunt, auferantur; alii vero justi donec a justitia cadant, in iisdem periculis vita productione teneantur, quis cognovit sensum Domini? Et Lib. de Correptione & Gratia, Cap. XIII. Credendum est quosdam de filiis perditionis, non accepto dono perseverandi usque in finem, in fide quæ per dilectionem operatur incipere vivere, Et aliquamdiu fideliter ac juste vivere, Et postea cadere, neque de hac vita prius, quam hoc eis contingat, auferri.*

183. Prob. III. *Authoritate Conciliorum. Vienne Oecumenicum hunc ipsum Beguardorum & Beguinarum errorem damnavit. Tridentinum Sess. VI. de Justificatione, Canone XXIII. ait: Siquis hominem semel justificatum dixerit amplius peccare non posse, neque gratiam amittere; atque ideo eum qui labitur Et peccat, nunquam vere fuisse justificatum; anathema sit.*

184. Prob. IV. *Exemplis eorum, qui, Spiritu Sancto referente, charitatem amiserunt. I. Adam & Eva gratia supernaturali ac sanctificante ornat, graviter peccarunt transgrediendo Dei præceptum. II. Dæmones antequam peccarent justos fuisse, ex verbis illis Ezechielis Cap. XXVIII. Patres colligunt: Tu signaculum similitudinis, plenus sapientia Et perfectus decore, in deliciis paradisi Dei fuisti. --- Perfectus in viis tuis a die conditionis tuæ, donec inventa est iniquitas in te. III. Saul Rex, de quo antequam Rex eligeretur I. Reg. Cap. IX. dicitur: Saul electus Et bonus: Et non erat vir de filiis Israël melior illo, non solum peccavit, verum etiam, juxta communissimam Patrum & Interpretum, reprobis obiit. IV. David Rex, quem Deus secundum cor suum invenit, adulterio & homicidio se polluit. V. Salomon Rex, singulariter antea Deo dilectus, Diis*

Gen-

Gentium sacrificavit. VI. S. Petrus Apostolorum Princeps, cui Christus paulo ante pedes laverat, ut perfecte esset mundus ab omni peccato, Magistrum suum addito perjurio turpiter negavit: quam noxam foras egressus amare deflevit. Certe eo insanix non devenerint Protestantes, ut a gravi culpa hos omnes absolvant, aut antea justos fuisse negent, aut demum charitatem cum peccato mortali componi posse asserant.

185. Conclusio II. Fides potest quidem simpliciter amitti, non tamen amittitur sicut charitas per quodlibet peccatum mortale. Prima pars Conclusionis probatur autoritate Scripturarum. Lucae Cap. VIII. v. 13. dicitur: *Ad tempus credunt, & in tempore temptationis recedunt.* II. ad Timoth. Cap. II. *Ex quibus est Hymeneus & Philetus, qui a veritate exciderunt.* Ad Titum. Cap. III. *Hæreticum hominem post unam & secundam correptionem devota, sciens quia subversus est.* Quomodo autem subverti, excidere, recedere a fide potest, qui fidem numquam habuit? Præterea ipsi Protestantes admittunt, infantes in baptismo fidem accipere; qui tamen ubi ad adultam ætatem pervenerint, sæpe a fide deficiunt, hæresi adhærentes. Ergo fides amitti potest.

*Non tamen
Fides.*

186. Prob. altera pars Conclusionis Imo. Autoritate Scripturarum. Joannis Cap. XII. v. 42. *Ex Principibus multi crediderunt in eum, (Christum) sed propter Phariseos non confitebantur, ut e Synagoga non ejicerentur.* Dilexerunt enim gloriam hominum magis, quam gloriam Dei. I. ad Cor. Cap. XIII. *Si habuero omnem fidem, ita ut montes transferam, charitatem autem non habuero, nihil sum.* Jacobi Cap. II. *Quid proderit fratres mei, si fidem quis dicat se habere, opera autem non habeat? Numquid poterit fides salvare eum?* Ergo fides consistere potest sejuncta a charitate. Idem S. Jacobus Cap. II. v. 26. ait: *Sicut enim corpus sine spiritu mortuum est, ita & fides sine operibus mortua est.* Ex quo sic argumentor. Quale est corpus sine spiritu, talis est fides
sine

sine operibus. Sed corpus sine spiritu est mortuum quidem, sed tamen verum corpus. Ergo similiter fides sine charitate est mortua quidem, id est, nihil conducens ad vitam æternam, sed tamen vera fides.

187. Prob. II. Autoritate Patrum. S. Hieronymus, & Theophylactus Comment. in Cap. VII. Mathæi, ac S. Basilius in Reg. Monachorum, Cap. XCIV. ajunt per illa verba Christi Matth. Cap. VII. *Multi dicent mihi in illa die: Domine, Domine, nonne in nomine tuo prophetavimus? --- Et tunc constebor illis: Quia nunquam novi vos: discedite a me, qui operamini iniquitatem*, excludi multos a beatitudine cœlesti ob solum charitatis & operum defectum. Eosdem significari dicit S. Chrysostomus Hom. LIV. in Matth. per virgines illas fatuas, quæ acceptis lampadibus non sumperunt oleum secum. Et S. Gregorius M. Hom. XXVIII. in Evang. per illum qui intravit ad convivium Regis, non habens vestem nuptialem. S. Irenæus Lib. IV. adv. Hær. Cap. XXV. ait, *neque agnitionem sine dilectione quæ est erga Deum, præstare aliquid, neque Myſteriorum comprehensionem, neque fidem, neque prophetiam; sed omnia vacua & frustrata esse sine dilectione*. Idem affirmant S. Cyprianus in Sermonem de Zelo & Livore, & S. Ambrosius Lib. II. Officiorum, Cap. II. S. Augustinus Lib. XV. de Trinitate, Cap. XVIII. scribit: *Sine charitate quippe fides potest quidem esse, sed non & prodesse*. Ergo fides vera Catholica & Theologica stare potest sine charitate, & reipsa est in peccatoribus fidelibus.

188. Prob. III. Autoritate Tridentini, quod Sess. VI. Can. XXVIII. ait: *Siquis dixerit, amissa per peccatum gratia, simul & fidem semper amitti; aut fidem quæ remanet, non esse veram fidem, licet non sit viva; aut eum, qui fidem sine charitate habet, non esse Christianum; anathema sit*. Et Sess. XIV. Cap. IV. docet attritionem ex turpitudinis peccati consideratione, vel ex gehennæ aut pœnarum metu conceptam, si voluntatem peccandi excludat cum spe veniæ, esse donum Dei, & Spiritus

ritus Sancti impulsus, ac peccatorem disponere ad Dei gratiam in Sacramento Pœnitentiæ impetrandam. Ergo supponit peccatores illos, quamvis charitate destitutos, adhuc esse fideles: sine fide enim neque datur de-
testatio peccati, neque spes veniæ obtinendæ.

189. Conclusio III. Spes Theologica non amittitur per quodlibet peccatum mortale. Prob. I. Authoritate Scripturarum. Ecclesiastici Cap. XXI. dicitur: *Fili peccasti? non adjicias iterum: sed & de prioribus deprecare, ut tibi dimittantur.* Ergo spes non amittitur per quodlibet peccatum; alias peccator rogare non posset Deum, ut remittat sibi peccata, siquidem de obtinenda venia desperaret. II. Paralipom. Cap. XXXIII. de Manasse Rege in captivitatem abstracto dicitur: *Qui postquam coangustatus est, oravit Dominum Deum suum: & egit pœnitentiam valde coram Deo patrum suorum. Deprecatusque est eum, & obsecravit intende: & exaudivit orationem ejus, reduxitque eum Jerusalem in regnum suum, & cognovit Manasses quod Dominus ipse esset Deus.* Quomodo autem Manasses, aut quicumque alius peccator deprecari potest Deum sine spe illum placandi? II. Authoritate Patrum. S. Augustinus Serm. XXVII, alias XX. de verbis Apostoli scribit: *Domus Dei credendo fundatur, sperando erigitur, diligendo perficitur.* Ergo quemadmodum frequentissime videntur domus, quarum fundamenta jacta sunt, parietes erecti, quin fabrica perfecta atque absoluta sit: ita etiam fides & spes absque charitate possunt consistere. Clemens Alexandrinus Lib. II. Stromatum ait: *Fides est prima ad salutem inclinatio, post quam timor, & spes, & pœnitentia.* III. evertendo præcipuum fundamentum adversariorum. Fides, quæ est fundamentum spei, non tollitur per quodlibet peccatum grave. Ergo neque spes, quæ fide tamquam basi nititur.

190. Quæ res. Si non per quodlibet peccatum mortale, per quodnam igitur Fides & Spes amittuntur? R. Fidem amitti per solum peccatum infidelitatis. Sicut enim charitas amittitur per quodlibet peccatum

Ac Spes
Theologi-
ca.

Per quale
peccatum
Fides &
Spes amit-
tantur?

catum

catum grave, quia qualibet noxa gravis illi opponitur: ita fides per solum infidelitatis peccatum amittitur, quia sola infidelitas directe fidei adversatur. Spes Theologica tollitur tum per peccatum ei oppositum, quod directe tollit objectum formale spei, ut desperatio, & efficax nolitio, vel contemptus beatitudinis: tum per peccatum infidelitatis. Sublata enim fide, quæ spei Theologicæ est fundamentum, spem quoque corruere necesse est. Contra vero sicut paries potest esse sine tecto, & fundamentum sine parietibus: ita spes esse potest sine charitate in peccatoribus, & fides sine spe in iis qui desperant.

Argumenta contraria refutantur.

Charitatem amitti non posse, nulli doctet Scriptura.

191. Objicitur I. contra I. Conclusionem, Auctoritas Scripturarum. I. Joan. Cap. III. dicitur: *Qui natus est ex Deo, peccatum non facit: quoniam semen ipsius in eo manet, & non potest peccare, quoniam ex Deo natus est.* II. Cantic. Cap. VIII. *Aquæ multæ non poterunt extinguere charitatem, nec flumina obruent illam.* Ad Rom. Cap. VIII. *Certus sum enim, quia neque mors, neque vita... neque creatura alia poterit nos separare a charitate Dei.* Joannis Cap. IV. ait Christus: *Qui biberit ex aqua, quam ego dabo ei, non sitiet in æternum. Sed aqua, quam ego dabo ei, fiet in eo fons aquæ salientis in vitam æternam.* III. I. ad Cor. Cap. XIII. *Charitas nunquam excidit.* IV. I. Joan. Cap. II. *Ex nobis prodierunt, sed non erant ex nobis. Nam si fuissent ex nobis, permanisissent utique nobiscum.* V. Joan. Cap. III. *Ut omnis qui credit in ipsum, non pereat, sed habeat vitam æternam.* Confirmat. Charitas est habitus. Sed habitus non amittitur per unum actum contrarium. Ergo neque charitas per quodlibet mortale peccatum. R. Ad I. Commendari ibi non immobilitatem, sed excellentiam charitatis, sensumque citati textus esse hunc: *Qui natus est ex Deo, non peccat, nec peccare potest lethaliter, quamdiu perseverat filius Dei, quoniam se-*

men

men illius, id est, charitas, quæ omnibus peccatis lethalibus contraria est, in ipso manet. Atque hanc charitatem vult S. Joannes certissimam esse notam, qua filii Dei distinguantur a filiis diaboli. Ad II. R. Nec aquas tribulationum, nec timorem mortis, neque sitim seu cupiditatem rerum creatarum prævalere posse adversus hominem gratia sanctificante & charitate munitum, quamdiu eam non abjecerit, aut neglexerit. Si vero hæc arma voluntarie abjiciat, facile obrui posse aquis tribulationum, terreri mortis periculo, incendi firi rerum temporalium. Ad III. R. Charitas excidit superveniente gravi peccato: at numquam excidit superveniente gloria & visione beatifica, de qua sola I. c. loquitur Apostolus. Nimirum charitas, quæ in hac vita inchoatur & crescit, perficietur in patria, & in æternum permanebit. Contra vero fides & spes in cælo destruentur: neque enim sperare possumus, quod actu possidemus, aut credere quod clarissime & absque obscuritate videmus. Ad IV. R. N. C. S. Joannes ait hæreticos illos non fuisse constantes, solidos, perfectos in fide: neque ex numero electorum secundum propositum prædestinationis æternæ. Si enim ex illorum numero fuissent, solidi ac perfecti, mansissent utique in Ecclesia, nec finaliter defecissent. Ad V. R. ad salutem obtinendam nudam fidem non sufficere, sed fidem requiri charitate formatam. Ad *confirm.* D. M. Charitas est habitus acquisitus, N. M. Infusus, C. M. Et D. m. Habitibus acquisitus non amittitur per unum actum contrarium, C. m. Infusus, N. m. & Conseq. Habitibus infusus charitatis dependet ab actione Dei infundentis, qui cessat illum conservare, quando ponitur obstaculum, quale est quodlibet peccatum grave.

192. Objic. II. contra II. Conclusionem, Autoritas Scripturarum. I. Joannis Cap. II. *Qui dicit se nosse eum (Deum) & mandata ejus non custodit, mendax est.* Ergo sine charitate non datur fides. II. Ad Rom. Cap. I. *Iustus ex fide vivit.* At non datur spiritualis vita sine charitate. III. I. Joan. Cap. IV. *Qui non diligit, non novit Deum: quoniam Deus charitas est.* Er-

*Aut fidem
non dari
sine cha-
ritate.*

go si non novit, neque credit. IV. Ad Ephesios Cap. II. *Eratis illo in tempore sine Christo --- Et sine Deo in hoc mundo.* Ergo nec Deus, nec religio est, ubi non est charitas. V. Joannis Cap. VI. *Sunt quidam ex vobis, qui non credunt; sciebat enim ab initio Jesus, qui essent non credentes, Et quis traditurus esset eum.* IV. I. ad Timoth. Cap. V. *Si quis autem suorum, Et maxime domesticorum curam non habet, fidem negavit, Et est infidelem deterior.* Ergo multo magis fidem negarunt peccatores, qui graviter delinquendo curam animæ non habent. R. ad I. S. Joannem non loqui ibi de fide, aut notitia qualicunque, sed de notitia familiaritatis & amicitiae, de qua notitia intelligendus est Dominus Matth. Cap. VII. & XV, ubi ad improbos dicit, *Non novi vos*, aut *Nescio vos*. Ad II. R. Si cum Apostolo de justis sit sermo, totum id concedimus: neque enim quis justitiam sine fide & charitate consequi, aut obtentam retinere valet. Hoc tantum negamus, fidem in peccatoribus a charitate separari non posse. Ad III. N. C. Qui non diligit, Deum quidem novit speculative, non tamen practice, experimentaliter, salubriter, atque eo modo quo oportet Deum nosse. Sicut mellis saporem & dulcedinem nemo novit per experientiam & saporem, nisi qui illud gustat, aut gustavit: ita qui Deum amando non gustavit, eum practice non cognoscit. Ad IV. N. C. Apostolus ibi non de peccatoribus quibusvis agit, sed de Gentilibus & Idololatriis. Hos sine notitia veri Dei, ac sine religione esse, ultro omnes agnoscimus. Ad V. R. a nobis minime negari, quod peccatores aliqui fidei naufragium patiantur, quos inter fuit Judas Iscariotes; quia nimirum amissa charitate, ac spe abjecta emergendi e gurgite vitiorum, in peccatum infidelitatis quandoque prolabantur; sed hoc unum asserimus, propter absentiam charitatis fidem non extinguui. Ad VI. R. Qui domesticorum atque animæ suæ curam non gerit, fidem negare, non quidem verbo, sed re ipsa & facto suo crudeli, quia contra præscriptum fidei & Scripturæ facit, monentis Isaia Cap. LVIII. *Carnem tuam ne despexeris,*

Et

Et sic hac in parte est infideli deterior, quia infideles naturali instinctu & pietate curam suorum gerunt.

193. Dices I. Jacobi Cap. II. v. 26. dicitur: *Sicut enim corpus sine spiritu mortuum est, ita & fides sine operibus mortua est.* Ergo non datur vera fides absque charitate. P. C. Homo mortuus non est verus homo. Ergo etiam fides mortua non est vera fides. R. C. A. N. C. Ad prob. N. C. Homo in suo conceptu dicit animal rationale, adeoque compositum ex anima & corpore inter se unitis. Jam vero si anima ponatur a corpore separata, dabitur quidem verum corpus, non tamen idcirco dabitur verus homo. Contra charitas, seu vita spiritualis non est de essentia fidei in se spectata; ideoque dari potest vera fides absque charitate, sicut dari potest verum corpus absque anima.

194. Dices II. S. Jacobus in sua Epistola Cap. II. v. 19. Peccatorum fidem comparat fidei dæmonum: *Tu credis, quoniam unus est Deus: Bene facis: & dæmones credunt, & contremiscunt.* Atqui dæmones non habent veram fidem. Ergo neque peccatores. R. D. M. comparat fidei dæmonum per omnia, N. M. In hoc tantum, quod sicut fides dæmonum caret merito & utilitate ad salutem assequendam, ita etiam fides sine charitate, C. M. In hoc utique convenit fides peccatorum cum fide dæmonum. At vero in multis aliis discrepat; dæmonum enim fides neque laudabilis in ipsis est, neque ex gratia, neque ad bonum ipsis utile a Deo conceditur; sed mere naturalis est, invita, & signis evidentibus extorta. Non ita fides hominum viatorum, etiam informis illa & expers amoris atque fiduciæ: Viatores enim, quantumvis impii, non credunt contremiscentes, id est, invitati, sed sponte ac libenter.

195. Objic. III. Infirmitas probationis nostræ ex Scripturis petitur. Principes illi, de quibus dicitur Joan. Cap. XII, quod crediderint in Christum, sed eum confessi non fuerint, non habuerunt veram fidem Christi, sed tantum notitiam aliquam imperfectam. II. S. Paulus verbis illis I. ad Cor. Cap. XIII. *Si habue-*

*Frustra
infirmitas
argumen-
ti.*

ro omnem fidem, ita ut montes transferam; charitatem autem autem non habuero, nihil sum, ducit argumentum a conditione impossibili, ut ostenderet necessitatem dilectionis; sicut etiam initio capituli ejusdem dicit: *Si linguis hominum loquar & Angelorum.* Vel dici potest, quod tantum loquatur Apostolus de fide signorum, non vero de fide promissionum. III. S. Jacobus in sua Epistola Cap. II. non dicit: *Si quis fidem habeat, sed, Siquis fidem habere se dicat.* Ergo ex illis locis nihil evincitur. R. ad I. N. A. quod gratis, & absque ullo fundamento dicitur ab adversariis. *Credere enim in eum*, usitata est Scripturarum phrasis, qua intelligitur vera fides in Christum. Ad II. N. A. Quod Apostolus argumentum non ducat a conditione impossibili, patet ex familiari modo loquendi, quasi de re agat quæ solet contingere, atque ex scopo Apostoli. Nempe quorundam ibi Corinthiorum insolentiam reprimit, qui de sola fide nimis gloriabantur. Verba illa, *Si linguis hominum loquar & Angelorum*, sunt hyperbole in Scripturis valde usitata, huncque habent sensum: Si omnem haberem humanam & Angelicam eloquentiam, vel si disertissime, elegantissime, atque excellentissime loquerer &c. Ergo sicut eloquentia, scientia, eleemosyna sine charitate esse possunt, sed non prodesse: ita & fides sine charitate esse poterit, non tamen sine illa prodesse. Neque de fide tantum signorum loquitur Apostolus, sed de vera fide Christiana, Theologica; ait enim: *Si habuero omnem fidem*, & in fine capituli concludit: *Nunc autem manent fides, spes, charitas, tria hæc.* Ubi de illa ipsa fide procul dubio loquitur, cujus antea in eodem capite meminerat: sicut etiam loquitur de eadem charitate, de qua prius agebat. Præterea quamvis adversariis daretur, Apostolum loqui de fide signorum, nihil contra nos ideirco evincitur: siquidem fides signorum nihil aliud est, quam ipsa fides Christiana, eaque excellens: Apostolis enim petentibus fidem, Christianam utique, sibi adaugeri, respondit Christus Lucae Cap. XVII. v. 6. *Si habueritis fidem sicut granum sinapis, dicetis huic arbori*
more;

moro: Eradicare, & transplantare in mare: & obediet vobis. Quibus verbis ostendit Christus, signum auctæ fidei esse, si per eam miracula efficiantur. Ad III. C. A. N. C. Idem omnino dixit S. Jacobus, ac si dixisset, *Siquis fidem habeat.* Arguit enim ibi jactantiam improborum, qui de sola fide gloriantur, ideoque ait: *Siquis fidem habere se dicat, hoc est, siquis sola fide fretus eam jactet, seque ea contentum esse affirmet, sciat hanc sibi neutiquam profuturam: Atque hanc mentem suam verbis immediate sequentibus declarat: Numquid fides poterit salvare illum?*

196. Objic. IV. *Authoritas Patrum.* S. Hieronymus in Cap. IV, Epist. ad Galatas ait: *Cum dilectio procul absuerit, & fides pariter abscedit.* Et Proemio in Lamentat. Jeremiæ scribit, *nudari etiam fide animam fidelem, cum a Deo recedit per peccatum.* II. S. Gregorius M. Hom. XXIX. in Evang. ait, *eos non veraciter credere, & non habere veram fidem, qui non bene operantur.* III. S. Augustinus Epist. CCXXII. nunc CXX. ad Consentium ait: *Pia fides sine spe, & sine charitate esse non vult. Sic igitur homo fidelis debet credere quod nondum videt, ut visionem & speret & amet.* R. ad I. S. Hieronymus tantum vult, quod extincta charitate fides desinat esse viva & perfecta; aut quod peccata fidem aliquo modo debilitent, & ad illius amissionem disponant. Ad II. R. S. Gregorius ait, peccatores non habere veram fidem in ostensione operum, seu non ostendere veram fidem ex operibus; alioquin S. Doctor sibi contradiceret, cum Hom. XXXVIII. apertissime doceat, multos in Ecclesiam intrare, quia fidem habent; & tamen veste nuptiali carere, quia charitatem non habent. Ad III. N. C. Aliud est, quod pia fides nolit esse sine spe & charitate; datur enim a Deo per modum dispositionis ad justificationem: aliud est, quod fides sine charitate & spe non subsistat, quod nullibi dicit Augustinus, immo contrarium expresse docuit, ut patet ex textibus in probatione allatis. Magistro consentit etiam discipulus S. Fulgentius Lib.

Authoritas Patrum.

II. ad Monimum, Cap. IX. *His igitur demonstratur indicari, ibi esse Spiritum Sanctum, ubi est finis præcepti, hoc est charitas. --- Ubi autem cum fide charitas non est, quæcunque dona Spiritus Sancti esse posse; ipsum vero Spiritum Sanctum esse non posse.*

*Aut ratio
opponitur.*

197. Objic. V. Ratio. Christus non potest cognosci sine sanctificatione Spiritus, quæ charitatem includit. Ergo fides separari non potest a charitate. P. A. Ad Rom. Cap. X. dicitur: *Corde enim creditur ad justitiam; ore autem confessio fit ad salutem.* Ergo. II. Quodlibet peccatum grave meretur puniri amissione omnium bonorum supernaturalium. Ergo per quodlibet peccatum amittuntur fides & spes. III. Habitus fidei non manet in damnatis, quamvis semper in vita veram fidem habuerint. Ergo neque manet in peccatoribus. R. N. A. Ad prob. C. A. N. C. Sensus citati textus est iste: Ad justitiam obtinendam necesse est, ut ad voluntatis nostræ imperium per Spiritum Sanctum adjuncta intellectu firmiter credamus; ad eandem vero fovendam, stabiliendam, augendam, adeoque ad salutem consequendam requiritur etiam professio fidei, non verbalis tantum, sed realis per bona opera. Ad II. C. A. N. C. Quodlibet peccatum mortale meretur etiam statim æternis pœnis mulctari: neque tamen idcirco Deus ordinarie denegat peccatoribus spatium pœnitendi. Ad III. N. C. Fides, & Spēs, aliaque auxilia supernaturalia non dantur a Deo, nisi ubi locus est gratiæ, & homo per actus salutares potest tendere ad beatitudinem: damnati vero neque piam affectionem ad fidem, neque ullam aliam operationem supernaturalem possunt elicere, quam elicere possunt peccatores adhuc in via constituti, & Dei gratia adjuti.

*Augustinus nullibi
docet spem
dari non
posse sine
charitate.*

198. Objic. VI. contra III. Conclusionem, Auctoritas S. Augustini. S. Doctor in Enchiridio, Cap. VIII. scribit: *Jam de amore quid dicam, sine quo fides nihil prodest? Spes vero sine amore esse non potest. --- Proinde nec amor sine spe est, nec sine amore spes: nec utrumque sine fide.* Ergo juxta S. Augustinum ubi non datur charitas, non datur spes. II. Idem Enarratione

in

in Psalm. XXXI. ait, *malam conscientiam totam esse in desperatione*. Ergo spes amittitur per quodlibet mortale, cum nemo in peccato mortali constitutus sperare possit æternam beatitudinem. R. ad I. C. A. N. C. Augustinus l. c. per amorem non intelligit charitatem, sed amorem concupiscentiæ sanctæ, quo Deum amamus ut bonum nobis, ac beatitudinem appetimus ut nobis perquam accommodam. Atque sine hoc amore certum est spem subsistere non posse; nemo enim sperat quod non amat. Ad II. R. id non semper, sed quandoque tantum accidere: subsequitur enim quandoque ex conscientia maximorum scelerum desperatio, quæ omnem Christianam spem jugulat, utpote spei directæ opposita, ut Caino & Judæ contigit. At vero longe frequentius contingit, ut qui in gravia crimina prolapsi sunt, spem salutis non amittant. Sperare equidem peccator non potest beatitudinem in statu peccati se adepturum; sperare tamen potest se e statu peccati ad statum gratiæ Dei auxilio transferendum, in quo dein salutem æternam consequatur.

CONTROVERSIA V.

AN, ET QUIBUS POENIS APUD INFEROS DAMNATI TORQUEANTUR, QUI IN STATU PECCATI MORTALIS EX HAC VITA DECEDUNT?

CONTRA ORIGENISTAS, ALBIGENSES, ALMARICUM, ARNALDUM DE VILLA NOVA, ET SOCINIANOS.

199. **S**æculo VIII. Clemens quidam gente Scotus do-
cuit, Infernum quidem a rerum omnium authore Deo
cum cælo & terra conditum fuisse, sed per mortem
Christi eversum esse omnino atque exhaustum, adeo
ut in lege amoris & gratiæ nullum infernum credere
necesse sit. Pœnas quoque inferorum nullo suo com-
modo negarunt Almaricus Carnotensis, Albigenes, &
Hermannus Riswick Batavus: docebant enim paradi-
sum nihil aliud esse, quam gratiam, & veri Dei cogni-
tionem, infernum vero esse conscientiam criminum.
Locum materiale puniendis reprobis destinatum esse
infi-

Errors.

inficiati sunt Calvinus, Beza, Bucerus, rati inferni nomine in Scripturis sepulcrum intelligi. Pœnas quod attinet apud inferos infligendas, censuit Origenes dæmones atque impios homines igne vero & proprie dicto in inferno non cruciari, teste S. Hieronymo, qui Epist. LIX. ad Avitum de Origene scribit: *Ignem quoque gehennæ & tormenta, quæ Scriptura peccatoribus comminatur, non ponit in suppliciis, sed in conscientia peccatorum, quando Dei virtute & potentia omnis memoria delictorum ante oculos nostros ponitur.* Eandem sententiam Theophylactus amplectitur in Cap. IX. Marci, & Ambrosius Catharinus Lib. de præmio bonorum & supplicio malorum. Sed graviolem adhuc hac in materia errorem disseminavit idem Origenes, ut testantur Theophilus Alexandrinus in Epistola Paschali, S. Athanasius Lib. de communi Essentia, S. Hieronymus Epist. LV. ad Pammachium, Epist. LIX. ad Avitum, & in Apologia I. adversus Rufinum. S. Epiphanius in Epist. ad Joannem Jerosol. S. Augustinus Lib. de Hæresibus, Cap. XLIII. & V. Synodus Oecumenica, seu CPolitana II. sub Vigilio & Justiniano, quæ Origenem proscripsit. Docuit nimirum pœnas dæmonum atque impiorum hominum sempiternas non fore; sed illos vitiis purgatos atque peccatis, cœlestem gloriam aliquando adituros, & cum Sanctis regnatos: Salvatorem pro dæmonibus ac spiritualibus nequitis apud Superos affigendum Cruci. Aliqui sectatores Origenis Magistri sui errorem mitigarunt; quidam enim, rejectis dæmonibus & infidelibus, eos qui Christi baptismo abluti essent: alii eos qui in Ecclesia Catholica perseverassent, quamvis in ea male viventes, ab inferni pœnis aliquando liberandos, æternaque vita fruituros dicebant. Integrum Origenis errorem postremis hisce sæculis amplexi sunt Sociniani, impie arbitantes, justum non fore Dei judicium, si creaturas etiam ob unum unicum grave peccatum, v. g. cogitatione admissum, sempiternis cruciatibus addiceret. Alia laboravit insania Arnaldus de Villanova, natione Catalanus, professione Medicus, qui

qui initio Sæculi XIV. asseruit, Deum publice tantum, non autem occulte peccantibus inferni pœnas comminatum esse.

200. Conclusio I. Etiam in lege gratiæ & amoris datur Infernus. Prob. I. Autoritate Scripturarum. Matth. Cap. X. v. 28. Ipse Christus Evangelicæ legis author ait: *Potius timeate eum, qui potest & animam & corpus perdere in gehennam.* Matth. XXV. *Cum autem venerit Filius hominis in majestate sua, & omnes Angeli cum eo, tunc sedebit super sedem majestatis suæ; & congregabuntur ante eum omnes Gentes --- Tunc dicet & his, qui a sinistris erunt, Distcedite a me maledicti in ignem æternum.* II. Petri Cap. II. v. 17. de hæreticis & impiis tum veteris tum novi Testamenti dicitur: *Hi sunt fontes sine aqua, & nebulae turbinibus exagitatae, quibus caligo tenebrarum reservatur.* Prob. II. Ratione. Ex una parte in Scripturis nullibi legitur, damnatorum carcerem in morte Christi destructum atque eversum fuisse: ex altera parte in Lege Evangelica non minus quam in veteri Testamento, plurima committuntur enormia scelera, plurimique in impietate sua moriuntur, gratia sanctificante, immo sæpe etiam vera fide destituti. Ergo cum nihil coinquinatum cælum ingredi possit, atque in termino constitutis nullum amplius pœnitentiæ spatium concedatur, etiam in Lege Evangelica impii inferni pœnis torquentur.

201. Conclusio II. Infernus, seu damnatorum carcer, est locus materialis, determinatus, ac subterraneus. Prob. I. Autoritate Scripturarum. Psalm. XCIII. dicitur: *Nisi quia Dominus adjuvit me, paulo minus habitasset in inferno anima mea.* Ubi infernus clare distinguitur a sepulcro, in quo anima non jacet. Lucæ Cap. XVI. *Mortuus est dives, & sepultus est in inferno,* qui locus per antonomasiam locus tormentorum ibidem dicitur, & a sinu Abraham distinguitur. Ergo infernus est locus materialis ac determinatus. Matthæi Cap. XI. *Et tu Capharnaum numquid usque in cælum exaltaberis? usque in infernum descendes.* II. Petri

Datur Infernus etiam in lege gratia.

Qui locus est materialis, determinatus ac subterraneus.

Cap. II. *Deus Angelis peccantibus non pepercit, sed rudentibus inferni detractos in tartarum tradidit cruciandos.* Apocal. Cap. V. *Et omnem creaturam (audivi) quæ in cælo est, & super terram, & sub terra.* Ad Philippeneses Cap. II. *Ut in nomine Jesu omne genu flectatur cælestium, terrestrium, & infernorum.* In Græco textu dicitur *Subterraneorum*. Ergo carcer damnatorum est subterraneus. Prob. II. *Authoritate Patrum.* S. Hieronymus in Cap. XIV. *Isaiæ scribit: Dicimus, quod infernus sub terra sit.* Et in Cap. II. *Jonæ: Sicut cor in medio est animalis, ita infernus in medio terræ esse perhibetur.* S. Augustinus Lib. II. *Retractat. Cap. XXIV. De inferis magis mihi videor docere debuisse, quod sub terris sint, quam rationem reddere, cur sub terris esse credantur, sive dicantur, quasi non ita sit.* Idem sentiunt Tertullianus Lib. de Anima, Cap. XXXI. S. Chrysostomus Hom. XXIV. in Matth. S. Gregorius M. Lib. IV. *Dialogorum, Cap. XLII.* Ven. Beda Lib. III. in Job. Cap. VII. S. Damascenus Lib. III. de Fide, Cap. ultimo.

*In quo tor-
quentur
damnati
vero igne.*

202. *Conclusio III. Damnati igne vero & proprie dicto torquentur apud inferos.* Hæc Conclusio quamvis de fide non sit, est tamen certa, illicque opposita merito censetur temeraria. Prob. I. *Authoritate Scripturarum.* Matth. Cap. V. v. 22. *Qui autem dixerit, fatue: reus erit gehennæ ignis.* Matth. Cap. XXV. v. 41. *Discedite a me maledicti in ignem æternum.* Quis autem dixerit, *Judicem contra reum decernentem metaphorice loqui?* Marci Cap. IX. v. 42. *Bonum est tibi debilem introire in vitam, quam duas manus habentem ire in gehennam, in ignem inextinguibilem: ubi vermis eorum non moritur, & ignis non extinguitur.* Apocal. Cap. XX. *Diabolus -- missus est in stagnum ignis, & sulphuris, ubi & bestia & pseudopropheta cruciabuntur die ac nocte.* Verba Scripturæ, præcipue quando constanter & uniformiter loquitur, intelligenda sunt in proprio ac naturali sensu, si ille nullam contradictionem aut absurditatem præferat. Ergo hæc Scripturarum verba intelligenda sunt de vero ac proprie dicto igne.

203. Prob. II. Authoritate Patrum. S. Cyprianus Lib. de laudibus Martyrii, Cap. XII. infernum sic describit: *Sæviens locus, cui gehenna nomen est . . . eructantibus flammis per horrendam spissæ caliginis noctem sæva semper incendia camini fumantis exspirat: globus ignium arctatus obstruitur, Et in varios pænæ exitus relaxatur. Tunc sæviendi plurima genera; tum in se ipso convolvit, quidquid ardoris emisit edax flamma cruciarit.* Quæ certe descriptio est ignis materialis & corporei. S. Hieronymus Epist. LIX. ad Avitum, arguit Origenem, quod ignem tartareum ad metaphoram transtulerit. S. Augustinus Lib. XXI. de Civit. Dei, Cap. X. *Adhærebunt Spiritus incorporei corporeis ignibus cruciandi.* S. Gregorius M. Lib. IV. Dialog. Cap. XXIX. *Certe reprobus veritas in fine dictura est, Ite in ignem æternum, qui paratus est diabolo Et Angelis ejus. Si igitur diabolus, ejusque Angeli, cum sint incorporei, corporeo sunt igne cruciandi, quid mirum si animæ, etiam antequam recipiant corpora, possint corporea sentire tormenta?* Porro inferorum ignem, quo dæmones & animæ damnatæ torquentur, materia constare, Theologi hodie omnes, immo & Christiani consentiunt.

204. Neque Conclusioni nostræ obstat, quod S. Ambrosius in Cap. XIV. Lucæ. S. Gregorius M. Lib. XV. Moralium, Cap. XVII. & S. Augustinus Lib. XXI. de Civit. Dei, Cap. X. ignem illum, quo damnati torquentur, *incorporeum* vocent: aut quod S. Damascenus Lib. IV. de Fide Orthodoxa, Cap. XXVIII. non materialem, qualis est apud nos, sed qualem novit Deus, vocitet, ut longe jam ante illum Lactantius scripsérat Lib. VII. Divin. Institut. Cap. XXI. Ambrosius enim & Gregorius ignem illum vocant *incorporeum*, tum quia pabulo non indiget: tum quia non virtute corporea, sed forte spiritali torquet Spiritus: Augustinus vero verbis subsequenter mentem suam dilucide explicat l. c. *At vero gehenna illa, quod etiam flagnum ignis Et sulphuris dictum est, corporeus ignis erit, Et cruciabit corpora damnatorum, aut Et hominum Et dæ-*

monum. Damascenus & Lactantius volunt tantum ignem inferni non fore impurum & crasum, qualis hic noster est. Audiatur Lactantius Lib. VII. Divin. Institut. Cap. XXI. *Cujus (ignis infernalis) natura diversa est ab hoc nostro, quo ad vitæ necessaria utimur. Qui nisi alicujus materiæ fomite alatur, extinguitur: at ille divinus per se ipsum semper vivit, ac viget sine ullis alimentis, nec admistum habet fumum; sed est purus ac liquidus, Et in aquæ modum fluidus.* Jam vero si purus, si liquidus, si fluidus instar aquæ est, materialis & corporeus sit necesse est.

*Ejusdem
speciei cum
nostro.*

205. Quæres I. An ignis ille ejusdem sit naturæ & speciei cum elementari nostro, an diversæ? R. ejusdem omnino speciei esse, quamvis secundum accidentia differat, ut superius dictum est. Vocatur enim a Scripturis Sacris & Patribus constanter, & absque alia additione, *ignis*, quod nomen specificum est, sicut nomen aquæ. Ergo cum vere ac proprie ignis sit, ejusdem est cum elementari nostro speciei. Differentiam accidentalem ignis illius a nostro elegantissime describit Minutius Felix Sæculi III. Scriptor, in Dialogo, qui Octavius inscribitur: *Illic sapiens ignis membra urit, Et reficit: carpit, Et nutrit. Sicut ignes fulminum corpora tongunt, nec obsumunt: sicut ignes Æthiæ Et Vesuvii montis, Et ardentium ubique terrarum flagrant, nec erogantur: ita pœnale illud incendium non damnis ardentium pascitur, sed inextesa corporum laceratione nutritur.*

*Licet mo-
dus agen-
di in spi-
ritum ex-
plicari ne-
queat.*

206. Quæres II. Qua ratione ignis corporeus agere possit in Spiritus? Missis quorundam opinionibus, qui quod investigari non potest, inexhausta curiositate perquirunt, respondeo cum S. Augustino Lib. XXI. de Civit. Dei, Cap. X. *miris, tamen veris modis.* Et Epist. III. nunc CXXXVII. ad Volusianum: *Demus Deum aliquid posse, quod nos fateamur investigare non posse.* Nullus sane ex eo capite negabit animas corporibus inclusas adustione, aut rei ingrata perceptione torqueri, quod hætenus Philosophorum nullus additum id naturæ mysterium exponere nobis valuerit. Ne-
que

que dicas mentem esse cum corpore conjunctam in unam personam, ideoque corporis motibus necessario percelli. Præterquam enim quod difficultas hac responsione insoluta dimittatur, ajo, quemadmodum Deus mentes immateriales ita cum corporibus conjunxit, ut motibus eorum afficerentur: sic apud inferos, novis legibus naturæ rerum impositis, efficere potest, ut Spiritus igne materiali & corporeo urantur.

207. Conclusio IV. Non peccata publica tantum, *Peccata etiam occulta apud inferos puniuntur.* sed etiam occulta, per penitentiam nondum remissa, in altera vita inferorum cruciatibus puniuntur. Prob. I. Autoritate Scripturarum, quæ nullo facto discrimine inter peccata gravia publica & occulta, æternam mortem impiis comminantur. Ezechielis Cap. XVIII. v. 4. *Anima quæ peccaverit, ipsa morietur.* Apocalypsis Cap. XXI. v. 27. *Non intrabit in eam (Jerusalem cælestem) aliquid coinquinatum aut abominationem faciens & mendacium.* II. ad Cor. Cap. V. v. 10. *Omnes enim nos manifestari oportet ante tribunal Christi, ut referat unusquisque propria corporis, prout gessit, sive bonum, sive malum.* Psal. XVIII. dicitur: *Ab occultis meis munda me.* Quibus verbis Propheta regius satis innuit, peccata, etiam occulta ac secreta, & soli Deo nota, veram habere culpam, ac digna esse supplicio. Matth. Cap. XV. ait Christus: *De corde enim exeunt cogitationes malæ, homicidia, adulteria, fornicationes, furta, falsa testimonia, blasphemias. Hæc sunt, quæ coinquant hominem.* Prob. II. Ratione Theologica. In die ultimi judicii Deus manifestabit consilia cordium, & illuminabit abscondita tenebrarum ea etiam de causa, ut peccata occulta puniantur. II. Si peccata occulta a Deo post mortem hominis non punirentur, plurima enormia & gravissima scelera manerent impunita; quod justitiæ divinæ repugnat. III. Peccata occulta sunt transgressio libera divinæ legis. Ergo ex natura sua spoliant hominem gratia sanctificante, reddunt inimicum Deo, & reum constituunt æternæ damnationis.

208. Conclusio V. Animæ, in statu peccati mortalis ex hac vita decedentes, statim ad inferos amandantur. *Morientes in peccato mortali*

*Statim ad
inferos de-
ceduntur*

dantur. Prob. I. Authoritate Scripturarum. Lucae Cap. XVI. v. 22. dicitur: *Mortuus est dives, Et sepultus est inferno.* Quo nomine non sepulcrum, sed ipsos inferos, seu carcerem damnatorum intelligendum esse, tum ex Patribus, tum ex ipsa Scriptura evincitur. Ait enim Epulo ad Abrahamum: *Quia crucior in hac flamma.* Ergo eadem est reliquorum etiam damnatorum conditio. II. Authoritate Patrum. S. Basilius in Exhortat. ad Baptismum: *Aderit tibi repentinum exitium, ac interitus similis procellae te evertet. Veniet malus Angelus, per vim, tuam rapiens tot peccatis irretitam animam, teque demum magnopere cruciatum, pracluso lamentis vocis organo, ad nigra tartara deducet.* S. Hilarius in Psal. II. *Excipit impios statim ultor infernus, Et decedentes de corpore confestim de via iusta peribunt. Testes nobis sunt Evangelii dives Et pauper.* S. Gaudentius Brixien-sis Tract. XIII. de Natali Domini: *Judas praedictorum facinorum conscientia strangulatus, mortem debitam laqueo sibi intulit praeparato, confestim rapiendus ad inferni supplicia.* S. Augustinus Lib. XIII. de Civit. Dei, Cap. VIII. *In requie sunt animae piorum a corpore separatae; impiorum autem poenas lument.* S. Gregorius M. Lib. IV. Dialog. Cap. XXVIII. *Si esse Sanctorum animas in caelo sacri eloquii satisfactione credidisti, oportet ut per omnia esse credas Et iniquorum animas in inferno: quia ex retributione aeternae justitiae, ex qua iusti jam gloriantur, necesse est per omnia ut Et iniusti crucientur. Nam sicut electos beatitudo latificat, ita credi necesse est, quod a die exitus sui ignis reprobos exurat.* III. Authoritate Oecumenici Florentini, quod in Decreto fidei definivit Sess. ultima, *Illorum animas, qui in actuali mortali peccato, vel solo originali decedunt, mox in infernum descendere, poenis tamen disparibus puniendas.* IV. a pari. Sanctorum beatitudo non differtur usque ad ultimi iudicii diem. Ergo nec poena reproborum.

*Aeternas
esse Infe-
rorum po-
nas Scrip-
turae do-
cent.*

209. Conclusio VI. Poenae damnatorum apud inferos sunt aeternae, nullum umquam finem habiturae. Prob. Conclusio haec dogmatica I. Authoritate Scripturarum

rarum. Matth. XXV. v. 41. dicitur: *Discedite a me maledicti in ignem æternum.* Et v. 46. *Et ibunt hi in supplicium æternum; iusti autem in vitam æternam.* Marci Cap. IX. *Vermis eorum non moritur, & ignis non extinguitur.* Apocal. Cap. XX. Bestia & Pseudopropheta, quibus universitas impiorum designatur, in flagno ignis & sulphuris cruciabuntur die ac nocte in secula sæculorum. II. ad Thessalon. Cap. I. *Qui peras dabunt in interitu æternarum.*

210. Prob. II. Autoritate Patrum. S. Justinus Patres.
 Apologia II. scribit: *Sed enim, quia liberi arbitrii & Angelorum & hominum genus ab initio creavit Deus, iusto iudicio pro delictis suis supplicium in igne sempiterno reportabunt.* Tertullianus in Apologetico, Cap. XLV. *Enimvero nos, qui sub Deo omnium speculatore dispungimur, quique æternam ab eo pœnam prævidemus, merito soli innocentia occurrimus, & pro scientia plenitudine, pro latebrarum difficultate, & pro magnitudine cruciatus, non diuturni, verum sempiterni, eum timentes.* S. Irenæus Lib. IV. adv. Hær. Cap. XLVII. *Quibuscunque dixerit Dominus, Discedite a me maledicti in ignem æternum, isti erunt semper damnati. Et quibuscunque dixerit, Venite benedicti Patris mei, percipite hæreditatem regni, quod præparatum est vobis in sempiternum, hi percipiunt regnum, & in eo proficiunt semper.* S. Hilarius Canone V. in Matth. *Igitur requies nulla gentibus, neque mortis, ut volunt, compedio quies dabitur. Sed corporalis & ipsis æternitas destinabitur: ut ignis æterni sit in ipsis æterna materies, & in universis sempiternis exerceatur ultio sempiterna.* Lactantius Lib. II. Divin. Institut. Cap. V. *Qui maluerit bene vivere ad tempus, male vivet in æternum. Damnabitur enim sententia Dei ad æternam pœnam, quia cælestibus bonis terrena præposuit.* S. Ambrosius Lib. II. de Fide ad Gratianum, Cap. IV. *Tu te a diabolo creatum Manichæe arbitraris. Ad illius ergo festina sedem, ubi ignis & sulphur, ubi non restinguitur ejus incendium, nec unquam pœna moritur.* Et Lib. de lapsu Virginis, Cap. VIII. *Ego tamen, qui scio graviora facinorosis ser-*
uari

vari tormenta, Et sine fine impias animas cruciatus manere, non temporales utique, sed æternos; aliis te volo cruciatibus affici, profuturis utique, non animam perdituris. S. Basilius in Regulis compendio traditis, Interrogatione CCLXVII. ait: Cum hæc Et ejusmodi sæpe in Scriptura proponantur; hoc quoque est diaboli artis Et astutia, ut multi homines velut oblii talium tantarumque Domini sententiarum, finem sibi audeant pœnarum in posterum adumbrare. Nam si æterni supplicii quandoque finis est futurus, omnino habebit Et vita æterna finem. Sin in vita non sic Evangelici dicti sensum accipimus, quæ ratio est statuendi finem supplicio æterno? Æterni enim adjunctio pariter in utroque ponitur. Ibunt enim hi, inquit, in supplicium æternum, justi autem in vitam æternam. His igitur ita concessis, intelligendum est illud, Vapulabit multis, Et illud, Vapulabit paucis, non finem, sed diversitatem supplicii declarare. S. Gregorius Nazianzenus Carmine XIX. vermem, qui apud inferos rodit, describens ait: At vermis illinc perpeti morsu premens. Et Oratione XV. de plaga grandinis scribit: Mitto dicere futuræ vitæ tribunalia, quibus hujusce vitæ indulgentia Et impunitas eos tradit: ita ut satius sit nunc castigari Et purgari, quam ad cruciatum illum transmitti, cum jam pœnæ tempus erit, non purgationis. Quemadmodum enim qui Dei memor hic est, morte superior est, idque a Davide optime dictum est: ita his, qui vita exceßerint, non est in inferno confessio, aut morum correctio. Hic enim Deus vitam Et actionem, illic rerum gestarum censuram conclusit. S. Chrysost. Hom. IX. in I. ad Cor. Non est hæc parva, quæ proponitur, quæstio, --- an finem habeat ignis gehennæ? Nam quod non habeat, Christus pronuntiavit dicens: Ignis eorum non exstinguetur, Et vermis eorum non desinet. S. Augustinus Lib. de Fide & operibus, Cap. XV. Neque illud dici hic potest, in quo nonnulli seipsos seducunt dicentes, ignem æternum dictum, non ipsam pœnam æternam. Per ignem quippe, qui æternus erit, transituros arbitrantur eos, quibus propter fidem mortuam per ignem promittunt salutem; ut videlicet ipse ignis æternus sit, combustio vero eorum,

rum, hoc est, operatio ignis non fit in eos æterna: cum Et hoc providens Dominus, sententiam suam concluserit, ita dicens: Sic ibunt illi in combustionem æternam, iusti autem in vitam æternam. Erit ergo æterna combustio, sicut ignis; Et eos in illam ituros Veritas dicit, quorum non fidem, sed bona opera defuisse declaravit. S. Fulgentius Lib. de Fide ad Petrum, Cap. XLIII. Ex ejus (Dei) ore iusti æternique iudicii sempiterna atque incommutabili prolata sententia, iniqui omnes ibunt in combustionem æternam, iusti autem in vitam æternam; iniqui semper arsurus cum diabolo, iusti autem sine fine regnaturi cum Christo.

211. Prob. III. Autoritate Conciliorum. Vta Synodus, seu C^o Politana II. Oecumenica damnavit Origenem, quod docuerit omnium impiorum hominum, atque etiam demonum tormenta finem aliquando habitura, ut testantur Evagrius Hist. Eccles. Lib. IV. Cap. XXXVII. Nicephorus Callistus Lib. XVII. Hist. Eccles. Cap. XXVIII. Photius Lib. de VII. Synodis, Theophanes, Zonaras, Cedrenus, VI. Synodus seu C^o Politana III. Actione XVIII. & Nicæna II. Act. I. Immo S. Augustinus annis facile CXXX. ante V. Synodum, in libro de Hæresibus, Cap. XLIII. commentum hoc Origenis vocat vanissimam impietatem, propter quam Origenes merito ab Ecclesia proscriptus fuit. Lateranense IV. Cap. Firmiter docet, reprobos pœnam perpetuam recepturos esse cum diabolo. Tridentinum Sess. VI. Can. XXV. & Sess. XIV. Can. V. pœnas damnatorum vocat æternas: quo nomine Concilia & Patres non intelligunt longam durationem, sed æternitatem proprie ac stricte dictam, sine carituram.

Argumenta contraria refutantur.

212. Objicitur I. contra I. Conclusionem, Autoritas Scripturarum. Christus ad inferos descendens post mortem suam, ut dicitur Psalmo CVI. *Contravit portas æreas, & vinctus ferreos confregit.* II. Act. *Christus post mortem suam inferos non destruxit.* xix. Cap.

Cap. II. *Deus suscitavit* (Christum) *solutis doloribus inferni*. III. Christus triduo illo apud inferos moratus, ut dicitur I. Petri Cap. IV. Evangelium prædicavit: *Propter hoc enim & mortuis evangelizatum est: ut judicentur quidem secundum homines in carne; vivant autem secundum Deum in spiritu*. IV. Christus ad Ephes. Cap. IV. v. 8. *Ascendens in altum captivam duxit captivitatem*. Ergo infernus per mortem Christi eversus & destructus fuit. R. I. Cur ergo Christus in die extremi iudicii reprobos æternis flammis addicet, Matth. Cap. XXV. *Discedite a me maledicti in ignem æternum?* R. II. C. A. N. C. Imus textus de Christo ad inferos descendente intelligendus est, non in hoc sensu, quod infernum destruxerit; sed quod divina virtute sua ad inferos penetrarit, carcerem Patriarcharum reserarit, prædamque, ringentibus inferis, animas nimirum piorum hominum, quæ in sinu Abraham quiescebant, extorserit. II^{di} textus sensus est, quod Christus sua resurrectione destruxerit mortem, illamque omni dominatu in sanctissimam suam humanitatem exuerit; resurrexit enim immortalis & impassibilis: vel quod Christus dolores inferni solverit, impediendo ne illis amplius tenerentur animæ Patriarcharum, quas liberare decreverat. III. textus dicit, Christum Patribus in limbo reclusis pro vita pie antea transacta latissimum æternæ beatitudinis nuntium, ac præmium attulisse; ita ut quamvis illi a mundanis & stultis hominibus plane interis se astimarentur, tamen revera vivant spiritu in præsentia Divinæ Majestatis, donati a Deo gloria æterna. Ad IV. N. C. Christus enim secum in cælos non traxit impios, æternæ mortis vinculis constrictos; sed piorum animas apud inferos in sinu Abraham quiescentes.

Narratio Evangelica Divitis & mendici offendit damnatos vero igne. 213. Objic. II. contra III. Conclusionem, Infirmitas probationis. In narratione illa divitis & mendici Lucæ Cap. XVI. plura sunt metaphorice accipienda, v. g. quod dives oculos elevarit, & Abrahamum a longe viderit: quod guttam aquæ rogaverit. Ergo etiam verba illa, *Crucior in hac flamma*, intelligenda sunt

sunt de flamma metaphorica, non vero proprie ac strictè tali. *Confirm.* Eo modo damnati igne torquentur, quo a frigore & vermibus. Atqui vermes & frigus sunt tantum metaphorice in inferno. Ergo etiam ignis. R. Non desunt viri docti, qui non animam tantum, verum etiam corpus divitis ad inferos delatum fuisse suspicantur: quo casu omnia, absque metaphora, explicari possent. Juxta communem autem Interpretum sententiam, qui verba illa, *Sepultus est inferno*, de sola anima intelligunt, Resp. C. A. N. C. Certum est atque omnibus exploratum, oculos, manus, linguam, sitim, Spiritibus a corpore separatis non nisi metaphorice tribui posse: At vero Scriptura clare ac frequenter asserit dari in inferno ignem, quem naturalem esse, ac ejusdem quoad substantiam speciei cum elementari nostro Sancti Patres passim affirmant. Ad *confirm.* R. I. N. M. Frigoris apud inferos nullibi Scriptura meminit, nisi forsitan, Job Cap. XXIV. *Ad nimium calorem transeat ab aquis nivium, Et usque ad inferos peccatum illius.* Qui tamen textus facile aliam interpretationem admittit juxta mentem S. Gregorii M. Lib. XVI. Moral. Cap. XXVII. Vermium quidem sæpius meminit Scriptura, cum de poenis inferni agit; sed de illorum veritate ac proprietate non tam concors est Sanctorum Patrum & Theologorum sententia. R. II. N. m. Ex alternante frigoris & caloris cruciatu damnatos acerbissime torquendos esse affirmant. S. Hieronymus in Cap. XXIV. Job, & Cap. X. in Matth. Ven. Beda in illud caput Job, Hugo Victorinus Lib. IV. de Anima, Cap. XIII. Vermes vero materiales voracissime damnatorum corpora depasturos esse, S. Augustinus Lib. XXI. de Civit. Dei, Cap. IX. S. Maximus, alique Patres absque cunctatione asserunt, divinarum Scripturarum oraculis permoti.

214. Dices. Ipsa Scriptura divina quamcunque gravem tribulationem ignem vocat metaphorice, ut Psal. LXV. *Transivimus per ignem Et aquam: Et eduxisti nos in refrigerium.* Psal. XVI. *Ignem me examinasti, Et non est inventa in me iniquitas.* Ecclesiastici Cap.

Cap. LI. v. 6. *Et in medio ignis non sum aestuatus.* Ergo ex Scripturis evinci nequit, damnatos igne vere ac proprie tali torqueri. R. N. C. Quamvis hæc vox ignis uno aut altero loco figurate fumatur in Scripturis, minime tamen sequitur etiam tunc figurate fumi, quando Scriptura tam frequenter, tamque diversis locis æterno igne damnatos torqueri asserit: præcipue cum divinæ Scripturæ libri a diversis authoribus conscripti sint, Sanctique Patres textus illos in sensu proprio intelligendos esse docuerint.

*Ad statim
Post mor-
tem tor-
queri.*

215. Objic. III. contra V. Conclusionem, Infirmas argumenti. Narratio illa Lucæ Cap. XVI. Divitis, & mendici, non est historica, sed parabolica. Ergo ex ea probari non potest, impios statim post mortem ad inferos detrudi. R. I. N. A. Narrationem illam non parabolicam, sed historicam esse asserunt Origenes, Tertullianus, S. Irenæus, Clemens Alexandrinus, S. Ambrosius, S. Chrysostomus, S. Cyrillus Alexandrinus, S. Augustinus, S. Petrus Chrysologus, S. Isidorus Pelusiota, S. Gregorius M. Unde enim, ut observat Tirinus, pauperi nomen Lazari, seu Eleazari? Unde diviti quinque fratres? Unde tam exacta damnationis & pœnarum descriptio? Fateor quidem symbolica quadam interseri, ut de lingua divitis, de gutta aquæ &c. Sed non poterat aliter nobis status ejus innotescere; & solent ejusmodi corporalibus symbolis spiritualia adumbrari. R. II. N. C. Quamvis in parabolis non ea narrentur quæ contigerunt; narrantur tamen eo modo, quo contingere possunt, atque etiam in aliis vel similibus circumstantiis, aut saltem ex parte contingere solent. Cum igitur narretur ibi, divitem mortuum, atque in inferno sepultum esse; quamvis narratio illa foret parabolica, legitime tamen infertur, reprobos quoscunque post mortem ad inferos detrudi, non expectato extremi judicii die.

*Dæmones
pœnas in-
ferni susti-
nens.*

216. Objic. IV. Paritas. Dæmones nondum missi sunt in ignem æternum, sed primum mittentur in die extremi judicii. Ergo etiam damnati nondum apud inferos torquentur. P. A. I. Authoritate Scripturarum.

Mat-

Matthæi Cap. VIII. dæmones dicunt Christo: *Venisti ante tempus torquere nos.* Et I. ad Cor. Cap. VI. ait Apostolus: *Nescitis quoniam Angelos judicabimus?* II. Auctoritate Patrum. S. Justinus Apologia I. & II. S. Irenæus Lib. V. adv. Hær. S. Epiphanius in Hær. Sethianorum, Oecumenius in Cap. ult. I^{mæ}. Petri dicunt, dæmones sempiterno igni tradendos, nondum tamen traditos esse. III. Auctoritate Ecclesiæ, quæ in exorcismo Baptismati præmitti solito alloquens dæmonem, ait: *Nec te lateat imminere tibi pœnas, tormenta, diem judicii, diem supplicii æterni, qui venturus est velut clibanus ardens, in quo tibi & universis Angelis tuis æternus veniet interitus.* R. I. Quidquid sit de dæmonibus, reprobos homines statim post mortem in infernum detrudi docent Scripturæ divinæ, & Patres, atque a Florentina Synodo clare decisum est. R. II. N. A. Ad I. *prob.* C. A. N. C. Triplex distingui debet dæmonum damnatio. Prima, qua dæmon damnatus est propter superbiam, & in infernum præceps actus. Altera, qua per Christum potestate sua in homines spoliatus est, ne amplius ea libertate longe lateque dominetur, qua olim ante adventum Christi. Tertia erit in die extremi judicii, in qua licet nulla futura sit accessio ad pœnam principalem, maxima tamen fiet ad secundariam; quia tunc dæmonum malitia toti mundo manifestabitur: quia judicati condemnabuntur a Sanctis, atque omnis ab iis auferetur potestas electis in posterum nocendi. Atque de tertia hac damnatione intelligendi sunt Scripturarum textus in objectione adducti. Ad II. R. Patrum illorum sententiam hac in re deserendam esse, ut pote contrariam cæteris Patribus, præcipue S. Ambrosio, S. Hieronymo, S. Augustino, S. Gregorio M. S. Gregorio Nazianzeno, S. Chrysostomo, S. Cyrillo Alexandrino. Ad III. N. C. Verbis illis in objectione laudatis immediate subjungitur: *Et ideo pro tua nequitia dammate & damnande da honorem Deo; appropinquabit enim judicium Dei.* Quæ verba significant, eum etiam nunc in inferno torqueri; sed pœnarum suarum complementum in die judicii accepturum.

Quamvis
multi eo-
rum in
aere ver-
sentur.

217. Dices. Non omnes dæmones sunt in inferno, sed multi adhuc in æere ac supra terras vagantur, ut tradunt Athenagoras in Legatione pro Christianis, Tertullianus in Apologetico, Cap. XXII. S. Augustinus Lib. VIII. de Civit. Dei, Cap. XXII. Eusebius Lib. III. Demonstrat. Evang. S. Chrysostomus Hom. XI. in I. ad Thesalon. Theodoretus Orat. III. contra Græcos, S. Fulgentius Lib. de Trinitate, Cap. VIII. Ergo dæmones nondum æternis uruntur incendiis. R. Quamvis communis sit Patrum sententia, non omnes prorsus dæmones statim post peccatum in inferorum claustris fuisse conclusos; sed eorum plerosque in tartarum fuisse deturbatos, reliquos vero in æere vicinisque locis vagari, atque ultro citroque commeari: exinde tamen inferri nequit, eos qui in æere versantur, non torqueri ab igne, & damnationis suæ pœnas non pati. Certe Scriptura hanc pœnam adstruit; dicitur enim II. Petri Cap. II. v. 4. *Si enim Deus Angelis peccantibus non pepercit, sed rudentibus inferni detractos in tartarum tradidit cruciandos, in judicium reservari.* Et in Epistola Canonica B. Judæ v. 6. *Angelos vero, qui non servaverunt suum principatum, sed dereliquerunt suum domicilium, in judicium magni diei, vinculis æternis sub caligine reservavit.* Quæ verba tartarus, infernus, caligo, perspicue damnatorum carcerem significant. Sicut igitur Angeli, etiam dum apud nos agunt, semper vident faciem Patris, atque in cœlis esse a Christo dicuntur: ita dæmones etiam, dum in hoc æere versantur, pœnas inferni sustinent. Quæ autem ratione fieri possit, ut ignis gehennæ agat in dæmones per æera volitantes, fatemur nos ignorare. Hoc tantum dicimus, fieri id miris & ineffabilibus, veris tamen modis, soli Divinæ Omnipotentis & Justitiæ cognitum.

Inferni
pœnas fi-
nem habi-
entibus, ne-
que insi-
nuat Scri-
ptura.

218. Objic. V. contra VI. Conclusionem, Auctoritas Scripturarum. I. Psal. LXXVI. dicitur: *Numquid in æternum proficiet Deus, aut non apponet ut complacitor sit adhuc? Aut in finem misericordiam suam abscindet a genera-*

generatione in generationem? Aut obliviscetur miseri Deum?
 Aut continebit in ira sua misericordias suas? II. Psal. XV.
 Propter hoc lætatum est cor meum, & exultavit lingua mea:
 caro mea requiescet in spe. Quoniam non derelinques ani-
 mam meam in inferno. III. Psal. CXLIV. Miserationes
 ejus super omnia opera ejus. IV. Psal. CII. Non in per-
 petuum irascetur: neque in æternum comminabitur. V. Isaia
 Cap. XXIV. v. 22. Et congregabuntur in congregatione
 unius fascis in lacum, & claudentur ibi in carcere; &
 post multos dies visitabuntur. VI. ad Rom. Cap. XI. v.
 32. Conclisit enim Deus omnia in incredulitate: ut omnium
 misereatur. VII. I. ad Cor. Cap. III. v. 15. Si cujus
 opus arserit, detrimentum patietur: ipse autem salvus erit;
 sic tamen quasi per ignem. VIII. Apocal. Cap. XX. v.
 6. Beatus & sanctus, qui habet partem in resurrectione
 prima: in his secunda mors non habet potestatem. IX. Mar-
 ci Cap. XII. v. 40. dicitur de Pharisæis: Hi accipient
 prolixius judicium. Ergo pœnæ damnatorum sunt inæ-
 quales in duratione. X. Tobia Cap. IV. v. 11. Quo-
 niam elemosyna ab omni peccato & a morte liberat, & non
 patietur animam ire in tenebras. Ergo damnati, qui in
 vita fuere misericordes, non punientur æternum. R.
 ad I. verba illa referri non posse ad damnatos, sed
 esse agitationem mentis, in qua noctu diuque Prophe-
 ta regius exercebatur, cernens quod vix tunc inveni-
 retur qui faceret bonum. Itaque interrogationibus hi-
 sce vaticinatur S. David, quod Deus tempore suo vi-
 sitaturus sit populum suum, adventurumque sit ali-
 quando tempus Redemptionis generis humani, in quo
 per misericordiam Dei & merita Christi plurimi sal-
 ventur. Ad II. R. verba illa intelligenda esse de Chri-
 sto, cujus anima non est relicta in inferno, sive in sinu
 Abrahamæ, & corpus in sepulchro ab omni corruptione
 fuit immune. Ita locum illum interpretatus est B. Pe-
 trus Act. Cap. II. v. 25. David enim dicit in eum: Pro-
 pter hoc lætatum est cor meum &c. Ad III. Deus mise-
 ricordiam exercet præcipue in hac vita, peccatores
 excitando ad pœnitentiam, petentibus veniam dando,

gravesque pœnas in hac vita condonando, justos a lapsu præservando &c. Justitiam vero præcipue in altera vita, electos remunerando, & impios puniendo, quamvis infra condignum. Ad IV. locus hic pertinet ad præsentem vitam, in qua baptizatis remittitur originale, pœnitentibus vero personalia peccata. Ad V. R. locum illum favere, non obesse sententiæ Catholicæ; *Visitare* enim sæpius in Scripturis sumitur in malam partem, pro punire & percutere, ut v. g. Isaia Cap. XXVI. *Visitasti, & contrivisti eos.* Ad VI R. recitati textus hunc esse sensum: Deus permisit successive tum Judæos, tum alias nationes in infidelitatem delabi; ut sic omnium totius mundi nationum misereatur, ut misericordiam suam omnibus patefaciat, & hac ratione tam Judæos quam Gentes humiliet: ut eas inter se concordet faciat, & divina beneficia magis illustret, omnes homines, quamvis indignos tanto favore, veræ fidei lumine collustrando. Ad VII. R. Apostolum ibi loqui de iis, qui in statu gratiæ ex hac vita decedant: per ignem intelligi aut tribulationes hujus vitæ, aut Purgatorium. Ad VIII. R. uti alias sæpe, ita etiam hic per secundam mortem intelligi æterna damnatorum supplicia; minime vero destructionem, seu annihilationem reproborum. Ad IX. Christus ait prolixius fore Pharisæorum judicium, non quoad durationem, sed quoad intensiorem pœnarum. Ad X. N. C. Eleemosyna, atque alia misericordiæ opera disponunt quidem hominem ad pœnitentiam, præservant a peccatis futuris, Deum movent ad largiendam uberio- rem gratiam: At si homo gratiæ non cooperetur, atque ex hac vita migret charitate destitutus, frustra sunt omnia. Nam ut ait Apostolus I. ad Cor. Cap. XIII. v. 3. *Si distribuero in cibos pauperum omnes facultates meas, & si tradidero corpus meum ita ut ardeam, charitatem autem non habuero, nihil mihi prodest.*

Neque S.
Hierony-
mus.

219. Objic. VI. Autoritas S. Hieronymi, qui in Lib. I. Dialogorum adversus Pelagianos scribit: *Si autem Origenes omnes rationabiles creaturas dicit non esse perdendas, & diabolo tribuit pœnitentiam, quid ad nos, qui*

qui diabolum & satellites ejus: omnesque impios & pravaricatores dicimus perire perpetuo, & Christianos, si in peccato præventi fuerint, salvandos esse post pœnas? Ergo juxta S. Hieronymum, saltem Christiani in peccato mortui liberabuntur a gehenna. II. Idem l. c. ait: Illud vero, quod in sequenti ponis capitulo, in die judicii iniquis & peccatoribus non parcendum, sed æternis eos ignibus exurendos, ferre quis potest, & interdicere te misericordiam Dei, & ante diem judicii de sententia judicis judicare: ut si voluerit iniquis & peccatoribus parcere, te præscribente non possit? III. Idem in Cap. ult. Isaiaë scribit: Sicut diaboli & omnium peccatorum atque impiorum, qui dixerunt in corde suo, non est Deus, credimus æterna tormenta: Sic peccatorum atque impiorum, & tamen Christianorum, quorum opera in igne probanda sunt, moderatam arbitramur, & mixtam clementia sententiam Judicis.

220. Resp. I. S. Hieronymum de æternitate pœnarum Catholice sensisse, ex ipso S. Hieronymo facile ostendi potest. Commentario in Caput III. Jonæ scribit S. Doctor: Sed hoc quia Scriptura sacra non dicit, & evertit penitus timorem Dei, dum facile homines labantur ad vitia; putantes etiam diabolum, qui author malorum est, & omnium peccatorum fons, acta pœnitentia posse salvari, de nostris mentibus abjiciamus, & sciamus peccatores in Evangelio mitti in ignem æternum, qui præparatus sit diabolo & angelis ejus, & de his dici: Vermis eorum non morietur, & ignis eorum non exstinguetur. Et paulo inferius: Si longo post circuitu, atque infinitis sæculis, omnium rerum restitutio fiet, & una dignitas militantium: quæ distantia erit inter Virginem & prostibulum? Quæ differentia erit inter Matrem Domini & (quod dictu quoque scelus est) victimas libidinum publicarum? Idemne erit Gabriel & Diabolus? Idem Apostoli & Dæmones? Idem Prophetæ & Pseudoprophetæ? Idem Martyres & Persecutores? Pinge quodlibet: annos & tempora duplica, & infinitas ætates congere cruciatibus: Si finis omnium similis est, præteritum omne pro nihilo est: quia non quærimus quid aliquando fuerimus, sed quid semper futuri simus. Idem in

T. IV. Theol. Dogm. Pol. N Com-

Comment. ad Cap. LXV. Isaia, v. 20. ait: *In illo igitur tempore, quando aetas fuerit una cunctorum, & Sanctus & peccator erunt simili resurrectione perfecti, nec inter se variabunt tempore; sed alius ad præmia, alius ad supplicia pertrahetur; & in eo peccator maledictus erit, quod incorrupto corpore pœnas patiatur æternas.*

221. R. II. ac directe ad I. textum. S. Hieronymus non loquitur ibi de omnibus Christianis promiscue, etiam graviorum criminum reis; sed de illis, qui levibus culpis inquinati ex hac vita decedunt: contradistinguit enim illos a prævaricatoribus, seu graviorum criminum reis, quos perpetuo perituros esse dicit. Ad II. R. S. Doctor verbis illis impugnat Pelagianos, quos toto hoc Opere exagitat. Hæreticis illis levia etiam peccata gravissima habebantur; hinc divitem non posse ingredi in regnum Dei, nisi omnia sua vendiderit, contendebant, docebantque, omnia omnino peccata inducere reatum æternæ mortis: & justos, qui in vitam æternam ituri sunt, eos tantum esse qui expertes essent omnis omnino peccati, etiam levis. Quod si verum foret, nullus omnino salvaretur, cum nullus fuerit aut futurus sit, præter Deiparam, qui omni peccato personali caruerit aut peccaturus aliquando non sit. In his ergo levioribus culpis deprehensos Christianos salvandos esse post pœnas rectissime S. Hieronymus asseruit, post pœnas scilicet in Purgatorio subeundas. Ad III. R. S. Hieronymus vel loquitur ibi de Christianis, quos supponit pœnitentiam ante mortem egisse, ideoque purgatorio igne detineri, nomine peccatorum & iniquorum etiam illos intelligens, qui alicujus peccati five levis rei sunt, five gravioris, sed pœnitentia jam expiati, & propterea pœna temporali sunt digni: vel solum vult Christianos impios mitius in inferno torquendos, quod in fide Christiana usque ad mortem perseveraverint. Quæ opinio quamvis probabilius sit falsa, nihil tamen cognationis habet cum errore Origenis. Vide Natalem Alexandrum Dissert. XXVII. in Hist. Eccles. Sæculi III. Simonnet Tract. V. de Peccatis, Disput. IV. Art. III.

222. Objic. VII. Authoritas aliorum Patrum. S. *Neque alii Patres asserunt.* Gregorius Nyssenus Lib. de Anima & Resurrectione, atque in Oratione Catechetica, Cap. XXVI. aperte Origenis sententiam propugnat. II. S. Gregorius Nazianzenus Orat. XXXIX. in Sancta Lumina, Novatianis nisi resipiscant, & Christi viam incedant, supplicia post mortem comminatur, sed purgatoria, minimeque perpetua. *In altero ævo, ait, igne fortasse baptizabuntur, qui postremus est baptismus, nec solum acerbior, sed & diuturnior, qui crassam materiam instar foeni depascitur, vitique omnis levitatem absumit.* Orat. XL. dubium esse significat, an pœnæ inferni æternæ sint, & liberum cuique esse ea de re quod voluerit opinari. *Est alter ignis, inquit, non purgans, sed scelerum vindex. Nisi hoc quoque loco quispiam ignem mitius, atque ut Deo vindice dignum est, intelligendum putet.* III. S. Ambrosius in Psalm. CXVIII. scribit: *Differtur diaboli iudicium, ut sit semper in pœnis reus; semper improbitatis suæ innexus catenæ, conscientiae suæ, ut in perpetuum subeat ipse iudicium.* Ideo Dives ille in Evangelio, licet peccator, pœnalibus urgetur ærumnis, ut citius possit evadere. Ergo censuit dæmonum quidem, at non hominum æterna fore supplicia. R. ad I. Nysseni Opera probabilius ab Origenistis fuisse corrupta, ut contendit jam Sæculo VIII. S. Germanus CPolitanus Patriarcha in libro, qui inscribitur, *Retribuens & legitimus*, id est, de vera & legitima retributione, quæ rependitur hominibus prout vixerint. Quem librum laudat Photius in Bibliotheca, Codice CCXXXIII. Stylus quidem & dicendi character idem videtur esse, qui S. Gregorii Nysseni: sed norunt etiam hæretici alterius styllum imitari, ne fraus deprehendatur tam facile. Ad II. R. S. Gregorium Nazianzenum in priori loco improprie & obscure locutum esse, & per baptismum ignis postremum & diuturniorem, intellexisse ignis sempiterni supplicia, qui terrenam & crassam materiam tamquam fœnum comedit, hoc est, crassæ & obscenæ corporis voluptatibus servientes exurit, atque homi-

nes peccato leves & aridos ita excruciat, ut tamen non absumat. In Oratione autem XL. pœnarum tartarearum æternitatem diserte adstruit his verbis: *Omni- bus his formidabilior ignis, cum insomni illo verme conjun- ctus est, nec unquam extinguitur, verum in sceleratorum hominum pœnam perennis est, & sempiternus.* Quod au- tem addit, *Nisi quispiam ignem mitius, atque ut Deo vindice dignum est, intelligendum putet,* non refertur ad æternitatem supplicii, quasi arbitrarium sit asserere, pœnas damnatorum finiendas esse, nec adeo acerbis esse, ut in perpetuum durent: sed ad pœnæ magnitu- dinem & intensionem referendum est, quam si quis no- strorum atrocitati scelerum non adæquari contendat, sed mitiorem intelligi velit, quam criminum immanis magnitudo mereatur; quia Deus vindex justam pœ- nam misericordia & lenitate temperare solet, S. Gre- gorium Nazianzenum repugnantem non habebit. Ad III. R. S. Ambrosius ibi non opponit pœnas, quas ho- mines impii patiuntur in inferno, dæmonum suppliciis quoad durationem; quasi dæmonum quidem pœnas æ- ternas fore existimet, hominum vero impiorum ali- quando finiendos cruciatus: sed opponit pœnas dæmo- num, & hominum peccatorum in genere spectatas, in eo quod homines peccatores quandoque in hac mor- tali vita, vel etiam in futura temporaliter a Deo pu- niantur, pœnis nimirum purgatoriis, idque conse- quantur temporariis hujusmodi suppliciis, ut æterna effugiant. Unde nomine Divitis Evangelici, quem pœ- nalibus ærumnis ait urgeri, ut citius possit evadere, non intelligit Divitem illum epulonem, qui sepultus est in inferno, sed Divitem avarum, de quo Lucæ Cap. XII. dicitur, a Deo ultore de morte sibi immi- nente commonitum fuisse verbis illis, *Stulte, hac nocte animam tuam repetunt a te: quæ autem parasti, cujus erunt?* Quem proinde sic a Deo increpitum S. Ambro- sius existimavit ex eorum esse numero, qui tempora- riis pœnis plectuntur, ut æternas evadant. Quam ob- rem in eo S. Ambrosii loco, XII. Lucæ Caput ad mar- ginem adnotatur.

223. Objic. VIII. Liberatio Trajani ab inferno. S. Gregorius Magnus Trajanum Imperatorem precibus suis ab inferorum poenis liberavit, CD. facile annis post illius mortem. Ergo poenæ damnatorum non sunt æternæ. P. A. I. S. Joannes Damascenus, qui CXXX. annis post tempora B. Gregorii floruit, hujus rei mentionem facit in Oratione de iis, qui in fide dormierunt, additque: quod hoc verum sit, atque ab omni criminatione alienum, totus Oriens Occidensque testatur. II. Idem referunt Paulus Diaconus Monachus Casinensis, & Joannes Diaconus in Vita S. Gregorii, qui citat etiam Anglicanas Ecclesias, in quibus hæc historia legebatur. III. Ecclesia Græca in Euchologio, Cap. XCVI. sic orat: *Quemadmodum Trajanum per intensam servi tui Gregorii Dialogi intercessionem flagro solvisti, exaudi etiam nos te orantes, non pro idolorum cultore, sed pro fideli servo tuo, qui te propter imbecillitatem ad iracundiam provocavit.* IV. In Revelationibus S. Birgittæ Lib. IV. Cap. XIII. dicitur, quod Gregorius oratione sua infidelem Casarem elevarit ad altiorem gradum. V. Narrationem hanc ut certam tenent Hugo Etherianus, Vincentius Bellocensis, S. Thomas, S. Antoninus, S. Vincentius Ferrerius, Gersonius, Salmeron, Benzonius, & Alphonsus Ciaconius in Vindiciis hujus historię, pluresque alii viri docti & pii.

*Liberatio
Trajani
ab infer-
no, est
prorsus
commenti-
tia.*

224. R. I. N. C. Si vera forent, quæ de Trajano dicta modo fuerunt, inferri legitime non posset, poenas damnatorum non esse æternas; sed dicendum foret, Trajanum nondum fuisse damnatum: suspensam a Deo fuisse sententiam, dilatatamque causæ cognitionem; interim vero secundum præsentem suam iniustitiam punitum fuisse apud inferos. R. II. N. A. Præter argumentum negativum, plures assignari possunt rationes positivæ, ob quas narratiuncula hæc ut inane commentum merito ab Eruditis exsufflatur. I. Trajanus, quamvis magna laude Imperio Romano præfuerit, immanissimus fuit Christianæ Religionis hostis, superstitione, ebrietate, ac nefando sodomix scelere infa-

infamis, Dionis Cassii, Xiphilini, aliorumque Scripto-
rum tam Græcorum quam Latinorum confessione. Er-
go omnino incredibile est, Trajanum gravissimorum
criminum reum ab inferis liberatum fuisse. II. In-
credibile est S. Gregorium pro anima Trajani liberan-
da orasse, cum ipse S. Gregorius Lib. VII. Epist.
XV. ad Gregorium Presbyterum, & Theodorum Dia-
conum CPolitanum scripserit: *Hæc itaque pertrahentes
nihil aliud teneatis, nisi quod vera fides per Catholicam
Ecclesiam docet: quia descendens ad inferos Dominus illos
solummodo ab inferni claustris eripuit, quos viventes in cor-
ne per suam gratiam in fide & bona operatione servavit.
Quod enim per Evangelium dicit, Cum exaltatus fuero a
terra, omnia traham ad meipsum, omnia videlicet electa.
Nam trahi ad Deum post mortem non potuit, qui se a Deo
male vivendo separavit.* Et Lib. XXXIV. Moralium, Cap.
XVI. *Ad districti judicis justitiam pertinet, ut nunquam
careant supplicio, quorum mens in hac vita nunquam vo-
luit carere peccato: & nullus detur iniquo terminus ultio-
nis, qui quamdiu valuit, habere noluit terminum criminis.*
Hæc Gregorius cum scripserit, quis adeo imprudens
affirmaverit, tentasse ipsum precibus obtinere, quod
nec a Christo ipso ad inferos descendente factum fuis-
se asseruit, & secus sentire hæreticum esse prædica-
vit? III. Multa alia incredibilia & falsa in narratiun-
cula illa apud Damascenum, Paulum & Joannem Dia-
conos, ac Pseudo-Petrum continentur, v. g. quod S.
Gregorius pro Trajano orans hanc vocem cælitus e-
missam audiverit: *Preces tuas exaudivi: Tu vero post-
hac cave, ne preces mihi pro impiis offeras.* quod Grego-
rio immissa fuerit ægritudo, quia pro anima damnati
orare præsumpsit: quod Gregorius præterea a Deo
petierit, ut nullus Christianus sepeliendus ad S. An-
drea in clivo Scauri, damnetur. Plures, easque ope-
rosiores nugas de Baptismo Trajani invexere sequio-
rum temporum Scriptores. IV. Nulla datur ratio ad-
struendi exceptionem a lege generali, per verbum
Dei scriptum & traditum sufficienter promulgata; se-
cus ul-

eus quilibet damnatus salutem sperare, alique pro ipso orare possent.

225. Ad I. rationem dubitandi R. Orationem illam longe probabilius non esse legitimum S. Damasceni factum, ut Michael Le Quien Dissert. V. ex Damascenicis, Leo Allatius in Diatriba de Scriptis S. Joannis Damasceni, alique viri doctissimi contendunt; tum quia Oratio illa stylo, dictione, methodo atque ingenio discrepat ab aliis Damasceni lucubrationibus! tum quia manifestos contra fidem errorés continet, & doctrinæ S. Damasceni alibi traditæ repugnat. Etenim Lib. II. de Fide Orthodoxa, Cap. IV. *Sciendum*, inquit, *illud hominibus mortem præstare, quod lapsus Angelis. Post lapsum enim nulla ipsis penitentia est, uti nec hominibus post mortem.* Et in Dialogo contra Manichæos, Paragr. LXV. *Sicut Dæmones post lapsum non resipiscunt, neque etiam Angeli nunc peccant, sed utrique hoc habent, ut nulla in ipsos mutatio cadat; sic homines post obitum conversionem nullam admittunt.* Quod si etiam Oratio illa Damasceni esse probaretur, dicendum foret, Damascenum, quamvis alioquin vir Sanctus, doctus ac prudens fuerit, narrationi tamen huic facile nimis fidem habuisse, neque de veritate illius investiganda sollicitum fuisse. Ad II. R. Paulum & Joannem Diaconos, tribus ferme sæculis S. Gregorio posteriores, nullam hac in re fidem mereri. Paulus enim in Vita S. Gregorii, Cap. XXVII. neminem compellat, a quo narrationem hanc acceperit; Joannes vero Lib. II. Cap. XLIV. hæc narrans hæreere plane visus est in falebris, dum nihil habuit, quod ad rem testandam ex Archivo Romano, aut vicinarum Ecclesiarum scriniis adducere posset; sed migrandum ipsi fuit ad Britannos, seu Anglo-Saxones. Immo ipse Joannes Diaconus fatetur, Romæ suo tempore, id est, Sæculo IX. de ea liberatione vehementer dubitari, eoquod S. Gregorius Lib. IV. Dialog. Cap. XLIV. doceat, damnatos ab æternis pœnis liberari amplius non posse. Accedit quod Anastasius Bibliothecarius, Marianus Scotus, Ado Viennensis, ac præcipue Ven.

Beda,

Beda, S. Gregorii M. alias studiosissimus, nullam prorsus hujus rei mentionem faciant. Ad III. R. Græci ex Pseudo-Damasceni Oratione acceptam fabulam in suum Euchologium transtulerunt: cui proinde non major adhibenda est fides, præsertim cum Græca Ecclesia, ex quo a Latina se separavit, in alios errores momenti longe majoris impegit. Ad IV. R. Revelationem illam S. Birgittæ factam, valde obscuram esse, utpote in qua id unum asseritur, Trajanum elevatum esse ad altiorem gradum. Immo contraria est revelationi S. Mathildi factæ, in qua dicitur, *nolle Deum, ut sciant homines, quid ipse statuerit de anima Trajani*. Caterum liceat mihi cum Baronio sentire in Annalibus Eccles. ad Annum Christi DCIV. Num. XLVII. *Veneror quidem, ut par est, Sanctas ipsas, Et colo: Sed de revelationibus ipsis factis, vel potius ipsis adscriptis, ea dumtaxat recipio, quæ Ecclesia recipit: quam scimus non potuisse ista probare, quæ sunt inter se pugnantia*. Ad V. R. Doctos illos viros, quamvis eorum aliqui fuerint sanctitate conspicui, rem hanc plerumque non examinasse, easque ab illis quandoque narratas esse historias, quæ vulgo ferebantur, quæque ad timorem Dei, spem, Religionem, vel pietatem conducere poterant, absque molesto & scrupuloso illarum examine. Caterum discussa nostris temporibus caligine, qua historia prioribus sæculis premebatur, aucthores numero fere infiniti, doctrina & pietate illustrissimi, fabulam hanc communi consensu rejiciunt. Vide Natalem Alexandrum Dissertat. I. in Hist. Eccles. Sæculi II, Antonium Sandini Disputat. Hist. XVI. Ignatium Schwarz in Colleg. Hist. Parte V. Quæst. VII. Sect. II. Gerardum Castel Controversia XXXIII.

Pœna æterna est delicto proportionata.

226. Objic. IX. Ratio. Pœna, quæ peccatoribus post mortem infligitur, debet esse delicto proportionata. Atqui pœna æterna non est peccato gravi proportionata. Ergo non infligitur pœna æterna. P. m. Peccatum est temporaneum, immo sæpe momentaneum. Ergo pœna æterna non est illi proportionata.

Confirm.

Confirm. Ex æterna pœna damnatorum Deus nullam utilitatem potest intendere. Ergo non infligit pœnam æternam. R. D. M. Debet esse delicto proportionata quoad durationem, id est, diuturnitas pœnæ non debet excedere diuturnitatem peccati, N. M. Debet esse proportionata quoad acerbicatem & gravitatem, C. M. Et sic dist. minore, N. C. Ad probat. C. A. N. Conseq. quam manifestæ falsitatis arguunt Sancti Patres. S. Augustinus Lib. XXI. de Civit. Dei, Cap. XI. scribit: *Sic autem quidam eorum, contra quos defendimus Civitatem Dei, injustum putant, ut pro peccatis quamlibet magnis, parvo scilicet tempore perpetratis, pœna quisque damnetur æterna; quasi ullius id unquam justitia legis attendat, ut tanta mora temporis quisque puniatur, quanta mora temporis unde puniretur admisit. Octo genera pœnarum in legibus scribit esse Tullius, damnum, vincula, verbera, talionem, ignominiam, exilium, mortem, servitutem. Quid horum est, quod in breve tempus pro cuiusque peccati celeritate coarctetur, ut tanta vindicetur morula, quanta deprehenditur perpetratum?* S. Gregorius M. Lib. XXXIV. Moralium, Cap. XVI. At, inquiunt, sine fine non debet puniri culpa cum fine: justus nimirum est omnipotens Deus, Et quod non æterno peccato commissum est, æterno non debet puniri tormento. Quibus respondemus, quod recte dicerent, si Judex justus veniens non corda hominum, sed facta pensaret. Iniqui enim ideo tum cum fine deliquerunt, quia cum fine vixerunt; voluissent quippe sine fine vivere, ut sine fine potuissent in iniquitatibus permanere. --- Ad districti ergo Judicis justitiam pertinet, ut numquam careant supplicio, quorum mens in hac vita numquam voluit carere peccato; Et nullus detur iniquo terminus ultionis, qui quamdiu valuit, habere noluit terminum criminis. Ad confirm. N. A. Quamvis damnati æternis pœnis non corrigantur, ut pote a fine ultimo, atque amicitia divina æternum rejecti; absterrentur tamen a sceleribus viventes, exerceturque justitia Dei vindicativa, ac Beati in cælo continuo urgentur ad extollendam divinam misericordiam, gratiasque Deo agendas, cujus ope æterna evaserunt incendia.

ARTICULUS III. DE MERITO, ET BONIS OPERIBUS.

CONTROVERSIA I.

AN HOMO JUSTUS DIVINA GRATIA ADJUTUS,
EFFICERE POSSIT OPERA VERE BONA?

CONTRA LUTHERUM, CALVINUM, ALIOSQUE
PROTESTANTES.

Errores. 227. Nulla dari opera bona, sed omnia etiam iustorum opera peccatis ex natura sua mortalibus esse inquinata asserunt novi Evangelii buccinatores, ut patet ex Luthero in Assertionem Articuli XXXI. XXXII. & XXXVI. Immo in Sermonem de novo Testamento ausus est scribere: *Caveamus a peccatis, sed multo magis a legibus & operibus bonis: tantum attendamus Dei promissionem & fidem.* Et in Sermonem, Sic Deus dilexit mundum &c. Ego dico tibi, quia angusta est via; oportet te fieri tenuem, si vis per eam venire. Cæterum qui operibus onerati sunt, sicut conchilibus onustos videmus Jacobii peregrinos, ii non poterunt penetrare. . . . Si veneris cum magnis saccis operum plenis, deponere oportebit, alioqui non poteris penetrare. Calvinus Lib. III. Institut. Cap. XII. Paragr. IV. Qui serio tamquam sub Dei conspectu de vera iustitiæ regula quærent, illi certo comparent, omnia hominum opera, si sua dignitate censeantur, nihil nisi inquinamenta esse & sordes: & quæ iustitia vulgo habetur, eam apud Deum meram esse iniquitatem; quæ integritas censetur, pollutionem: quæ gloria dicitur, ignominiam. Et in Antidoto Concilii Tridentini Sess. VI. Non sunt tantopere exagitandi, qui dixerunt, bona opera, si exacto rigore censeantur, æterna potius damnatione, quam vitæ præmio digna esse. Philippus Melancthon in Locis Theol. Tit. de Peccato, ait: Consequitur itaque omnia hominum quantumvis laudabilia opera, plane vitiosa esse, & morte digna peccata. Nicolaus Amsdorffius Lutheri discipulus contra Georgium Majorem Theologum Saxonicum librum conscripsit

scripsit cum hac epigraphe: *Opera bona sunt pernicioſa ad ſalutem.* Cæterum non deſunt hodièdum Proteſtantes paulo honeſtiores, quos Majorum ſuorum impudentiſſimæ inſaniæ merito pudet, humaniusque de Bonis Operibus ſentiunt.

228. **Concluſio.** Homo juſtus gratia Dei adjuſtus, poteſt efficere opera vere ac perfecte bona. *Diſti, homo juſtus; injuſti enim, quod charitate deſtituti ſint, poſſunt quidem cum gratia Dei elicere opera vere bona, non tamen perfecte bona. Prob. Concluſio I. Authoritate Scripturarum. Job Cap. I. v. 22. dicitur: In omnibus hiſ non peccavit Job labiis ſuis, neque ſolum aliquid contra Deum locutus eſt. Quin ipſe Deus Cap. II. v. 3. Jobi innocentiam in tantis calamitatibus conſervatam dilaudavit: Vir ſimplex & rectus, ac timens Deum, & recedens a malo, & adhuc retinens innocentiam. Pſal. XVI. Probaſti cor meum, & viſitaſti nocte: igne me examinaſti, & non eſt inventa in me iniquitas. Pſal. VII. Judica me Domine ſecundum juſtitiam meam, & ſecundum innocentiam meam ſuper me. Ergo David credebat, hominem divina gratia adjutum facere poſſe opera vere ac perfecte bona, ſecundum quæ petit judicari. Matth. Cap. V. Sic luceat lux veſtra coram hominibus, ut videant opera veſtra bona, & glorificent Patrem veſtrum, qui in cælis eſt. Ad Ephes. Cap. II. Creati in Chriſto Jeſu in operibus bonis, quæ præparavit Deus ut in illis ambulemus. Ergo non omnia opera ſunt ſecundum ſe peccata. Præterea Scriptura ait opera bona Deo placere. Act. Cap. X. Qui timet eum (Deum nempe) & operatur juſtitiam, acceptus eſt illi. Hortatur homines ad non peccandum. Iſaiæ Cap. I. Quiſcite agere perverſe: diſcite benefacere. I. ad Cor. Cap. XV. Evigilate juſti, & nolite peccare. I. Joan. Cap. II. Hæc ſcribo vobis, ut non peccetis. Atqui nihil Deo placere poteſt peccato infectum: neque peccata vitari poſſent, ſiquidem omnia opera eiſent peccatis inquinata, & mala. Ergo aliqua opera, viribus gratiæ nimirum elicitæ, ſunt vere ac perfecte bona.*

Juſtos efficiere poſſe opera vere bona, docent Scriptura

Patres. 229. Prob. II. Autoritate Patrum. S. Ambrosius Lib. de Apologia David, Cap. VI. *Etenim, ait, quia non potest sine peccato esse humana fragilitas, cavendum est, ne plura peccata sint, quam opera virtutum.* Frustra vero S. Doctor distingueret opera virtutum a peccatis, si omnia opera, quantumvis bona, essent vere peccata. S. Hieronymus Lib. III. adversus Pelagianos: *Qui cantus est & timidus, potest vitare peccata.* Et Comment. in Matth. Cap. XXII. *Vestis nuptialis præcepta sunt Domini, & opera quæ complentur ex lege & Evangelio, novique hominis efficiunt vestimentum.* At vero quis dicet vestem nuptialem obtineri peccatis? S. Chrysostomus Serm. in B. Job & Abraham: *Dives erat Job ex benedictionibus, utebaturque pro necessitate divitiis, ita ut satiendo pauperes, dæmonem mirum in modum contristaret; bona enim opera humana plagæ & vulnera sunt dæmonibus.* Atqui si bona opera sunt peccata, certe non essent plagæ & vulnera dæmonum. Plures textus Patrum exhibebimus Controversia sequente, ubi ostendemus, bona opera esse meritoria æternæ beatitudinis.

Tridentinum. 230. Prob. III. Autoritate Tridentini Sess. VI. Can. XXV. de Justificatione, definientis: *Siquis in quolibet bono opere iustum saltem venialiter peccare dixerit, aut, quod intolerabilius est, mortaliter, atque ideo pœnas æternas mereri; tantumque ob id non damnari, quia Deus ea opera non imputet ad damnationem; anathema sit.*

Ostendit sana ratio 231. Prob. IV. Ratione. Si omnia opera justorum essent peccato vitata, id oriretur vel ex concupiscentia, vel ex defectu charitatis, vel ob admixtionem peccatorum. Atqui ex nullo capite oritur. Ergo. P. m. Concupiscentia, nisi ei consentiatur, non est peccatum, sed infirmitas, ut diximus Num. 41. & seq. Charitas justorum, quamvis comparata ad charitatem Beatorum sit imperfecta, tamen in se absolute perfecta dici potest: peccata vero venialia neque impediunt veram justitiam, ut ostendimus Num. 170. neque semper operibus nostris immiscentur; cum non in omnibus, sed in multis, teste B. Jacobo, offendamus.

232. Prob. V. Ex sequelis sane absurdissimis. Si enim omnia opera ex natura sua sunt peccata, sequeretur I. hominem, quando justificatur per fidem, hoc ipso justificari per peccatum, quia fides est opus iustorum. II. Justos non debere credere quæ a Deo sunt revelata; nam omnia opera peccaminosa lege æterna Dei prohibentur. III. Homines tunc etiam peccare, quando Deum rogant dimitti sibi sua debita, sive peccata. IV. Deum intendere, præcipere & mandare ut fiant peccata: intendit enim, præcipit, & mandat, ut fiant opera quædam bona. V. Opera bona fugienda esse, quia fugienda sunt peccata: ac viceversa aliqua peccata mortalia facienda esse, quia facienda sunt quædam opera bona. VI. Sanctos omnes per sua bona opera, ac Martyres acerbissima quæque pro Christo tolerando, de se æterna inferorum supplicia promeritos fuisse; solique clementiæ divinæ imputandum esse, quod inferni pœnæ illis non fuerint irrogatæ. At quæso, quid hac doctrina amentius, quid impudentius exogitari potest?

Ac Sequela evincunt.

Argumenta contraria refutantur.

233. Objic. I. Autoritas Scripturarum. Psal. CXLII. dicitur: *Non intres in iudicium cum servo tuo, quia non justificabitur in conspectu tuo omnis vivens.* II. Ecclesiasticis Cap. VII. v. 21. *Non est enim homo iustus in terra, qui faciat bonum, & non peccet.* III. Isaia Cap. LXIV. *Facti sumus ut immundus omnes nos, & quasi pannus menstruata universa iustitiæ nostræ.* Ergo omnia opera nostra sunt peccata. R. ad I. triplicem huius loci expositionem apud Patres inveniri, Protestantium doctrinæ minime faventem. Prima est S. Augustini Enarratione in Psal. CXLII. dicentis, hominem ex se vere nihil habere, quo justificetur; sed solum ex gratia Dei, ex qua etiam habet, quod bene possit operari. Secunda est S. Hieronymi in Epist. ad Ctesiphontem, S. Augustini Lib. de Perfectione iustitiæ, & S. Gregorii M. in Psal. cit. qui

Protestantes frustra se tuentur Scripturis

putant

putant Davidem loqui de venialibus, sine quibus in hac vita esse non possumus. Non autem sequitur, omnia nostra opera peccatis inquinari, etiamsi longiori tempore absque omni peccato vivere nequeamus. Miscentur enim aliquando operibus bonis opera quædam mala, quæ tametsi levia & quotidiana sint, tamen in iudicio Dei non injuste puniuntur. Tertia est S. Hilarii, S. Hieronymi, Arnobii, Euthymii in Psal. cit., qui dicunt non posse hominem justificari, si iustitia illius conferatur cum iustitia Dei, cujus tanta est sublimitas ac perfectio, ut omnis hominum & Angelorum iustitia cum ea comparata, injustitia esse videatur. Ad II. R. sensum esse, quod nullus tam constanter bene operetur, quin subinde veniale committat peccatum. Ad III. R. Isaiam non loqui de bonis operibus justorum, sed de fictis iustitiis Judæorum, de eorum sacrificiis & neomeniis, aliisque operibus ad cultum divinum institutis, in quibus illi præcipue iustitiam constituebant, de agenda pœnitentia nihil solliciti, sed scelera sceleribus cumulantes. Hinc eorum opera panno menstruata a Propheta merito comparantur: atque idcirco Civitas Jerosolymitana eversa est a Nabuchodonosore Chaldæorum Rege, & populus Judæicus Babylonem in captivitatem abstractus fuit. Vide Bellarminum Lib. IV. de Justificatione, Cap. XX.

234. Dices cum Luthero. Matth. Cap. VI. omnibus præscribitur orandi forma, quam quotidie usurpamus: *Sanctificetur nomen tuum - fiat voluntas tua. - Et dimitte nobis debita nostra.* Ergo in omni opere nostro peccamus. P. C. Petimus quod non habemus. Ergo si petimus sanctificari nomen Dei, & dimitti nobis peccata, semper inhonoramus nomen Dei, repugnamus in omni opere voluntati Dei, & peccamus. R. I. Christus non jubet nos in oratione petere quæ numquam sumus impetraturi. Ergo per orationem possumus a Deo obtinere, ut sanctificemus nomen ejus, divinamque ipsius voluntatem impleamus. R. II. C. A. N. C. Ad probat. N. A. Peccatores petunt quod non habent, just

justi vero petunt conservationem & incrementum ejus, quod habent.

235. Objic. II. *Authoritas Patrum.* S. Hierony-
mus Dial. I. adversus Pelagianos, scribit: *Tunc ergo
justi sumus, quando nos peccatores fatemur, & justitia no-
stra non ex proprio merito, sed ex Dei consistit miseri-
cordia.* S. Augustinus Lib. de Perfectione justitiæ,
Cap. VI. in Responsione XV. ait: *Peccatum est, cum vel
non est charitas quæ esse debet, vel minor est quam debet.*
Atqui in nobis semper est peccatum. Et Lib. III. con-
tra duas Epistolas Pelagianorum, Cap. VII. *Ex hoc fa-
ctum est, virtutem, quæ nunc est in homine justo, perfe-
ctam hætenus nominari, ut ad ejus perfectionem pertineat
etiam ipsius imperfectionis & in veritate cognitio, & in
humilitate confessio.* III. S. Gregorius M. Lib. IX. Mo-
ralium, Cap. XIV. *Omnis humana justitia, injustitia esse
convincitur, si districte judicetur.* Prece ergo post justiti-
am indiget, ut quæ succumbere discussa poterat, ex sola
Judicis pietate convalescat. Et Lib. XXXV. Morali-
um, Cap. ult. *Si autem de his divinitus districte discutimur,
quis inter ista remanet salutis locus, quando & mala no-
stra pura mala sunt, & bona quæ nos habere credimus,
pura bona esse nequaquam possunt.* IV. S. Bernardus
Serm. V. de verbis Isaïæ: *Nostra, si qua est, humilis
justitia, recta forsitan, sed non pura, nisi forte meliores
nos esse credimus, quam patres nostros, qui non minus
veraciter quam humiliter dicebant: Omnes justitiæ nostræ
tamquam pannus menstruatus mulieris. Quomodo enim pura
justitia, ubi non potest adhuc culpa deesse?* R. ad I. Hæc
jure a S. Hieronymo dici. Cum enim tota vivendi ra-
tio, qua homo denominatur justus, admixta habeat
multa peccata venialia, justus indigent Dei misericor-
dia, & ad pœnitentiæ remedia semper confugere de-
bent: & quidquid boni faciunt, non sine gratia & au-
xilio Dei faciunt. Ad II. R. Imperfectionem charita-
tis Augustinus vocat peccatum, non stricte, sed lar-
go modo. Libro enim de Spiritu & littera, Cap.
XXXVI. scribit: *Neque enim si esse nondum potest tanta*
dile-

dilectio Dei, quanta illi cognitioni plenæ perfectæque debetur, jam culpæ deputandum est. Aliud est enim totam nondum assequi charitatem, aliud nullam sequi cupiditatem. Altero vero loco ex Lib. III. contra duas Epistolas Pelagianorum, vult S. Doctor, justitiam in hac vita imperfectam esse, si comparetur cum justitia vitæ beatæ: & hujus imperfectionis cognitionem & confessionem hoc tempore non parum esse necessariam, ne quis existimet esse, quod vere non est, atque ita seipsum seducat. Ad III. R. Sensum prioris loci esse hunc: Omnis humana justitia est injustitia, si judicetur remotis beneficiis Dei, secundum ea quæ homo habet ex se. Posteriori loco S. Gregorius non dicit, omnia bona opera nostra esse impura, sed non omnia posse esse pura; quia fieri non potest, ut non aliquando subrepat aliquid, quo bona aliqua opera vitentur. Ad IV. R. Quamvis S. Bernardus paulo aliter locum illum Isaia de panno menstruata explicet, ac alii Patres, in re tamen non dissentit a cæteris. Triplicem itaque l. c. justitiam distinguit. In Angelis beatis ponit justitiam rectam, puram & firmam: in primis nostris parentibus, antequam peccarent, dicit fuisse justitiam rectam & puram, sed non firmam: Denique in nobis dicit esse posse justitiam rectam, quia possumus peccato non consentire; sed neque puram, neque firmam. Non puram; quia nemo nostrum est, qui non peccaverit in Adamo, & qui non aliquando saltem venialiter peccet: non firmam; quoniam nemo est, qui eam non possit amittere. Adde, quod Sermones illi in Isaiam non sint genuinum S. Bernardi opus, sed B. Aelredi Angli, Ord. Cisterc. Abbatis Rievallensis.

*Ac ratio-
ne.*

236. Objic. III. Ratio. Omnia opera nostra sunt imperfecta, vanitate, prava intentione, mentis evagatione, ac negligentia inquinata. Ergo placere Deo nequaquam possunt. Ergo quando in Scripturis dicitur opera nostra Deo placere, id non intelligendum est de operibus nostris secundum se, sed propter dignitatem Christi, qui has imperfectiones fidelium merito suo tegit. R. D. A. Omnia opera nostra sunt imperfecta

fecta negative, id est, possent absolute esse perfectiora, C. A. Sunt imperfecta positive, id est, sunt semper peccato vitata, & contra legem Dei prohibentem, N. A. Sape eliciuntur ab homine opera ab omni peccato depurata, ut in Conclusionem ostendimus auctoritate Scripturarum & Patrum. Profecto fieri nequit, ut vel ratione sui, vel ratione Christi ea tegentis, peccata Deo placeant, quemadmodum opera bona Deo placere asserunt Scripturæ & Patres.

CONTROVERSIA II.

AN BONA OPERA JUSTORUM, VIRIBUS GRATIÆ
ELICITA, MERENTUR BEATITUDINEM
ÆTERNAM ?

CONTRA PROTESTANTES, ET QUESNELLUM.

237. Meritum supernaturale definitur esse obsequium Deo libere exhibitum, ex se potens movere ad retributionem præmii supernaturalis. Dividitur in meritum de condigno, & de congruo. Meritum de *condigno* est illud, quod spectatis omnibus, nempe præstantia operis, dignitate operantis, & munificentia præmiantis, habet cum præmio æqualitatem moralem, si-
Quid sit meritum de condigno, & de congruo?
ve secundum rectam æstimationem, ita ut præmium ei debeatur, si non ex rigurosa justitia, saltem ex fidelitate in servandis promissis, ideoque ex justitia late dicta. Tale juxta communissimam ac veram Catholicorum sententiam est opus bonum hominis justī, quod propter præstantiam suam, quam trahit ex dignitate filii adoptivi Dei, a liberalissimo Domino meretur de condigno gratiæ & gloriæ augmentum. Meritum *de congruo* est opus, quod suo valore non adæquat quidem æstimationem præmii, habet tamen congruentiam ad illud, ita nempe ut licet ob hujus meriti dignitatem & æstimabilitatem præmians possit moveri ad dandum præmium, hoc tamen potius detur ex liberalitate præmiantis, quam ex valore & dignitate operis. Tale censetur esse contritio perfecta in peccatore, respectu justificationis.

Quid re-
quiratur
ad meri-
tum de
condigno?

238. Ad meritum de condigno vitæ æternæ neces-
sario requiruntur quædam ex parte Dei præmiantis,
quædam ex parte hominis operantis, atque ex parte
operis. Ex parte Dei præmiantis ad meritum de con-
digno requiritur promissio mercedis. Ratio est, quia
actus meritorius de se non obligat Deum ad conferen-
dam præmium; cum Deus omnia creaturarum obsequia
titulo supremi dominii potiori jure possit exigere,
quam Domini a suis mancipiis. Ergo nulli creaturæ
debitor fieri potest, nisi ipse voluerit, promittendo
mercedem sub conditione talium operum mercedi ali-
quo modo æqualium. Hinc S. Augustinus Serm.
CLVIII, alias XVI. de verbis Apostoli, ait: *Debitor
factus est, (nobis Deus) non aliquid a nobis accipiendo,
sed quod ei placuit promittendo.* Ex parte hominis, seu
operantis requiritur I. status viatoris; Deus enim hu-
jus mortalis vitæ spatium nobis constituit ad operan-
dam salutem nostram; illam bonis operibus promeren-
do, juxta illud Apostoli ad Galatas Cap. VI. *Dum
tempus habemus, operemur bonum.* II. requiritur status
gratiæ. Constitutus enim in peccato mortali, est pal-
mes a vitæ succisus, reus æternæ mortis: filius dia-
boli. Ergo nequit ferre fructus justitiæ, hoc est,
opera vitæ æternæ exercere. Ex parte operis requi-
ritur I. ut sit supernaturale; *Cum ille ipse Christus Je-
sus, ut ajunt Tridentini Patres Sess. VI. Cap. XVI.
tamquam caput in membra, & vitis in palmites, in ipsos
justificatos jugiter virtutem influat, quæ virtus bona eorum
opera semper antecedit, & comitatur, & subsequitur, &
sine qua nullo pacto Deo grata & meritoria esse possent.*
Ratio est, quia debet dari proportio aliqua & æquali-
tas inter opus & mercedem, inter meritum & præmi-
um. Atqui nulla est proportio inter opus naturale,
moraliter solummodo bonum, & beatitudinem æter-
nam, quæ omnem ordinem creatum excedit. Ut vero
actus sit supernaturalis, duo requiruntur, objectum
nimirum, seu finis supernaturaliter movens, quia om-
nis actus speciem & essentiam desumit ab objecto mo-
vente: & principium supernaturale, seu gratia, non
habi-

habitualis modo & sanctificans, verum etiam actualis. II. Ut opus sit liberum libertate indifferentiæ; quia ut S. Hieronymus ait Lib. II. contra Jovinianum, *Nec ad vitia, nec ad virtutes necessitate trahimur: alioquin ubi necessitas, nec corona, nec damnatio est.* III. Opus debet esse moraliter bonum, & honestum positive; quia ut opus aliquod sit apud Deum meritorium, debet habere erga illum rationem obsequii. Atqui hanc rationem erga Deum habere nequit, nisi ei gratum sit & acceptum: quale profecto esse non potest, nisi sit positive honestum.

239. Ad meritum *de congruo* quatuor requiruntur conditiones. Ima est, ut opus sit supernaturale, ac viribus gratiæ actualis elicitum. Si enim ex folis naturæ viribus sit factum, nec est, nec esse potest de congruo meritorium præmii supernaturalis. II. Ut opus sit bonum, & positive honestum. III. Ut opus illud libere eliciatur. IV. Et quidem ab homine viatore. Quod vero spectat reliquas duas conditiones ad meritum de condigno necessarias, nempe statum gratiæ sanctificantis in operante, & promissionem in præmiante, absolute non requiruntur ad quodlibet meritum de congruo; quia illud fundatur præcise in motione Spiritus Sancti, & in bonitate operis proportionata beneficio accipiendi. Quamvis autem non requirantur, aliquando tamen alterutra illarum intervenit. Sic in homine justo bona opera per gratiam facta, sunt tantum meritoria de congruo perseverantiæ finalis in gratia; licet enim cum illa moralem habeant æqualitatem, nulla tamen datur ex parte Dei finalis perseverantiæ promissio. Et in homine peccatore contritio charitate perfecta, est tantum de congruo meritoria primæ gratiæ sanctificantis; quia quamvis ex parte Dei promissionem illius habeat, propter defectum tamen dignitatis in persona operante non habet moralem æqualitatem cum prima gratia sanctificante, sed solum proportionem quamdam & congruitatem, vi cuius Deum decet hominem perfecte contritum justificare.

Quid ad meritum de congruo?

Quid ca-
dat sub
meritum
de condi-
gno, et de
congruo?

240. Juxta communissimam ac veram Catholicorum Theologorum doctrinam, sub meritum *de condigno* cadunt I. æterna beatitudo II. Augmentum gratiæ sanctificantis. III. Juxta plurimos, etiam primus gradus gloriæ, qui obtineri potest duplici titulo, nempe hæreditatis debitæ filiis adoptionis, & mercedis propter bona opera. Sub meritum *de congruo* cadit prima gratia sanctificans, & quidem infallibiliter, respectu adultorum qui perfecte conteruntur; quia attenta misericordia & promissione Dei, perfecta contritio habet congruitatem quamdam cum gratia sanctificante, ut Deus peccata illi remittat, qui peccata summe detestatur propter Deum super omnia propter se amatum: & contritioni perfectæ a Deo promissa est gratia sanctificans.

Quid non
cadat sub
meritum
de condi-
gno?

241. Contrà, sub meritum *de condigno* cadere non potest prima gratia sanctificans. Ad Rom. enim Cap. III. dicitur: *Justificati gratis per gratiam ipsius*. Si gratis autem justificamur, quomodo de condigno mereri possumus causam formalem nostræ justificationis? Et S. Augustinus Epist. CXCIV. alias CV. ad Sixtum ait: *Nullane sunt merita justorum? Sunt plane, quia justii sunt. Sed ut justii fierent, merita non fuerunt. Justii enim factii sunt, cum justificati sunt: sed sicut dicit Apostolus, Justificati gratis per gratiam ipsius*. Accedit autoritas Tridentini Sess. VI. Cap. VIII. *Gratis autem justificati ideo dicimur, quia nihil eorum, quæ justificationem præcedunt, sive fides, sive opera, ipsam justificationis gratiam promeretur*. Et manifesta ratio suffragatur. Moralis enim illa æqualitas operum supernaturalium cum prima gratia sanctificante petitur maxime ex eo, quod fiant ab homine Dei amico, & filio adoptivo: amicus autem & filius adoptivus Dei constituitur homo consequenter ad infusionem primæ gratiæ sanctificantis.

242. II^{do}. Homo, etsi justus, nec sibi nec alteri de condigno mereri potest donum finalis perseverantiæ, aut ullam gratiam efficacem actualem. Deus enim noluit finalem perseverantiam, aut efficacem gratiam actualem supponere meritis, proponendo illas ut mercedem

cedem retribuendam bonis operibus, etiam in statu iustitiæ factis ex auxilio gratiæ supernaturalis; sed voluit eas a pura sua liberalitate ac misericordia dependere, ita ut quibus conceduntur, ex pura liberalitate ac misericordia concedantur, etiam iustis & Sanctis. Assertio hæc fundatur in ipsis Scripturis. I. ad Cor. Cap. X. dicitur: *Qui se existimat stare, videat ne cadat.* Ad Philippenses Cap. II. *Cum metu & tremore vestram solutem operamini: Deus est enim qui operatur in vobis & velle & perficere, pro bona voluntate.* Quæ verba significant, & finalem perseverantiam, & gratias efficaces a solo Dei beneplacito pendere. S. Augustinus Lib. de Dono perseverantiæ, Cap. IX. ait: *Ex duobus piis, cur huic donetur perseverantia usque in finem, illi autem non donetur; inscrutabilia sunt judicia Dei.* Et Cap. XIII. *Unde satis dilucide ostenditur, & inchoandi, & usque in finem perseverandi gratiam Dei, non secundum merita nostra dari; sed dari secundum ipsius secretissimam, eandemque iustissimam, sapientissimam, beneficentissimam voluntatem.* Dixi, neminem promereri posse finalem perseverantiam, ac gratiam actualement efficacem *de condigno*: non enim negamus, quod justus possit illa promereri *de congruo* non habente infallibiliter effectum, juxta illud S. Augustini Lib. de Dono Persev. Cap. VI. *Hoc Dei donum suppliciter emereri potest.* Porro meritum *de congruo* non habens infallibiliter effectum dicitur illud, cui retributio a Deo non est promissa, ita ut Deus neque titulo iustitiæ, neque titulo fidelitatis, teneatur mercedem illam retribuere.

243. III^{to}. Justus reparationem post lapsum neque *de condigno*, neque *de congruo* infallibiliter meretur per bona opera supernaturalia, facta in statu iustitiæ. Ratio est, quia justus neque *de condigno*, neque *de congruo* infallibiliter meretur auxilia gratiæ efficacia ad non peccandum. Ergo multo minus mereri potest reparationem gratiæ sanctificantis post lapsum; plus enim est illam restitui, quam conservari.

244. IV^{to}. Adulti, qui justificantur, non merentur de condigno primam gratiam actualem; immo nequidem merentur eam de congruo. Prob. assertio I. Authoritate Scripturæ. Ad Rom. Cap. III. ait Apostolus: *Justificati gratis per gratiam ipsius*. Et Cap. XI. *Si autem gratia, jam non ex operibus: alioquin gratia jam non est gratia*. II. Authoritate S. Augustini, aliorumque Patrum adversus Pelagianos & Semipelagianos. III. Authoritate Conciliorum. Arausicanum II. Cap. XVIII. ait: *Debetur merces bonis operibus, si fiant: sed gratia, quæ non debetur, præcedit ut fiant*. Similia habet Tridentinum Sess. VI. Cap. V. IV. Ratione Theologica. Principium meriti non cadit sub meritum. Sed prima gratia actualis est principium meriti. Ergo. Præterea homo solis naturæ viribus nihil potest, quod conducat ad æternam salutem. Ergo nullo actu naturali mereri potest sive de condigno sive de congruo primam gratiam actualem.

*Errores
circa me-
ritum.*

245. Ut ad quæstionem hac Controversia propositam propius accedamus, Lutherus negavit dari opera verè bona, ac meritoria æternæ beatitudinis, eoquod illa mera sint peccata, apta potius de se ad provocandam Dei iracundiam. Calvinus Lib. III. Institut. Cap. XV. veteres Patres pessime ait consuluisse fidei sinceritati, dum usi sunt vocabulis meriti & mercedis: sicque haud tacite fatetur, doctrinam suam Patrum traditioni esse contrariam. Sectatores Lutheri: Philippus Melancthon in Confessione Augustana, & in Apologia Art. XX., Brentius in Confess. Würtembergensi, Cap. de Bonis operibus, Kemnitius in Exam. Conc. Tridentini ad finem Sess. VI, alique passim admittunt, opera bona justorum meritoria esse, non quidem ipsius vitæ ac salutis æternæ, ad quam juxta ipsos per solam fidem perveniri potest; sed alicujus præmii temporalis, aut etiam spiritualis: idque non ex dignitate operum, quæ secundum ipsos sunt vera peccata; sed ex indulgentia Dei, tegentis eorum fæditatem. Protestantium errorem renovavit Paschasius Quesnellus propositione LXIX. inter damnatas a Clemente XI.

in Bulla Unigenitus. *Fides, usus, augmentum, & præmium fidei, totum est donum puræ liberalitatis Dei.*

246. Conclusio. Opera bona Justorum, viribus gratiæ supernaturalis elicitæ, merentur beatitudinem æternam. Prob. I. Autoritate Scripturarum. Gen. Cap. XV. ait Deus ad Abraham: *Ego protector tuus sum, & merces tua magna nimis.* Proverb. Cap. XI. dicitur: *Seminanti justitiam merces fidelis.* Sap. Cap. V. *Iusti autem in perpetuum vivent, & apud Dominum est merces eorum.* Matth. Cap. V. *Merces vestra copiosa est in cælis.* I. ad Cor. Cap. III. *Unusquisque propriam mercedem accipiet.* II. ad Cor. Cap. IV. *Quod in præsentem est momentaneum, & leve tribulationis nostræ, supra modum in sublimitate æternæ gloriæ pondus operatur in vobis.* Ad Rom. Cap. II. *Qui (Deus) reddet unicuique secundum opera ejus: iis quidem, qui secundum patientiam boni operis, gloriam & honorem, & incorruptionem quærant, vitam æternam.* II. ad Timoth. Cap. IV. *Bonum certamen certavi, cursum consummavi, fidem servavi. In reliquo reposita est mihi corona justitiæ, quam reddet mihi Dominus in illa die iustus iudex: non solum autem mihi, sed & iis qui diligunt adventum ejus.*

Opera bona. Testorum mercedem æternam docent Scripturæ.

247. Prob. II. Autoritate Patrum. S. Ignatius *Patres.* Martyr in Epist. ad Rom. scribit: *Sinite me ut bestiarum esca sim, per quam possim Deum promereri.* S. Justinus Apologia II. *Homines, qui dignos se Dei voluntate & consilio operibus præstiterint, cum eo victuros esse meritis suis sumpsimus, ac regnatos.* S. Cyprianus Lib. de Unitate Ecclesiæ, Cap. X. *Justitia opus est, ut quis promereri possit Deum: præceptis ejus & monitis est obtemperandum, ut accipiant merita nostra mercedem.* S. Hilarius Can. V. in Matth. *Regnum Dei vitæ nostræ stipendiis quæramus. Et hæc recte perfecteque viventium merces est.* Et Canone VI. *De nostro est beata illa æternitas promerenda, præstandumque est aliquid ex proprio.* S. Basilius Orat. in initium Proverbiorum. *Omnes qui viam Evangelicam incedimus, mercatores sumus per opera mandatorum nobis possessionem cælestium comparantes.*

S. Gre-

S. Gregorius Nazianz. Orat. XL. in S. Baptisma: *Crede resurrectionem, iudicium, mercedem ad justam Dei lancem exigendam.* S. Gregorius Nyssenus Orat. I. de amandis pauperibus. *Denique pro suis quemque meritis ornatum cerno. Illis, qui boni benignique fuerint, summa & perpetua requies tribuitur in regno cœlorum; inhumanis autem & improbis supplicium ignis, idque sempiternum.* S. Ambrosius Lib. I. de Offic. Cap. XV. *Nonne evidens est, meritorum aut præmia aut supplicia post mortem manere?* S. Hieronymus Lib. II. adv. Jovinianum: *Jam nostri laboris est, pro diversitate virtutum diversa nobis præmia præparare.* S. Paulinus Epist. XXIX. ad Victricium: *Tuarum tibi præmia se debere virtutum, Iudex justus agnoscet.* S. Augustinus Epist. CXCIV. alias CV. ad Sixtum: *Sicut merito peccati tamquam stipendium redditur mors: ita merito justitiæ tamquam stipendium vita æterna.* Et Lib. de Moribus Ecclesiæ, Cap. XXV. *Vita æterna est tantum præmium, cujus promissione gaudemus: nec præmium potest præcedere merita, priusque homini dari quam dignus est. Quid enim hoc injustius, & quid justius Deo? Non ergo debemus postcere præmium antequam mereamur accipere.* S. Gregorius M. Lib. IV. Moral. Cap. XLII. *Quia in hac vita nobis est discretio operum, erit in illa procul dubio discretio dignitatum; ut quo hic alius alium merito superat, illic alius alium retributione transcendat.* S. Bernardus Serm. LXVIII. in Cant. *Merita habere cures; habita data novis. Perniciosa paupertas, penuria meritorum.* Ex his colliges, quam impudenter Martinus Bucerus in Actis Colloquii Ratisbonensis mentitus fuerit, negans Scripturam, vel Patres nomine meriti usos fuisse; vel si hoc nomine usi sunt, duram esse in ea voce catachresim, seu abusum vocabulorum.

Et Concilia.

248. Prob. III. Autoritate Conciliorum. Africanum II. Cap. XVIII. ait: *Debetur merces bonis operibus, si fiant; sed gratia quæ non debetur, præcedit ut fiant.* Atqui merces bonis operibus debita, non est donum puræ liberalitatis Dei. Lateranense IV. Cap.

Fir.

Firmiter, de Summa Trinitate & fide Catholica: *Non solum Virgines & continentes, verum etiam conjugatæ per rectam fidem & operationem bonam placentes Deo, ad æternam merentur beatitudinem pervenire.* Florentinum in Decreto fidei Sefs. ultima definivit, animas Sanctorum plene purgatas in cælum mox recipi, & intueri clare ipsum Deum trinum & unum, sicuti est, pro meritorum tamen diversitate, alium alio perfectius. Tridentinum Sefs. VI. Can. XXXII. *Siquis dixerit, hominis justificati bona opera ita esse dona Dei, ut non sint etiam bona ipsius justificati merita; aut, ipsum justificatum bonis operibus, quæ ab eo per Dei gratiam, & Jesu Christi meritum, cujus vivum membrum est, fiunt, non vere mereri augmentum gratiæ, vitam æternam, & ipsius vitæ æternæ, si tamen in gratia decesserit, consecutionem, atque etiam gloriæ augmentum; anathema sit.*

249. Quæres I. An justi bonis operibus æternam beatitudinem de condigno mereantur, an tantum de congruo? R. merentur de condigno. Ita communissima Theologorum contra Durandum, & Ariminensem. Prob. assertio. Ex una parte Deus tenetur ex justitia saltem late tali operibus bonis justorum vitam æternam retribuere: ex altera parte opera bona justorum habent cum æterna beatitudine æqualitatem moralem. Ergo justi merentur illam de condigno. Prob. I. pars Anteced. II. ad Timoth. Cap. IV. dicitur: *Reposita est mihi corona justitiæ, quam reddet mihi Dominus in illa die justus judex.* Ad Hebr. Cap. VI. *Non enim injustus Deus, ut obliviscatur operis vestri.* S. Augustinus Lib. de Nat. & Gratia, Cap. II. *Non enim injustus Deus, qui justos fraudet mercede justitiæ.* Et Lib. IV. contra Julianum, Cap. III. *Deus namque ipse, quod absit, erit injustus, si ad ejus regnum verus non admittatur justus.* Dixi, ex justitia saltem late tali, id est, ex fidelitate, quia præmium æternum promisit sub conditione bonorum operum, ut omnes Catholici tenent. Prob. etiam altera pars Anteced. Opera bona hominis justi viribus gratiæ elicitæ, sunt opera filii Dei adoptivi, & dignifican-

*Et quidem
de condigno.*

ficantur a gratia, quæ est semen gloriæ. Ergo opera bona justorum habent moralem æqualitatem cum præmio.

*Fiducia
potest ex
bonis me-
ritis nasci.*

250. Quæres II. An fiducia, quam justi in Deo constituunt, non ex fide sola, sed etiam ex bonis meritis nascatur? R. contra Protestantes affirmative. Prob. assertio I. Autoritate Scripturarum. Tobia Cap. IV. dicitur: *Fiducia magna erit coram summo Deo eleemosyna omnibus facientibus eam.* I. ad Timoth. Cap. III. Qui bene ministraverint, gradum bonum sibi acquirunt, Et multam fiduciam. I. Joannis Cap. III. Si cor nostrum non reprehenderit nos, fiduciam habemus ad Deum. Ad Rom. Cap. V. Tribulatio patientiam operatur, patientia autem probationem, probatio vero spem. Prob. II. Autoritate Patrum. S. Cyprianus Serm. de Eleemosyna: *Præclara, Et divina res, fratres charissimi, salutaris operatio, solatium grande credentium, securitatis nostræ salubre præsidium, munimentum spei, tutela fidei, medela peccati.* S. Chrysost. Hom. II. in Epist. II. ad Cor. Optamus, ut ex beneficiis habeamus fiduciam. S. Augustinus Enarratione II. in Psal. XXXI. Ille sperat, qui bonam conscientiam gerit: quem vero pungit mala conscientia retrahit se a spe, Et non sibi sperat, nisi damnationem. Ut ergo speret regnum, habeat bonam conscientiam; Et ut habeat bonam conscientiam, credat, Et operetur. Prob. III. Ratione. Ex bonis operibus nascitur bona conscientia, sicut ex malis mala. Atqui ex bona conscientia fiducia. Ergo.

*Potestque
fiducia a-
liqua poni
in pro-
priis me-
ritis.*

251. Quæres III. Utrum liceat fiduciam aliquam ponere in propriis meritis? R. absolute fiducia potest in operibus vere bonis poni; tutius tamen tota fiducia in sola Dei misericordia & benignitate reponitur. Prob. I. pars assertionis, I. Autoritate Scripturarum. Psal. XVII. dicitur: *Et retribuet mihi Dominus secundum iustitiam meam, --- quia custodivi vias Domini.* Isaia Cap. XXXVIII. ait Ezechias Rex: *Obsecro Domine, memento quæso quomodo ambulaverim coram te in veritate, Et in corde perfecto, Et quod bonum est in oculis tuis fecerim.* II.

ad

ad Timoth. Cap. IV. *Bonum certamen certavi, cursum consummavi, fidem servavi. In reliquo reposita est mihi corona iustitiæ.* II. Exemplis Sanctorum, S. Hilario-
nis apud Hieronymum in Vita illius: *Egredere ani-
ma mea, egredere, quid times? Septuaginta prope annis
servisti Christo, & mortem times?* Ac S. Martini Tu-
ronici apud Sulpitium Severum in Vita, qui in
agone constitutus, demonem his verbis alloquebatur:
*Quid hic adstas cruenta bestia? Nihil in me funeste repe-
ries. Abrahæ me sinus excipiet.* III. Ratione. Licet con-
fidere in omni vera causa salutis. Atqui bona merita
sunt vera causa salutis, ut suo loco a nobis ostende-
tur. Ergo licet in illis confidere, atque aliquam fidu-
ciam reponere; sine ambitione tamen & superbia.

252. Prob. etiam altera pars assertionis. Ex una *Quamvis
tutus in
sola Dei
misericor-
dia repo-
natur.*
parte nemo absque revelatione scire potest certo se
habere vera merita, atque in eis usque ad finem se
perseveraturum: ex altera parte facile est, nos idcir-
co superbia inflari, aliosque contemnere. Ergo tutis-
simum est plurima quidem pro Deo operari, attamen
in sola Dei misericordia totam fiduciam reponere. Vel
enim homo habet merita, vel non habet: si non ha-
bet; seipsum seducit, confidendo in falsis meritis: si
habet; in solo Deo confidendo nullam facit merito-
rum jacturam, quæ Deus in numerato habet, suo tem-
pore largissime remuneraturus. Patres etiam aperte
suffragantur assertioni nostræ. S. Chrysostomus
Hom. III. in illud: *Elevatum est cor Ozia.* II. Para-
lipom. Cap. XXVI. scribit: *Nihil perinde gignit super-
biam, ut bona conscientia, nisi advigilemus. Unde & Chri-
stus sciens, quod post benefacta nos hic morbus adoritur,
dicebat discipulis: Cum feceritis omnia, dicite quia servi
inutiles sumus. Quando nihil nos arbitramur operatos egre-
gium, amplius etiam ob talem meremur affectum, quam pro-
pter opera ipsa quæ fecimus. Minimum itaque de se sen-
sisse tam magnum est, quam magnas res fecisse.* S. Ber-
nardus Serm. IX. in Psal. *Qui habitat,* scribit: *Præ-
tendat alter meritum, sustinere se jactet pondus dei &
æstus;*

actur; mihi adhærere Deo bonum est, ponere in Domino Deo spem meam.

Argumenta contraria refutantur.

*Catholica
Sententia
non contra
dicit Scri-
ptura.*

253. Objic. I. Autoritas Scripturarum. Psalmo CII. dicitur: *Qui coronat te in misericordia & miserationibus.* Et ad Rom. Cap. VI. *Stipendia peccati mors; gratia autem Dei, vita æterna.* II. Isaia Cap. LV. *Venite, emite absque argento, & absque ulla commutatione vinum & lac.* III. Danielis Cap. IX. *Neque enim in justificationibus nostris prosternimus preces ante faciem tuam, sed in miserationibus tuis multis.* IV. Lucæ Cap. XVII. *Cum feceritis omnia quæ præcepta sunt vobis, dicit: Servi inutiles sumus, quod debuimus facere, fecimus.* V. Ad Titum Cap. III. *Non ex operibus iustitiæ, quæ fecimus nos, sed secundum misericordiam suam salvos nos fecit.* Et ad Ephes. Cap. II. *Gratia salvati estis per fidem, & hoc non ex vobis, Dei enim donum est: non ex operibus, ut ne quis gloriatur.* VI. Ad Rom. Cap. VIII. *Non sunt condignæ pæssiones hujus temporis ad futuram gloriam.* Ergo opera nostra non sunt meritoria vitæ æternæ. R. ad I. *Æterna beatitudo, quamvis illam vere mereamur, recte tamen misericordiæ ac gratiæ Dei adscribitur triplici ex capite.* I. Quia Deus ex mera gratia & misericordia illam beneficientibus promisit. II. Quia gratiam sanctificantem nobis largitur sine merito nostro de condigno. III. Quia gratis omnino gratias efficaces concedit, quæ sunt semen gloriæ. Ad II. R. per vinum & lac non intelligitur hic vita æterna, sed gratia præsentis vitæ. Fatemur autem primam gratiam gratis dari sine meritis, quamvis non sine opere & labore nostro. Nam sicut illæ voces, *Absque argento, & ulla commutatione*, excludunt nostra merita: ita istæ, *Venite & emite* requirunt nostrum laborem. Ad III. R. Daniel ibi non loquitur de vita æterna; sed petit liberationem a captivitate Babylonica, in quam populus Judaicus ob enormia scelera abstractus erat: Bona autem temporalia, aliasque vitæ hujus

hujus commoditates de condigno mereri non possumus, nisi quatenus hominem adjuvant ad consequendam æternam beatitudinem; eoquod illa bonis operibus iustorum Deus non promiserit, sicut vitam æternam pollicitus est. Ad IV. R. Christus non dixit servos inutiles nos esse, cum omnia fecerimus; sed iussit ut id nos dicamus ad cavendam superbiam. Quamquam etiam in sensu aliquo servi inutiles sumus, licet omnia fecerimus. Imo. Quia nihil utilitatis per opera nostra bona Deo conferimus. II. Quia viribus nostris relictis, sine gratia Dei nihil possumus facere ad vitam æternam conducens. III. Quia, cum natura servi sumus, nullamque mercedem Deus, ut supremus Dominus, retribuere teneatur, æternam beatitudinem nunquam promereri potuissimus, nisi Deus eam gratuito promississet bene facientibus. Ad V. R. Apostolus manifeste ibi loquitur, non de salute perfecta, quæ reposita est nobis in cælis, sed de initio justificationis & fidei, quod juxta omnes Catholicos sub meritum non cadit: & de operibus, quæ fidem & gratiam Dei præcedunt, solisque naturæ viribus eliciuntur. Ad VI. R. Non sunt condignæ pæsiones hujus temporis ad futuram gloriam, si veluti materialiter secundum suam entitatem, levitatem, & exiguum temporis durationem spectentur: at vero condignæ sunt pæsiones ex gratia propter Deum a filiis adoptivis toleratæ, & Christi meritis innixæ. Nam ipse Apostolus II. ad Cor. Cap. IV. testatur: *Quod in præsentis est momentaneum & leve tribulationis nostræ, supra modum in sublimitate æternæ gloriæ pondus operatur in nobis*, procul dubio non physice, sed moraliter & meritorie. Itaque si spectetur gratia, a qua procedunt opera meritoria, datur proportio inter illa & gloriam cælestem, sicuti proportio datur inter semen & arborem. Neque temporis discrimen hanc proportionem tollit: siquidem etiam peccata momentanea damnatorum in hac vita patrata, æternam merentur pœnam, & passio transitoria Christi vitam æternam nobis promeruit.

Non Au-
gustinus.

254. Objic. II. Autoritas S. Augustini, qui Serm. II. in Psal. LXX. ait: *Cum præmium venerit, sua dona coronabit, non merita tua.* II. Serm. CLXIX. alias XV. de verbis Apostoli: *Prorsus gratis das, gratis salvas, qui nihil invenis unde salves, & multum invenis unde damnes.* III. Lib. de Gratia & Libero arbitrio, Cap. IX. *Insuper accipiemus & gratiam pro gratia, quando nobis vita æterna reddetur.* IV. Eodem libro, & capite pergit S. Doctor: *Maluit dicere (Apostolus) Gratia autem Dei vita æterna; ut hinc intelligeremus, non pro meritis nostris Deum nos ad æternam vitam, sed pro sua miseratione perducere.* R. ad I. S. Augustinus agit ibi contra Pelagianos, excluditque opera solis naturæ, non vero gratiæ viribus elicitæ, uti manifeste patet legenti contextum. Ad II. R. Deus gratis salvat, quia gratis dat gratiam, per quam salutem meremur; non vero propter opera ex solis naturæ viribus profecta, & quæ gratiam peccedunt. Ad III. R. Vita æterna dicitur ibi gratia, quia datur propter bona merita, quæ sunt effectus gratiæ & dona Dei, ut ipse S. Doctor explicat Libro citato, Cap. VIII. Ad IV. eadem est responsio. Vita æterna dicitur ibi gratia Dei; quia bona illa opera, quibus vita æterna tamquam merces retribuitur, Deus in nobis per gratiam efficacem pure gratuitam operatur: ait enim S. Doctor l. c. *Cum posset dicere, Stipendium autem justitiæ vita æterna; maluit dicere, Gratia autem Dei vita æterna.* Si itaque Apostolus dicere potuit, vitam æternam esse stipendium, five mercedem bonorum operum, manifeste sequitur, opera nostra bona mereri vitam æternam.

Aliique
Patres.

255. Objic. III. Autoritas aliorum Patrum. S. Hilarius in Psal. LI. scribit: *Non enim illa ipsa justitiæ opera sufficerent ad perfectæ beatitudinis meritum, nisi misericordia Dei etiam hac justitiæ voluntate humanarum demutationum & motuum non reputet vitia.* Spes igitur in misericordia Dei in sæculum sæculi. II. S. Basilius in Psalm. CXIV. *Requies æterna non secundum operum debitum ac meritum retribuitur, sed juxta magnificentiam Dei,*

his

his qui in ipsum speraverunt, exhibetur. III. S. Gregorius M. Lib. IX. Moral. Cap. XIV. *Si opus virtutis exercuero, ad vitam, non ex meritis, sed ex venia convalesco.* IV. S. Bernardus Serm. I. de Annuntiat. *Neque talia sunt hominum merita, ut propter ea vita æterna debeat ex jure; aut Deus injuriam aliquam faceret, nisi eam donaret.* Confirmat. Deus opera bona supra condignum remuneratur, ut patet ex communissima Theologorum doctrina, & ex Baii propositione, inter damnatas a S. Pio V. & Gregorio XIII, ordine XIV. manifeste deducitur: *Opera bona justorum non accipient in die judicii extremi ampliorem mercedem, quam justo Dei judicio mereantur accipere.* Ergo. R. ad I. S. Hilarius solum docet, operibus bonis levia & venialia peccata sæpe admisceri, quæ remissione & misericordia Dei indigent. Ad II. S. Basilius ait, requiem æternam dari certantibus, non ob merita propria, id est, propriis viribus acquisita; sed ob gratiam Dei, a qua merita vera nascuntur. Ad III. R. Non convalescimus ex meritis, quæ propriis viribus acquisivimus; sed ex venia, per quam justificati a Deo, justitiam & bona opera salubriter habere incipimus. Ad IV. R. juxta S. Bernardum vita æterna non debetur meritis nostris absolute & de se, antecedenter ad promissionem Dei gratuitam; præsupposita autem gratia & promissione, ex jure debetur, testante Apostolo. II. ad Timoth. Cap. IV. *Reposita est mihi corona justitiæ.* Ad confirm. C. A. N. C. Deus supra condignum opera nostra remuneratur, quia in retribuendo illis præmio non attendit ad solam excellentiam operis, atque ipsius operantis, verum etiam ad suam, & Christi excellentiam, sub qua sola consideratione vita æterna perfectam habet cum meritis æqualitatem. Propositio illa Baii merito fuit proscripta, quia is docebat ad meritum de condigno non requiri statum gratiæ, seu adoptionem; bonæque opera tantummodo secundum propriam excellentiam, ac dignitatem personæ operantis premiari.

*Frustra
opponitur
meritum
Christi.*

256. *Objic. IV. Meritum Christi.* Christus sanguine suo nos redimens, meruit nobis æternam beatitudinem. Ergo eam non meremur nostris operibus. P. C. Ex una parte merita Christi sufficiunt ad consequendam vitam æternam: ex altera parte si requirentur merita nostra, divideretur gloria inter Deum & hominem. Ergo merita nostra sunt prorsus inutilia, & Christo injuriosa. R. D. A. Meruit nobis beatitudinem æternam in radice, id est, auxilia sufficientia & apta ad illam consequendam, C. A. Meruit nobis beatitudinem æternam formaliter, & absque cooperatione nostra consequendam, N. A. & Conseq. vel D. C. Ergo illam non meremur nostris operibus. primo & principaliter, eo nimirum modo, quo Christus eam nobis promeruit, C. C. Non meremur eliciendo opera bona ex gratia, quam Deus ob merita Christi nobis communicavit, N. C. Ad *probat.* D. I. membrum Anteced. Merita Christi sufficiunt, si nobis plene & complete applicentur, C. Secus, N. A. Merita Christi, ex voluntate Dei, atque ipsius etiam Christi per Scripturas & traditionem nobis sufficienter manifestata, ad æternam beatitudinem consequendam plene & complete nobis non applicantur, nisi per bona opera meritoria, ex ejus gratia facta, ejusque meritis innixa. Alterum membrum Antecedentis omnino negatur. Cum enim merita nostra proficiantur ex gratia Christi, quidquid illa laudis & dignitatis habent, totum redundat in laudem & dignitatem meritorum Christi: sicuti quo palmites magis frugiferi sunt, eo vitis magis laudanda est; quia quidquid fucci & humoris habent palmites, hoc totum habent a vite.

Status Elevationis.

257. *Objic. V. Status elevationis.* Fideles per baptismum constituuntur filii adoptivi Dei. Ergo mereri non possunt æternam beatitudinem. P. C. Vita æterna in Scripturis vocatur hæreditas. Atqui hæreditas debetur filiis solo jure filiationis, seu adoptionis, non ex merito, aut labore. Ergo. *Confirm.* Parvulis baptizatis vita æterna donatur solo jure hæreditatis. Ergo etiam adultis, dicente Christo Marci Cap. X.

Amen

Amen dico vobis, quisquis non receperit regnum Dei velut parvulus, non intrabit in illud. R. C. A. N. C. Ad prob. R. Vita æterna in Scripturis non tantum hæreditas, verum etiam merces, denarius, bravium, corona justitiæ & vitæ sæpe vocatur. Parvulis itaque post baptismum decedentibus donatur vita æterna solo jure hæreditatis; adultis vero duplici titulo, hæreditatis nimirum & mercedis, juxta illud ad Coloss. Cap. III. *Scientes, quod a Domino accipietis retributionem hæreditatis.* Deus nimirum hac conditione nos adoptavit in filios, ut observando ejus mandata obtineremus hæreditatem; adeoque titulo meriti. Ad confirm. C. A. N. C. Parvuli nondum capaces meriti, non alio quam hæreditatis titulo vitam æternam possidere queunt: At vero adultos qui usum rationis habent, voluit Deus propriis laboribus & meritis illam acquirere. Quoniam enim magis honorificum est habere aliquid ex merito, quam ex sola donatione, ideo Deus ut filios suos magis honoraret, id etiam eis præstitit, ut vitam æternam per merita sibi pararent. Sensus verborum Christi apud Marcum Cap. X. est, nos æterna felicitate minime donandos, nisi per voluntatem reddamur humiles, simplices, innocentes, ambitionis & invidiæ expertes, quales sunt parvuli per ætatem.

258. Objic. VI. Natura meriti. Ut opus aliquod sit meritorium, requiritur ut detur æqualitas inter opus & mercedem. II. Ut opus afferat aliquam utilitatem & commodum illi, cui præstatur. III. Ut opus illud aliunde non sit debitum. IV. Ut a propriis viribus proficiscatur. Atqui opera nostra non habent æqualitatem cum vita æterna, nullam afferunt Deo utilitatem, aliunde Deo debentur ut supremo Domino, omnemque valorem a gratia accipiunt. Ergo non sunt meritoria. R. Ad opus meritorium non requiri perfectam & absolutam æqualitatem operis cum mercede, sed sufficere moralem æqualitatem proportionis, & promissionem gratuita mercedis: quæ proportio certe datur in operibus per vires gratiæ elicitis, a qua tamquam forma dignificantur. II^{da} conditio omnino falsa

T. IV. Theol. Dogm. Pol.

P

est;

est; qui enim laborem, sive utilem, sive supervacaneum præcipit, mercedem dare tenetur. III^{ta} conditio omnino admittenda est, nisi ille, cui ea obsequia debentur, nolit uti jure suo, illa quasi condonando, & mercedem promittendo si fiant, quod in præsentī casu accidit; liberalissimus enim Deus, licet opera nostra omnia titulo supremi dominii absque ulla mercede exigere posset, obligationem hanc gratuito servienti Deo remisit, amplissimum atque æternum præmium servis suis strenue laborantibus pollicitus. IV^{ta} conditio pariter admittitur; siquidem adversarii velint, debere opus illud ex propriis viribus proficisci ex parte, non tamen ex toto. Jam vero opera nostra bona, & Dei sunt propter gratiam prævenientem, excitantem & adjuvantem: & nostra sunt, quia Deus nobiscum, & nos cum Deo per liberum arbitrium operamur: totaliter tamen, totalitate influxus, neque Dei sunt, neque nostra sunt.

CONTROVERSIA III.

AN LICEAT BONUM AGERE INTUITU MERCEDIS ÆTERNÆ?

CONTRA CALVINUM, LUTHERUM, BAJUM, QUESNELLUM.

Errores. 259. Lutherus contritionem, quæ elicitur ex motivo amissæ æternæ beatitudinis, docuit hominem facere hypocritam, ac magis peccatorem. Calvinus Lib. VI. Institut. Cap. XVI. & in Antidoto Conc. Tridentini ad Sess. VI. Canonem XXXI. negat licitum esse operari æternæ mercedis intuitu. Id ipsum asserere visus est Michael Bajus Doctor Lovaniensis, docens omnem amorem, qui non est Dei propter se ipsum dilecti, esse vitiosam cupiditatem, & peccatum, ut manifeste colligitur ex ejus propositione ordine XXXVIII. inter damnatas a S. Pio V. & Gregorio XIII. *Omnis amor creaturæ rationalis aut vitiosa est cupiditas, qua mundus diligitur, quæ a Joanne prohibetur; aut laudabilis illa charitas, qua per Spiritum Sanctum in corde diffusa Deus ama-*

amatur. Consentit Paschasius Quesnellus propositione XLVII. inter proscriptas a Clemente XI. in Bulla Unigenitus. *Obedientia legis profluere debet ex fonte; Et hic fons est charitas: Quando Dei amor est principium illius interius, Et Dei gloria ejus finis, tunc purum est, quod apparet exterius; alioquin non est nisi hypocrisis, aut falsa justitia.* Eadem fuit Jansenianorum quorundam in Belgio & Galliis doctrina, quam propositione X. contentam damnavit Alexander VIII. *Intentio, qua quis detestatur malum, Et prosequitur bonum, mere ut cœlestem obtineat gloriam, non est recta, nec Deo placens.*

260. Conclusio. Licitum est bona agere intuitu mercedis æternæ. Prob. I. Autoritate Scripturarum, excitant nos ad bene operandum proposita mercede æterna. Apocalyp. Cap. II. dicitur: *Esse fidelis usque ad mortem, Et dabo tibi coronam vitæ.* Ad Coloss. Cap. III. *Quodcumque facitis, ex animo operamini, sicut Domino, Et non hominibus: scientes, quod a Domino accipietis retributionem hæreditatis.* Ad Galatas Cap. VI. *Bonum autem facientes non deficiamus: tempore enim suo metemur.* Psal. CXVIII. S. David de se ipso fatetur: *Inclinavi cor meum ad faciendas justificationes tuas in æternum, propter retributionem.* Ad Hebr. Cap. XI. Apostolus laudat Moysem, quod aspexerit in remunerationem, magis eligens affligi cum populo, quam temporalis peccati habere jucunditatem. Christus ipse Matth. Cap. VI. nobis præcipit: *Quærite ergo primum regnum Dei, Et justitiam ejus.* Et Lucae Cap. XVI. *Facite vobis amicos de mammona iniquitatis, ut cum defeceritis, recipiant vos in æterna tabernacula.*

*Licitum
esse agere
intuitu
mercedis
æternæ,
ostenditur
ex Scri-
pturis.*

261. Prob. II. Autoritate Patrum. S. Hieronymus Lib. II. adversus Jovinianum ait: *Ideo Paulus hoc facit, ut plus laborans, plus etiam mercedis accipiat.* S. Augustinus Enarrat. in Psal. XCIII. *Si forte tentant fluctus concupiscentiæ, intueris quid promisit Deus; Et dulcedo promissorum faciet te contemptorem dulcedinum sæculi.* Idem Lib. de Catechizandis rudibus, Cap. XVII. *Qui*

Patribus.

propter beatitudinem sempiternam & perpetuam requiem, quæ post hanc vitam Sanctis futura promittitur, vult fieri Christianus, ut non eat in ignem æternum cum diabolo, sed in regnum æternum intret cum Christo, vere ipse Christianus est. Et Enarrat. in Psal. CXLI. Timoris & cupiditatis januiam claudere contra diabolum, operi ad Christum. Quomodo ipsas valvas aperis ad Christum? Cupiendo regnum cælorum, timendo ignem gehennarum. Per cupiditatem sæculi diabolus intrat, per desiderium vitæ æternæ Christus intrat. S. Gregorius M. Hom. XIII. in Evang. Nec castitas ergo magna est sine bono opere, nec opus bonum est aliquod sine castitate. Sed si utrumque agitur, restat, ut quisquis ille est, spe ad supernam patriam tendat.

Ex Tri-
dentino.

262. Prob. III. Autoritate Tridentini Sess. VI. Can. XXXI. Siquis dixerit, justificatum peccare, dum intuitu æternæ mercedis operatur; anathema sit. Et Cap. XI. ejusdem Sess. Constat, eos Orthodoxæ Religionis doctrinæ adversari, --- qui statuunt in omnibus operibus justos peccare, si in illis suam ipsorum socordiam excitando, & sese ad currendum in stadio cohortando, cum hoc ut in primis glorificetur Deus, mercedem quoque intuentur æternam.

Ac ratione

263. Prob. IV. Ratione. Vita æterna est finis secundarius fidei & bonorum operum, subordinatus fini primario, seu gloriæ Dei, ad quam nostra beatitudo refertur. Ergo licitum est ad illam, tamquam finem secundarium, obtinendam, media, id est, bona opera dirigere. P. A. Ad Rom. Cap. VI. dicitur. *Habetis fructum vestrum in sanctificationem, finem vero vitam æternam.* Et I. Petri Cap. I. *Reportantes finem fidei vestræ, salutem animarum.* II. In operibus temporalibus omnium suffragatione licitum est finem spectare temporalem, v. g. colere agros spe fructus percipiendi, currere ac certare spe obtinendæ victoriæ ac bravii, pharmacum fumere spe recuperandæ valetudinis. Ergo etiam in opere spiritali licitum erit finem spectare spirituales ac supernaturales, præmium a Deo propositum, beatitudinem nimirum æternam.

Argu.

Argumenta contraria refutantur.

264. Objicitur I. Autoritas Scripturarum. Jo-
 annis Cap. X. reprehenditur a Christo mercenarius: *Infirmi sunt adven-*
sarii argumen-
ta petita
ex Scri-
pturis.
Bonus pastor animam suam dat pro ovibus suis. Mercenarius autem, & qui non est pastor, cujus non sunt oves propriæ, videt lupum venientem, & dimittit oves, & fugit: & lupus rapit, & dispergit oves: Mercenarius autem fugit, quia mercenarius est, & non pertinet ad eum de ovibus. Atqui qui operantur intuitu mercedis æternæ, sunt mercenarii. Ergo. II. Apostolus I. ad Cor. Cap. X. v. 31. scribit: *Sive ergo manducatis, sive bibitis, sive aliud quid facitis: omnia in gloriam Dei facite.* Ergo qui intuitu æternæ mercedis operantur, agunt contra doctrinam & præceptum Apostoli. R. C. M. N. m. Mercenarii proprie dicuntur illi, qui vel unice, vel præcipue mercedem intendunt, ita ut servire nollent, si nulla daretur merces: quales sunt illi qui viso lupo fugiunt, & dimittunt oves; quia salutem ovium pensi non habent, sed proprium tantummodo commodum quærunt. At vero, qui intuitu salutis æternæ operantur, eam tamquam finem secundarium, gloriam Dei autem ut finem primum respiciunt: neque ita constituti sunt, ut Deo servire nollent, si merces abesset. Sicut qui metu gehennæ de peccatis dolet, ac mandatorum observantiam proponit, non idcirco peccare vult, si non daretur gehenna. Ad II. C. A. N. C. Vel enim hoc merum est Apostoli consilium perfectiora suadentis, ut plurimi, iique præstantes Theologi autumant; vel si præceptum est, impletur etiam ab illis, qui intuitu mercedis æternæ operantur. Ut enim observat S. Thomas in Quæstionibus disputatis, Quæst. VII. de Malo, Artic. I. *Præceptum hoc, omnia in gloriam Dei facite, non obligat ad hoc, quod semper observetur in actu. Observatur autem semper in habitu, quamdiu homo habitualiter habet Deum ultimum finem.* Quamdiu scilicet homo est in flatu gratiæ, Deum semper amat habitualiter; atque ita radix bonorum operum ipsius est

est charitas, si nempe ex fine honesto, absque prava circumstantia exerceantur. Rursus S. Thomas in I. ad Cor. Cap. X. Lectione VII. *Dicendum est, inquit, quod non est necessarium, quod omnia in Deum referantur actu, sed habitu. Qui enim facit contra gloriam Dei, facit contra hoc præceptum, non qui non dirigit in omnibus actibus intentionem ad Dei gloriam.*

Ex Augustino.

265. Objic. II. Autoritas S. Augustini. S. Doctor Enarrat. in Psal. LV. scribit: *Nos ergo Deum amemus, Fratres, pure & caste. Non est castum cor, si Deum ad mercedem colit. --- Illum ergo sic diligamus, ut aliud præter ipsum non diligatur.* II. Enarrat. in Psal. LXXII. *Factum est cor castum, gratis jam amatur Deus, non ob illo petitur aliud præmium. Qui aliud præmium petit a Deo, & propterea vult servire Deo; carius facit quod vult accipere, quam ipsum a quo vult accipere. --- Ama Deum gratis, nulli invidas Deum.* R. C. A. N. C. In I. textu S. Augustinus loquitur de mercede, non æterna, sed temporali, quæ posita est in ubertate & copia rerum fluxarum & caducarum, adeoque hæc non debent esse summa votorum apud Christianos homines: etenim paulo ante citata verba ait S. Doctor: *Omnia quippe illa, fratres, quæ commemorarunt filii alieni, Deus dat; sed & malis dat, sed & blasphemis dat, qui Solem suum oriri facit super bonos & malos.* In II. textu amor concupiscentiæ, quo Deus amatur ut bonus amanti, non reprobatur; sed tantum præfertur illi amor amicitæ, quo Deus amatur ut bonus sibi, ac propter se. Quod siingas, hominem ita esse animo constitutum, ut sublatò præmio Deum amare recuset, hic utique peccat; præfert enim munus Deo largitori muneris. At hanc animi dispositionem non habet, qui in sententia nostra Deum laudabiliter & honeste amat propter præmium.

Aliisque Patribus.

266. Objic. III. Autoritas aliorum Patrum. S. Chrysostomus Hom. V. in Epist. ad Romanos. scribit: *Amore Christi omnia facite, & non spe mercedis.* II. S. Bernardus Lib. de diligendo Deo ait: *Non sine præ-*

præmio diligitur Deus, etsi absque præmii intuitu diligendus sit. Vacua namque vera charitas esse non potest, nec tamen mercenaria est. III. S. Thomas II^{da} II^{dæ} Quæst. XIX. Artic. IV. ad III^{ium} ait, amorem mercenarium contrariari charitati. Ergo. R. ad I. Cujus mercedis spem abesse velit S. Chrysostomus, l. c. manifeste indicat S. Doctor, nempe spem mercedis temporalis; illico enim subjungit: *Hæc est vera merces, hæc vera gloria, ut Christum possideamus. Hoc nostrum regnum est, nostræ deliciae.* Ad II. R. S. Bernardus vult tantum, mercedem æternam respiciendam a nobis esse ut finem secundarium, gloriam Dei vero ut finem primum; quod a justis intuitu mercedis æternæ operantibus, semper fieri superius docuimus. Ad III. R. S. Thomam loqui de inordinato amore bonorum temporalium: ait enim l. c. *Ad tertium dicendum, quod amor mercenarius dicitur, qui Deum diligit propter bona temporalia: quod secundum se charitati contrariatur; Et ideo amor mercenarius semper est malus.* Nimirum operari propter mercedem ipso opere viliores, v. g. ex fine principali ob bona temporalia Ecclesiastica ministeria obire, ac bona opera elicere, sordidum ac fervile est. At spectare mercedem eminentissimam, quæ in ipsius Dei visione consistit, honestissima est, & præstans actio.

267. Objic. IV. Ratio. Qui ob cæleste regnum operatur, quærit gloriam suam. Ergo non quærit gloriam Dei. Ergo peccat. *Confirm.* Si talis ita operando quæreret gloriam Dei, Deum non prosequeretur amore concupiscentiæ, sed benevolentia, ac perfectæ charitatis. Atqui si intuitu æternæ mercedis operatur, juxta omnes Deum prosequitur amore concupiscentiæ. Ergo. R. D. A. Quærit gloriam suam, ita tamen ut gloriam saltem implicite & virtualiter referat ad ipsum Deum tamquam finem ultimum excellentiæ, velitque æternum beatus esse, ut in ipso Deus glorificetur, C. A. Ut hoc non fiat, N. A. & Conseq. Ad *confirm.* D. M. Si quæreret gloriam Dei formaliter & explicite, C. M. Si implicite & virtualiter, N. M. Justi, (de his enim

Ac ratio-
no.

enim hic solum agimus, cum iniusti, utpote charitate destituti, prudenter & efficaciter operari non possint intuitu mercedis æternæ,) quando intuitu æternæ mercedis operantur, gloriam suam atque utilitatem respiciunt tamquam finem, non positive sed negative tantum ultimum, qui ulterius referri potest, quamquam hic & nunc per solum amorem concupiscentiæ ulterius ab operante non referatur formaliter & explicitè. Quia vero gratia sanctificante ornatī sunt, necessario Deum complectuntur etiam amore benevolentiae atque amicitiae, qui beatitudinem hominis formaliter & explicitè, si sit actualis; implicite vero & virtualiter, si sit habitualis tantum, refert ad ipsum Deum propter se dilectum. Ex quo apparet, justos, quando intuitu æternæ mercedis operantur, Deum diligere amore concupiscentiæ, atque amicitiae per eundem, aut diversos actus, saltem habitualiter.

268. Dices. Amor benevolentiae non potest simul stare cum amore concupiscentiæ. Ergo dicta non subsistunt. P. A. Amor benevolentiae est charitas perfecta, amor concupiscentiæ est imperfectus, habentque motiva sibi opposita. Ergo non possunt simul stare. *Confirm.* Amor viri, qui uxorem suam amat, propter pecunias, vel præpinguem dotem, non potest simul stare cum amore, quo eam prosequitur propter se ipsam. Ergo a pari R. N. A. Ad *prob.* D. I. membrum Anteced. Amor concupiscentiæ est imperfectus, si spectetur se solo absque eo quod Deus etiam ametur propter se, C. A. Si spectetur una cum amore benevolentiae, quocum in casu nostro conjunctus est, N. A. & D. etiam alterum membrum Anteced. Habent motiva sibi opposita formaliter & præcisive, T. A. Realiter & exclusive, N. A. Amor concupiscentiæ quamvis præscindat ab amore benevolentiae, non tamen illum excludit; potest enim aliquis per eundem, vel etiam diversos actus simul desiderare beatitudinem tamquam mercedem, & sibi bonam atque utilem, ita tamen ut simul illam ordinet ad gloriam Dei. Ad *confirm.* T. A. N. C. Amor uxoris propter pecunias respicit bonum distin-

distinctum a fruitione personæ amatæ: amor vero mercedis æternæ respicit bonum identificatum cum Deo, qui est merces magna nimis nostrorum meritorum.

CONTROVERSIA IV.

AN BONA OPERA SINT NECESSARIA AD SALUTEM
CONSEQUENDAM?

CONTRA SIMONEM MAGUM, EUNOMIUM, ÆTIUM,
PROTESTANTES.

269. **S.** Irenæus Lib. I. adv. Hæreses, Cap. XX. *Errores.* refert, præter alia Simonem Magum graviter in eo etiam errasse, quod homines asseruerit per gratiam salvari, non per bona opera. Theodoretus Lib. I. Hæreticarum Fabularum, Cap. II. de eodem Simone scribit: *Jubebat Simon suos Legis minas non pertimescere; sed tamquam liberos facere quæ vellent. Non enim per bonas actiones, sed per gratiam eos esse salutem consecuturos.* Sæculo IV. Eunomius homo pessimus, atque inter Arianos facile impudentissimus, errorem hunc renovavit, teste S. Augustino Lib. de Hæresibus, Cap. LIV. *Fertur, inquit, usque adeo fuisse bonis moribus inimicus, ut asseveraret, quod nihil cuiquam obesset quorumlibet perpetratio ac perseverantia peccatorum, si hujus quæ ab illo docebatur fidei particeps esset.* Insaniam hanc ab Ætio itidem Ariano, quo ille Magistro utebatur, hausisse dicunt Philastrius & Augustinus. Quid de bonis operibus Lutherus senserit, arduum non est in ejus scriptis deprehendere. Quamvis enim quandoque, præcipue in libro de Visitatione Saxonica, doceat bona opera esse facienda, eaque ad salutem aliquo modo necessaria esse solita sua levitate affirmet, contrarium tamen variis in locis sæpissime asseruit. Libro de Libertate Christiana scribit: *Bona opera non faciunt bonum virum, nec malum mala. -- Ut infideli nullum bonum opus prodest ad salutem, & justitiam: sic e diverso nullum malum opus facit malum & damnatum, sed sola incredulitas.* Lib. de Captiv. Babylonica, Cap. de Baptismo: *Vides, quam dives sit homo Christianus, vel baptizatus, ut etiam volens*

volens non possit perdere salutem suam quantiscunque peccatis, nisi nolit credere. Nulla enim peccata possunt eum damnare, nisi sola incredulitas. Tomo IV. Jenensi Latino fol. 98. & Tomo I. Vittenbergensi Germ. fol. 215. Quare si prudens es, longissime ableges Mosen balbum & blasum cum sua lege, neque ullo modo te moveant terrores & minæ ipsius. Hic simpliciter sit tibi suspectus, ut hæreticus, excommunicatus, damnatus, deterior Papa & diabolo, ideo prorsus non audiendus. Et Serm. de piscatura Petri: Erga Deum non operibus, sed nuda fide indigemus; debemus enim cum solo Isaac venire, id est, in fide: Servos & asinos, hoc est, opera deorsum dimittere oportet. Quanto sceleratior es, tanto citius Deus suam gratiam infundit. Neque profecto aliter sentire potuit Lutherus principiis suis insistendo. Si enim mandata Dei ab homine etiam justo fervari nequeunt: si omnia justorum opera peccata sunt ex natura sua mortalia: si in lege gratiæ justus liberatur a debito implendi legem, quis, nisi cui sinciput graviter læsum est, necessitatem adstruet bonorum operum ad salutem æternam consequendam?

*Discordia
Protestan-
tium.*

270. Sectatores Lutheri circa necessitatem bonorum operum in diversas, sibi que oppositas iverè sententias. Lutherani rigidi, quos inter Illiricus, Amsdorffius, & Vinarienses Theologi in Colloquio Altenburgensi dicebant, *Opera bona, & novam obedientiam, non ad Regnum Christi, sed ad mundum pertinere: ad Satanam spectare Christianos cum operibus bonis. Item: Adeo non esse necessaria opera bona, ut etiam salutem incommodent, sintque perniciosa. Denique, precari oportere, ut in fide, sine omnibus operibus bonis, usque in finem perseveremus. Vide Petrum Canisium Lib. I. de Corrupt. Verbi Dei, Cap. X. Wigandus cum sociis ea quidem ad salutem non necessaria, at neque noxia, sed arbitraria esse censebat. Contra Lipsienses in eodem Colloquio Altenburgensi ea ad salutem omnino requiri contendebant, quibuscum consentit Confessio Vittenbergensis Tit. de bonis Operibus definiens, *Necessario deberi**

deberi praticari bona opera, eaque per bonitatem Dei gratuitam mereri remunerationes suas corporales ac spirituales. Confessio Augustana Art. XX. dicit, falso a Catholicis accusari suos, quod bona opera negligant, vel prohibeant. Melancthon in Locis Theologicis, Brentius in Catechismo, Kemmitz in Exam. Conc. Tridentini Sess. VI. Calvinus Lib. III. Institut. Cap. XVI. docent, opera bona esse facienda, veramque fidem non esse, quæ opera bona non parit, & quæ charitatem comitem non habet.

271. Cum his communiter sentiunt nostrorum temporum Protestantes, docentque, opera bona ad salutem & justitiam obtinendam necessaria esse, non ratione efficientiæ, sed sola necessitate præsentis: id est, opera bona necessaria esse, non quod illa sint causæ, conditiones ac merita salutis & justitiæ; sed quia fides, quæ sola hominem justificat & salvat, nec viva, nec vera esse potest sine operibus, quamvis opera nullam relationem habeant ad salutem: & quia Deus neminem justificare & salvare decrevit absque bonis operibus, quamquam illa sint merum signum veræ fidei, nihilque efficiant ad salutem obtinendam. Ita illi, ut imperitiæ plebi fucum faciant, & capitalem errorem tueantur, quod sola fides justificet. Verum si opera bona ex natura sua sunt peccata mortalia, & omnes justitiæ nostræ sunt sicut pannus menstruatus: si præcepta Dei ab hominibus perfecte eo modo, quo obligant, servari nequeunt; fierine potest, ut opera nostra sint boni fructus, indices salvificæ fidei? Ut Deus factum impossibilia tamquam necessaria præcipiat, neminem que justificare ac salvare decreverit, nisi qui prioribus peccatis novum aliquod adjecerit, Deumque ad iracundiam, quantum est in se, iterato provocaverit? Fierine potest, ut peccatum aliquod, de se & ex natura sua mortale, Deum moveat ad impertiendam nobis suam misericordiam, viamque ad cælum sternat? Quare aut fateantur Protestantes necesse est, opera bona justorum viribus gratiæ elicitæ, vere bona esse, meritoria vitæ æternæ, atque ad salutem consequendam necessaria;

Protestantium recentiorum sensus.

ria: aut si hoc negent, eadem nullo prorsus modo, neque necessitate præsentia, ad salutem requiri.

Opera bona necessaria esse ad salutem, docent Scriptura

272. Conclusio I. Opera bona sunt necessaria ad obtinendam salutem. Conclusio intelligenda est de adultis, qui postquam Christo reconciliati sunt, non statim ex hac vita decedunt. Infantes enim, atque etiam adulti recens baptizati, si continuo ex hac vita decedant, salutem æternam consequuntur, non titulo mercedis, sed hæreditatis. Probatur jam Conclusio. Æterna salus promissa nobis a Deo fuit sub conditione bonorum operum. Ergo ut salutem æternam obtineamus, necessario implenda ac purificanda est conditio. P. A. I. Autoritate Scripturarum. Matth. Cap. XIX. dicitur: *Si vis ad vitam ingredi, serva mandata.* Matth. Cap. XXV. *Venite Benedicti Patris mei, possidete paratum vobis regnum a constitutione mundi. Esurivi enim, & dedistis mihi manducare &c.* Ad Hebr. Cap. X. *Patientia vobis necessaria est, ut voluntatem Dei facientes reportetis promissionem.* I. ad Timoth. Cap. II. *Mulier seducta in prævaricatione fuit. Salvabitur autem per filiorum generationem, si permanserit in fide & dilectione, & sanctificatione cum sobrietate.* Ad Rom. Cap. VIII. *Si spiritu facta carnis mortificaveritis, vivetis.* Jacobi Cap. I. *Qui autem perspexerit in legem perfectam libertatis, & permanserit in ea, non auditor obliviosus factus, sed factor operis: hic beatus in facto suo erit.* Et Cap. II. *Quid proderit, fratres mei, si fidem quis dicat se habere, opera autem non habeat? Numquid poterit fides salvare eum? -- Abraham pater noster, nonne ex operibus justificatus est, offerens filium suum Isaac super altare? Vides, quoniam fides cooperabatur operibus illius: & ex operibus fides consummata est? --- Videtis, quoniam ex operibus justificatur homo, & non ex fide tantum?*

Et Patres.

273. Prob. II. Autoritate Patrum. S. Justinus Martyr. Apolog. I. pro Christianis scribit, quod Christiani orent, *Ut postquam veritatem agnovimus, per opera, & præceptorum observationem, ad salutem æternam pervenire valeamus.* Clemens Alexandrinus Lib. V.

Stro-

Stromatum: *Gratia salvamur, sed non absque bonis operibus. . . .* Quando audierimus, *Fides tua te salvum fecit, non accipimus absolute eos salvos futuros, qui quomodocunque crediderint, nisi facta quoque fuerint consecuta.* S. Hilarius Can. VII. in Matth. *Salus gentium omnis in fide est, & in præceptis Domini vita est universorum.* S. Gregorius Nazianz. Orat. in Sanctum Lavacrum: *Operare bonum super hoc doctrinarum fundamento, quoniam fides sine operibus mortua est, quemadmodum & opera sine fide.* S. Chrysostomus Hom. XXX. in Joannem: *Si in Patrem, & Filium, & Spiritum Sanctum recte credideris, non autem recte vixeris, nulla tibi ad salutem utilitas.* Cum ergo dicit, *Ipsa est vita æterna, ut cognoscant te solum Deum verum: nolimus hoc nobis ad salutem satis arbitrari.* Opus namque nobis est & vitæ & morum puritate pollere. S. Hieronymus Comment. in Isaiam, ad Cap. XXVI. interpretans illud, *Murus, & antemurale ponetur in ea,* scribit: *Murus bonorum operum, & antemurale fidei.* Non enim sufficit murum habere fidei, nisi ipsa fides bonis operibus confirmetur. S. Augustinus Lib. de Gratia & Lib. arbitrio, Cap. VII. *Homines autem non intelligentes, quod ait ipse Apostolus, Arbitramur justificari hominem per fidem sine operibus legis: putaverunt eum dicere sufficere homini fidem, etiamsi male vivat, & bona opera non habeat.* Quod absit ut sentiret *Vas electionis.* S. Fulgentius Lib. II. de Remiss. peccat. Cap. I. *Vita bona non veraciter dicitur, quæ perversæ credulitatis vitio depravatur. Neque sufficit ad salutem vita recte credentis, si conversatio moribus atque operibus turpatur obscænis.*

274. Conclusio II. Opera bona ad salutem consequendam necessaria sunt, non tantum ratione præsentiae, sed etiam efficientiæ. Prob. I. Autoritate Scripturarum. Apostolus II. ad Cor. Cap. IV. scribit: *Id enim, quod in præsentem est momentaneum & leve tribulationis nostræ, supra modum in sublimitate æternæ gloriæ pondus operatur in nobis.* Ergo juxta Apostolum bona opera salutem efficiunt, & operantur. II. ad Cor. Cap.

Non tantum ratione præsentiae, sed etiam efficientiæ.

Cap. VII. *Quæ enim secundum Deum tristitia est, pœnitentiam in salutem stabilem operatur.* Pœnitentia utique opus est, eaque per tristitiam effecta, operatur salutem. II. Petri Cap. I. *Quapropter fratres magis satagite, ut per bona opera certam vestram vocationem & electionem faciatis.* Ad Rom. Cap. VIII. *Si Spiritu facta carnis mortificaveritis, vivetis.* Ergo bona opera juxta Scripturam non tantum sunt signa veræ ac vivæ fidei; sed etiam sunt causæ, conditiones, ac merita salutis, quam operantur & efficiunt. Ergo sunt necessaria ratione efficientiæ. Prob. II. a pari. Ut quis damnetur, prærequiruntur peccata gravia, non tantum ratione præsentia, ac tamquam indices inobedientiæ erga Deum, & impietatis; verum etiam ratione efficientiæ, quia illa vere operantur damnationem. Ergo a pari, ut quis æternum beatus fiat, requiruntur bona opera, non tantum ratione præsentia, sed etiam efficientiæ. Prob. III. evertendo fundamentum Protestantium. Opera a justis viribus gratiæ elicitæ, sunt vere bona, & meritoria vitæ æternæ ut ostendimus Controversia I. & II. Ergo vere operantur & efficiunt salutem æternam. Ergo requiruntur etiam ratione efficientiæ. Prob. IV. Ratione. Purificatio conditionis involventis actiones liberas in obsequium promissoris præstandas, habet efficientiam moralem ac meritoriam illius rei, quæ sub conditione promittitur. Atqui opera bona viribus gratiæ elicitæ, sunt purificatio conditionis, sub qua nobis a Deo promittitur æterna salus. Ergo moraliter ac meritorie efficiunt, atque operantur æternam salutem.

Argumenta contraria refutantur.

Contrari-
um evinci
nequit ex
Scripturis

275. Objic. I. *Authoritas Scripturarum.* Scriptura salutem tribuit soli fidei, operibus prætermis-
Luçæ Cap. VII. *Fides tua te salvam fecit.* Luçæ Cap.
VIII. *Crede tantum, & salva erit.* Joan. Cap. I. *De-*
dit eis potestatem filios Dei fieri, his, qui credunt in no-
mine ejus. Joan. Cap. III. *Qui credit in Filium, vitam*
habet æternam. II. Ad Ephes. Cap. II. dicitur: *Gra-*
tia

tia estis salvati per fidem, - non ex operibus. III. Ad Rom. Cap. I. *Non erubesco Evangelium. Virtus enim Dei est in salutem omni credenti.* Joannis Cap. III. *Ut omnis, qui credit in eum, non pereat, sed vitam habeat æternam.* Ergo juxta Scripturas opera bona sunt necessaria ad salutem. R. I. opponendo adversariis clarissimos Scripturarum textus a nobis in probatione adductos, qui necessitatem bonorum operum comprobant. R. II. Quamvis sola fides nominetur, neutiquam tamen sequitur, solam fidem esse causam salutis. Scriptura enim, cum ad unum effectum multæ causæ concurrunt, modo uni, modo alteri causæ effectum tribuit, quin propterea significare intelligatur, unam causam sine aliis sufficere. Sic v. g. Lucæ Cap. VII. dicitur: *Remittuntur ei peccata multa, quoniam dilexit multum.* Tobix Cap. XII. *Eleemosyna a morte liberat.* Ad Rom. Cap. VIII. *Spe salvi facti sumus.* Ad Titum Cap. III. *Salvos nos fecit per lavacrum regenerationis.* Neque idcirco denotare vult Scriptura, dilectionem, spem, eleemosynam, Baptismum, sine fide salutem parere. Cæterum quod Scriptura salutem tribuat fidei magis quam bonis operibus, causa est, quia fides initium est grætuæ justificationis, sine qua bona opera nihil prodesse possunt ad vitam æternam, ut observat S. Augustinus Lib. de Prædestinatione Sanctorum, Cap. VII. *Ex fide autem ideo dicit (Apostolus) justificari hominem, non ex operibus, quia ipsa prima datur, ex qua impetrentur cætera, quæ proprie opera nuncupantur, in quibus jussæ vivitur.* Lucæ Cap. VIII. illis verbis, *Crede tantum, & salva erit,* non est sermo de salute æterna, aut remissione peccatorum; sed de miraculo faciendo, ac revocanda ad vitam defuncta: ad patranda autem miracula in confirmationem veræ fidei sola fides sufficere potest. Ad II. R. textum illum Apostoli non esse ad rem; loquitur enim ibi B. Paulus de prima justificatione, quæ certe omnino gratuita est, ac de operibus quæ fidem præcedunt, atque ex solis viribus liberi arbitrii fiunt. Ad III. R. fidem justificare & sal-

vare,

vare, quantum in se est, si non desint cætera, nimirum bona opera viribus gratiæ elicitæ; eo nimirum modo, quo Scriptura loquitur de spe, dilectione, humilitate, oratione, ut v. g. Lucæ Cap. XVIII. *Omnis qui se humiliat, exaltabitur.* Lucæ Cap. XI. *Omnis qui petit, accipit.* Ad Rom. Cap. X. *Quicumque invocaverit nomen Domini, salvus erit.* Nimirum si cætera non desint: neque enim quis dicet ad salutem sufficere solam orationem, humilitatem, aut Domini invocationem. Verum plura de his dicemus Tract. V. Artic. II. ubi fermo erit de Justificatione.

Aut ex discrimine Legis veteris & Evangelii. 276. Objic. II. Discrimen Legis veteris, & Evangelii. Quamvis opera bona necessaria fuerint in veteri Lege, non sequitur ea etiam necessaria esse in Lege Evangelii. Ergo. P. A. In Evangelio nullæ continentur leges proprie dictæ, nullæ comminationes, nullæ promissiones conditionatæ vitæ æternæ, sed absolutæ. Ergo. P. A. Apostolica prædicatio dicitur *Evangelium*, id est, bonus ac lætus nuntius. At non esset bonus ac lætus nuntius, si contineret leges proprie dictas, comminationes, terrores, ac promissiones conditionatas tantum. Ergo. *Confirmat.* Promissiones Evangelicæ sunt gratuitæ. Ergo non sunt conditionatæ. R. N. A. Opera bona etiam in Lege Evangelica necessaria esse ad obtinendam salutem, probatum fuit a nobis ex Scripturis novi testamenti. Ad *probat.* N. A. cujus falsitatem manifeste ostendimus. Christus Matth. Cap. V. confirmat, explicat, & perficit legem Moysis de homicidio, adulterio, perjurio, eamque a se ita explicatam fervari voluit; ait enim l. c. *Ego autem dico vobis - Nolite putare quoniam veni solvere legem, aut prophetas: non veni solvere, sed adimplere.* Ac statim subiungit: *Qui ergo solverit unum de mandatis istis minimis, & docuerit sic homines, minimus vocabitur in regno cælorum.* Ergo in Evangelio dantur leges proprie dictæ. Similiter in Evangelio continentur comminationes & terrores. Christus Matth. Cap. V. ait: *Qui dixerit fratri suo, raca: reus erit concilio. Qui autem dixerit, fatue:*

fatue: reus erit gehennæ ignis. Et Cap. VII. Omnis arbor, quæ non facit fructum bonum, excidetur, & in ignem mittetur. B. Judas in Epist. Catholica v. 15. Ecce venit Dominus in Sanctis millibus suis, facere iudicium contra omnes, & arguere omnes impios de omnibus operibus impietatis eorum, quibus impie egerunt. Denique Christus Matth. Cap. V. ait: Nisi abundaverit iustitia vestra plus quam Scribarum & Phariseorum, non intrabitis in regnum cælorum. Et Cap. XIX. Si vis ad vitam ingredi, serva mandata. Lucæ Cap. X. Legisperito, qui Christum interrogaverat, Magister, quid faciendo vitam æternam possidebo? postquam is mandata Legis recitasset, respondit Christus: Recte respondisti: hoc fac, & vires. Ergo promissiones Evangelicæ de salute obtinenda non sunt absolutæ, sed conditionatæ, ut ipsi etiam Protestantes fateri coguntur, cum utique conditionem fidei admittant juxta illud Marci Cap. ult. Qui non crediderit, condemnabitur. Neque dicas cum Brentio Hom. I. in Dominicam XIII. post Trinit. Christum verbis illis, Si vis ad vitam ingredi, serva mandata, indicasse potius adolescenti viam ad æternam damnationem: aut cum Calvino Lib. III. Institut. Cap. XVIII. & Luthero in Cap. III. Epist. ad Galatas, Christum ironice dixisse Jurisperito, Hoc fac, & vires. Hæc enim quam impie, flagitiose ac sulte dicantur, nemo non videt. Ad prob. C. M. N. m. Prædicatio Apostolica dicitur Evangelium, seu bonus ac lætus nuntius, quia annuntiat Salvatoris adventum, reconciliationem humani generis cum Deo, aditum patefactum ad regnum cælorum, quamvis simul etiam annuntiet iram & indignationem his, qui non recipiunt Salvatorem, neque pœnitentiam agunt. Neque desinit esse bonus nuntius, quod gravissima supplicia comminetur impiis; terret enim, ut ad pœnitentiam perductos postea consoletur, eo fere modo, quo medicus vulnerat, ut sanet. Ad confirm. R. I. Ergo promissio Evangelica conditionem fidei non requirit? R. II. N. C. Gratuitum & conditionatum sibi non opponuntur. Ipsa conditio fidei, pœnitentiæ, ac bonorum

T. IV. Theol. Dogm. Pol. Q ope-

operum est gratuita, hoc est gratis, & ex mera liberalitate a Deo posita: atque ideo, quamvis promissiones Evangelii sint conditionatæ, recte tamen vocantur etiam gratuitæ.

277. Dices. Si etiam in Lege Evangelica requiruntur opera bona ad salutem, nullum dabitur discrimen inter Evangelium, & Legem veterem. Atqui hoc dici nequit. Ergo. R. N. M. Nam I. Doctrina veteris Legis erat inchoata & imperfecta; Evangelii vero perfecta, sive spectentur Mystéria fidei & promissiones, sive leges & mandata. In veteri Lege Trinitas Personarum & Incarnatio obscure significabantur: expressæ bona temporalia, figurate vero regnum cælorum promittebatur. Cæremoniales leges erant propemodum infinitæ &c. At vero in Lege Evangelica Trinitas Personarum, Incarnatio, aliaque dogmata perspicue traduntur, regnum cælorum & vita æterna disertis verbis promittitur: paucæ cæremoniales leges, prioribus abolitis, subrogatæ sunt, atque ut S. Augustinus ait Enarrat. in Psal. LXXIII. *Mutata sunt Sacramenta, facta sunt facilia, pauciora, salubriora, feliciora.* Judiciales leges Christus non tulit, sed ferendas reliquit iis, qui variis in locis Rempublicam gerentes, pro rerum, personarum, ac temporum diversitate instituendas esse judicaverint; eoquod populus Christianus tam late per totum orbem diffusus, iisdem legibus judicialibus regi non potuerit, & gubernari, ut olim Judæi; cum tam diversa sint ingenia, mores, & consuetudines hominum. Morales leges & expressius leguntur in Evangelio, quæ obscurius habebantur in Lege veteri: & majori perfectione sunt observandæ a Christianis, ut patet ex Sermone Domini in monte Matth. Cap. V. II. Lex per Moysen data est, qui legislator tantum fuit: Evangelium vero per Christum, qui non legislator tantum fuit, sed etiam Redemptor. Hinc per Evangelium non solum doctrinam, sed etiam gratiam accepimus; ut non modo virtutes & vitia discerneremus, sed etiam ut iustitiam diligeremus. Ex quo patet, bonorum operum necessitatem ad Evangelium maxime pertinere. Quorum
sum

sum enim cum Evangelio gratiam bene operandi, & Legis ipsius implendæ Christus conjunxit, nisi ut, quod per litteram Legis Evangelicæ discimus esse faciendum, id per Spiritum & gratiam impleamus? III. Lex Mosaica uni tantum genti data fuit; Lex Christi omnibus gentibus. IV. Lex vetus umbram & figuras rerum futurarum magna ex parte complectebatur; Evangelium vero ipsum corpus & veritatem exhibet. V. Lex Moysis, adveniente Christi Lege, mutanda erat; Christianæ autem Legi nulla alia succedet. VI. Lex Moysis non habebat vim justificandi, neque data erat ut justificaret, sed ut morbum ostenderet, & ad quærendum Medicum excitaret: Lex autem Christi, seu Evangelium, habet vim justificandi; non quasi littera sola Evangelii salutem afferre possit: sed quia Christus cum lege dedit etiam gratiam implendi legem. VII. Lex Moysis fuit lex timoris & servitutis; Evangelium lex amoris & libertatis, nimirum a peccato, morte æterna, & iugo legis cærimonialis; quia Christus cum lege dedit etiam Spiritum, per quem in corde diffusa est charitas. VIII. Lex Moysis gravissima erat; at vero Evangelium Christi est jugum suave, & onus leve. Vide Bellarminum Lib. IV. de Justific. Cap. II. &c.

278. Objic. III. Autoritas Patrum. S. Chrysost. Hom. de Fide & Lege naturæ scribit: *Eum qui operatur opera justitiæ sine fide, non possum probare vivum esse: fidelem absque operibus possum monstrare & vixisse, & regnum cælorum assecutum esse. Nullus sine fide vitam habuit; latro autem credidit tantum & justificatus est.* S. Augustinus Lib. I. contra duas Epistolas Pelagianorum, Cap. XXI. ait: *Quantalibet fuisse virtutis antiquos prædices justos, non eos salvos fecit nisi fides Mediatoris.* Et Lib. LXXXIII. Quæstionum, Quæst. LXXVI. *Quod si cum crediderit, mox de hac vita decesserit, justificatio fidei manet cum illo, nec præcedentibus bonis operibus, quia non merito ad illam, sed gratia pervenit; nec consequentibus, quia in hac vita esse non finitur.* R. I. Quæ-

nam circa bonorum operum necessitatem mens fuerit Chrysostomi & Augustini, luce meridiana clarius colligitur ex eorum textibus superius a nobis in probatione Conclusionis adductis Num. 273. R. II. Chrysostomum nobis contrarium non esse; vult enim interdum fidem sine opere externo sufficere; numquam vero opus externum sine fide, quia fides parit opera salutaria, opera non pariunt fidem: idque exemplo boni Latronis comprobatur, qui ob scelera sua cruci jam affixus in Christum credidit, sicque illa adhuc die cum Christo conjungi meruit ob excellentem fidem, quamquam non omnibus bonis operibus vacuus; siquidem irrogatum sibi supplicium patienter toleravit, ac Christi Divinitatem publice professus est. S. Augustinus priori textu contendit, Justos illos antiquos, neque per naturæ, neque per Moysis legem, sed per ipsam fidem in Christum, esse salvatos: sicque fidem in Christum non opponit bonis operibus viribus gratiæ elicitis; sed tantum legi naturali ac Mosaicæ. Neque magis posterior illius locus Conclusioni nostræ adversatur. Fatemur enim baptizatos, si mox ex hac vita decedant, salutem æternam consequi, non titulo mercedis, sed hæreditatis; opera enim bona quamvis non habeant in actu, habent tamen in voto, & in habitu, eoquod charitate perfecta sint instructi.

CONTROVERSIA V.

DE ORATIONE.

CONTRA MESSALIANOS, PELAGIANOS, WICKLEFFITAS,
WALDENSES, QUIETISTAS.

Errors. 279. Circa necessitatem orationis duo fuere oppositi Hæreticorum errores: Sæculo IV. Adelphius, Hermias, & Messaliani, dicti etiam Euchitæ, docebant, teste Theodoro Lib. IV. Hæreticarum Fabularum, jugem ac non interruptam orationem sufficere cuicumque homini ad consequendam vitam æternam, seclusa quacumque alia virtute, etiam remotis Sacramentis, & spretis Dei & Ecclesiæ mandatis: ita ut qui constanter orat,

orat, damnari non possit, etiamsi sit Judæus, vel infidelis; solaque oratio vim habeat delendi omnia peccata. Contra Pelagiani, ut refert S. Augustinus Lib. de Hæresibus, Cap. LXXXVIII. orationem prorsus inutilem esse, nulliusque virtutis ac meriti apud Deum asserabant, precesque improbabant, quæ fiunt ab Ecclesia præcipue in majori hebdomadæ pro perfidis Judæis, & Infidelibus, ut Deus dignetur tollere velamen de cordibus eorum: item pro peccatoribus, ut convertantur, & pro justis, ut perseverent in sanctitate. Ratio illorum erat, quia juxta eorum principia ad salutem consequendam, aut ad peccatum vitandum, solum sufficit liberum hominis arbitrium, absque gratia Dei. Eadem fuit doctrina Albigenium, Abailardi, Wicleffi & Hufsi, qui diverso nitebantur fundamento. Albigenes quidem ideo, quia divinam providentiam res humanas curantem sustulerant: reliqui vero idcirco, quia omnia, sive bona sive mala, necessitate absoluta ita evenire aiebant, ut non possint non evenire: ex quo consequebatur, Deum frustra orari. Lutherus quamvis ex instituto non negaverit necessitatem orationis, alicubi tamen adeo extulit solam fidem, & cognitionem propriæ infirmitatis, ut non obscure indicaverit, habenti fidem non esse necessariam ullam orationem. In Concione de Dom. IV. Adventus, a Bucero anno 1525. Latine reddita scribit: *Cor quodlibet quanto hanc sui cognitionem habuerit perfectiorem, tanto ad illud Domino via paratior & instructior est: etiamsi interrim homo nihil nisi vinum Creticum biberet, & ambularet super rosas, neque verbo quidem oraret.* Joannes Monheimus Theologus Lutheranus in suo Catechismo, Tract. de Orat. scribit, Deum id petentibus dare, quod etiam alias daturus esset, si non rogaretur. Ex quo sequitur, orationem non modo necessariam non esse, sed omnino supervacaneam.

280. Novatiani, dicti etiam Cathari, seu mundi, quod superbe atque arroganter jactarent peculiarem quamdam animæ munditiem, dicebant, illicitum esse orare pro se, aut aliquo alio in particulari, ac deter-

mina-

minate, rati orationem debere esse communem, & pro omnibus. Atque hac de causa Waldenses, seu Pauperes de Lugduno, nullam orationem, præter Dominicam, admittebant, eoquod illa pro omnibus ad Deum fundatur. Notus est pariter Wickleffi Articulus, ordine XIX. inter proscriptos a Constantiensi Concilio. *Speciales orationes applicatæ uni personæ per Prælatos, vel Religiosos, non plus prosunt eidem, quam generales, cæteris paribus.*

281. Eustathius Sæculo IV. asserēbat, Templā nullius esse utilitatis: neque aliqua ratione prodesse in Ecclesia Deum orare; quapropter ea evertenda omnino, aut conspurcanda esse, omniaque sacra vasa pretiosa confringenda ac destruenda. Eustathii dementiam adoptarunt Faustus Afer, secta Manichæus, & Waldenses, qui templum Dei mundum universum esse aiebant; adeo ut impium sit ædificare aliquam domum, in qua Dei Majestas coactetur: ac denique Beguardorum progenies, Segarelli & Dulcini discipuli, qui Ecclesiam Deo consecratam aptiorem esse ad orandum negabant, quam stabulum porcorum.

282. Fanatici nostrorum temporum Quietistæ, Michæelis de Molinos Hispani Presbyteri sectatores docent, orantibus, si perfectionis Christianæ studiosi sint, nequidem beatitudinem, & virtutes quibus acquiritur, desiderandas aut petendas esse; sed omnia voluntati divinæ sic permittenda, ut homo veluti passivè se habeat, hoc est, paratus sit vel accipere, si Deus concedat, vel privari, si Deus ita velit, ut patet ex propositionibus Molinosii ab Innocentio XI. damnatis, præcipue ex XIV. *Qui divinæ voluntati resignatus est, non convenit, ut a Deo rem aliquam petat; quia petere est imperfectio, cum sit actus propriæ voluntatis & electionis, & est velle, quod divina voluntas nostræ conformetur, & non quod nostra divinæ. Et illud Evangelii, Petite & accipietis, non est dictum a Christo pro animabus internis, quæ nolunt habere voluntatem. Immo ejusmodi animæ eo perveniunt, ut non possint a Deo rem aliquam petere.*

283. Conclusio I. Sola oratio ad salutem non sufficit, neque continua requiritur. Prob. I. Autoritate Scripturarum, quæ plura nobis præscribunt ad obtinendam salutem. Joan. Cap. III. ait Christus: *Nisi quis renatus fuerit ex aqua & Spiritu Sancto, non potest introire in regnum Dei.* Matth. Cap. XIX. *Si vis ad vitam ingredi, serva mandata.* II. Petri Cap. I. *Satagite, ut per bona opera certam vestram vocationem & electionem faciatis.* Prob. II. Autoritate Patrum, qui non solum orationem, sed alia etiam opera bona ad salutem exigunt, ut ostendimus Num. 273. Prob. III. Ratione. Si Deus salutem nostram alligasset continuæ ac jugi orationi, constitueret consecutionem salutis nostræ in mediis impossibilibus. Quis enim sine cibo, somno, ac potu vivit, aut dormiens &c. orat? Quis domus suæ curam geret, si continua ac numquam interrupta oratione mens in Deo fixa est habenda? Actum plane & conclamatum foret de salute omnium hominum, atque evacuata esset passio Christi. Verum hic error rideri magis quam refutari meretur.

284. Dices Lucæ Cap. XVIII. Christus ait: *Oportet semper orare, & non deficere.* Et Apostolus I. ad Thessalon. Cap. V. *Sine intermissione orate.* Ergo continua ac numquam interrupta oratio est necessaria ad salutem. R. C. A. N. C. Duplex est objecti textus expositio. Prima est S. Augustini Lib. de Hæresibus, Cap. LVII. Particula *semper* non denotat hic continuationem temporis, sed perseverantiam & constantiam in orando, donec exaudiamur, ita ut nulla dies absque oratione fluat. Qui enim singulis diebus, aut dum tempus est orandi, orat, dicitur semper orare. Et sane particulam *semper* in Scripturis hoc sensu quandoque usurpari, ostenditur ex Lib. II. Regum, Cap. IX, in quo legitur David dixisse Miphiboseth Jonathæ filio: *Comedes panem in mensa mea semper.* Quæ verba profecto non denotant, Miphibosethum diu noctuque, absque physica interruptione, ibi comedisse, sed solum statis temporibus. Altera expositio est Sancti Thomæ 1^a 2^a Quæst. LXXXIII. Art. XIV, qui jugem ac con-

Sola oratio ad salutem non sufficit: neque continua requiritur.

continuum ait præscribi orationem, non actu & secundum se ipsam; quod impossibile foret, cum aliis etiam operibus sit vacandum; sed secundum causam, & virtualiter, sive secundum desiderium charitatis; cuius desiderii virtus manet in omnibus, quæ facimus ex charitate. Hinc S. Augustinus Epistola CXXX. alias CXXI. ad Probam ait: *In ipsa fide, spe, & charitate continuato desiderio semper oramus.* Eadem responsio datur ad textum Paulinum, & ad illud Psalmi XXXIII. *Benedicam Dominum in omni tempore: semper laus ejus in ore meo.* Si enim verba hæc intelligenda essent de oratione formali, eaque continua, S. David non dixisset Psalmo CXVIII. v. 62. *Media nocte surgebam ad confitendum tibi.* Et eodem Psal. v. 164. *Septies in die laudem dixi tibi.*

Quamvis
sine ora-
tione sa-
lus obti-
neri ne-
queat.

285. Conclusio II. Oratio ad salutem est necessaria. Prob. I. Autoritate Scripturarum. Lucæ Cap. XVIII. ait Christus: *Oportet semper orare, & non desicere.* Matth. Cap. VII. *Petite, & dabitur vobis: quærите & invenietis; pulsate, & aperietur vobis.* Matth. Cap. XXVI. *Vigilate, & orate ut non intretis in tentationem.* Ad Ephes. Cap. VI. *Galeam salutis assumite; & gladium spiritus, quod est verbum Dei, per omnem orationem & obsecrationem orantes omni tempore in spiritu.* Ad Coloss. Cap. IV. *Orationi instate, vigilantes in ea in gratiarum actione.* I. ad Thessalon. Cap. V. *Sine intermissione orate.* Jacobi Cap. V. *Orate pro invicem ut salvemini.* Ergo oratio divino præcepto est necessaria.

296. Prob. II. Autoritate Patrum. S. Chrysostomus Lib. I. de orando Deum, scribit; *Quemadmodum corpus hoc nostrum, si non adsit anima, profecto mortuum est, ac fœtidum: sic anima nisi se ipsam incitet ad orandum, mortua est, ac misera, & graviter olens.* S. Augustinus Enarrat. in Psalm. CXVIII. Sermone XVII. *Cum quo ergo Deus facit suavitatem, id est, cui propitius inspirat boni delectationem; atque ut apertius id explicem, qui donatur a Deo charitas Dei, & propter Deum charitas pro-*

proximi; profecto instanter orare debet, quo tantum sibi au-
geatur hoc donum, ut non solum pro illo contemnat delecta-
tiones cæteras, sed etiam pro illo quaslibet perferat passio-
nes. S. Gregorius M. Lib. XVIII. *Moralium*, Cap.
III. *Corda cum manibus levant, qui orationem suam operi-
bus roborant. Nam quisquis orat, sed operari desinit, cor
tantum levat. Quisquis vero operatur, & non orat, ma-
nus levat, & cor non levat.* S. Cyprianus in Expo-
sitione Orat. Dominicæ: *Qui fecit vivere, docuit & ora-
re, benignitate ea, qua scilicet & cætera dare & conferre
dignatus est: ut dum prece & oratione, quam Filius do-
cuit, apud Patrem loquimur, facilius audiamur.* Author
librorum de Vocatione Gentium, Lib. II. Cap. ult.
*Quamvis ergo quod statuit Deus, nulla possit ratione non
fieri, Audia tamen non tolluntur orandi, nec per electionis
propositum liberi arbitrii devotio relaxatur: cum implendæ
voluntatis Dei ita sit præordinatus effectus, ut per laborem
operum, per instantiam supplicationum, per exercitia virtu-
tum fiant incrementa meritorum: & qui bona gesserint,
non solum secundum propositum Dei, sed etiam secundum
sua merita coronentur.*

287. Prob. III. Ratione Theologica. Ex una par-
te fieri non potest, ut absque auxilio Dei vitam du-
camus Christiano homine dignam, & Deo placentem;
Christus enim Joan. Cap. XV. ait: *Sine me nihil pote-
stis facere.* Et Apostolus II. ad Cor. Cap. III. *Non quod
sufficientes simus cogitare aliquid a nobis, quasi ex nobis:
sed sufficientia nostra ex Deo est:* ex altera parte Deus
auxilium suum non nisi petentibus, & orantibus pro-
misit. Matth. Cap. VII. *Petite, & dabitur vobis.* Et
Joannis Cap. XVI. *Siquid petieritis Patrem in nomine
meo, dabit vobis.* Lucæ Cap. XI. *Pater vester de cælo
dabit spiritum bonum petentibus se.* Ergo cum omnes te-
neantur salutem æternam procurare, oratio est omni-
bus necessaria.

288. Dices Oratio est inutilis ad consequendam
salutem. Ergo non est necessaria. P. A. Eatenus ora-
tio utilis esse potest, in quantum manifestat alteri o-
rantis

rantis indigentiam, ac desiderium, vel mutare potest ejus voluntatem. Atqui oratio, quæ ad Deum dirigitur, neutrum præstare potest, cum Deus sit omniscius, & immutabilis. Ergo. R. N. A. Ad probat. N. M, quæ solum admittenda est, quando agitur de oratione, quæ ad creaturas dirigitur; has enim oratione nostra docere, disponere, excitare, mutare contendimus, ut nobis bene velint, & faciant. At vero oratio ad Deum aliis de causis est nobis utilis. Nam I. oratione ad Deum edocetur homo, quanta sit ipsius infirmitas & indigentia: sicque verissimam sui cognitionem acquirendo, sibimet ipsi vilescit. II. Per orationem immutatur, disponiturque ad accipienda beneficia, quæ Deus ab aeterno solis orantibus decrevit concedere.

Deus orantibus multa largitur, non concedenda absque oratione.

289. Conclusio III. Deus orantibus multa largitur, quæ absque oratione non concederet. Prob. I. Authoritate Scripturarum. Psal. CV. *Et dixit ut disperderet eos: si non Moyses electus ejus stetit in confractione in conspectu ejus.* Ergo Israelitæ præcibus Moysis ita ab ultimo exitio liberati sunt, ut, si Moyses non orasset, omnes interissent. Matth. Cap. XVII. ait Christus discipulis interrogantibus, cur dæmonium illud a corpore obsepsi ejicere non potuerint: *Hoc autem genus non ejicitur, nisi per orationem & jejunium.* Ergo sine oratione & jejunio non liberantur obsepsi a quibusdam dæmoniis. Jacobi Cap. IV. *Non habetis, propter quod non postulatis; petitis, & non accipitis: eo quod male petatis.* Ergo bene petentes accipimus, quod male petentibus denegatur. Prob. II. Authoritate S. Augustini, qui Lib. de Dono perseverantiæ, Cap. XVI. scribit: *Constat, Deum alia danda etiam non orantibus, sicut initium fidei; alia non nisi orantibus præparasse, sicut usque in finem perseverantiam.* Prob. III. Ratione Theologica. Si Deus petentibus daret id, quod etiam non petentibus concederet, supervacaneæ forent orationes nostræ, frustraquer juberet nos orare, ne intremus in tentationem.

290. Dices. Si Deus quædam beneficia orantibus concedit, quæ alioqui non esset concessurus, mutaretur divina providentia. Atqui id dici nequit. P. M. Deus ab æterno statuit prædestinatos salvare. Ergo si nunc non orantes salvare nollet, mutaretur divina providentia. R. N. M. Ad probat. C. A. N. C. Sicut Deus statuit ab æterno prædestinatos salvare: ita etiam statuit, ut prædestinati per bona opera & orationem salutem suam operentur. Quod si quis orationem penitus negligeret in tempore, numquam ille ab æterno fuisset prædestinatus. Ut paritate utamur, res hæc in temporalibus etiam beneficiis Sole meridiano clarior est. Etiam si Deus ab æterno decreverit, quos fructus, & quantos accedente hominis industria cultura agrorum & vinearum nobis dare velit; nemo tamen sanæ mentis inficias ibit, laborem nostrum necessarium esse, aut divinam providentiam idcirco mutari asseret, quod homo agros & vineas colat.

Quin idcirco mutetur Divina Providentia.

291. Conclusio IV. Licitum & honestum est orare non pro omnibus in genere tantum, sed etiam in specie pro aliquo determinato. Probatur Conclusio a-
 pertis Scripturarum testimoniis. Job Cap. XLII. Deus dixit ad Eliphaz Themanitem: *Iratus est furor meus in te, & in duos amicos tuos. --- Ite ad servum meum Job, & offerite holocaustum pro vobis: Job autem servus meus orabit pro vobis: faciem ejus suscipiam, ut non vobis imputetur stultitia.* Baruch Cap. I. *Et orate pro vita Nabuchodonosor Regis Babylonis, & pro vita Balthasar filii ejus, ut sint dies eorum sicut dies cæli super terram.* Apostolus fidelium preces sæpius pro se imploravit. Ad Rom. Cap. XV. *Obsecro ergo vos, fratres, per Dominum nostrum Jesum Christum, ut adjuvetis me in orationibus vestris pro me ad Deum.* Ad Coloss. Cap. IV. *Orationi instate, vigilantes in ea in gratiarum actione, orantes simul & pro nobis.* I. ad Timoth. Cap. II. jubet orari pro Regibus, & Magistratibus in particulari. *Obsecro igitur primum omnium fieri obsecrationes, orationes, postulationes, gratiarum actiones, pro omnibus hominibus, pro Regibus.*

Licita est oratio pro aliquo in specie.

gibus, & omnibus qui in sublimitate sunt, ut quietam & tranquillam vitam agamus, in omni pietate & castitate. Hoc enim bonum est, & acceptum coram Salvatore nostro Deo. Act. Cap. XII. dicitur: *Et Petrus quidem servabatur in carcere. Oratio autem fiebat sine intermissione ab Ecclesia ad Deum pro eo.* Ipse Christus Dominus Lucae Cap. XXII. peculiariter pro Petro oravit: *Ego autem rogavi pro te, ut non deficiat fides tua.* Et pro Apostolis Joan. Cap. XVII. *Ego pro eis rogo: non pro mundo rogo, sed pro his, quos dedisti mihi: quia tui sunt.* Denique pro crucifixoribus suis Lucae Cap. XXIII. *Pater dimitte illis: non enim sciunt, quid faciunt.* Latronem etiam pro se rogantem Lucae Cap. XXIII. *Domine momento mei, cum veneris in regnum tuum, pro infinita bonitate tua exaudivit, dicens: Hodie mecum eris in Paradiso.* Mirum itaque non est, Ecclesiam sanctosque viros exemplis his instituisse semper, atque etiamnum insistere, precesque Deo offerre non pro omnibus in genere tantum, sed etiam pro aliquibus speciatim.

*Neque per
eam perfe-
cta chari-
tati ali-
quid de-
dit.*

292. Dices. Oratio efficax debet proficisci ex perfecta charitate. Atqui oratio quæ fit pro aliquo speciatim ac determinate, non proficiscitur ex perfecta charitate. Ergo non est efficax. P. m. Charitas perfecta neminem excludit, sed omnes complectitur. Ergo. *Confirm. I.* Oratio Dominica tota est generalis; neque enim dicitur: *Pater mi, qui es in cælis - panem meum da mihi - & ne me inducas in tentationem, sed Pater noster - panem nostrum da nobis hodie - & ne vos inducas &c.* Atque ideo S. Cyprianus, S. Ambrosius, & S. Chrysostomus meliorem esse orationem generalem dicunt, quam specialem. Ergo non licet pro aliquo in specie orare; quia sic orando peteremus aliquid, quod in Oratione Dominica non continetur. *Confirm. II.* Communitas præferenda est singularitati. Ergo oratio generalis præferenda est speciali. R. C. M. N. m. Ad prob. D. A. Omnes complectitur, ita tamen, ut unum alteri præferat pro ratione indigentiae, vel ex motivo gratitudinis, C. A. Ut hoc non fiat, N. A. & Conseq. Quando

do pro aliquo in specie oramus, neminem positive excludimus: neque petimus, ut oratio nostra nemini prosit, præterquam illi pro quo ea peragitur; sed speciale auxilium ac juvamen illi impetrare conamur, futuri minime inviti, si omnibus prosit oratio nostra. Ad *confirmat.* I. C. A. N. C. & rationem additam. Speciatim pro aliquo orantes, neque aliud, neque proprie alio modo petimus, quam Christus in Oratione Dominica nos iusserit petere; sed generalem illam orationem applicamus duntaxat particularibus personis: quod fieri posse tum Christus ipse, tum Apostoli exemplo suo nos docuerunt, ut patet consideranti Scripturarum loca a nobis in probatione allata. Patres citati volunt orationem generalem utiliore esse aliis, atque ipsi etiam oranti, præ oratione speciali; quia dum singuli orant pro omnibus, sequitur ab omnibus orari pro singulis, nisi ordinata charitas, nimirum gravior alterius indigentia, aut debitum gratitudinis specialem exigant orationem. Ad II. *confirmat.* D. A. Si eodem tempore necessitas æqualis occurrat, C. A. Si inæqualis occurrat necessitas, ac particularis persona in majore discrimine versetur, N. A. & Conseq.

293. Conclusio V. Oratio, etiam privata, recte peragitur in Templis, utpote loco aptissimo ad orandum, & decentissimo. Prob. I. Authoritate Scripturarum. II. Paralipom. Cap. VI. ait Salomon in dedicatione Templi Jerosolymitani ad Deum: *Sed ad hoc tantum facta est (domus ista) ut respicias orationem servi tui, & obsecrationem ejus, Domine Deus meus: & audias preces, quas fundit famulus tuus coram te: ut aperiās oculos tuos super domum istam diebus ac noctibus, super locum, in quo pollicitus es ut invocaretur nomen tuum, & exaudires orationem, quam servus tuus orat in eo: & exaudias preces famuli tui, & populi tui Israël.* Ipse Deus II. Paralipom. Cap. VII. ait: *Oculi quoque mei erunt aperti, & aures meæ erectæ ad orationem ejus, qui in loco isto oraverit. Elegi enim & sanctificavi locum istum, ut sit nomen meum ibi in sempiternum, & permaneant oculi mei,*

Oratio, etiam privata, recte in Templis peragitur.

mei, & cor meum ibi cunctis diebus. Ecclesiastici Cap. ult. Cum adhuc junior essem, priusquam oberrarem, quæsiui sapientiam palam in oratione mea. Ante Templum postulabam pro illa, & usque in novissimis inquiram eam. Matth. Cap. XXI. ipse Christus ait: Domus mea domus orationis vocabitur: vos autem fecistis illam speluncam latronum. De Anna filia Phanuelis dicitur Luca Cap. II. Non discedebat de Templo, jejuniis & obsecrationibus serviens nocte ac die.

294. Pro. II. Autoritate Patrum. Tertullianus in Apologetico, Cap. XXXIX. dicit, in Ecclesiam conveniri ad orationem, lectionem, & exhortationem. S. Basilius in Quæstionibus fuse explicatis, Quæst. XL. scribit, ad Ecclesias non oportere accedere propter negotia sæcularia, sed orationis gratia. S. Ambrosius in Orat. de tradendis Basilicis ait, se quotidie solitum ire ad Basilicas Martyrum orationis gratia. S. Chrysostomus Hom. XXX. contra Anomæos: Orare, inquiunt, vel domi possumus: te homo decipis, & magno in errore versaris: nam etsi domi quoque datur orandi facultas, tamen fieri non potest, ut domi tam bene ores, quam in Ecclesia. S. Hieronymus in Epitaphio Marcellæ scribit: Apostolorum & Martyrum reliquias secretis celebrabat orationibus. Patres Concilii Gangrensis Sæculo IV. Can. V. inquiunt: Siquis docet, domum Dei contemptibilem esse, & conventus qui in ea celebrantur, anathema sit. Et Can. VI. Si quis extra Ecclesiam seorsum conventus celebrat, & despiciens Ecclesiam, ea quæ sunt Ecclesiæ, voluerit usurpare, -- anathema sit.

295. Prob. III. Ratione, eaque multiplici. I. Deus speciali modo habitat in Templis, tamquam in domo sua. II. In Templis citius exaudit orationes nostras, ut patet ex promissione Dei facta Salomoni II. Paralipom. Cap. VII. III. Templum, cum sit Deo consecratum, est locus nobilissimus. IV. In Templo omnia accommodata sunt ad excitandam devotionem.

296. Dices. Christus Matth. Cap. VI. ait: Tu autem cum oraveris, intra in cubiculum tuum. II. Joannis

nis Cap. IV. ait ad Samaritanam: *Venit hora, quando neque in monte hoc, neque in Jerosolymis adorabitis Patrem. --- Spiritus est Deus, & qui adorant eum, in Spiritu & veritate oportet adorare.* III. Apostolus I. ad Timoth. Cap. II. ait: *Volo viros orare in omni loco, levantes puras manus.* Ergo Templum nullam habet specialem aptitudinem ad orandum præ alio loco. R. C. A. N. C. Imus locus non intelligendus est de cubiculo materiali, sed spiritali, seu fuga inanis gloriæ; carpit enim ibi Christus Pharisæos, qui in angulis platearum orabant, ut viderentur ab hominibus: docetque per orationes nostras non quærendam esse humanam laudem, sed ut soli Deo placeamus. Si vero de materiali cubiculo verba illa intelligenda esse quis contendat, Respondeo, Christum non absolute, sed comparative loqui: præstare nimirum orationem humilem factam in secreto & decenti loco, remotis arbitris, quam factam in loco publico, atque in ipso etiam Templo ad quærendam humanam laudem, & ambitionis gratiâ. Ad II. R. Christum non loqui ibi de adoratione, ratione loci, cum Petrus & Joannes etiam post adventum Spiritus Sancti in Templum Jerosolymitanum ascenderint ibidem oraturi; sed ratione modi & ritus, quo utebantur Judæi & Samaritani. Sensus igitur verborum Christi est, temporibus novæ Legis Deum non adorandum amplius esse ritibus tantum externis, & umbraticis cæremoniis; sed in interna & spiritali cognitione, & dilectione Dei, in corde contrito & humiliato. Ad III. R. locum illum nobis potius favere. Loquitur enim ibi Apostolus de oratione publica, ad quam convenire vult fideles in omni loco, non in una tantum urbe, ut Judæi Jerosolymis, sed in omni loco precibus publicis dicato, id est in Ecclesiis, levantes ad Deum manus puras a forde peccati. Quod si etiam adversariis concederetur, Apostolum loqui de oratione privata, plus ex eo textu exsculpere non possent, quam non solum in Ecclesia, quæ præcipua est domus orationis, sed etiam in omnibus alijs locis licitum esse orare Deum.

Quæ ad
salutem æ-
ternam
pertinent,
determina-
te sunt pe-
tenda.

297. Conclusio VI. Quædam determinate a Deo peti debent, ut vita æterna, eaque quæ ad illam obtinendam conducunt. Prob. I. Autoritate Scripturarum. Psal. XXVI. dicitur: *Unam petii a Domino, hanc requiram, ut inhabitem in domo Domini omnibus diebus vitæ meæ.* Psal. LXXIX. *Ostende faciem tuam, & salvi erimus.* Psal. CXVIII. *Deduc me in semitam mandatorum tuorum.* Isaia Cap. XLV. *Rorate Cæli desuper, & nubes pluant justum: aperiatur terra, & germinet Salvatorem.* Joan. Cap. XIV. *Dicit ei Philippus: Domine ostende nobis Patrem, & sufficit nobis.* Christus ipse Matth. Cap. VI. docuit Apostolos omnesque homines, salutem æternam, eaque quæ ad illam conducunt, determinate a Deo petere. Sic vos orabit: *Pater noster -- Adveniat regnum tuum. Fiat voluntas tua sicut in cælo, & in terra. Panem nostrum super substantialem da nobis hodie. Et dimitte nobis debita nostra &c.* Ergo, cum juxta S. Cyprianum in Expositione Orat. Dominicæ, non ignorantia solum, sed etiam culpa fit aliter orare quam Christus docuit, certum est petendam esse a Deo tum æternam salutem, tum ea quæ ad illam conducunt. II. Autoritate Ecclesiæ, quæ a Spiritu Sancto instructa, & Christo desponsata, multa determinate a Deo petit. Hac autem oculatiorem se, aut perfectiorem nemo sanæ mentis dicet. III. Ex praxi fidelium, & Sanctorum. IV. Ratione. Deus, quantum est in se, serio vult omnes homines salvos fieri, jubetque ut mandata servemus. Ergo vult nos velle salutem nostram, & mandatorum custodiam. Ut enim S. Augustinus scribit Lib. de Natura & Gratia, Cap. XLIII. *Non igitur Deus impossibilia jubet: sed jubendo admonet, & facere quod possis, & petere quod non possis.*

Indifferen-
tia circa
salutem
inepta &
commenti-
cia est.

298. Dices I. Qui petit a Deo æternam beatitudinem, non est indifferens circa salutem, vel damnationem suam. Atqui qui ita indifferens non est, charitatem non habet perfectam. Ergo. P. m. Charitas perfecta est charitas pura. Ergo excludit proprium interesse. P. C. Charitas perfecta & pura, qua Moyses & Pau-

& Paulus prosequabantur populum Judaicum, proprium ipsorum excludebat interesse: Moyses enim Exodi Cap. XXXII. ad Deum ait: *Aut dimitte eis hanc noxam: aut si non facis, dele me de libro tuo, quem scripsisti.* Et Apostolus ad Rom. Cap. IX. *Optabam ego ipse anathema esse a Christo pro fratribus.* Ergo multo magis charitas erga Deum excludit proprium interesse, sive propriam utilitatem. R. C. M. N. m. Præceptum spei obligat omnes viatores quantumvis perfectos ad actus spei eliciendos. Ergo indifferentia, quam somniant fanatici hi novi Mystici, est prorsus commentitia. Et profecto nullus negabit, hominem perfectum, absque ullo perfectionis suæ detrimento, posse velle ac desiderare proximo beatitudinem æternam, quatenus summum ejus bonum est, quia eum diligit propter Deum. Ergo etiam homo perfectus, absque ullo perfectionis suæ detrimento, potest sibi velle beatitudinem æternam, quatenus suum summum bonum est, quia se ipsum ordinate diligit propter Deum. Ad *prob.* C. A. N. C. Charitas pura non consistit in exclusione proprii interesse supernaturalis, ultimato ad Dei gloriam relati, sed in eo, quod Deum non colamus, nec amemus propter mercedem æternam; immo quod illam velimus propter Deum, ut per eam Deus, propter se super omnia dilectus, magis glorificetur. Ad hujus *prob.* N. A, quod non probant textus citati. Utraque enim illa locutio est figurata, & hyberbolica, quod de materia sit impossibile; fieri enim non potest, ut Deus quem semel prædestinavit, postea reprobet: & vehementissimum indicat affectum, quo uterque populum suum complectebatur.

299. Dices II. Apostolus ad Rom. scribens Cap. VIII. ait: *Quid oremus, sicut oportet, nescimus.* Ergo nihil determinate a Deo petendum est, qualecunque illud sit. R. Nescire nos quandoque quid a Deo petendum sit; at non semper. Æternam beatitudinem, remissionem peccatorum, observantiam mandatorum, majorem Dei gloriam, auxilium congruum & efficax absolute a Deo petere debemus; bona vero temporalia,

*Bona temporalia
petenda
recte petuntur sub
conditione.*

& cætera præsentis vitæ subsidia non nisi conditionate postulanda sunt, non propter se, & ut bona per se delectabilia; sed dumtaxat ut media utcunque necessaria, & propter vitam æternam appetibilia. Atque in his locum habet illud Apostoli: *Quid oremus, sicut oportet, nescimus.* Cum enim bona temporalia sint ex natura sua indifferentia, & prodesse nobis possunt, & nocere si illis abutamur. Quare si illa absolute petamus, merito timendum est, ne Deus iratus concedat nobis obfutura, quæ placatus denegaret.

300. Dices III. Bona temporalia neque absolute, neque conditionate a Deo petenda sunt. Ergo. P. A. Oratio est mentis ascensus in Deum; appetitus vero temporalium est descensus ad inferiora. Ergo bona temporalia non possunt esse materia orationis. *Confirm.* In quarta petitione Orationis Dominicæ nomine *panis* intelligunt Patres solum panem spiritualem, ita S. Hieronymus in Cap. VI. Matth. & in Cap. II. Epist. ad Titum. S. Ambrosius Lib. V. de Sacramentis, Cap. IV. S. Cyrillus Jerosol. Cathechesi mystagogica V. Cassianus Collat. IX. Cap. XXI. & XXIV. S. Petrus Chrysologus in Serm. de Orat. Dom. In septima vero petitione per *malum* Græci Patres intelligunt diabolum, quibus ex Latinis adhærent S. Ambrosius, S. Chrysologus, Cassianus. Tertullianus vero Lib. de Oratione, Cap. VI. & S. Augustinus Epist. CXXX. alias CXXI. ad Probam, intelligunt malum culpæ, sive peccatum. Ergo ex Oratione Dominica inferri nequit, temporalia esse a Deo petenda. R. N. A. Ad *prob.* D. A. Appetitus temporalium est mentis descensus, si temporalia propter se appetantur, C. A. Si propter vitam æternam, N. A. & Conseq. Qui media querit ad vitam æternam consequendam, aliud non intendit, quam ipsam vitam æternam, sicque affectu deorsum non trahitur. Ad *confirm.* R. Sententia Patrum communissima est, Tertulliani, S. Cypriani, S. Gregorii Nysseni, S. Augustini in Enchiridio, Cap. CXV. Bedæ, Theophylacti &c. nomine *panis* intelligi debere alimenta & subsidia necessaria ad vitam tam animæ quam

poris sustentandam; quamquam solus panis spiritualis principaliter & primaria intentione petendus sit. Pari-
ter S. Cyprianus. S. Augustinus, Ven. Beda, alique Patres nomine *mali* intelligunt res omnes malas, ac potissimum præsentis vitæ calamitates, in quas propter peccata incidimus: quibus suffragatur Ecclesiæ auctoritas, quæ verbis illis, *Libera nos a male*, subjungit in Canone Missæ: *Libera nos quæsumus Domine ab omnibus malis, præteritis, præsentibus, Et futuris, --- ut ope misericordiæ tuæ adjuti, Et à peccatis simus semper liberi, Et ab omni perturbatione securi.*

CONTROVERSIA VI.

DE HORIS CANONICIS.

CONTRA HILARUM, WALDENSES, WICKLEFFUM, THABORITAS, PROTESTANTES.

301. *Officium Divinum* est certa ratio publice laudandi precandique Deum mente simul & voce, auctoritate Præsulum Ecclesiæ instituta. Dicitur I. *Certa ratio*, quia non qualibet Dei laudatio est *Officium divinum*, sed certa quadam forma & ordo Psalmorum, hymnorum, & precum, quem omnes sequi debent, qui divinum *Officium* ex obligatione persolvunt. II. *Publice*, quia nomine totius Ecclesiæ, pro bono communi, per publicos Ministros nempe Clericos & Monachos persolvitur. III. *Laudandi precandique Deum*, laudandi nimirum pro beneficiis acceptis, pro accipiendis vero precandi Deum, cui soli proprie divinum *Officium* offertur. Atque in hoc Ecclesiæ triumphantis officium differt ab officio Ecclesiæ militantis, quod triumphans post ultimi judicii diem Deum sit tantum laudatura, militans vero, præter Dei laudem, pro accipiendis etiam beneficiis oret. IV. *Mente simul Et voce*. Voce, quia recitatio Officii divini debet esse actus externus: mente, quia sola vox sine mente nec Deum laudat, nec gratias impetrat, quin immo Deum ad iracundiam magis provocat. V. *Auctoritate Præsulum Ecclesiæ instituta*;

*Officium
Divinum
quid sit?*

quia Ecclesiæ Præsulum est certam orandi formulam præscribere. Hinc Milevitnum II, vel potius Carthaginense anno 418. Can. XII. statuit: *Placuit etiam illud, ut preces, vel orationes seu missæ, quæ probatæ fuerint in Concilio, sive præfationes, sive commendationes, seu manus impositiones ab omnibus celebrentur. Nec aliæ omnino dicantur in Ecclesia, nisi quæ a prudentioribus tractatæ, vel comprobatæ in Synodo fuerint. Ne forte aliquid contra fidem, vel per ignorantiam, vel per minus studium sit compositum.*

Varia ejus nomina.

302. Porro varia nomina Officio divino imposita fuerunt a fidelibus. *Horæ canonice* dicuntur, quia certis horis recitari debent juxta Canones & regulas Sanctorum Patrum. *Breviarium*, quia tamquam in nuce Ilias tum selectissima Scripturarum & Patrum loca, tum ea omnia continentur, quæ nobis facienda sunt. Alii cum S. Columbano in Reg. Cap. VII. S. Bonifacio Moguntino Epist. XVII. S. Gregorio Turonico Lib. I. de Gloria Martyrum, Cap. XI. horarias preces *cursum divinum* dixerunt, vel a cursu Solis desumpto vocabulo, vel quia legendo & cantando percurruntur. A Græcis officium *Canon* vocatur: item *Synaxis*, seu congregatio; quia ad psallendum colliguntur in unum, quibus id muneris demandatum fuerit. In Concilio Agathensi Can. XXX. *Missa* nuncupatur, ab aliis *Psalmodia*, *Agenda*, *Solemnnitas*, atque a S. Benedicto in Reg. Cap. XLIII. & XLVII. *Opus Dei*, quasi per antonomasiam.

Errores Sæctariorum circa officium divinum.

303. Novatores, quibus solemne est verbum Dei spernere, & Ecclesiæ auctoritatem convellere, temperare sibi non potuerunt, quin horas quoque Canonicas, modumque eas publice decantandi improbarent. De Paulo Samosateno Antiochiæ Episcopo Patres Antiochenæ Synodi apud Eusebium Lib. VII. Hist. Eccles. Cap. XXIV. in Epistola sua Synodica ad omnes totius orbis Episcopos scribunt: *Porro quid vobis in memoriam revocemus, quemadmodum Psalmos & cantus, qui ad Domini nostri Jesu Christi honorem decantari solent, tamquam*
recen-

recentiores, *Et a viris recentioris memorie editos explode-
rit: Et in media Ecclesia, solenni Paschatis die, mulieres,
quæ inanes cantilenas, quas si quisquam audiret, plane ex-
horresceret, in ipsius laudem funderent, pararit? Vigilanti-
us non totum quidem Officium Ecclesiasticum, sed
nocturnas vigilias fidelium reprehendebat, ut patet ex
Epistola S. Hieronymi ad Riparium: Quod dicis eum
execrari vigilias, facit Et hoc contra vocabulum suum, ut
velit dormire Vigilantius, Et non audiat Salvatorem di-
centem sic: Non potuistis una hora vigilare mecum? Wal-
denses agebant, tempus frustra teri in dicendis horis
Canonicis; improbabant illarum ordinem, atque obli-
gationem illas recitandi tam in Choro, quam extra il-
lum, rati nullum hominem adstringi debere ad oran-
dum; eoquod oratio, ut Deo placeat, libera esse de-
beat ac voluntaria. Qua in re consentientes habuere
Thaboritas in Bohemia, & Joannem Wicklessum in An-
glia, qui usum horarum Canonicarum prudentem non
esse, atque obligationem illas recitandi contrariam es-
se Christianæ libertati contendebat. Martinus Luthe-
rus Lib. de forma missandi, horas Canonicas vocat *fi-
mulatum Dei cultum*; utque nihil commune cum Eccle-
sia Catholica se habere ostenderet, alias ipse instituit,
sed brevissimas, & ordine perverso. Centuriatores
Magdeburgici Centuria VI. de Pelagio I. loquentes,
ajunt: *Notis Antichristi hic quoque insignis fuit; nam con-
stituit, ut Clerici quotidie Canonicas horas septies cantarent.*
At vero quid hoc convicio insulsum magis aut pueri-
le? Numquid Antichristus, qui jube sacrificium aufe-
ret, ut Daniel testatur, officium instituet statim horis
laudandi Deum?*

304. Cantum Ecclesiasticum, qui in publica Officii
divini recitatione adhibetur, insectatus est Hilarus,
de quo S. Augustinus Lib. II. Retractionem, Cap.
XI. scribit: *Hilarus quidam vir tribunicius laicus Catholi-
cus, nescio unde adversus Dei ministros, ut fieri assolet,
irritatus, morem qui tunc esse apud Carthaginem coeperat,
ut hymni ad altare dicerentur de Psalmorum libro, sive ante
obla-*

*Et Cantum
Ecclesia-
sticum.*

oblationem, five cum distribueretur populo quod fuisset oblatum, maledica reprehensione ubicunque poterat lacerabat, asserens fieri non oportere. Eundem errorem postea secuti sunt Henriciani, Petrobrusiani, Waldenses, & Wicklessus, qui Clericos & Monachos in Templo canentes Sacerdotibus Baal comparandos esse impie asserbat; quia sic clamare videntur, ac si Deus dormiens eos non audiret, nisi inconditis eorum vocibus excitaretur. Centuriatores Magdeburgici, maledicendi libidine Wicklesso suppres, Cent. IX. Cap. VI. Sacerdotes Catholicos pari petulantia Baaliticis vocant. Sed mirum est tantum Ecclesiasticum ab illis reprobari, cum apud Protestantes non Ministelli tantum, sed etiam populus magno clamore in Templis canant. Ex ipsis Protestantibus aliter hac de re sensit Illustris Vir Christianus Wolffius, qui in Institutionibus Juris naturalis, Paragr. CLXXVI. hanc ponit conclusionem: *Ad hymnos componendos & canendos ipsa lege naturali obligamur.*

Usum horarum Canoniarum commendant Scriptura.

305. Conclusio I. Horarum Canoniarum usus, ab Ecclesia ministris publicis præsriptus, saluberrimus est, antiquissimus, Deoque gratissimus. Prob. I. Autoritate Scripturarum. Psalmo CXVIII. dicitur: *Septies in die laudem dixi tibi. -- Media nocte surgebam ad confitendum tibi.* Psal. V. *Mane exaudies vocem meam, mane adstabo tibi, & videbo.* Psal. LIV. *Vespere, & mane, & meridie narrabo & annuntiabo, & exaudiet vocem meam.* Hora III. Apostoli acceperunt orantes Spiritum Sanctum. Act. Cap. II. Hora VI. Petrus ascendit in superiorem ædium partem, ut orationi vacaret. Act. Cap. X. Hora IX. Petrus & Joannes ascendebant in Templum ad horam orationis nonam. Act. Cap. III. Apostolus ad Ephesios Cap. V. ait: *Implemini Spiritu Sancto, loquentes vobismet ipsis in psalmis & hymnis, & canticis spiritualibus, cantantes & psallentes in cordibus vestris Domino, gratias agentes semper pro omnibus, in nomine Domini nostri Jesu Christi, Deo & Patri.*

306. Prob. II. Authoritate Patrum. S. Cyprianus in Exposit. Orat. Dominicæ scribit: *Sed nobis, Fratres dilectissimi, præter horas antiquitus observatas, orandi nunc & spatia & sacramenta creverunt. Nam & mane orandum est, ut Resurrectio Domini matutina oratione celebretur. --- Recedente item sole, ac die cessante necessario rursus orandum est. Nam quia Christus sol verus est, & dies verus, sole ac die sæculi recedente quando oramus & petimus, ut super nos veniat denuo lux, Christi precamur adventum, lucis æternæ gratiam præbiturum.* S. Basilius in Regulis fusius disputatis ad Interrogationem XXXVII. omnium VII. horarum facit mentionem. S. Hieronymus Epist. XXII. ad Eustochium: *Horam tertiam, sextam, nonam, diluculum quoque & vespere nemo est qui nesciat. --- Noctibus bis terque surgendum.* S. Augustinus, aut quicumque alius Serm. LV. de Tempore, nunc CXL. in Appendice: *Rogo vos, ad Vigiliis maturius surgite; ad tertiam, ad sextam, ad nonam ante omnia convenite.* S. Chrysostomus Hom. XIV. in Iam ad Timotheum, describens Monachorum consuetudinem, *Ante lucem, inquit, cum gallus vocem dederit, omnes statim cum reverentia somnum deponentes exsurgunt, excitante eos prælato, & consistunt sanctum constituentes chorum, & statim manus extendentes sacros hymnos decantant.* S. Benedictus in Regula, Cap. XVI. *His horis referamus laudes Creatori nostro, Matutinis, prima, tertia, sexta, nona, vespere, completorio, & nocte surgamus ad confitendum ei.*

307. Prob. II. Ex praxi Fidelium primorum sæculorum, cujus testes sunt, non modo Patres paulo ante laudati, verum etiam ipsi Scriptores Ethnici. Plinius junior Lib. X. Epist. XCVII. ad Trajanum Imp. de Christianis scribit, quod soliti essent statim die ante lucem convenire, carmenque Christo, quasi Deo, dicere secum ipsis. Lucianus Samosatenus, cognomento Atheus, in Philopatore Dialogo Christianos irridet, ad hymnos tota nocte decantandos vigilantes. Ipse Julianus Apostata, teste Hermia Sozomeno Lib. V.

Hist.

*Praxis
Fidelium
primorum
Sæculorum.*

Hist. Eccles. Cap. XV. & Cassiodoro in Historia tripartita Lib. VI. Cap. XXIX. *Considerans Christianismum ex vita bona & conversatione consistere, studuit ubique templa Paganorum constructione & ordine Christianæ religionis ornare, sedibus atque processionibus, paganorumque dogmatibus atque monitionibus. Lectores suæ superstitionis instituit instar Clericorum, ut & horas certas, & dies orationum solemniter observarent.* Certe tanta fuit jam ante multa sæcula, præcipue inter Monachos, psallendi contentio, ut cum viri Sanctissimi probe agnoscerent, singulos non posse tota die insistere cantandis Dei laudibus, magnum numerum Servorum Dei in una Ecclesia congregarint, qui in plures turmas distributi, sibi invicem succederent, ut diu noctuque laudes divinæ in eadem Ecclesia numquam interromperentur. Tale erat institutum Acæmetarum Monachorum, Agaunensium, Centulensium, Cabilonensium, Sandionysianorum, Luxoviensium, Habendensium, Laudunensium &c.

Et ratio. 308. Prob. IV. Ratione. Ex una parte nihil omnino est in toto hoc instituto Horarum Canonicarum, quod jure a Novatoribus reprehendi queat: ex altera parte Ecclesia ad denotanda præcipua Religionis nostræ mysteria, tempora Horarum congrue distribuit, ut ex veteribus illa explicant Rabanus Maurus Lib. de Institutione Clericorum, Amalarius, Rupertus Tuitiensis, & Hugo Victorinus in Libris de Officiis Ecclesiasticis: ex recentioribus Bonartius de Horis Canonicis, & Card. Bona Lib. de Psalmodia divina. Ergo. Præter alias rationes hujus institutionis horarum, quas videre est apud Card. Bona lib. cit. Cap. II. SS. PP. Athanasius, Basilius, Cæsianus &c. assignant memoriam redemptionis nostræ; præcipua enim redemptionis nostræ mysteria his horis completa esse noscuntur. Hora Vespertina, a qua Officium Ecclesiasticum initium sumit, Christus cœnam cum Discipulis suis fecit, Sacrosanctum Eucharistiæ Sacramentum instituit, de Cruce depositus, & sepulcro illatus est. Hora completorii, post orationem in horto, & sanguineum sudorem, a Judæis captus est; Hora matutina
ini-

initum est a sacerdotibus & Judæis consilium perden-
di Christum; Sub auroram Christus a mortuis surre-
xit; Hora prima ductus est ad Pilatum; Hora tertia
descendit Spiritus Sanctus super Apostolos; Hora sexta
Christus crucifixus est; Hora nona Spiritum emisit.

309. Conclusio II. Consuetudo canendi in Tem-
plis Horas Canonicas antiquissima est, justissimisque de
causis ab Ecclesia introducta. Prob. I. Exemplo San-
ctissimorum virorum, qui in divinis Scripturis com-
mendantur. Psalm. CL. dicitur: *Laudate eum in sono
tubæ: laudate eum in psalterio & cithara. Laudate eum
in tympano & choro: laudate eum in chordis & organo.
Laudate eum in cymbalis benesonantibus.* Act. Cap. XVI.
*Media autem nocte Paulus & Silas orantes laudabant De-
um: & audiebant eos, qui in custodia erant. Ubi in Græ-
co textu legitur, hymnos decantantes.* Ad Colloss.
Cap. III. *Docentes & commonentes vosmet ipsos, psalmis,
hymnis, & canticis spiritualibus.* Matth. Cap. XXVI.
Christus & Apostoli, finita cœna, & hymno dicto, exie-
runt in montem Oliveti. Hymnus autem Græca vox La-
tine sonat canticum. Unde S. Augustinus Enarratio-
ne in Psal. LXXII. scribit: *Hymni, laudes sunt Dei cum
canto. Hymni cantus sunt continentes laudem Dei. Si sit
laus, & non sit Dei, non est hymnus. Si sit laus, &
Dei laus, & non cantetur, non est hymnus. Oportet er-
go ut si sit hymnus, habeat hæc tria, & laudem, & Dei,
& canticum.*

*Cantum
Ecclesiasti-
cum com-
mendant
Scriptura*

310. Prob. II. Authoritate Conciliorum, ex quibus *Concilia.*
praxis Ecclesiæ manifeste dignoscitur. Laodicenum
Can. XV. juxta versionem Dionysii Exigui, ita statuit:
*Quod non oporteat amplius præter eos qui regulariter can-
tores existunt, qui & de codice canunt, alios in pulpitu
conscendere, & in Ecclesia psallere.* Carthaginense
IV. Cap. X. *Psalmista, id est, Cantor potest absque scien-
tia Episcopi, sola iussione Presbyteri, officium cantandi su-
scipere, dicente sibi Presbytero: Vide, ut quod ore cantas,
corde credas: & quod ore credis, operibus comprobas.* Aga-
thense in Galliis A. C. 506. celebratum Can. XXX.

ait:

ait: *Et quia convenit ordinem Ecclesiæ ab omnibus æqualiter custodiri, studendum est, ut sicut ubique fit, & post Antiphonas collectiones per ordinem ab Episcopis vel Presbyteris dicantur, & hymni matutini vel vespertini decantentur diebus omnibus, & in conclusione matutinarum vel vespertinarum missarum post hymnos capitella de Psalmis dicantur: & plebs collecta oratione ad vesperam ab Episcopo cum benedictione dimittatur.* Toletanum IV. anno 633. Cap. XIII. *De Hymnis canendis & Salvatoris & Apostolorum habemus exemplum.*

Patres. 311. Prob. III. *Authoritate Patrum.* Ignatius Antiochiæ, ut refert Socrates Hist. Eccles. Lib. VI. Cap. VIII, quæ est in Syria, tertius a Petro Apostolo Episcopus, qui cum Apostolis ipsis multum versatus est, visionem vidit Angelorum Sanctam Trinitatem hymnis alterna vice decantatis collaudantium: & formam canendi in ea visione expressam Ecclesiæ Antiochenæ tradidit. Unde illa traditio in omnibus Ecclesiis recepta est. S. Hilarius in Psal. LXV. ait: *Audiat orantis populi, consistens quis extra Ecclesiam, vocem: spectet celebres hymnorum sonitus.* S. Ambrosius in Orat. de tradendis Basilicis, adversus Ariannorum calumnias cantum Ecclesiasticum hymnosque suos defendit. S. Augustinus adversus Hilarum librum conscripsit, ut ipse testatur Lib. II. Retraçtat. Cap. XI, qui tamen injuria temporum periit. S. Hieronymus in Vita B. Pauli Eremitæ scribit, S. Antonium Abbatem, quamvis solus esset, Pauli exequias celebrasse, psalmos atque hymnos cantando juxta Christianam traditionem. S. Chrysostomus, teste Socrate Lib. VI. Hist. Eccles. Cap. VIII. cantum Ecclesiasticum auxit & ornavit. Rufinus Lib. I. Hist. Eccles. Cap. XXXV. narrat, translationem S. Babylæ Martyris hymnos inter ac psalmos a frequentissimo populo Antiocheno decantatos factam fuisse, inspectante atque indignante impio Juliano Apostata Imperatore.

Ad ratio. 312. Prob. IV. *Ratione.* Cantus Ecclesiasticus plurimas easque eximias affert utilitates. Nam I. accendit audientium animos ad pietatem. Testem adducimus S.

Augu-

Augustinum, qui Lib. IX. Confessionum, Cap. VI. scribit: *Quantum fleui in hymnis & canticis tuis, suave sonantis Ecclesiae tuae vocibus commotus acriter. Voces illae infuebant auribus meis, & eliquabatur veritas in cor meum, & afluabat inde affectus pietatis, & currebant lacrymae, & bene mihi erat cum eis.* Et Lib. X. Cap. XXXIII. *Cum reminiscor lacrymas meas, quas fudi ad cantum Ecclesiae tuae in primordiis recuperatae fidei meae --- magnam instituti hujus utilitatem agnosco.* II. Adhibito cantu facilius atque lubentius laudes Deo persolvuntur, sine tædio, immo cum voluptate. III. Hac ratione omnibus ostendimus, non erubescere nos fidem nostram, cum illam cantu & versibus palam celebrare ac commendare non dubitemus. IV. Perfectum sic omni ex parte redditur obsequium Deo; dum & animo ardentissimis votis, & corpore elata voce laudes ejus celebrare contendimus.

Argumenta contraria refutantur.

313. Objicitur I. contra I. Conclusionem, Abusus Horarum Canonicarum. Usus officii divini multos continet abus. Ergo nequit esse Deo gratus. P. A. I. In Ecclesia Catholica horae Canonicae recitantur, ut merito hujus operis mitigetur ira Dei, utque peccata expientur. II. Non recitantur lingua vernacula, sed Latina, a rudi populo non intellecta; qui idcirco caret solatio Scripturarum, nec vocem suam conjungere potest cum voce Ministrorum Ecclesiae. III. Id officii solis Clericis & Monachis demandatur, exclusis laicis, qui tamen primis saeculis ad recitandas divinas laudes admittebantur. IV. Multa recitantur, quae in Scripturis non continentur, ut v. g. Hymni, Homiliae Patrum, Vitae Sanctorum. V. Clerici & Monachi obligantur ad recitandas Horas Canonicas: quod Christianae libertati repugnat, & naturae orationis, quae libera esse debet. R. N. A. Ad I. R. Horas Canonicas praecipue recitari ad laudandum Deum: quamvis pia hac precatione & veniam delictorum promereri, & poenas peccatis nostris

*Usus officii Divini
nullos continet abusus.*

stris debitas avertere studeamus: quod reliquis etiam piis operibus, præcipue orationi commune est. Ad II. R. justissimis de causis id fieri, quas enumeravimus Tractatu II. Num. 234. & sequent. Ecclesia Latina semper usa est in recitatione Officii divini lingua Latina; Græca semper idiomate Græco, quamvis populi diversissima haberent idiomata, apud quos Ecclesiæ temporibus Apostolorum fundata sunt. Neque asserere quis verisimiliter potest, psalmos & alias orationes versas fuisse ab Apostolis in omnes linguas earum gentium, quibus illi Evangelium promulgaverunt. Rudes tamen idcirco solatio Scripturarum non carent, quas in concionibus sacrisque allocutionibus a Ministris Ecclesiæ explicari sibi audiunt, majori certe fructu, quam si ipsi Scripturas diu noctuque volverent, ac minore periculo, ex ignorantia & imbecillitate humani intellectus in noxios errores labendi. Ad III. R. Quamvis omnium fidelium sit privatim orare; proprium tamen est Ministrorum Ecclesiæ pro populo publice Deum deprecari. Exemplum habemus Ecclesiæ utriusque Testamenti. I. Paralipom. Cap. XV. *Dixit David Principibus Levitarum, ut constituerent de fratribus suis cantores.* Et Cap. XVI. *Constituitque coram Arca Domini de Levitis, qui ministrarent, & recordarentur operum ejus, & glorificarent atque laudarent Dominum Deum Israel.* Act. Cap. VI. foli Apostoli munus suum proprium ac peculiare esse duxerunt, verbo Dei & orationi sine intermissione instare. *Nos orationi & ministerio verbi instantes erimus.* Neque verisimile est, priscis temporibus inconditam multitudinem voces incompositas in decantandis horis Canonicis junxisse; unde nec decor, nec ordo qui præcipitur, valent expectari: cum tamen omnia honeste, & secundum ordinem fieri præcipiat Apostolus I. ad Cor. Cap. XIV. Multo minus probabile est, mulieres cum viris in Ecclesia, saltem ordinarie, cecinisse, quas tacere I. c. v. 34. jubet Apostolus. Et quamquam nostris temporibus laicis omnibus integrum foret Officium divinum cum Ecclesiæ ministris decantare; facile tamen huic privilegio renuntiarent,

rent, aut certe, ob Gregoriani cantus & rubricarum ignorantiam, ad risum magis quam ad pietatem adstantes excitarent. Ad IV. R. id nullam absurditatem involvere; perinde enim est, quibus verbis laudetur Deus, modo pie & decenter id fiat, neque in ipsa oratione error contineatur. Hinc Toletanum IV. anno 633. Cap. XIII. excommunicationis pœnam in eos tulit, qui Ecclesiasticos hymnos propterea respuunt, quod humano studio sint compositi; secus, ut observant Toletani Patres, hymnus qui in fine Psalmorum dicitur, *Gloria Patri, Et Filio Et c.* rejiciendus foret. Ad V. R. Libertatem Christianam consistere in exemptione a servitute diaboli, atque ab oneribus Mosaicæ legis, minime vero in exemptione a lege humana civili vel Ecclesiastica; secus frustra Christus Apostolis potestatem dedisset ligandi & solvendi, & frustra juberet Apostolus fideles obedire Præpositis suis. Æquum autem est, ut Clerici & Monachi, qui a fidelibus aluntur, ac publici Ecclesiæ ministri constituti sunt, ad orandum pro populo Ecclesiæ legibus adigantur. Neque idcirco oratio desinit esse libera; possent enim Ecclesiæ ministri, quamvis non sine gravi piaculo, omittere preces præceptum Ecclesiæ transgredi, quod nunc libere observant.

314. Dices. Ecclesia Catholica saltem Moniales imprudenter & irrationabiliter obligat ad recitandum Latina lingua Officium divinum. Ergo. P. A. Moniales non intelligunt quod orant. Ergo earum oratio omnifructu caret. Ergo est supervacanea. R. N. A. Ad prob. D. A. Non intelligunt quod orant, id est, non assequuntur sensum omnium verborum, C. A. Non sciunt saltem in genere, Psalmis & hymnis a se Deum laudari, N. A. & Conseq. Deus, quem orando precantur Moniales, quocunque demum idiomate illæ utantur, etiam a se non intellecto, earum petitiones atque obsecrationes cognoscit. Sicut igitur qui libellum supplicem peregrina lingua ab amico conscriptum extero Principi offert, de eo unice sollicitus est, ut amicus interpres mentem suam probe assecutus, eoque sermo-

*Moniales
rationabi-
liter obli-
gantur ad
recitan-
dum Lati-
num Bre-
viarium.*

nis genere usus fuerit; qui a Principe facile intelligatur: ita Moniales, dum in Choro Officium divinum recitant, ignorantia Latinæ linguæ minime sollicitas habet. Sciunt enim in genere Deum a se tunc laudari, ac fidiſſimo se uti interprete, Scriptura nimirum & Ecclesia, cujus nomine horas Canonicas persolvunt, ea-que mente, prout intendit Ecclesia. Ergo nihil obstat, quo minus earum mens cum Deo jungatur, atque in pulcherrimos fructus earum oratio efflorescat; licet earum animus, ob linguæ latinæ ignorantiam, peculiari illa suavitate non perfundatur, quæ ex intellectu verborum sensu oritur.

*Cantum
Ecclesiasti-
cum neque
Scriptura*

315. Objic. II. contra II. Conclusionem, Auctoritas Scripturæ. Matth. Cap. VI. ait Christus: *Tu autem cum oraveris, intra in cubiculum tuum, & clauso ostio, ora Patrem tuum in abscondito.* II. Apostolus ad Ephes. Cap. V. scribit: *Cantantes & psallentes in cordibus vestris Domino.* III. I. Reg. Cap. I. Porro Anna loquebatur in corde suo, tantumque labia ipsius movebantur. & vox penitus non audiebatur. Ergo consuetudo decantandi in Templis horas Canonicas non est Deo grata. *Confirm.* Cantoribus his merito dici potest, quod Elias Sacerdotibus Baal III. Reg. Cap. XVIII. *Clamate voce majore: Deus enim est, & forsitan loquitur, aut in diversorio est, aut in itinere, aut certe dormit, ut excitetur.* Credere enim videntur, Deum ubique non esse, & secretas preces non audire. R. C. A. N. C. Imum locum explicavimus Controversia priore, Num. 296. Christus ibi nos monet, ne precibus & orationibus nostris quæramus humanam laudem. II^{do} textu admonemur ab Apostolo, ut non labiis tantum, sed etiam corde Deum laudemus. Et quamvis vocem ibi, aut labia clare non exprimat Paulus, sufficienter tamen indicat per ly, *Cantantes, & psallentes*, quod in proprio sensu fieri non potest absque voce. III^{tus} locus agit de privatis precibus Annæ, quas secretas esse oportere prudentia & sana ratio docent, ne petitiones nostræ alteri quam soli Deo innotescant. Ad *confirmat.* N. A, & rationem additam. Sacerdotes Baal irridentur ab Elia,

non

non quia voce magna clamabant; sed quia inane Dei falsi simulacrum, Baal nimirum invocabant, qui exaudire eos non poterat. Contra Catholici & verum Deum laudant, & elata voce in ejus laudes effunduntur, ut perfectum Deo reddant obsequium corde & ore, & adstantium animos ad pietatem excitent. Profecto si Baalismi nota alta voce psallentibus inuritur, hoc illi convicium haud gravate ferent: socios enim habebunt Davidem Regem, Cantores ante Arcam fœderis a Davide constitutos, Paulum & Silam, immo Apostolos omnes, ipsumque Christum, qui finita cœna, *Et hymno dicto exierunt in montem Oliveti.* Matth. Cap. XXVI.

316. Objic. III. Autoritas Patrum. S. Cyprianus Serm. VI, qui est de Orat. Dominica, ait: *Deus non vocis, sed cordis auditor est. Nec admonendus est clamoribus, qui cogitationes videt. Quod Anna in primo Regum libro Ecclesiæ typum portans, custodit Et servat; quæ Dominum non clamosa petitione sed tacite Et modeste intra ipsas pectoris latebras precabatur.* II. S. Chrysostomus Hom. XIX. in Matt. scribit: *Non gestibus corporis, neque clamoribus vocis, sed intentione optimæ voluntatis orationum vota reddamus.* III. S. Hieronymus Comment. in Cap. V. Epist. ad Ephesios ait: *Audiant hæc adolescentuli, audiant hi, quibus prallendi in Ecclesia officium est, Deo non voce, sed corde canendum, nec in tragædorum modum guttur Et fauces dulci medicamine colliniendas, ut in Ecclesia theatrales moduli audiantur Et cantica; sed in timore, in opere, in scientia Scripturarum.* Ergo Patres cantum omnem exulare volunt ab Ecclesia. R. C. A. N. C. Cyprianus & Chrysostomus de privata tantum oratione loquuntur, non de publica. S. Hieronymus non usum cantus, sed abusum reprehendit, eorum nempe superbiam, qui in hoc toti sunt, ut cantando adstantibus placeant; subjungit enim l. c. *Sic cantet servus Christi, ut non vox cantantis, sed verba placeant, quæ leguntur.* Cæterum dum cantum Ecclesiasticum, gravem illum & moderatum, a Sectariorum obtreptionibus vindicamus, minime nobis probatur cantus ille mollis ac fractus,

Neque Patres improbant.

ctus, qui Musurgorum intemperantia ac levitate, contra mentem Ecclesiæ, quandoque in Templis auditur: qui sæcularem vanitatem, ac Theatri licentiam redollet, & fideles ad choreas magis, quam ad pietatem excitat.

CONTROVERSIA VII.

DE JEJUNIO ECCLESIASTICO, ET DELECTU CIBORUM.

CONTRA EUSTATHIUM, ÆRIUM, IOVINIANUM, WAL-
DENSEM, BEGUARDOS, PROTESTANTES.

*Quid sit je-
junium Ec-
clesiasti-
cum?*

317. *Jejunium Ecclesiasticum*, de quo solo in præsen-
tiarum nobis sermo est, dicitur abstinencia a pluribus
refectionibus, certoque ciborum genere secundum Ec-
clesiæ regulas. Nomine cibi ea intelliguntur, quæ apta
sunt ad alendum corpus, sive per modum cibi solidi
sumantur, ut panis, caro, ova &c. sive per modum
potus, ut lac, mel &c. Nomine potus ea veniunt, quæ
non ad alendum corpus referuntur, sed ad juvandam
digestionem, vel sitim restinguendam, ut sunt vinum,
aqua, cerevisia. Quæ ad morbos pellendos ordinantur,
nec cibi, nec potus, sed pharmaca nominantur. Præ-
ceptum jejunii Ecclesiastici tria includit. I^{mo} unicum
refectionem, II^{do} abstinenciam a carnibus, III^{tio} tem-
pus pro unica refectione præscriptum. Notio potissi-
ma jejunii, juxta communem omnium Gentium existi-
mationem, sita est in unica refectione, cujus hora pri-
mis Ecclesiæ sæculis fuit vespertina, id est, post solis
occasum saltem tempore Quadragesimæ; dein hora no-
na, demum hora sexta, quæ est meridiana, ita ut a
media nocte qua incipit dies naturalis, usque ad me-
diam noctem qua dies finitur, unica sumatur plena re-
fectio sub meridiem ejus diei: qui mos ad finem Sæculi
XIV. introductus, & hucusque ab Ecclesia est tolera-
tus. Quamvis vero potissima notio jejunii sita sit in
unica refectione, tempore tamen jejunii a carnibus sem-
per abstinuere Christiani, ut testantur S. Cyrillus
Jerosol. Catech. IV. S. Basilius Orat. I. de Jeju-
nio,

nio, S. Chrysostomus Hom. VI. in Genes. Theophilus Alexandr. Orat. III. Paschali, S. Augustinus Lib. XXX. contra Faustum, Cap. V. Immo S. Cyrillus, S. Basilius, S. Chrysostomus ac Theophilus scribunt, Orientales populos non a vino minus quam carnibus in Quadragesima abstinuisse; notæque sunt illorum Xerophagiæ in Majori hebdomada, seu cœnulæ, in quibus solus panis, sal, & aqua apponebantur.

318. Utilitas Jejuni uberrima est. Nam I. corpus in servitutem redigit, & carnem crucifigit cum vitiis & concupiscentiis ejus. II. Animam disponit ad orationem, & rerum cœlestium contemplationem. Idcirco dicitur Tob. Cap. XII. *Bona est oratio cum jejunio.* Et S. Chrysostomus Hom. I. in Genes. scribit: *Jejunium leves pennas animæ producit, ut in sublime feratur, & summa contemplari queat, voluptatibusque, & omnibus quæ in hoc mundo habentur suavia, ipsa sit superior.* III. Utile est ad colendum Deum; non quidem ex opere operato, ut nos docere fabulatur Kemnitius, sed ex opere operantis. IV. Ad Deum nobis placandum, Deique beneficia tam sempiterna, quam temporalia impetranda maxime conducit, ut patet ex jejunio Achab III. Reg. Cap. XXI. & Ninivitarum Jonæ Cap. III. Item Judæorum Estheris Cap. IV. & Judith Cap. IV.

319. Omnium celeberrimum est Quadragesimale jejunium, ab Apostolis absque dubio institutum, ut patet tum ex regula illa Augustiniana Lib. IV. de Baptismo contra Donatistas, Cap. XXIV, quia dicitur omnia illa ex Apostolica traditione descendere, quæ in universa Ecclesia observantur, & in nullo Concilio instituta inveniuntur: tum ex testimonio S. Hieronymi in Epist. ad Marcellam: *Nor unam Quadragesimam, secundum traditionem Apostolorum, toto anno, tempore nobis congruo jejunamus.* Et S. Leonis Magni Serm. VI. de Quadrag. *Quod ergo, dilectissimi, in omni tempore unumquemque convenit facere Christianum, id nunc sollicitius est, & devotius exequendum, ut Apostolica institutio quadraginta dierum jejuniis impleatur.* Neque obstat, quod

T. IV. Theol. Dogm. Pol.

S

S. Au-

Quæ ejus
utilitas?

Origo je-
junii Qua-
dragesi-
malis.

S. Augustinus Epist. XXXVI. olim LXXXVI. ad Casulanum scribat: *Ego in Evangelicis & Apostolicis litteris, totoque instrumento quod appellatur Testamentum novum, animo id revolvens, video præceptum esse jejunium. Quibus autem diebus non oporteat jejunare, & quibus oporteat, præcepto Domini vel Apostolorum non invenio definitum.* Loquitur enim ibi S. Doctor de præcepto Domini, vel Apostolorum, non tradito, sed scripto in divinis libris.

Non ubique eadem die inchoabatur.

320. Porro quamvis Quadragesimale jejunium in Ecclesia Dei tam Latina quam Græca semper viguerit, ut antiquissimi testantur Patres; illud tamen non eadem die ab omnibus Ecclesiis inchoabatur. Græci, qui diebus Dominicis & Sabbathi non jejunabant, VII. ante Pascha hebdomadis; Latini vero, apud quos dies Dominica tantum a jejunio eximebatur, VI. hebdomadis jejunii tempus circumscribebant, quibus ad explendum XL. dierum numerum quatuor alii dies adjecti sunt: tempore S. Leonis M. quidem Feria II. IV. VI. & Sabbathum post Dominicam Quinquagesimæ, ut colligitur ex Sermone IV. de Quadragesima a S. Leone habito, haud dubie Dominica Quinquagesimæ, qua Quadragesimale jejunium indixit: *Secunda igitur, & quarta & sexta feria jejunemus: Sabbatho autem apud S. Petrum vigilas celebremus.* Tempore autem S. Gregorii M. feriæ II. substituta est V^{ta} feria, ita ut serie non interrupta, a feria IV. post Quinquagesimæ Dominicam usque ad Pascha, diebus Dominicis exceptis, jejunatum fuerit: qui mos hodie adhuc in Ecclesia Latina perdurat.

Causæ instituendi jejunium Quadragesimale.

321. Causæ instituendi Quadragesimale jejunium, præter communes illas, quas in præfatione Missæ Quadragesimalis Ecclesia indicat: *Qui corporali jejunio vitia comprimis, mentem elevas, virtutem largiris & præmia,* aliæ etiam fuere, justissimæ fane ac prudentissimæ. Imo. Ut Christiani omnes pro negligentis toto anno commissis agant quasi communem & publicam pœnitentiam, & Deum conjunctis studiis, precibus & lacrymis pla-

placare nitantur. Sic enim loquitur S. Leo M. Serm. IV. de Quadrag. *Dum per varias actiones vite hujus sollicitudo distenditur, necesse est de mundano pulvere etiam religiosa corda sordescere: ideo magna divinæ institutionis salubritate provisum est, ut ad reparandam mentium puritatem quadraginta nobis dierum exercitatio mederetur, in quibus aliorum temporum culpas & pia tempora redimerent, & jejunia casta decoquerent.* II. Ut ad sacram Communionem, quam in Paschate Christianorum nullus debet omittere, simul omnes per hoc publicum ac solemne jejunium præparemur, ut scribit S. Hieronymus in Cap. III. Jonæ: *Ipse Dominus, verus Jonas, jejunavit XL. dies, & hæreditatem jejunii nobis derelinquens, ad esum corporis sui sub hoc numero, nostras animas præparat.* III. Ut impleatur, quod Dominus ait Matth. Cap. IX. *Venient autem dies, cum auferetur ab eis Sponsus: & tunc jejunabunt.* Tempore enim Quadragesimæ Ecclesia passionem Dominicam commemorat. IV. Ut ad celebrationem passionis, ac resurrectionis Domini, quæ sunt Mysteria nostræ redemptionis omnium maxima, per hoc solemne jejunium præparemur. V. Ut Christiani non solum pro se, sed etiam pro Catechumenis in Paschate regenerandis jejunent & orent. Atque hanc rationem reddit S. Ambrosius Serm. XXVII. *Sic Elias quadraginta dierum curriculo continuato jejunio, totius mundi longam ac nimiam siccitatem meruit imbrium rore restinguere, & ardentem terrarum sitim cælestis pluviae largitate perfundere. Quod quidem in figuram nostri factum esse cognoscimus, ut nos quoque horum quadraginta circulo dierum jejunantes, Spiritualem baptismatis pluviam mereamur, nostramque jam diu aridam terram cælestis desuper imber enfundat, & longam Gentilium siccitatem lavacri inundatio salutaris irroret. Siccitatem enim & ardorem animæ suæ patitur, quisquis baptismi gratia non rigatur.* VI. Ut Christum, qui caput nostrum est, eo modo quo possumus imitemur. Imitamur autem per hoc jejunium tum passionem Christi, quam hoc tempore ipse pro nobis pertulit, tum etiam illud ipsum jejunium, quod

nostri causa fuscipere dignatus est. Atque hanc rationem plures ex Patribus assignant. S. Hieronymus Comment. in Cap. LVIII. Isaïæ: *Dominus XL. diebus in solitudine jejunavit, ut nobis solemnes jejuniorum dies relinqueret.* S. Chrysostomus Hom. I. in Genes. *Dominus noster Jesus Christus, & ipse XL. dierum jejunio declarato, sic certamen contra diabolum aggressus est, omnibus nobis exemplar dans, ut per illud armemur.* S. Ambrosius Serm. XXXVII. *Hoc fecit causa salutis nostræ, ut rem utilem non solum doceret verbis, sed etiam exemplis instrueret: ut iisdem vestigiis, quibus ad fidem currimus, ad abstinentiam graderemur.*

*Jejunium
hebdoma-
darium.*

322. Præter Quadragesimam alii etiam dies per annum jejuniis consecrabantur: cujus rei rationem reddit S. Leo M. Serm. IV. de Jejunio VII. mensis: *Cum nos oporteat semper studere virtutibus, quidam tamen dies sunt ad castigationem communis observantiæ consecrati; ut anima, quæ terrenis adhuc desideriis implicatur, & curis sæculi impeditur, ex intervallo saltem ad divina respiret, & quia portio divini agri est, dignos cœlestibus horreis offerat fructus.* Bis in hebdomade ubique terrarum jejunabant Christiani, si non a secunda refectioe, saltem a carnibus abstinendo. In Græca quidem, Mediolanensi, & Africana Ecclesia singulis feriis IV. & VI. quod feria IV. Dominus venditus sit, ac feria VI. crucifixus: in Romana vero Ecclesia singulis feriis VI. & diebus Sabbathi tantum, ob Christi sepulturam, & Apostolorum mœrorem. Atque hæc consuetudo diebus Sabbathi & feria VI. abstinendi a carnibus jam a multis sæculis, non in Romana tantum, sed in tota viget Latina Ecclesia.

*Et qua-
tuor Tem-
porum.*

323. Solertissime etiam in Ecclesia Romana observatum fuit jejunium triduanum quatuor Temporum, scilicet I. IV. VII. & X. mensis, nimirum mensibus Martio, Junio, Septembri, & Decembri, tribus potissimum de causis. Imo. Ut etiam Christiani, qui perfectiores Hebræis esse debent, quatuor haberent tempora jejuniis destinata. Hancque rationem assignat S.

Leo

Leo M. Serm. VII. de Jejunio VII. mensis, & Serm. IV. & VI. de Jejunio X. mensis. II. Propter Ordinationes Clericorum, quæ initio quidem mense tantum Decembri fiebant; postea vero crescente numero ordinandorum, etiam reliquis tribus temporibus. De Ordinationibus cum jejunio IV. Temporum conjungendis mentionem facit S. Gelasius I. Epist. VI. ad Episcopos Lucaniæ. III. Ut his temporibus Deo supplicaremus pro frugibus & fructibus terræ: & pro iisdem jam perceptis gratias ageremus. Nam in iis IV. temporibus æris temperies maxime variatur, & fructus omnes ac fruges vel feruntur, aut nascuntur: vel maturantur, aut colliguntur. Rationem hanc affert S. Leo M. Serm. II. V. & VIII. de Jejunio X. mensis.

324. Circa jejunium Ecclesiasticum, & delectum ciborum varii atque inter se pugnantes Hæreticorum errores exorti sunt. Tatianistæ, Encratitæ, Manichæi, Priscillianistæ, docebant, nefas esse quocunque tempore carnibus vesci; quod illæ immundæ essent propter mali principii commixtionem, & quia a malo principio, seu Deo malo creatæ. Sæculo IV. Eustathius assererebat jejunia Ecclesiastica contemnenda esse, quia absque legitima autoritate ab Ecclesia instituta. Quæ in re consentientem sibi habuit Aërium Presbyterum Arianum, quem S. Epiphanius Hæresi LXXV. ita loquentem inducit: *Sed neque jejunium erit ordinatum. Hæc enim Judaica sunt, & sub jugo servitutis. Iusto enim lex non est posita, sed patricidis, & matricidis, & reliquis. Si vero omnino volo jejunare, qualemcunque eligam diem a me ipso, & jejunabo propter libertatem.* Jovinianus & ciborum delectum, seu abstinentiam a carnibus damnabat, dicens, in jejunio nullum esse meritum: & Ecclesiam posse illud instituere negabat, cum illa nequeat præcipere quæ meritoria non sunt, nec ad vitam æternam conducunt. Eadem sensere Waldenses, & nostrorum temporum Sectarii, Lutherus, Calvinus, Melancthon, Brentius, Centuriatores Magdeburgici, Kemnitius, & Erasmus Roterodamus, qui in Epistola ad Episcopum Basileensem scribit: *Paulatim irrepsit*

*Errores
Novatorum.*

repsit consuetudo, quæ diem Veneris pisculentum nobis reddidit. Deinde ubi hoc successit, adjuncta est & Sabbathi dies: nunc etiam Mercurii periclitatur. Ob idque genus observatiunculas videmus homines affligi, & denique mori, si-bique Christianos videri, cum sint Judæi. Beguardi & Fraticelli potestatem jejunia instituendi non omnino Ecclesiæ denegarunt; aiebant enim peccatores tantum, non vero justos qui ad statum perfectionis pervenerunt, ad jejunia Ecclesiastica obligari posse; eoquod justis culpa carentibus nulla infligi valeat pœna, nullisque legibus illi teneantur.

Abstinentia a carnibus ut natura sua immundis, est superstitiosa.

325. Conclusio I. Abstinencia a carnibus, tamquam natura sua immundis, ac pro omni tempore a Deo prohibitis, impia ac superstitiosa est. Prob. I. Authoritate Scripturarum. Apostolus I. ad Timoth. Cap. IV. scribit: Spiritus autem manifeste dicit, quia in novissimis temporibus discedent quidam a fide, attendentes Spiritibus erroris, & doctrinis dæmoniorum, in hypocrisi loquentium mendacium, --- prohibentium nubere, abstinere a cibis, quos Deus creavit ad percipiendum cum gratiarum actione fidelibus, & iis qui cognoverunt veritatem. Quia omnis creatura Dei bona est, & nihil rejiciendum, quod cum gratiarum actione percipitur; sanctificatur enim per verbum Dei & orationem. II. Authoritate Christi & Apostolorum, qui tum alias, tum potissimum in ultima Cœna agnum comederunt, & vinum biberunt. III. Authoritate Conciliorum. Toletanum I. in asserctione fidei ait: Siquis dixerit, vel crediderit, carnes avium vel pecudum, quæ ad escam datæ sunt, non tantum pro castigatione corporis abstinendas, sed execrandas esse; anathema sit. Et Bracarense I. A. 561. Can. XIV. Siquis immundos putat cibos carniū quas Deus in usum hominum dedit; & non propter afflictionem corporis, sed quasi immunditiam putans, ita abstineat ab eis, ut nec olera cocta cum carnibus prægustet, sicut Manichæus & Priscillianus dixerunt; anathema sit. IV. evertendo fundamentum Manichæorum. Falsum est dari plures Deos, unumque ex illis natura sua malum esse, creatorem rerum visibilium, ut ostendimus Tract. I. Controversia I. Ergo.

326. Dices. Apostolus ad Rom. Cap. XIV. scribit: *Bonum est non manducare carnem, & non bibere vinum.* Ergo in lege Evangelica præscripta est abstinencia a carnibus, quia nimirum immundæ sunt. R. C. A. N. C. & rationem additam. Apostolus l. c. non absolute damnat esum carniū, sed tunc tantum, quando aliis occasio scandali datur, ac merito timetur spiritualis ruina proximi, ut manifeste colligitur ex toto Cap. XIV. Aut quando quis ex erronea conscientia judicat illicitum esse esum carniū; quia in eo casu comedendo carnes ageret contra propriam conscientiam. Juvat Apostoli verba adducere: *Scio, & confido in Domino Jesu, quia nihil commune per ipsum, nisi ei qui existimat quid commune esse, illi commune est. Si enim propter cibum frater tuus contristatur, jam non secundum charitatem ambulas. Noli cibo tuo illum perdere, pro quo Christus mortuus est. --- Bonum est non manducare carnem, & non bibere vinum, neque in quo frater tuus offenditur, aut scandalizatur, aut infirmatur.* Ergo juxta Apostolum de se nihil commune est, id est, nihil profanum & immundum, neque carnes Lege Mosaica olim vetitæ: licetque illis vesci, modo quis illarum esum ex erronea conscientia illicitum sibi esse non existimet, aut scandalum aliis non præbeat: cujus quidem temporibus nostris nullum amplius est periculum, utpote Synagoga jam dudum sepulta; erat tamen temporibus B. Pauli, quibus Judæi aliqui, in fide adhuc infirmi, cibos a lege Mosaica vetitos usurpare verebantur, Christianæ libertatis nondum sat gnari. Pari de causa Apostoli præceperunt abstinenciam ab immolatis, sanguine, & suffocato; non quod illa ex natura sua immunda essent, sed ne Judæi ad Christum perducti, qui ab immolatis vehementissime abhorrebant ob longam Mosaicæ legis consuetudinem, forte occasionem fumerent recedendi a fide Christiana, & doctrina Apostolorum, si Gentiles recens Christo authoratos vidissent idolothytiis vesci.

*Jejunium
ex malo fi-
ne inutile
ac pravam
est.*

327. Conclusio II. Jejunium ipsum, & abstinentia a carnibus quamvis de se licitis, si ordinetur ad finem supernaturalem, est opus bonum, utile, honestum, ac Deo placens. Dixi, *Si ad finem supernaturalem ordinetur*. Si enim ad malum finem referatur, v. g. ad vanam ostentationem, jejunium inutile ac pravam erit. Huc enim pertinet præceptum Domini Matth. Cap. VI. ne scilicet cum jejunamus, velimus videri hominibus jejunantes; neque imitetur hypocritas, qui *exterminant facies suas, ut appareant hominibus jejunantes*. Quod tamen, ut recte observat S. Augustinus, aut quicumque alius Serm. LX. de Tempore, nunc LXIII. in Appendice, non ita intelligendum est, quasi non liceat publice jejunium indicere & vidente toto populo cum ipso jejunare; sed *hoc sensu oportet id intelligi, ut nemo pro laude humana, sed pro peccatorum indulgentia, vel pro misericordia divina jejuset*: Et unusquisque interroget conscientiam suam, Et si pro solo Deo facit elemosynam, securus Et publice faciat, ut quicumque viderint, imitentur. Quod si vero jejunium conjuncta non habeat bona opera & charitatem, opus erit neque Deo gratum, neque utile ad salutem. Hinc S. Hieronymus Lib. II. contra Jovinianum scribit: *Non igitur jejunium reprobavit (Deus) sed quale vellet, ostendit; neque enim ventris esuries accepta est Deo, quam lites, Et rapina, Et luxuria destruunt. -- Sanctificate jejunium Et c. ut monstraretur jejunium sanctificari cæteris operibus, Et sanctificatum jejunium curationi proficere peccatorum*. S. Gregorius M. Hom. XVI. in Evang. Per Jöelem dicitur, *Sanctificate jejunium; jejunium quippe sanctificare, est adjunctis bonis aliis dignam Deo abstinentiam carnis ostendere. Cesset ira, sopiantur jurgia; in casum enim caro atteritur, si a pravis suis voluptatibus animus non refrænatur*.

*Ex bona
sine suscep-
tum, opus
bonum est,
et Deo gra-
tium.*

328. Probatur itaque Conclusio sic explicata I. Auctoritate Scripturarum. Tob. Cap. XII. dicitur: *Bona est oratio cum jejunio Et elemosyna magis quam thesauros auri recondere*. Joelis Cap. II. *Convertimini ad me in toto corde vestro, in jejunio, Et in fletu, Et in planctu*. Matth.

Matth. Cap. VI. *Tu autem cum jejunas, unge caput tuum, -- Et Pater tuus, qui videt in abscondito, reddet tibi.* II. ad Cor. Cap. VI. *Exhibeamus nosmet ipsos sicut Dei ministros, in multa patientia, -- in vigiliis, in jejuniis, in castitate.* Act. Cap. XIII. *Ministrantibus autem illis Domino, Et jejunantibus, dixit illis Spiritus Sanctus: Segregate mihi Saulum Et Barnabam in opus, ad quod assumpsi eos. Tunc jejunantes Et orantes, imponentesque eis manus, dimiserunt illos.* Prob. II. *Authoritate Patrum.* S. Basilii Hom. I. de laud. Jejunii, ait: *Jejunium hoc ipsum suo dignum est nomine, quod inedia purgat animæ viscera.* S. Athanasius Lib. de Virginitate: *Amplectamur valde jejunium; magnum eniæ munimentum est. --- Dæmones fugat, malasque cogitationes expellit, Et mentem nitidiorem reddit, Et cor purgatius, Et corpus salubrius, Et ad thronum Dei hominem sistit.* S. Chrysostomus Hom. I. in Genes. *Vellem vos purificata vestra mente, valeque deliciis Et voracitati dicto, matrem omnium honorum, Et pudicitiae aliarumque virtutum omnium Magistram, jejunium inquam, explicitis mentis vestrae sinibus suscipere, ut Et vos majori fruamini voluptate, Et illud congruam vobis suam medicinam conferat.* S. Leo M. Serm. II. de Jejunio X. mensis: *Semper virtuti cibus jejunium fuit; de abstinentia prodeunt castæ cogitationes, rationabiles voluntates, salubria consilia: Et per voluntarias afflictationes caro concupiscentiis moritur, virtutibus spiritus innovatur.* III. *Exemplo Sanctorum, qui sine jejunio ad insignem illam morum sanctimoniam numquam sunt eluctati.* IV. *Ratione. Illud opus bonum est, utile, ac Deo gratum, quod plurimum valet ad subigendam carnem rationi & spiritui. Atqui tale opus est jejunium, ut Patres omnes unanimi voce affirmant. Ergo.*

329. Dices. Delectus ciborum redolet Judaismum, in quo certis cibis vesci non erat integrum. Ergo opus Deo gratum esse nequit. P. A. Apostolus ad Coloss. Cap. II. scribit: *Si ergo mortui estis cum Christo ab elementis hujus mundi: quid adhuc tamquam viventes in mundo decernitis? Ne tetigeritis, neque gustaveritis, neque*
con-

Neque Judaismum redolet.

contractaveritis: quæ sunt omnia in interitum ipso usu, secundum præcepta & doctrinas hominum. Ergo. R. N. A. Multiplex Catholicos inter & Judæos circa delectum ciborum datur discrimen. Nam I^{mo} Catholici non observant leges Judaicas, sed Ecclesiæ constitutiones. II. Non abstinere a quibusdam cibis ob certam rerum præsentium vel futurarum significationem, ut olim Judæi; sed tum ut carnis petulantiam coerceant, tum ut Christum XL. diebus jejunantem aliquo modo imitentur. III. Extra jejunii tempora carnibus omnis generis vescuntur, quod Judæis numquam integrum erat. Ad *probat.* C. A. N. C. Apostolus I. c. non loquitur de abstinence a carnibus certo quodam ac determinato tempore observanda; sed de legalibus cæremoniis, ut scribit S. Hieronymus in Epist. ad Algasiam, Quæst. X. & S. Augustinus Epist. CXLIX. olim LIX. ad Paulinum: aut ut vult S. Chrysostomus in Commentario illius loci, damnat ibi Apostolus Græcorum Philosophorum, ac Simonianorum errorem, qui carnes tamquam natura sua immundas, & nuptias tamquam a Satana inventas execrabantur, ita ut carnes numquam comedi vellent, neque eas tangi sine contaminatione.

*Ecclesia
præcipientem
do jejunium
obligat
fideles in
conscientia.*

330. Conclusio III. Ecclesia præcipiens fidelibus jejunium, obligat illos in conscientia, ac sub gravi peccato ad jejunandum: neque jejunium præcipiendo excedit limites suæ potestatis. Prob. I. Autoritate Scripturarum, quæ generatim jubent fideles omnes obtemperare Ecclesiæ aliquid præcipienti. Matth. Cap. XVIII. *Si Ecclesiam non audierit sit tibi sicut Ethnicus, & Publicanus.* Lucæ Cap. X. *Qui vos audit, me audit: & qui vos spernit, me spernit.* Ad Hebr. Cap. XIII. *Obedite Præpositis vestris, & subiacete eis.* Obligationi autem huic obtemperandi correspondet potestas præcipiendi, quam primarii Pastores a Christo acceperunt, ut Ecclesiam debito modo; suaviter & fortiter regerent ac gubernarent.

331. Prob. II. Autoritate Conciliorum, quæ spernentes, aut violantes jejunia anathemate percellunt, irrefragabili indicio, peccari ab iis graviter, qui jejunia

junia violant, aut ea superbe contemnunt. Cum enim excommunicatio pœna sit inter Ecclesiasticas gravissima, ea ob peccatum leve non infligitur. Gangrense Sæculo IV. Can. XIX. ita statuit: *Siquis eorum, qui in proposito sunt continentiae, præter necessitatem corporalem, & superbiens, jejunia communia totius Ecclesiae putaverit contemnenda, perfectam in sua scientia vindicans rationem; anathema sit.* In Carthaginensi IV. Cap. LXIII. statuitur, ut Clericus, qui tempore jejunii absque inevitabili necessitate jejunium rumpit, inter minores habeatur. Agathense A. 506. Can. XII. statuit: *Placuit, ut omnes Ecclesiae filii, exceptis diebus Dominicis in Quadragesima, etiam die Sabbathi, Sacerdotali ordinatione, & distributionis comminatione jejunent.* Toletanum VIII. A. 653. Capit. IX. ait: *Quisquis absque inevitabili necessitate, atque fragilitatis evidente languore, seu etiam ætatis impossibilitate, diebus Quadragesimæ esum carniū præsumpserit attentare, non solum reus erit Resurrectionis Dominicæ, verum etiam alienus ab ejusdem diei sancta Communione.* In Moguntino A. 813. sub Carolo Magno, Can. XXXV. anathematizantur, qui indictum jejunium insolenter dissolvunt.

332. Prob. III. Authoritate Patrum. S. Epiphanius Hæresi LXXV. contrariam Aërii sententiam, docentis jejunium debere esse liberum, & non ex præcepto servandum esse, pro explorata hæresi habuit. Theophilus Alexandrinus Epist. III. Paschali de illis, qui Ecclesiae jejunia clam violant, scribit: *Nescientes, quod etiamsi conscientiam hominum fugiant: & clausi parietibus vescantur carnibus diebus Quadragesimæ, corripit hujusmodi Dominus, & dicat, Iniquitates magnas faciunt isti, ut recedant a Sanctis meis.* S. Ambrosius Serm. XXV. *Non leve peccatum est fidelibus indictam Quadragesimam a Domino violare, & jejunia consecrata ventris voracitate dissolvere.* S. Basilus Orat. II. de Jejunio: *Omnes æqualiter & præceptum audiunt, & cum gaudio suscipiunt. Angeli sunt, qui per singulas Ecclesias jejunantes describunt. Vide ne propter parvam eduliorum*
volu-

voluptatem damnum incurras, ut ne ab Angelo in numerum adscribaris, & te ipsum criminis desertoris reum ob exercitus lustratore statuas. S. Hieronymus in Epist. ad Marcellam: *Nos unam Quadragesimam secundum traditionem Apostolorum tempore nobis congruo jejunamus. Non quod & per totum annum, excepta Pentecoste, jejunare non liceat; sed quod aliud sit necessitate, aliud voluntate munus offerre.* S. Leo M. Serm. III. de Jejunio X. mensis: *Pium est agere non indictum; impium est negligere prædicatum.* S. Chrysostomus Hom. VI. ad populum Antiochenum ait: *Consuetudo res est tam facilis & expedita, ut adveniente jejunio, etsi millies quis exhortetur, & infinita crucient, & cogant vinum delibare, vel aliud quid jejunii lege non concessum gustare; omnia quis mallet pati, quam prohibitum tangere nutrimentum.* Nicephorus Lib. XVII. Hist. Eccles. Cap. XXXII. narrat, a CPolitano populo adeo severe observatum fuisse delectum ciborum, ut, cum Justinianus Imperator, ob ingentem penuriam rerum ad victum necessariarum, altera Quadragesimæ hebdomada carnes in macellis publice jussisset venum exponi, nullus ex tanto populo repertus sit, qui carnes emere voluisset.

Neque in hoc excedit limites suæ potestatis.

333. Cæterum quod Ecclesia jejunium præcipiendo non excedat limites suæ potestatis, probatur tum negative, quia id ab adversariis ostendi non potest; tum etiam positive. Ecclesia habet potestatem præcipiendi fidelibus actus illos, qui & moraliter sunt possibiles, & plurimum conducunt ad consequendum finem supernaturalem, seu æternam beatitudinem. Atqui jejunium est moraliter possibile, plurimumque conducit ad finem illum obtinendum. Ergo. P. M. tum a pari, quia potestas laica ea omnia præcipere potest quæ & moraliter sunt possibilia, & plurimum conducunt ad finem naturalem, seu ad conservandam publicam quietem & felicitatem. Ergo Ecclesia potest ea præcipere, quæ ad finem supernaturalem conducunt: tum exemplo Apostolorum, qui Act. Cap. XV. Gentilibus ad Christi fidem conversis præceperunt abstinentiam ab immolatis
simu.

simulacrorum, Et sanguine, Et suffocato. Fuisse autem Decretum illud Apostolicum verum præceptum, perspicuum est tum ex verbis B. Lucæ Act. Cap. XV. v. 31. *Perambulabat (Paulus) Syriam Et Ciliciam, confirmandans Ecclesias, præcipiens custodire præcepta Apostolorum Et Seniorum.* Tum ex eo, quod præceptum illud per aliquod tempus religiose adeo custoditum fuerit, ut Christiani mori mallent, quam sanguinem degustare, ut patet ex Apologetico Tertulliani Cap. IX. Minor propositio est certa; jejunium enim adhuc in Ecclesia Catholica observatur, ac longe rigidius observatum semper fuit in antiqua Ecclesia, ob insignem ejus utilitatem, quam Patres uno ore deprædicant. Ergo jejunium est moraliter possibile, plurimumque conducit ad finem supernaturalem obtinendum.

334. Dices I. In antiqua Ecclesia nulla dabatur lex jejunium præcipiens. Ergo posterioribus temporibus Ecclesia præscribendo jejunium excessit limites suæ potestatis. P. A. Montanus tamquam hæreticus damnatus fuit ab Ecclesia, quia quasdam leges instituit de jejunio. Ergo. R. I. N. C. Quamvis in antiqua Ecclesia nulla viguisset lex jejunium præcipiens, potuisset tamen Ecclesia posterioribus temporibus justis de causis legem hanc ferre, quin propterea limites suæ potestatis excederet. Nemo enim sanæ mentis negabit, Principem justis de causis legem ferre posse, a prædecessoribus suis numquam antea latam. R. II. N. A, cujus falsitas tum ex Patribus, tum ex Ecclesiastica Historia manifeste ostendi potest. Ad *probat.* R. Montanum his de causis ab Ecclesia damnatum fuisse. Imo. Quod contra consuetudinem Ecclesiæ, propria auctoritate tres in anno Quadragesimas instituerit, ut testatur S. Hieronymus Epist. LIV. ad Marcellam, a Christianis omnibus necessario observandas. II. Quia jactabat legem hanc latam fuisse per commentitium suum Paracletum, quem perfectius sibi, quam Apostolis communicatum esse ajebat. III. Quia superstitiose, & contra Ecclesiæ morem, suos adigebat ut per aliquot dies illarum trium Quadragesimarum cibus dumtaxat aridis,

aridis, & ab omni humore exsiccatis uterentur, asserens sine hoc jejunio homines carnales esse, animales, Psychicos, numquam vere spirituales.

335. Dices II. Saltem jejunium XL. dierum non viguit in antiqua Ecclesia. Ergo. P. A. I. S. Irenæus in Epistola ad Victorem Pontificem Romanum apud Eusebium Lib. V. Hist. Eccles. Cap. XXIV. ita scribit: *Quidam existimant unico die sibi jejunandum: alii duobus, alii pluribus: non nulli etiam quadraginta horis diurnis ac nocturnis computatis diem suum metiuntur. Atque hæc in observando jejunio varietas non nostra primum ætate nata est, sed longe apud Majores nostros cæpit; qui negligentius, ut verisimile est, præsidentes ex simplicitate & imperitia ortam consuetudinem posteris tradiderunt. Nihilominus tamen & omnes isti pacem inter se retinuerunt, & nos invicem retinemus. Ita jejuniorum diversitas fidem commendat.* II. S. Basilius Orat. II. de Jejunio, indicit publice Quadragesimam: & tamen dies tantum quinque, non autem quadraginta jejunandum esse monet. III. Socrates Lib. V. Hist. Eccles. Cap. XXII. scribit: *Primum igitur jejunia illa quæ ante Pascha fiunt, aliter apud alios observari reperias. Nam qui Romæ sunt, tres continuas hebdomadas ante Pascha, exceptis Sabbatho & Dominico die, jejunant.* Idem testantur Sozomenus Lib. VII. Hist. Eccles. Cap. XIX, & Cassiodorus in Historia Tripartita. R. N. A. Ad I. *prob.* R. S. Irenæum non loqui de ipso quadragesimali jejunio, sed solum de forma illius. Narrat nimirum antiquissimus ille Martyr quosdam Christianos integrum diem absque cibo & potu transegisse, quosdam duos vel plures cum eadem distictione decurrisse; alios per horas quadraginta, quas unius diei solidi instar computabant, jejunium prorogasse, ut numerum dierum quibus continuatim Christus jejunaverat, totidem horarum numero imitarentur. Similia referunt S. Epiphanius in Expositione fidei Catholicæ, S. Hieronymus in Epist. ad Marcellam de laudibus Asellæ, & S. Augustinus Lib. de Moribus Ecclesiæ, Cap. XXXIII. Neque desunt etiam

etiam hodie, præsertim apud Græcos, qui ad initium & finem Quadragesimæ tres dies, aut quadraginta horas impasti transigant. Ad II. R. S. Basilium non loqui de jejuniis totius Quadragesimæ, sed singularum Quadragesimæ hebdomadarum; ac quinque tantum dies numerare, quia Græci nec Sabbatho, nec Dominica jejunabant. Ad III. R. Socratem Novatianum uti alias sapius, ita etiam hic hallucinatum esse, & incertis deceptum rumusculis, alios in errorem traxisse. Quid mirum autem, si Græcus homo tanto locorum intervallo a Romana Urbe agens, Romanæ disciplinæ ignarus fuerit? Porro deceptum fuisse Socratem, Sanctorum Petri Chrysologi, & Leonis M. qui eadem ætate vixerunt, nec non Cassiani supparis etiam authoris testimoniis luculentissime probatur. Illi enim quadraginta dierum jejunium, publica lege, Romæ & in vicinis Ecclesiis, observatum fuisse suis temporibus testantur. Præterea quis sibi persuadeat, Romanos, qui reliquo anni tempore Sabbathi jejunium tam religiose observabant, ut testantur S. Augustinus Epist. XXXVI. olim LXXXVI. ad Casulanum, S. Hieronymus Epist. XXVIII. ad Lucinium Baticum, S. Innocentius I. in Epist. ad Decentium, S. Leo M. Epist. LXXXI. ad Dioscorum Alexandrinum, & Joannes Cassianus Lib. V. de Institutis Cœnobiorum, Cap. X, quis inquam sibi persuadeat, Romanos hujus moris tenacissimos Quadragesimæ Sabbatha a jejuniis absolvisse? Quod si errasse Socratem circa Sabbathi exceptionem a Quadragesimali jejuniis in Romana Ecclesia evidens est: quidni & circa hebdomadarum numerum Quadragesimalis jejunii erraverit? Neque verior evadit Socratis narratio, quod eam Cassiodorus in Historia sua Tripartita adoptarit; constat enim Cassiodorum errata Socratis & Sozomeni æque exscripsisse, ac ea quæ veritati consentanea sunt. Id autem mirum nemini videri debet: qui animadvertit consilium Cassiodori in scribenda Historia Tripartita aliud non fuisse, quam de singulis Dictatoribus deflorata colligere, & cum authoris sui

sui nomine in ordinem collocare, ut ipse monet in ejusdem Historiæ Præfatione.

Lege jejuni tenentur omnes fideles, justi & peccatores.

336. Conclusio IV. Præceptum jejunii non peccatores tantum, sed etiam justos comprehendit. Be-guardicam insaniam rejiciunt Scripturæ & Patres, qui nullo facto peccatores inter & justos discrimine, ab omnibus audiri volunt Ecclesiam, ab omnibus obtemperari legitimis Præpositis, hancque jejunii legem a nemine sine piaculo violari. Vide dicta Tract. III. de Ecclesia, Num. 244. ubi ostendimus, justos æque ac peccatores legibus Ecclesiasticis subijci. Denique quotidiana experientia ostendit, quo etiam in justis caro concupiscat adversus spiritum, ac justos etiam legem sentire in membris suis repugnantem legi mentis. Ergo sicut Apostolus, quamvis usque ad tertium cælum raptus viderit arcana Dei, quæ non licet homini loqui, castigavit corpus suum, & in servitutem redegit, ne posteaquam aliis prædicaverat, ipse reprobus efficeretur: ita multo magis justi concupiscentiam jejuniio aliisque afflictationibus corporis compescere debent. Quamdiu enim in hoc mundo versamur, inimicos domi nostræ habemus, qui velut latrunculi nobis insidiantur.

Atque hæc lex recte atque utiliter lata est ab Ecclesia.

337. Conclusio V. Ecclesia recte atque utiliter præcipit fidelibus jejunium & abstinentiam a carnibus. Prob. I. exemplis e Scriptura petitis. Rechabitarum ex præcepto humano, Jonadab nimirum, abstinebant a vino: placuitque Deo hæc abstinentia, ut manifeste colligitur ex Jeremiæ Capite XXXV. *Domui autem Rechabitarum dixit Jeremias: Hæc dicit Dominus Exercituum Deus Israel: pro eo quod obedistis præcepto Jonadab patris vestri, & custodistis omnia mandata ejus, & fecistis universa, quæ mandavit vobis: propterea hæc dicit Dominus Exercituum Deus Israel: non deficiet vir de stirpe Jonadab filii Rechab, stans in conspectu meo cunctis diebus.* Ergo si Jonadab recte filiis suis abstinentiam a vino præcepit, multo magis Ecclesia recte filiis suis præcepit jejunium, & abstinentiam a carnibus. Alios Scripturarum textus adduximus Num. 328. Prob. II. Ratione. Illud

Illud recte atque utiliter Ecclesia præcipit observari, quod approbatum est usu ac praxi primitivæ Ecclesiæ, quam ipsi adversarii fatentur erroris fuisse expertem: quodque religiosissime omnibus sæculis a fidei orthodoxæ cultoribus est observatum, atque a Patribus semper tamquam pium, rectum & laudabile est commendatum. Atqui hujusmodi est jejunium & abstinencia a carnibus, ut constat ex dictis tota hac Controversia. Ergo.

338. Christianos jejunii tempore a carnibus semper abstinuisse, innumeris Patrum locis comprobari facile posset. S. Basilius Hom. I. de Jejunio ait: *Carnes non edis, a vino abstines, vesperam expectas, ut cibum sumas.* Theophilus Epist. III. Paschali: *Qui autem legum præcepta custodiunt, ignorant vinum in jejniis, carnum esum repudiant.* S. Cyrillus Jerosol. Cathedesi IV. Illuminatorum. *Jejunamus, & a vino carnisque abstinemus.* S. Chrysostomus Hom. I. in Genes. *Hæ veræ feriæ sunt, ubi animarum salus, ubi pax & concordia est, ubi omnis hujus vitæ apparatus abigitur, ubi clamor & tumultus, & coquorum discursus, & pecudum mactationes e medio tolluntur.* S. Hieronymus in Cap. X. Danielis: *Hoc docemur exemplo tempore jejunii a cibis delicatioribus abstinere, nec carnem comedere, nec vinum bibere.* Theodorus in Epitome divinorum Decretorum, Cap. de Abstinencia: *A vino, & ab esu carnum, & ab aliis ejusmodi abstinenciam, non similiter ac hæretici, amplectitur Ecclesia.* S. Fulgentius Lib. de Fide ad Petrum, Cap. III. *Servi Dei in eo quod a vino & carnibus abstinent, non tamquam res immundas refugiunt, sed mundioris vitæ instituta sectantur.* S. Maximus Hom. III. de Jejunio Quadragesimæ: *Jejunium Christianum pacem debet nutrire, non jurgia. Quale autem est illud, quod non verceris carnibus, & de ore tuo omni esca sordidius egreditur maledictum?*

339. Conclusio VI. Jejunium recte ad eum etiam finem refertur, ut per illud, tamquam per bonum opus, mercedem a Deo promereamur; & Deo satisfaciamus.

T. IV. Theol. Dogm. Pol.

T

mus

Per jejunium mercedem a Deo promeremur.

mus pro peccatis. Meritum jejunii prob. I. Autoritate Scripturarum. Christus Matth. Cap. VI. ait: *Tu autem cum jejunas, unge caput tuum, & faciem tuam lava, ne videaris hominibus jejunans, sed Patri tuo, qui est in abscondito: & Pater tuus, qui videt in abscondito, reddet tibi.* Ubi vides a Christo mercedem promitti jejunantibus. II. Autoritate Patrum. S. Cyrillus Hierosolymitanus Catech. IV. Illuminatorum: *Jejunamus, & a vino carnibusque nos abstinemus, non ea quasi piacula abhorrentes, sed mercedem expectantes, ut dum sensibus grata contemnimus, spirituali cœlestique mensa fruamur; utque nunc seminantes cum lacrymis, cum exultatione metamus in sæculo venturo.* S. Ambrosius Epist. LXXXII. ad Ecclesiam Vercellensem: *Audio homines esse qui dicunt, nullum esse abstinentiæ meritum, nullum frugalitatis, -- delirare eos, qui jejunis castigant carnem suam, ut menti subditam faciant; quod numquam fecisset, numquam scripsisset Paulus Apostolus, si deliramentum putasset: gloriatur itaque dicens, Castigo corpus meum, & in servitutem redigo. -- Quæ istos Epicureos nova schola misit? -- Qui sunt hi præceptores novi, qui meritum excludunt jejunii?* S. Basilii Orat. I. de Jejunio: *Jejunium ad venturi sæculi mala fugienda, & assequenda bona utile est.* S. Hieronymus Lib. II. adversus Jovinianum, ex instituto ostendit jejunium esse meritorium. S. Leo M. Serm. I. de Jejunio VII. mensis: *Ut per humilitatem jejunii contra omnes hostes nostros divinum mereamur auxilium.* S. Maximus Hom. III. de Jejunio Quadrag. Eodem numero Moyses per mansiones pervenit ad requiem, quo & nos per jejunia properamus ad cœlum: *Jejunia enim nostra mansiones quædam sunt, per quæ iter spiritualiter facientes, animæ virtutibus ambulamus, & diurno profectu repromissæ nobis terræ viciniores efficimur.*

Ac pro peccatis satisfaciamus. 340. Probatur etiam vis satisfaciendi pro peccatis, quam jejunium habet, I. Autoritate Scripturarum. Jonæ Cap. III. *Vidit Deus opera eorum (nimirum Ninivitarum jejunia & pœnitentiam) quia conversi sunt de via sua mala: & misertus est Deus super malitiam, quam locu-*

locutus fuerat ut faceret eis, & non fecit. I. Reg. Cap. VII. jejunantes filii Israel cum Samuele, Deum placarunt, & victoriam de hostibus retulerunt. III. Reg. Cap. XXI. impius Rex Achab, posteaquam indutus cilicio jejunasset, iram Dei ex parte mitigavit; ait enim Deus ad Eliam: *Quia igitur humiliatus est mei causa, non inducam malum in diebus ejus.* Alia exempla suppeditant Scripturæ Estheris Cap. IV, & Judith. Cap. IV.

341. Prob. II. Authoritate Patrum. Tertullianus Lib. de Jejunii scribit: *Omnium erga victus macerationem hæc est ratio, quia rursum interdicto cibo, & observato præcepto primordiale jam delictum expiaretur: ut homo per eandem materiam causæ Deo satisfaciat, per quam offenderat.* S. Basilius Orat. I. de Jejunio: *Per jejunium satisfacito Deo.* S. Chrysostomus Serm. I. de Jejunio: *Peccevit alius; jejunabit, se ipsum castigans, ut effugiat pœnam.* Et Hom. I. in Genes. *Communis nostri omnium Dominus, veluti pater filios indulgenter amans, cupiens ea, quæ unquam peccavimus, nos abluere; hanc nobis, quæ per jejunium fit, curationem adinvenit.* S. Cyprianus in Tract. de Lapsis: *Iram & offensam ejus, jejunii, fletibus, planctibus, sicut monet ipse, placemus.* S. Ambrosius in Lib. de Elia & jejunio, Cap. III. *Jejunium culpæ mors, excidium delictorum, remedium salutis.* S. Epiphanius in compendiaria doctrina, quæ est ad finem librorum adversus hæreses, *Jejunamus, inquit, non ut beneficium aliquod ei qui pro nobis passus est, exhibeamus, sed ut Domini passionem, quam pro nobis ipse suscepit, ad salutem nostram confiteamur; & ut pro peccatis nostris jejunia nobis apud Deum suppulentur.* S. Hieronymus Comment. ad Cap. III. Jonæ: *Saccus & jejunium arma sunt pœnitentiæ, auxilia peccatorum.* S. Leo M. Serm. VIII. de Jejunio VII. mensis: *Convenientibus in unum propositum tribus studiis, oratione scilicet & elemosyna atque jejunio, præstabitur nobis a misericorde Deo & cohibitio cupiditatum, & exauditio precum, & remissio peccatorum per Dominum Jesum Christum.* S. Bernardus Serm. LXVI. in Cantica: *Ego interdum abstineo,*
T 2
sed

sed abſtinentia mea ſatisfactio eſt pro peccato, non ſuperſtitio pro impietate. Hæc Patrum testimonia tam perspicua sunt, ut Calvinus & Kemnitiſ ſcribere non erubuerint, per hanc doctrinam ſuperſtitionis ſemina jacta fuiſſe, Patreſque ab analogia fidei & norma Scripturarum non parum reſeſſiſſe. At quiſ non videt, antiquiſſimos Sanctiſſimoſque Patreſ Scripturarum ſenſum feliciuſ aſecutoſ eſſe, ac fundamentum fidei & ſalutiſ firmiſ tenuiſſe, quam Novatoreſ heri nati, nec doctrina nec probitate cum Patribuſ conferendi? Fateantur itaque neceſſe eſt Proteſtanteſ, doctrinam Catholicam de jejuniſ doctrinæ Patrum omnino conformem eſſe.

Objectioneſ Proteſtantiuſ.

*Scriptura
eſum car-
nium nul-
libi præci-
pit.*

342. Objicitur I. contra V. Conclusionem, Auctoritas Scripturarum. Chriſtuſ Lucæ Cap. X. juſſit Apoſtoloſ omneſ ciboſ ſine delectu manducare, dicens: *Manducate quæ apponuntur vobiſ.* Cujuſ ipſe rationem dat Matth. Cap. XV. *Non quod intrat in oſ, coinquinat hominem.* II. Apoſtoluſ permiſit Chriſtianiſ eſum omnium ciborum; ſcribit enim I. ad Cor. Cap. X. *Omne quod in macello vœnit, manducate, nihil interroganteſ propter conſcientiam.* Ergo Eccleſia legitime præcipere nequit delectum ciborum, contra ipſiuſ Chriſti, & Apoſtoli conſeſſionem. *Confirm.* Omnia quæ Deuſ creavit, in hominiſ uſum condidit. Ergo cum multa animalia nulluſ aliuſ uſum habeant quam ut comedantur, Eccleſia contra finem a Deo intentuſ agit præcipiendo abſtinentiam a carnibuſ. R. D. A. Chriſtuſ Apoſtoloſ juſſit omneſ ciboſ manducare, qui pro loco & tempore liciti & utileſ ſunt, C. A. Secuſ, N. A. Chriſtuſ citatiſ verbis monet Apoſtoloſ, ne ciboſ ſumptuoſoſ quærant cum hoſpitiſ recipiuntur, ſed appoſitiſ quibuſcunque cibis ſint contenti. Neque dubitari poteſt, quin Chriſtuſ de iis tantuſ cibis loquatur, qui pro loco & tempore liciti & utileſ ſunt. Profecto venenum, ſi apponeretur, aut etiam carneſ porcinæ eo tempore, quo lex Moſaica adhuc vigebat, comedi

medi noluit. Verbis illis, *Quod intrat in os non coinquinat hominem*, Christus superstitionem Judæorum reprehendit, qui existimabant cibos illotis manibus sumptos, nescio quas fordes contrahere, quibus anima quoque inficeretur. Cibi itaque, si secundum se spectentur, præscindendo ab usu vel lege prohibente, hominem non coinquinant. Quod si vero immoderate fumantur, aut contra legem prohibentem, nemo negare potest hominem illis aliquo modo coinquinari, id est, peccatorem constitui, nisi qui crapulam & ebrietatem quæ per os intret, aut primorum parentum nostrorum inobedientiam vetitum fructum absumendo, peccato vacare contendat. Ad II. R. Apostolus verbis illis liberat fideles a nimia cura & sollicitudine, quam quidam anxie nimis adhibebant, dum se teneri putabant inquire, an carnes, quæ in macello venales prostabant, Diis immolatae fuerint. Ad *confirm.* R. I^{mo}. Ergo contra finem a se intentum egit Deus prohibendo Judæis esum carnis porcinae ac leporinae, ac male egerunt Antediluviani abstinendo ab omni carne: pessime autem Apostoli præcipiendo Antiochenis abstinentiam ab immolatis, sanguine, & suffocato? R. II. C. A. N. C. Nam I^{mo} Ecclesia diebus tantum jejunii carnes prohibet, alio tempore illas permittit. II^{do} Omnia animalia, licet eorum carnes non comedantur, alium usum habent; sunt enim, præter alios fines nobis incognitos, a Deo creata, vel ut ex iis pharnaca pro conservanda vel reparanda hominum sanitate præparentur, vel ut ex eorum varietate ac venustate majus accedat huic Universo ornamentum, animusque noster ad laudandum Creatorem rerum omnium incitetur, cujus perfectiones infinitæ ex creaturis elucescunt.

343. Dices I. Apostolus I. ad Timoth. Cap. IV. scribit: *Spiritus autem manifeste dicit, quia in novissimis temporibus discedent quidam a fide, attendentes spiritibus erroris, & doctrinis dæmoniorum, in hypocrisi loquentium mendacium, & cauteriatam habentium suam conscientiam, prohibentium nubere, abstinere a cibis, quos Deus creavit ad percipiendum cum gratiarum actione fidelibus.* Ergo doctrina

na Catholicorum de jejunio & delectu ciborum est doctrina dæmoniorum. R. Protestantiam hanc consequentiam esse omnino dæmoniacam. Apostolus I. c. vaticinatur errorem Ebionis, Tatiani, Marcionis, Manetis &c. qui in Creatoris injuriam a carnibus abstinebant, tamquam natura sua malis & immundis. Ne vero Protestantes dicant, hæc a Catholicis gratis confingi, antiquissimos audiant Patres. Tertullianus Lib. de Jejuniiis, Cap. XV. scribit: *Prædamans (Apostolus) jam hæreticos, abstinentiam perpetuam præcepturos, ad destruenda & despicienda opera Creatoris. Quales inveniam apud Marcionem, apud Tatianum.* S. Hieronymus Lib. II. adversus Jovinianum, agens de hoc Apostoli loco, *Marcionem, inquit, designat, & Tatianum, & cæteros hæreticos, qui abstinentiam indicunt perpetuam, ad destruenda, & contemnenda, & abominanda opera Creatoris.* S. Augustinus Lib. contra Adimantum Manichæum, Cap. XIV. *Apertissime istos (Manichæos) significavit (Apostolus) cum dicit, in novissimis temporibus futuros quosdam prohibentes nubere, abstinentes a cibis quos Deus creavit. Hos enim proprie designat, qui non propterea temperant a cibis talibus, ut aut concupiscentiam suam refrænent, aut infirmitati alterius parcant; sed quia ipsas carnes immundas putant, & earum Creatorem Deum esse negant.* Neque obstat, quod Apostolus dicat, *in novissimis diebus*; nam per dies novissimos intelligit Paulus totum tempus, quod est a Christi adventu usque ad mundi finem; hoc enim tempus I. ad Cor. Cap. X. vocat fines sæculorum: & Petrus Act. Cap. II. de suo tempore exponit, quod Jöel Propheta futurum esse prædixerat in novissimis diebus. Denique S. Joannes Epist. I. Cap. II. sæpius repetit: *Filioli, novissima hora est.*

344. Dices II. Etiam Catholici abstinent a carnibus tamquam natura sua malis ac immundis. Ergo in eodem hærent luto cum Marcione, & Manichæis. P. A. Imo. Aliqui inter illos, ut v. g. Carthusiani, Carmelitæ, Minimi, tota vita a carnibus abstinent. II. Catholici

Neque Catholici a carnibus abstinent, tamquam natura sua malis.

tholici dicunt esu carnum pravas concupiscentias excitari. III. Ecclesia Catholica adhibet benedictiones ad ejusmodi cibos mundandos, in quibus diserte petit, *ut diaboli vis ac potestas a creaturis expellatur, & per consecrationes hoc accipiant, ut sint sanitas mentis & corporis.* Ergo Ecclesia prohibet carnes, quia illas esse natura sua immundas putat. R. N. A, cujus falsitas ex Patribus demonstratur, quos sine manifesta infrunitate impudentia nota Protestantes mendacii arguere nequeunt. S. Augustinus Lib. XXX. contra Faustum, Cap. V. scribit: *Christiani, non hæretici, sed Catholici, edomandi corporis causa, propter animam in orationibus amplius humiliandam, non quod illa esse immunda credant, non solum a carnibus, verum a quibusdam etiam terræ fructibus abstinent; vel semper sicut pauci, vel certis diebus atque temporibus.* Theodoretus in Epitome divinorum Decretorum, Cap. de Abstin. *Avino, & ab esu carnum, & ab aliis ejusmodi abstinentiam, non similiter ac hæretici, amplectitur Ecclesia. Illi enim ab iis tamquam abominandis abstinentum esse censent: Ecclesia autem nihil horum decernit.* S. Isidorus Lib. I. de Offic. Eccles. Cap. XLIV. *Non igitur quia carnes malæ sunt, ideo prohibentur: sed quia earum epulæ carnis luxuriam gignunt: fomes enim ac nutrimentum sunt omnium vitiorum.* Ad I. probat. N. C. Ecclesia neminem cogit Carthusianum aut Carmelitam fieri, sicque tota vita a carnibus abstinere. Ipsi vero hi viri religiosissimi perfectiores primorum temporum Christianos sectando, a Manichæorum dementia toto cælo distant. Nam I^{mo}. carnes non ut ex natura sua immundas execrantur, sed religiose ab illis abstinent, sine contumelia Creatoris, ac pietatis causa, ut carnem spiritui subjiciant. II. Christianos reliquos, qui extra jejunii tempora carnes comedunt, minime damnant; quod certe facerent, si cum Manichæis carnes immundas esse ex natura sua censerent. III. Carnes piscium non infrequenter adhibent: quas tamen non minus ac carnes pecorum & animalium Ebionitæ, Tatianistæ, & Manichæi execrabantur. Ad II. N. C.

Quam-

Quamvis carnes, juxta Patrum doctrinam, seminarium sint libidinum, non tamen sunt, aut a Catholicis censentur ex natura sua immundæ. Non enim a Deo creatæ sunt, vel concessæ ut concupiscentias excitent, sed ut moderate sumptæ corpus reficiant, viresque ad divinum servitium suppeditent. Facile tamen nihilominus contingit, ut immoderate sumptæ multa trahant post se incommoda: unde fit, ut non natura carnum, sed cupiditas fumentis sit culpanda. Ad III. iterum N. C. Ecclesia non benedicit carnes omni tempore, sed ex laudabili consuetudine in Paschate tantum: immo ne Paschali quidem tempore obligationem imponit fidelibus, ut carnes benedici finant; sed etiam tunc sine benedictione earum esum concedit, quod permittere non posset, si eas natura sua immundas esse censeret. Ecclesia igitur benedictiones illas adhibet eo fine, ut fideles post transactum Quadragesimale jejunium ad esum carnum redituri, carnes tamquam novum cibum de manu Domini recipiant, & benedictione Sacerdotali adjuti, iis sobrie & salubriter utantur. Exorcismos vero ideo adhibet, quia non ignorat, insensissimum dæmonem creaturis ex se bonis uti in perniciem hominum: proinde precatur Deum, ne finat res illas a diabolo converti hominibus in malum. Ex quo patet Kemnitianam hanc calumniam omni probabilitate ac fundamento destitui.

345. Dices III. Si Ecclesia Catholica censeret carnes ex natura sua immundas non esse, magisque culpandam esse fumentium cupiditatem, quam naturam carnum, moderatum illarum usum, non vero omnimodam abstinentiam præscribere debuisset. Ergo. P. A. Lautitiæ epularum, quæ ex piscibus parantur, multo majus sunt concupiscentiæ incitamentum, quam carnes v. g. sale conditæ, aut fumo duratæ & arefactæ. Ergo. R. N. A. Immoderatus usus carnum & aliarum rerum per se jam lege divina naturali & positiva prohibitus est, ut adeo opus non sit nova lege Ecclesiastica: neque definire potuit Ecclesia, quantum singulatim cibi, sive ex carnibus sive ex aliis rebus cuilibet

bet sit sumendum, ob diversam hominum complexio-
nem & necessitatem. Hinc cum lex generalis esse de-
beat, certamque singulis cibi quantitatem præscribere
non potuerit Ecclesia, de sola qualitate legem tulit,
certisque temporibus esum carnium omnibus simplici-
ter interdixit. Ad *probat.* T. A. N. C. Ecclesia præci-
piendo abstinentioniam a carnibus, tamquam cibus natura
sua concupiscentiam magis incitantibus, minime præci-
pit lautitias piscium, quæ omnino paucorum sunt: im-
mo serio desiderat, ut fideles abstinentionia a carnibus
non contenti, pretiosis aliis cibus non delectentur.
Quod si quis immoderate lautitias ciborum esurialium
ac piscium consecetur, legem quidem Ecclesiasticam
de jejunio idcirco non violat, cum finis legis sub præ-
ceptum non cadat; at meritum jejunii amittit.

346. Objic. II. contra VI. Conclusionem, Autho-
ritas Scripturarum. Scripturæ rejiciunt & damnant je-
junium. Ergo jejunium esse nequit meritorium, aut
satisfactorium. P. A. Isaia Cap. LVIII. dicitur: *Quare
jejunavimus, & non aspexisti: humiliavimus animas nostras,
& nescisti? Ecce in die jejunii vestri invenitur voluntas ve-
stra. -- Nolite jejunare sicut usque ad hanc diem, ut audia-
tur in excelso clamor vester. Numquid tale est jejunium
quod elegi, per diem affligere hominem animam suam? Num-
quid contorquere quasi circulum caput suum, & saccum &
sinerem sternere? Numquid istud vocabis jejunium, & diem
acceptabilem Domino? Nonne hoc est magis jejunium, quod
elegi? dissolve colligationes impietatis.* Zacharia Cap.
VII. *Cum jejunaretis & plangeretis, --- numquid jejunium
jejunastis mihi? Confirm.* I. ad Timoth. Cap. IV. scri-
bit Apostolus: *Exerce autem te ipsum ad pietatem. Nam
corporalis exercitatio ad modicum utilis est: pietas autem
ad omnia utilis est.* Ubi corporalis exercitationis nomi-
ne intelligitur jejunium. Ergo. R. N. A. Ad *probat.*
C. A. N. C. Deus non jejunium, quod a se præceptum
fuerat, & a sanctissimis viris, Davide, Tobia, Daniele
pie religioseque servabatur; sed modum jejunandi vi-
tuperat, quem Judæi tenebant. Illi quippe, quod pu-
tarent

*Jejunium
neque a
Scriptu-
ris.*

tarent ad obtinendam Dei misericordiam fatis esse corpus inedia affligere, omni flagitiorum genere vitam suam contaminabant. Docet igitur Dominus ingrata sibi esse jejunia, quando a solis cibis, non item a vitiis & sceleribus abstinemus; multumque apud Deum valere jejunia corporis, si mens a peccatis jejundet. Ad confirm. N. C. Per *corporalem exercitationem* Theodoretus, S. Chrysostomus, Theophylactus, Oecumenius Comment. in hunc locum non intelligunt jejunium, sed fluidum confirmandi & corroborandi corpus; ita ut sensus loci illius non alius sit, quam iste: Exerce te more boni Athletæ ad cursum, vel certamen pietatis. Hoc enim vere utilissimum est tum in hac vita, tum in futura. Nam qui vires exercent ad cursum, vel corporale certamen, parum omnino inde lucrantur in hac vita, & in alia nihil omnino.

Neque a Patribus, aut primitiva Ecclesia fuit reprobatum.

347. Objic. III. Autoritas Patrum, & primitivæ Ecclesiæ. Tertullianus Lib. de Jejniis, Montanum defendens, scribit abstinenciam a carnibus & jejunium utilia esse ad Deum placandum, promerendum, illique pro peccatis satisfaciendum: tum vero objicit sibi Catholicorum refutationem, qui locum illum Isaia LVIII. *Nonne hoc est magis jejunium, quod elegi?* atque illum Matth. Cap. XV. *Non quod intrat in os, coinquinat hominem*, proferebant. Ergo Catholici sæculo II. censebant jejunium non esse meritorium, aut satisfactorium. II. S. Chrysostomus Hom. XLVII. in Matth. ait, jejunium in choro virtutum ultimum fortiri locum. III. Eustathius a Gangrensi Synodo damnatus est, licet coram Patribus professus fuisset se abstinere a carnibus, non propter contumaciam, sed propter exercitationem cultus divini. IV. Eusebius Cæsariensis Lib. V. Hist. Eccles. Cap. III. ex Epistola Viennensium & Lugdunensium Christianorum ad Asiaticos fratres, juxta versionem Valesii, ita scribit: *Alcibiades unus ex illorum Martyrum numero, durum & squalidum vivendi genus sectabatur; nullumque omnino cibum admitteus, solo pane & aqua vesci hætenus consueverat, Cumque in carcere positus eandem vitæ rationem vellet retinere,*
Attalo

Altalo post primum quod in Amphitheatro confecerat certamen, revelatum est, non recte, neque ordine facere Alcibiadem, qui & creaturis Dei minime uteretur, & aliis exemplum scandali fieret. Paruit itaque Alcibiades, & cunctis promiscue cibus uti cepit, gratias agens Deo. R. C. A. N. C. Catholici non ipsum jejunium reprehendebant, sed errorem & superbiam Montani, qui contra morem Ecclesiæ suos certis diebus adigebat ad Xerophagias, alias vero ad cibos comedendos crudos & aridos, asferens, eos qui hoc ritu non jejunarent, non spirituales esse homines, sed animales, atque æterna salute excidere.

Ad II. Ipse S. Chrysostomus l. c. mentem suam dilucide explicat; ait enim: Hæc dixi, non quia jejunium mihi non placeat, quod magnis soleo efferre laudibus: sed quia doleo, si cæteris neglectis, satis ad salutem vobis jejunium existimetis, quod in choro virtutum ultimum certe sortitur locum. Præcipuæ namque virtutes sunt charitas, humilitas, misericordia, quæ vel Virginitatem superant.

Ad III. R. Eustathium a Gangrensis Patribus damnatum fuisse, quod Ecclesiastica jejunia contemneret, carni-umque esum, etiam extra Quadragesimam & jejunii tempora, semper illicitum esse doceret, negans salvari eos qui carnes gustarent, ut patet ex ipsa præfatione Concilii. Declaratum est, inquiunt Patres Gangrenses, hos eosdem (Eustathianos) nuptias accusare & docere, quod nullus in conjugali positus gradu, spem habeat apud Deum. --- Jejunia, quæ in Ecclesiis sunt constituta, comedendo contemnere. Quidam eorum esum carni-um illicitum reputare: nolle in domibus conjugatorum orationes facere &c. Et Can. II. Siquis carnem edentem præter sanguinem, & idolis immolatum & suffocatum, cum religione & fide, condemnat, velut spem propter hujusmodi perceptionem non habentem, anathema sit. Hæc ergo abstinentia Eustathianorum non cultus Dei erat, sed turpissimus error ac superstitio.

Ad IV. R. imperite a Protestantibus factum illud, contra Ecclesiasticam de carni-um abstinentia legem proferri; cum ad abstinentiam perpetuam spectet, quæ propter vitandam fratrum offensionem,

sionem, & ex charitatis officio remitti non solum potest, sed etiam debet. Alcibiades enim durum illud vivendi genus perpetuo servaverat, & in carcere positus retinere volebat. Quod scandalum Confessoribus movit, sive quod Montanistarum jam turbas in Ecclesia excitantium Xerophagiæ suspectum facerent austerius illud vitæ genus; sive suspicarentur Confessores ceteri, quod hæreticorum more, qui ciborum quorundam esu hominem pollui dicebant, a carnibus & vino Alcibiades abhorreret; sive periculum esset, ne Judices Ethnici duriores Alcibiadis abstinentiam unum esse e Christianæ legis officiis arbitrarentur, adeoque ceteros a Christiana lege hoc in capite deflectere existimarent. Vide quæ de Jejunio fuse ac erudite disserunt, Gregorius de Valentia Comment. Theolog. Tomo III. Disput. IX. Quæst. II. Card. Berllarminus Tomo IV. Controvers. Lib. II. de Bonis Operibus in particulari. Natalis Alexander Dissertat. IV. in Hist. Eccles. Sæculi II. Franc. Xav. Zech de Jure rerum Ecclesiasticarum, Seçãoe II. Titulo XXI.

ARTICULUS IV. DE LIBERO HOMINIS ARBITRIO, ET STATU NATURÆ PURÆ.

CONTROVERSIA I.

QUÆNAM LIBERTAS NECESSARIA SIT AD LIBERUM
HOMINIS ARBITRIUM?

CONTRA BUCERUM, BAJUM, JANSENIUM.

*Quid sit
libertas a
coactione,
& necessi-
tate?* 348. *Libertas* in genere idem est, ac immunitas a quocunque vinculo & subjectione. Triplex a Patribus & Theologis communiter statuitur. Ima est libertas a culpa, seu peccato, & dicitur libertas gratiæ. IIda a miseriis hujus vitæ, & vocatur libertas gloriæ. IIItia a vi & necessitate: atque hæc libertas naturæ appellatur. Libertas naturæ, de qua sola in præsentiarum nobis sermo est, subdividitur in libertatem a coactione, & ne-

& necessitate. *Libertas a coactione*, quæ etiam libertas spontaneitatis dicitur, est immunitas ab omni violentia, contra propensionem voluntatis illata, qua quis non invitus, sed sponte agit, licet agat necessario. Hoc modo libere Deum amant Beati in cælo, licet necessario ament Summum Bonum clare cognitum. Hoc sensu libera dicitur processio Spiritus Sancti a Patre & Filio, ac ipsius etiam Filii Divini generatio; quia neutra coacta est, sed ex naturali inclinatione, ac necessaria propensione divinæ voluntatis, & intellectus oritur. *Libertas a necessitate*, quæ etiam libertas electionis, arbitrii, indifferentiæ vocatur, est potentia sive facultas, quæ positis omnibus ad agendum prærequisitis, potest agere vel non agere, non tamen ita ut habeat quis potentiam simultatis, id est, conjungendi actum cum illius omissione; sed simultatem potentiæ, id est, simul utramque potentiam tam ponendi quam omittendi actum.

349. Libertas a necessitate subdividitur in libertatem contradictionis & contrarietatis. Libertas *contradictionis*, seu quoad exercitium, est potentia se determinandi per electionem ad utrumlibet ex duobus contradictoriis, qualia sunt v. g. amor, & non amor. Libertas *contrarietatis* est potentia se determinandi per electionem ad utrumlibet ex duobus contrariis, qualia sunt v. g. amor & odium, aut ad utrumlibet ex specie diversis, impossibilibus: qualia sunt v. g. oratio & studium. Atque hæc potestas dicitur etiam diversitatis & specificationis, quippe quæ est ad actus diversæ speciei.

350. Ad essentiam libertatis a necessitate proximæ & expeditæ non requiritur libertas contrarietatis, seu potentia contrarium agendi; sed sufficit libertas contradictionis, seu potentia agendi, & non agendi. Ratio est, quia tota essentia ac natura liberi arbitrii reperitur in Deo, ac Beatis; neque tamen in illis reperitur peccandi potestas. Ergo potentia peccandi, aut agendi contrarium, v. g. malum, non est de essentia liberi arbitrii, sed potius est ejusdem defectibilitas,

Quid libertas contradictionis et contrarietatis?

Libertas contrarietatis non semper requiritur ad libertatem a necessitate.

pro-

proveniens ex defectu intellectus, qui noxio errore malum apprehendit tamquam bonum. Quod si vero extaret præceptum de illa contraria actione ponenda, voluntas proxime expedita esse ad agendum non posset sine libertate contrarietatis. Res patebit in exemplo. Homo qui positivo actu odii Dei peccat, debet liber esse ut absteat ab illo positivo actu odii Dei. At necesse non est, ut proximam & expeditam habeat in eo instanti potestatem eliciendi actum contrarium supernaturalis amoris Dei; quia fieri potest, ut tunc non habeat gratiam, sine qua talem actum amoris Dei elicere nequit: neque enim singulis momentis præsto adest gratia. Quod si vero instaret præceptum eliciendi actum supernaturalis amoris Dei, quia v. g. aliter superari nequit gravis illa tentatio tunc enimvero ad libertatem requiritur potentia contrarietatis, seu eliciendi actum supernaturalis amoris Dei, odio directe oppositum: neque Deus eo in casu denegare posset gratiam, qua adjutus homo actum supernaturalis amoris Dei elicere queat.

Quid requiratur, ut potentia sit proxime expedita ad agendum?

351. Ut potentia sit proxime expedita ad agendum vel non agendum, requiritur quasi duplex actus primus proximus, ita nempe ut adsint omnia requisita ad utrumque extremum libertatis. Constitutiva hujus actus primi proximi sunt, I^{mo} voluntas ipsa, quantum est de se, & ex sua nativa indole potens se ipsam determinare ad suas operationes, & eligere hanc vel illam, prout ipsi libuerit. II^{do}. Omnipotentia divina parata ad concurrendum simul cum voluntate creata ad quoscunque actus ipsi liberos. Decretum, quo omnipotentia paratur ad concurrendum cum voluntate creata, tale est, ut per illud Deus, quantum est in se, velit actus bonos & meritorios; sed libertati creatæ consulendi causa nolit impedire concursum physicum suæ omnipotentiae etiam ad actus malos, quos tamen, quantum est de se, non vult, sed odit, & severe prohibet: Unde ad actus hujusmodi se habet pure permissive. III. Ex parte intellectus requiritur cognitio indifferens, representans non solum objectum, sed etiam moti-

motiva allicientia & absterrentia. IV. Ex parte voluntatis auxilia naturæ & gratiæ ad agendum necessaria. V. Negatio omnis impedimenti per ipsum actum secundum inaufertibilis, sive negatio eorum omnium, quæ voluntatem necessitare ad unum, vel ab altero impedire possent, & quæ per ipsum exercitium libertatis auferri nequeunt.

352. Ut libertatis, ita etiam necessitatis multiplex est apud Theologos acceptio. *Necessitas* in genere est determinatio ad unum, vel ex inclinatione naturali atque ex ipsa natura proveniens: ut v. g. necessitas in homine amandi beatitudinem in communi: vel ex inclinatione adventitia, quæ nempe ab aliqua forma extrinseca naturæ intellectuâ accedit. Talis est in Beatis necessitas amandi Deum intuitive cognitum. Dividitur hæc I. in antecedentem & consequentem. *Necessitas antecedens* est, quæ non consequitur ad rem, sed est causa cur res sit. *Consequens* dicitur, quæ ad rem ipsam consequitur, Utramque sic explicat S. Anselmus Lib. II. Cur Deus homo, Cap. XVIII. *Est præcedens necessitas, quæ causa est, cur sit res; & est necessitas consequens, quam facit res.* Prima opponitur libertati a necessitate, altera vero non opponitur. Antecedens alio etiam nomine vocatur absoluta, quia omne voluntatis imperium liberum antecedit: Consequens vero hypothetica seu conditionata, quia liberam voluntatis determinationem consequitur.

*Necessitas
alia ante-
cedens, a-
lia conse-
quens.*

353. Dividitur II. in perpetuam & transeuntem. *Necessitas immutabilis ac perpetua* dicitur illa, quæ pro omni tempore durat, ut v. g. necessitas in Beatis Deum intuitive cognitum semper amandi. *Mutabilis ac transiens*, quæ non pro omni tempore datur. Talis est flexibilitas voluntatis ad bonum, vel ad malum, qualis in hac vita reperitur, ubi voluntas non est immobiliter bono vel malo affixa & alligata.

*Perpetua;
& transiens.*

354. Dividitur III. in metaphysicam, physicam, & moralem. *Metaphysica* est qua voluntas ita ad unum determinatur, ut absolute nequeat aliud agere. *Physica*, quando naturaliter nequit aliud agere. *Moralis*, quan-

Metaphysica, physica, & moralis.

quando naturaliter quidem aliud potest agere, sed non sine summa difficultate operandi bonum, vel abstinendi a malo: qualis ex inveteratis habitibus contrahitur, cui nihilominus voluntas, quæ sui actus domina semper remanet, aliquando resistit. Ab hac communi & recepta necessitatis moralis significatione deflectunt non nulli Jansenistæ, apud quos vere & proprie dicta necessitas, ex delectatione relative superiori proveniens, cui voluntas numquam resistit, immo neque resistere potest in illis circumstantiis, mitiori ac molliori vocabulo *moralis* appellatur; quia nempe ad mores pertinet, vel ex delectatione nascitur.

*Libertas a
coactione
necessario
convenit
voluntati
humana.*

355. Antequam sententias Catholicos inter & Novatores controversas examinemus, observo Immo, omnium etiam Novatorum confessione, libertatem a coactione absoluta necessario convenire voluntati humanæ, prout hæc facultas rationalis est, & electiva a nobis dicitur suorum actuum, quos ipsa immediate elicit, cum impossibile sit eam quoad actus suos internos cogi. Quod enim cogit, est ab extrinseco contra inclinationem patientis: omne autem voluntarium est ab intrinseco & vitali principio, atque ex inclinatione voluntatis profluit. Sicut ergo impossibile est, ut voluntas volendo non velit: ita impossibile prorsus est eam ad volendum cogi coactione absoluta. Agnovit id ipse Jansenius Lib. VI. de Gratia Christi, Cap. V. scribens: *Implicat contradictionem, ut voluntas non sit libera, sicut implicat, ut volendo non velimus, aut non faciamus quod volumus: hoc est, ut voluntas non sit voluntas.* Dixi coactione absoluta; coactio enim secundum quid, ut cum v. g. metu amittendæ vitæ cariosum membrum præcidimus, aut merces in naufragio projicimus, quæ omnia merentes ac quasi inviti agimus, non est libertati prorsus opposita, sed tantum spontaneo. Voluntas tamen humana potest violentiam & coactionem pati quoad actus, quos potentiis inferioribus sibi subiectis imperat, ut contingit in eo, qui volens moveri per vim cohibetur, vel quiescere volens per vim ad motum impellitur.

356. Observo II. Juxta omnes, non hæreticos modo sed etiam Catholicos, liberum arbitrium creaturæ rationalis versari non posse circa finem ultimum, secundum communem beatitudinis rationem consideratum, ita ut homo beatitudinem suam in genere libere appetat, vel aversetur. Ratio est, quia creatura rationalis ultimum finem suum ex naturali instinctu, adeoque necessario appetit; cum nullus possit velle esse miser, aut malum sibi optare sub ratione mali. Ergo liberum arbitrium non versatur circa finem ultimum formaliter sumptum, seu secundum communem beatitudinis rationem consideratum; sed tantum circa media, quæ ad obtinendum finem ultimum conducunt. Quod si igitur voluntas consideretur ut appetens esse beata, suumque statum habere plenum atque perfectum, aut ut appetens bonum, suumque ultimum finem, in quæ omnia sine electione ac deliberatione, & suo veluti pondere rapitur; tunc non consideratur voluntas ut potentia rationalis & electiva, sed per modum naturæ, quæ necessario ad unum est determinata.

Homo necessario appetit beatitudinem.

357. Quæritur modo an ad liberum arbitrium sufficiat libertas a coactione, an vero requiratur libertas etiam a quacunque necessitate antecedente & inimpedibili: sive, an ad hoc ut actus nobis liber dicatur, sufficiat eum a voluntate elici tamquam a principio intrinseco, juxta illius inclinationem; an vero requiratur etiam ut sit immunis ab omni necessitate antecedente & inimpedibili? Omnes, non Catholici modo, verum etiam quotquot fuere hæretici, qui liberum arbitrium negarunt, persuasum semper habuere, liberum arbitrium sine immunitate a simplici necessitate stare non posse; adeoque illud non solum coactioni, sed etiam necessitati opponi. Certe Calvinus Lib. II. contra Pighium scribit: *Si coactioni opponitur libertas, liberum esse arbitrium & fateor, & constanter assevero, ac pro hæretico habeo, quisquis secus sentiat. Si hoc, inquam, sensu liberum vocetur, quia non cogatur, & violenter trahatur externo motu, sed sponte agatur sua, nihil moror.* Primus omnium Martinus Bucerus in Lib. de Concordia

Statue quaestio- nis.

Errores Novatorum.

dia doctrinæ scripsit, libero arbitrio solam coactionem repugnare, putans hoc modo viam ad concordiam Catholicos inter & Protestantes se reperisse. Quod enim Catholici dicunt hominem esse liberi arbitrii, Bucerus intelligi jubet de arbitrio libero a coactione, non a necessitate: quod vero Protestantes asserunt hominem non esse liberi arbitrii, accipiendum esse docet de arbitrio libero a necessitate, non a coactione. Michael Bajus Doctor Lovaniensis, cum sciret Protestanticam doctrinam, quæ liberum hominibus adimebat arbitrium, a Tridentina Synodo damnatam fuisse, ut fulmen hoc effugeret, atque erroris suspicionem declinaret, docuit hominem quidem a necessitate immunem non esse; neque ideo tamen liberum arbitrium amisisse, eoquod sola coactio libero arbitrio repugnet. Hinc damnata fuit a S. Pio V. & Gregorio XIII. Baji propositio ordine XXXIX. *Quod voluntarie fit, etiamsi necessario fiat, libere tamen fit.* Et LXVI. *Sola violentia repugnat libertati hominis naturali.* Errantem Magistrum secutus est discipulus Cornelius Jansenius, Iprensis postea Episcopus, Lib. VI. de Gratia Christi Servatoris, Cap. V. *Voluntas seu volitio, & libera voluntas idem sunt, sicut velle, & libere velle; & impossibile est, ut velle non sit liberum.* Et Cap. VI. *Ex quibus aperte consentaneum est, omnem omnino voluntatem, quantumcunque ad unum determinatam, nulla tali necessitate, qua dicitur necesse esse ut velit, desinere esse liberam.*

Libertatem a coactione non sufficere ad liberum arbitrium, evincit Scripturarum.

358. Conclusio. Ad liberum arbitrium non sufficit libertas a coactione, sed requiritur libertas a quacunque necessitate antecedente & inimpedibili. Prob. I. Authoritate Scripturarum, quæ ubicunque fere liberum arbitrium describunt, immunitatis a simplici necessitate meminerunt. Paucos textus ex plurimis delibabimus. Genes. Cap. IV. ait Deus ad Cain: *Sub te erit appetitus ejus, & tu dominaberis illius.* Ecclesiastici Cap. XV. dicitur: *Deus ab initio constituit hominem, & reliquit illum in manu consilii sui. Adjecit mandata & præcepta sua. Si volueris mandata servare, con-*
serva-

*servabunt te, & in perpetuum fidem placitam facere. Ap-
posuit tibi aquam & ignem: ad quod volueris, porrige
manum tuam. Ante hominem vita & mors, bonum & ma-
lum: quod placuerit ei, dabitur illi. Et Cap. XXXI. Qui
probatus est in illo, & perfectus est, erit illi gloria aeter-
na: qui potuit transgredi, & non est transgressus; facere
mala, & non fecit. I. ad Cor. Cap. VII. Qui statuit in
corde suo firmus, non habens necessitatem, potestatem autem
habens suæ voluntatis. Quæ verba satis indicant immu-
nitatem ab omni simplici & absoluta necessitate.*

359. Prob. II. Authoritate S. Augustini, qui *S. Augu-
stini.*
Manichæos & Pelagianos oppugnans constanter docuit,
humanam libertatem immunem esse ab omni necessita-
te, seu ineluctabili ad unum determinatione; atque ad
liberum arbitrium requiri, ut homo actum in sua po-
testate habeat. Lib. de Spiritu & littera, Cap. XXXI.
disputans S. Doctor de libertate hominis lapsi, scribit:
*Quid igitur ultra quærimus; quandoquidem hanc dicimus
potestatem, ubi voluntati adjacet facultas faciendi? unde hoc
quisque in potestate habere dicitur, quod si vult, facit; si
non vult, non facit. Lib. V. Operis imperfecti, Num.
XL. Qui enim propterea peccavit, quia voluit, potuit &
nolle peccare: & ita homo creatus est, ut & nolle posset
& velle; & quodlibet horum haberet in potestate. Lib. II.
de Actis cum Felice Manichæo, Cap. III. Esse autem li-
berum arbitrium, atque inde peccare quemque si velit, non
peccare si nolit, non solum in divinis Scripturis, quas non
intelligitis, sed etiam in verbis ipsius Manichæi vestri proba-
Et Cap. IV. Audi ergo de libero arbitrio ipsum Dominum,
ubi duas arbores commemorat, quarum mentionem ipse feci-
sti: audi dicentem, Aut facite arborem bonam, & fructum
ejus bonum, aut facite arborem malam, & fructum ejus
malum. Cum ergo dicit, Aut hoc facite, aut illud facite,
potestatem indicat, non naturam. Nemo enim nisi Deus fa-
cere arborem potest; sed habet unusquisque in voluntate, aut
eligere quæ bona sunt, & esse arbor bona, aut eligere quæ
mala sunt, & esse arbor mala. Enarratione in Psalm.
CXLIV. Laus Dei, in via te constituens, ostendere tibi de-
bit,*

bet, & quid diligas, & quid timeas: & quid appetas, & quid fugias: quid eligas, & quid rejicias. Tempus electionis nunc est, acceptionis postea erit. Enarratione in Psalm LI. Benignitas ante te: iniquitas ante te. Compara, & elige. Et in Psalm. XCI. Satanar autem non cogit invitum: in tua potestate est consentire, aut non consentire. Lib. de duabus Animabus, Cap. XII. Quamobrem illæ animæ quidquid faciunt, si natura, non voluntate faciunt, id est, si libero & ad faciendum & non faciendum motu animi carent; si denique his abstinendi ab opere suo potestas nulla conceditur, peccatum earum tenere non possumus. Lib. XXII. contra Faustum Manichæum, Cap. XXII. Si resistere non voluerunt, innocentes damnantur; si autem valuerunt, nec voluerunt, quid adhuc tam fabulose inducitis naturam mali, cum a propria voluntate sit origo peccati? Hoc enim certe sua culpa, non vi aliena fecerunt, quod cum possent malo resistere, noluerunt. Si ergo noluerunt, voluntatis crimen est, non necessitatis.

*Aliorum-
que Pa-
trum.*

360. Prob. III. Autoritate aliorum Patrum & Scholarum Principum. Clemens Alexandrinus Lib. I. Stromatum ait: Quoniam libera electio & appetitio peccata primum inchoat, jure infliguntur supplicia. S. Gregorius Nazianzenus in Apologetico: Arbitrii libertas parem in utramque partem motum habet. S. Hilarius Comment. in Psal. II. Unicuique nostrum libertatem vitæ, sensumque permisit, non necessitatem in alterutrum affigens. S. Optatus Milevitanus Lib. VII. adversus Parmenianum: Voluntas habet pœnam, necessitas veniam. Homicida scelus potest facere, potest etiam non facere, & cætera hujusmodi, in quibus liberum habetur arbitrium. S. Ambrosius Lib. II. de Fide, Cap. III. Pro voluntatis arbitrio, non pro necessitatis obsequio. S. Joannes Damascenus Lib. II. de Fide Orthodoxa, Cap. XXVI. In nostra potestate sunt ea, quæ liberum est nobis facere, vel non facere. --- Proprie autem in nostra potestate consistunt omnia ea, de quibus deliberamus. Consilium porro ac deliberatio de iis rebus suscipitur, quæ peræque in utramque partem contingere possunt. Peræque autem contingens id est, quod & ipsum
posse.

possemus, & quod ipsi adversatur. Hujus vero electio, penes mentem nostram est. S. Bernardus Lib. de Gratia & Libero arbitrio: Est vero ratio data voluntati, ut instruat illam, non ut destruat. Destruaret autem, si necessitatem ei ullam imponeret, quo minus libere pro arbitrio sese voveret, sive in malum consentiens appetui, sive in bonum, gratiam sequens. Eadem est S. Thomæ Aquinatis doctrina. I. Parte, Quæst. LXXXIII. Art. III. ait: *Proprium liberi arbitrii, est electio: ex hoc enim liberi arbitrii esse dicimur, quod possumus unum recipere alio recusato: quod est eligere.* Electionem vero sic describit Ima. II^{dæ}. Quæst. XIII. Artic. II. *Cum electio sit præacceptio unius respectu alterius, necesse est quod electio sit respectu plurium, quæ eligi possunt: & ideo in his quæ sunt penitus determinata ad unum, electio locum non habet.* Deum ad libertatem requirit exclusionem determinationis ad unum; ait enim Lib. I. contra Gentes, Cap. LXVIII. *Dominium quod habet voluntas supra suos actus, per quod est in ejus potestate velle vel non velle, excludit determinationem virtutis ad unum.* Præceptorem Angelicum sequuntur ceteri Theologi.

361. Prob. IV. Autoritate Pontificum, Pii V. & Gregorii XIII, qui propositiones Baji proscripserunt: & Concilii Tridentini, quod Sess. VI. Cap. V. docet, hominem qui inspirationem divinam recipit, aliquid agere, *Quippe qui illam & abjicere potest.* Et Can. IV. posse hominem gratiæ dissentire, si velit. At qui potest gratiæ dissentire, & inspirationem abjicere, non solum a coactione, sed etiam a necessitate est liber. Præterea Tridentinum Sess. VI. doctrinam Protestantiam rejicit ac damnat circa liberum arbitrium. At vero nequo Lutherus, neque Calvinus umquam negarunt immunitatem hominis a coactione, sed tantum a necessitate. Ergo fateantur necesse est Janseniani, simplici atque inimpedibili necessitate tolli liberum arbitrium; nisi eo petulantia devenerint, ut dicant, definitiones Tridentini Concilii contra Lutherum & Calvinum liberi arbitrii hostes, ineptas fuisse, falsas, aut saltem supervacaneas.

Ac Pontificum & Tridentini auctoritas

*Ratio
Theologi-
ca.*

362. Prob. V. Ratione Theologica. I. Quidquid repugnat electioni, repugnat etiam libero arbitrio. Atqui absoluta necessitas, quamvis sit voluntaria, repugnat electioni: hæc enim est acceptio unius præ alio, sine antecedente necessitate, & intrinseca ad unum determinatione. Ergo. P. M. Liberum arbitrium nihil aliud est quam vis eligendi, ut observat S. Thomas I. Parte, Quæst. LXXXIII. Artic. III. a nobis Num. 359. adductus. II. Liberum arbitrium dicit essentialiter dominium in actus illos circa quos versatur. Atqui dominium in actum stare non potest cum antecedente necessitate, & determinatione intrinseca ad illum. P. m. Voluntas eatenus habet dominium sui actus, quatenus potest de illo pro arbitrio disponere, hoc est, illum producere vel non producere. Atqui si datur antecedens necessitas ac determinatio ad actum, voluntas non potest jam actum illum non producere. Ergo.

*Ad Sequen-
tia.*

363. Prob. VI. Ex sequelis. Si sola libertas a coactione sufficeret ad liberum arbitrium, sequeretur I. quod amor quo Deus se ipsum amat, & quo Beati Deum intuitive cognitum prosequuntur, sit liber eo libertatis genere, quod ad merendum vel demerendum requiritur. Atqui id certo falsum est, quia is non est in potestate operantis. II. Deum Patrem libere genuisse Filium, quia non coactus illum genuit. III. Furiosos, fomniantes, infantes, usum habere liberi arbitrii; cum illi non minus sponte agant, atque adulti rationis compotes. IV. Quæstionem hanc jam a primis sæculis ad nostra usque tempora in Ecclesia agitatam circa liberum arbitrium, inanem fuisse logomachiam, & litem vocabulariam; cum nullus hæreticorum homini libertatem a coactione denegaverit.

Argumenta contraria refutantur.

*Jansenia-
nis non suf-
fragatur
authoritas
Patrum.*

364. Objicitur I. Autoritas Patrum. Patres, præcipue Augustinus, Damascenus, Anselmus &c. necessitatem & coactionem, voluntarium, spontaneum & liberum, cogi & necessitari, pro eodem sumunt. Ergo juxta

juxta Patres per solam immunitatem a coactione salvatur liberum arbitrium. R. C. A. N. C. Patres, atque etiam Theologi illi, qui ante Bajum & Jansenium scripsere, non raro hæc vocabula promiscue usurparunt, ea accipientes non in stricta significatione, quam modo in Scholis habent, sed in latiori sensu, prouti juxta popularem loquendi modum passim etiam nunc adhibentur. Quare voces illæ pro subjecta materia ad illorum mentem, quam in scriptis suis clarissime manifestarunt, exponendæ sunt. Nunc autem Theologi accuratius easdem voces distinxerunt, & in strictiori sensu easdem usurpant, ut Jansenianorum cavillationibus aditum præcludant.

365. Dices I. S. Joannes Damascenus Lib. II. de Fide Orthod. Cap. XXVII. dicit, libertatem nihil aliud esse quam voluntatem. Ergo cum necessitas non lædat voluntatem, neque destruet libertatem. R. C. A. N. C. Voluntas apud Patres & Theologos dupliciter sumitur, nempe prout natura est, ideoque potentia ad unum determinata, & prout est facultas sui ipsius per electionem determinativa: atque in hoc sensu voluntas dicitur libertas. Duplicis hujus acceptionis aperte mentionem facit S. Thomas Quæst. II. de Potentia, Art. III. *Voluntas, in quantum voluntas, cum sit libera, ad utrumlibet se habet: potest enim voluntas agere vel non agere, sic vel sic facere, velle Et non velle. Et si respectu alicujus hoc voluntati non conveniat, hoc accidit voluntati, non in quantum voluntas est, sed ex inclinatione naturali*, id est, in quantum natura est. Necessitas igitur non lædit voluntatem, si hæc consideretur tamquam natura, atque ad unum determinata; neque enim liberum habemus arbitrium circa ea quæ necessario volumus, aut ex naturali instinctu: lædit vero necessitas voluntatem, si hæc consideretur tamquam facultas agendi aut non agendi.

S. Joannis Damasceni.

366. Dices II. S. Augustinus agnoscit quamdam esse in homine lapso peccandi necessitatem. Ergo sensit necessitatem non repugnare libero arbitrio. P. A. Lib. I. Operis imperfecti contra Julianum, Num.

S. Augustini.

absolute necessariis voluntas habet modum agendi communem cum cæteris rebus naturalibus, nempe cum determinatione ad unum: neque agit ut voluntas, sed ut natura, saltem quoad modum agendi cum libertate; licet quantum ad substantiam operis semper modum agendi naturalium supergrediatur, cum ejusmodi actus oriantur ex principio intellectuali.

368. Dices I. Omne quod se ipsum agit, seu movet, est liberum. Atqui voluntas in omni actu voluntario, quantumvis is sit necessarius, se ipsam agit & movet. Ergo in omni actu voluntario est libera. P. M. Authoritate S. Thomæ, qui Lib. II. contra Gentes, Cap. XLVIII. docet, quod sola moventia se ipsa, libertatem habeant in agendo. R. N. M, secus voluntas Beatorum se ipsam movens in amando Deo, atque etiam anima in hypothesi Manichæorum se ipsam movens vel ad bonum vel ad malum, foret libera. R. II. D. M. Omne quod se ipsum movet cum facultate ad oppositum, seu cum dominio sui actus, est liberum, C. M. Sine tali facultate & dominio, N. M, & D. m. Ita tamen, ut juxta Jansenianos non possit se non movere, nec facultatem habeat ad oppositum, C. m. Aliter, N. m. & Conseq. Ad *probat.* R. S. Thomam loqui de iis, quæ se ipsa movent, non physice tantum, sed etiam moraliter, cum dominio sui actus.

369. Dices II. Omnis actus a voluntate elicited & imperatus, est liber. Atqui omnis actus voluntarius, quantumvis necessarius, est a voluntate elicited & imperatus. Ergo. *Confirm.* Omnis actus, qui in nostra est potestate, est liber. Sed omnis actus voluntatis, quantumvis necessarius, est in nostra potestate. Ergo est liber. R. C. M. N. m. Actus a voluntate imperatus dicitur ille, qui est sub imperio ac dominio voluntatis, a quo potest illa, si velit, abstinere. Atqui talis non est actus necessarius. Ergo non est imperatus a voluntate, quæ ad oppositum, seu ad non volendum actum, non est expedita. Res patet in amore Beatorum, quo illi Deum prosequuntur: atque in hypothesi Manichæorum de necessitate inducta ad malum per animam malam.

malam. Ad *confirm.* D. M. Qui est in nostra potestate electiva, & active indifferente, C. M. In potestate non electiva, N. M. Potentia electiva est potentia se determinandi per electionem, includitque simul potentiam ponendi actum, & potentiam illum non ponendi, ita ut voluntas de utroque contradictionis membro pro arbitrio suo possit disponere.

370. Dices III. Illud est in potestate nostra, quod fit cum volumus. Atqui omnis volitio fit cum volumus; neque enim illa fieri potest nobis nolentibus. Ergo omnis volitio est in potestate nostra. R. D. M. Illud est in potestate nostra, quod fit cum volumus ex propria determinatione & electione, & ita ut possimus non velle, C. M. Secus, N. M. Et D. m. Omnis volitio fit cum volumus, sive ex propria determinatione, sive ex ineluctabili necessitate, C. m. Fit ex propria determinatione, quando libertas tantum datur a coactione, N. m.

371. Dices IV. Si liberum arbitrium consistit essentialiter in indifferentia agendi vel non agendi, habitus boni perinde ac mali repugnarent libero arbitrio. Atqui id dici nequit. P. M. Habitus boni perinde ac mali tollunt indifferentiam. Ergo tollunt libertatem. R. N. M. Ad *prob.* D. A. Tollunt indifferentiam activam, id est, facultatem se determinandi per electionem ad utrumlibet ex duobus oppositis, N. A. Tollunt indifferentiam propensionis, C. A. N. Conseq. Ad liberum arbitrium non requiritur indifferentia propensionis; sed sufficit sola indifferentia activa, quæ expedita semper manet ad utrumlibet, quamvis sublatum sit æquilibrium propensionis. Immo meritum vel demeritum eo majus est, quo habitus boni vel mali intensiores fuerint; quia tunc eo intensius in bonum vel malum fertur voluntas, libere, & sine antecedente ad unum determinatione.

372. Dices V. In Deo datur libertas circa creaturas, quamvis non detur indifferentia. Ergo indifferentia illa non est de essentia liberi arbitrii. P. A. Deus ab æterno determinatus est ad hoc agendum vel
non

non agendum; neque deinceps potest non velle quod semel voluit. Ergo in Deo non datur indifferentia. R. N. A. Ad *probat.* R. I. D. A. Deus ab æterno determinatus est ad agendum vel non agendum libere, C. A. Ad agendum vel non agendum necessario, N. A. & Conseq. R. II. Necesitatem illam, qua Deus nequit non velle quod ab æterno voluit, non esse antecedentem, sed mere consequentem: adeoque illam minime obstare libero Dei arbitrio.

373. Dices VI. Ratio allata id unum evincit, Deum quidem fuisse, non autem modo esse liberum. Ergo, P. A. Si Deus nunc foret liber, tunc ideo quia priori cum indifferentia & propria libertate ad actum se determinavit. Atqui hæc ratio nihil probat. P. m. Tali modo liber etiam dicendus esset actus amoris beatifici; quia Angeli & homines, qui Beati fiunt, propria voluntate, libere ac indifferenter se determinarunt ad diligendum Deum. Ergo. R. N. A. Cum necessitas volendi quod Deus aliquando voluit, sit mere consequens & ex hypothesi, eadem perseverat in Deo libertas; quia actus non destruit potentiam, nec per actum tollitur indifferentia positiva & in actu primo, sed tantum indifferentia in actu secundo, & secundum negativum sumpta. Ad *probat.* C. M. N. m. Ad hujus *probat.* N. A. Deus circa creaturas liberrime, ac cum plena indifferentia se determinavit ad hoc agendum vel non agendum: at vero Beati jam in primo instanti, quo Deum intuitive vident, non libere & ex electione, sed suavi necessitate adacti Deum amant, ita ut eorum voluntas se ab hoc amore cohibere non possit; quamvis cum adhuc essent in via constituti, Deum & justitiam dilexerint libere atque ex electione. Neque enim putandum est, actum charitatis, quem Beati olim habebant in via, eundem esse secundum identitatem numericam cum illo, quem habent in termino, seu in patria: aut eundem esse modum illum producendi in patria, & in via. In via enim a voluntate indifferenter producitur, non sic in patria; quia nulla est in patria, sicut in via, indifferentia iudicii, quæ proponat Deum indifferenter

reuter amandum vel non amandum. Vide Tournely Tomo I. de Deo, Divinisque attributis, in Appendice de natura libertatis.

374. Objic. III. Infirmitas argumenti, quod Num. 363. ex sequelis instruximus. S. Thomas Quæst. X. de Potentia, Art. II. ad Vtum, & Scotistæ communiter processionem Spiritus Sancti a Patre & Filio liberam appellant, quia voluntaria est. II. Voluntas Beatorum in potestate sua habet amorem beatificum. Ergo amor beatificus est liber. P. A. Voluntas Beati potest suspendere amorem beatificum, quo necessario Deum diligit. Ergo amor beatificus est liber. P. A. Si Beatus non vellet Deum amare, non amaret. Ergo potest suspendere amorem beatificum. *Confirm.* Modus operandi necessario, est modus agendi brutorum. Ergo amor Beatorum est liber. R. ad I. S. Thomas, & Scotistæ liberam vocant processionem Spiritus Sancti a Patre & Filio in latiori sensu, ut probent eam non esse coactam, sed ex summa voluntatis propensione & inclinatione. Ipse Aureolus Scoti discipulus in I. Sententiarum, Dist. I. Cap. III. Artic. III. fatetur, ex Scotistarum opinione, nec Deum libere amare se ipsum, nec Patrem & Filium libere Spiritum Sanctum producere, si esse liberum idem sit, ac habere dominium sui actus. Hinc Scotistæ non loquuntur de ea libertate, quæ liberi arbitrii propria est, & quæ definitur dominium & potestas in actum. Ad II. R. N. A. Voluntas Beatorum ita exercet amorem beatificum, ut illum non possit non exercere. Ad *probat.* R. Antecedens equidem verissimum est, sed sub conditione impossibili, simileque huic: *Si Deus vellet mentiri, mentiretur.* Quare negatur suppositum, quod Beatus possit velle Deum non amare, quem necessario amat. Ad *confirm.* D. A. Modus operandi necessario, in omnibus & ex cognitione imperfecta, est modus agendi proprius brutorum, C. A. Modus operandi necessario circa objectum præstantissimum, nempe Deum perfectè & clare cognitum, N. A. & Conseq.

*Firmitas
argumenti
nostri vin-
dicatur.*

CON-

CONTROVERSIA II.

AN AD MERENDUM VEL DEMERENDUM IN STATU
NATURÆ LAPSE REQUIRATUR LIBERTAS IN-
DIFFERENTIÆ?

CONTRA BAJUM ET JANSENIUM.

*Baji &
Jansenii
erroris.*

375. Bajus & Jansenius admittunt quidem ad merendum vel demerendum in præsentī statu requiri liberum arbitrium. Verum cum liberi arbitrii nomine nil aliud intelligant, quam libertatem a coactione, hoc ipso negant, ad meritum vel demeritum requiri libertatem indifferentiæ, sive potentiam proxime expeditam ad agendum vel non agendum, quæ ad essentiam liberi arbitrii omnino pertinet. Hinc Pius V. & Gregorius XIII. damnarunt Baji propositionem ordine LXVII. *Homo peccat etiam damnabiliter in eo, quod necessario facit.* Innocentius X. hæreticam declaravit propositionem Jansenii ordine tertiam. *Ad merendum vel demerendum in statu naturæ lapsæ non requiritur in homine libertas a necessitate, sed sufficit libertas a coactione.*

*Ad meri-
tum, vel
demeritum
necessari-
am esse li-
bertatem
indifferen-
tiæ, osen-
ditur ex
Scriptu-
ris.*

376. Conclusio. Ad merendum vel demerendum etiam in statu naturæ lapsæ requiritur liberum arbitrium, seu libertas indifferentiæ. Prob. I. Autoritate Scripturarum. Ecclesiastici Cap. XXXI. dicitur: *Beatus -- qui potuit transgredi, & non est transgressus; facere mala, & non fecit: ideo stabilita sunt bona illius in Domino.* Quibus verbis Scriptura laudabilitatem moralem, & rationem meriti repetit ex eo, quod homo non transgrediatur mandata, cum posset transgredi: nec mala faciat, cum posset facere, hoc est, quod sine antecedente necessitate, ac cum plena libertate indifferentiæ bonum agat.

Patribus.

377. Prob. II. Autoritate Patrum Tertullianus Lib. II. contra Marcionem, Cap. VI. scribit: *Cæterum nec boni, nec mali merces jure pensaretur ei, qui aut bonus, aut malus necessitate fuisset inventus, non voluntate.* S. Justinus Apologia II. pro Christianis: *Illa quippe ortæ cujusque rei natura est, ut virtutis & vitii sit capax, neque*

neque quidquam eorum quæ creata sunt, laude dignum esset, nisi vim ac potestatem altero versus se convertendi obtineret. S. Irenæus Lib. IV. adv. Hær. Cap. LXXII. Si igitur non in nobis esset facere hæc, aut non facere, quam causam habebat Apostolus, Et multo prius ipse Dominus consilium dare, quædam quidem facere, a quibusdam vero abstinere? Sed quoniam liberæ sententiæ ab initio est homo, Et liberæ sententiæ est Deus cujus ad similitudinem factus est, semper consilium datur ei, continere bonum, quod perficitur ex ea, quæ est ad Deum obedientia. Clemens Alexandrinus Lib. I. Stromatum: Quoniam libera electio Et appetitio peccata primum inchoat, jure insignuntur supplicia. Origenes in Cap. I. Epist. ad Rom. Non enim vi res agitur, neque necessitate in alteram partem anima inclinatur: alioquin nec culpa ei, nec boni electio præmium, nec electio mali supplicium mereretur. Eusebius Lib. VI. Præparationis Evangelicæ, Cap. VI. Sublato libero arbitrio, jacebit omnis Philosophia, jacebit pietas, nulla erit laus virtutis, nullus fructus laboris, nec puniendi erunt improbi, nec admirandi studiosi. --- Nullum meritum, nulla laus, nec virtus erit, nec vitium, si non libera voluntate, sed necessitate factorum opera nostra fiunt. S. Hilarius in Psalm. II. Quid honoris ac præmii bonitatis necessitas mereretur, cum malos nos esse vis quædam inserta non sineret? Voluntati ergo promissa bonitas est, ut præmium sibi voluntas bonitatis acquireret. S. Chrysostomus Hom. XXII. in Genes. Nonne manifestum est, sua quemque voluntate vel malitiam vel virtutem eligere? Nam si ita esset, Et naturæ nostræ potestas insita esset, neque illos puniri, neque istos præmia virtutum accipere oportebat. S. Hieronymus Lib. II. contra Jovinianum: Liberi arbitrii nos condidit Deus, nec ad virtutes, nec ad vitia necessitate trahimur; alioquin ubi necessitas, nec corona, nec damnatio est. S. Cyrillus Alexandrinus Lib. II. in Joannem, Cap. LIV. Liberum arbitrium hominis his verbis ostendit, qui ad alterutrum secundum animi sui judicium potest proficisci. Sic enim juste laudem, si bene agimus, Et contraria, si mala committimus, invenimus. S.

Bernardus Serm. LXXXI. in Cantica: *Ubi non est libertas, nec meritum. Propterea quæ sunt carentia ratione animalia, nihil merentur; quia sicut deliberatione, ita & libertate carent.*

*Præcipue
S. Augu-
stino.*

378. Prob. III. peculiariter Autoritate S. Augustini, quem Janseniani non flagitiose minus quam false suum esse contendunt. Lib. de duabus Animabus, Cap. XI. scribit S. Doctor: *Neminem vituperatione, suppliciove dignum, qui aut id velit quod iustitia velle non prohibet; aut id non faciat quod facere non potest. Nonne ista cantant & in montibus pastores, & in theatris pœtæ, & indocti in circulis, & docti in bibliothecis, & magistri in scholis, & antistites in sacratis locis, & in orbe terrarum genus humanum?* Lib. XII. de Civit. Dei, Cap. VIII. *Scio in quo fit mala voluntas, id in eo fieri, quod si nollet, non fieret; & ideo non necessarios, sed voluntarios defectus iusta pœna consequitur.* Lib. contra Fortunatum Manichæum, Disp. I. Num. XV. *Animæ rationali, quæ est in homine, dedit Deus liberum arbitrium. Sic enim posset habere meritum, si voluntate, non necessitate boni essemus. Cum ergo oporteat non necessitate, sed voluntate bonum esse, oportebat ut Deus animæ daret liberum arbitrium. Et Disput. II. Num. XX. Liberum arbitrium si non dedisset Deus, iudicium puniendi nullum esse iustum posset, nec meritum recte faciendi.* Lib. de Gratia & Libero arbitrio, Cap. II. *Ipsa divina præcepta homini non prodescent, nisi haberet liberum voluntatis arbitrium, quæ faciens ad promissa præmia perveniret.* Ex quibus locis sic argumentor. Ex divinis præceptis, eorundem utilitate, transgressione, ac transgressorum punitione S. Augustinus eam infert libertatem, quam Manichæi, quos impugnat, negabant. Sed illi negabant libertatem arbitrii, seu libertatem a simplici necessitate, non vero a coactione, quæ essentialis est ipsi voluntati, cum nolens non possit velle. Ergo hanc ipsam libertatem S. Augustinus infert, atque adeo hæc, juxta ipsum, requiritur ad obediendum præceptis, eorumque transgressionem, adeoque ad merendum vel demerendum.

379. Prob. IV. Autoritate Theologorum, ac præcipue S. Thomæ, qui Quæst. VI. de Malo, Artic. unico ita scribit: *Quidam posuerunt, quod voluntas hominis ex necessitate movetur ad aliquid eligendum, nec tamen ponebant, quod voluntas cogeretur; non enim omne necessarium est violentum, sed solum id, cujus principium est extra. --- Hæc autem opinio est hæretica: tollit enim rationem meriti & demeriti in humanis actibus: non enim videtur esse meritorium, quod aliquis sic ex necessitate agit, quod vitare non possit. Et paulo infra: Si ex necessitate movemur ad volendum, tollitur deliberatio, exhortatio, præceptum & punitio.* Et S. Thoma.

380. Prob. V. Ratione Theologica. Nam Immo ad meritum requiritur, ut actio qua meremur, sit nostra, eamque dare possimus tamquam pretium pro præmio. Atqui ut hoc fiat, requiritur libertas a quacunque necessitate simplici. II. Ad rationem demeriti requiritur peccatum proprie ac vere tale. Atqui peccatum proprie ac vere tale dari non potest sine libertate indifferentiæ. P. m. In homine nec datur, nec dari potest obligatio moralis ad impossibile. Ergo actio necessario ab homine elicitæ non est contra aliquam obligationem moralem. Ergo non est peccaminosa. Ut enim observat S. Augustinus Lib. de duabus Animabus, Cap. XII. *Peccati reum tenere quemquam, quia non fecit quod facere non potuit, summæ iniquitatis est & insanix.* Confirmatur id ex communi consensu omnium hominum, qui judicant neminem mereri laudem vel præmium, penam aut vituperium, quod egerit id quod omittere non potuit, vel omiserit id quod non potuit facere. Ac ratione Theologica.

Argumenta contraria refutantur.

381. Objicitur I. Autoritas S. Augustini, qui Lib. I. Operis imperfecti contra Julianum, Num. 106. scribit: *Necesse est ut peccet, a quo ignoratur justitia: numquid ideo cum justitiam cognoverit, non sunt ei remittenda peccata, quæ ignorantix necessitate commisit?* Jansenianis non favet S. Augustinus.

go S. Augustinus censet, hominem demereri posse cum necessitate peccandi. R. C. A. D. C. Cum necessitate peccandi consequente & impedibili, C. C. Cum necessitate antecedente & absoluta, N. C. Augustinus agit ibi de peccatis, quæ fiunt ex ignorantia culpabili, quam homo debuit & potuit vincere, nec tamen vicit ob negligentiam in perquirenda veritate. Unde hæc ignorantia est indirecte volita, & est in potestate hominis, ut sit, vel non sit: neque impedire potest imputabilitatem aut demeritum.

382. Dices I. S. Augustinus loquitur ibi de peccatis quæ fiunt ex ignorantia invincibili. Ergo loquitur ibi de peccatis quæ necessario fiunt, necessitate antecedente. P. A. Loquitur de ignorantia, quæ est pœna peccati. Ergo loquitur de ignorantia invincibili. R. N. A. Ad prob. C. A. N. C. Utraque ignorantia, tam invincibilis quam vincibilis, est pœna peccati originalis: invincibilis quidem a peccato proprie tali operantem excusat; vincibilis autem, qua non ex impossibilitate, sed ex magna difficultate discendi quid appetendum ac vitandum sit, laborat homo non adhibens ad eam depellendam tantam diligentiam, quantam posset & deberet, non excusat a peccato.

383. Dices II. S. Doctor post verba superius laudata illico subjungit: *Non est igitur impunitatis securitas in necessitate peccandi; sed ut non obsit ista necessitas, donat ille cui dicitur, De necessitatibus meis erue me. Donat autem duobus modis, Et præteritam dimittendo iniquitatem, Et opitulando ne intremus in tentationem. Unusquisque vero tentatur a concupiscentia sua abstractus Et illeclus.* Ergo necessitas non tollit demeritum. R. C. A. N. C. S. Augustinus loquitur ibi de morali necessitate peccandi, orta partim ex ignorantia culpabili, partim ex effreni concupiscentia: quæ moralis necessitas cum nihil aliud sit quam magna illa ad malum propensio, tollit quidem libertatem æquilibrii, seu propensionis; at non tollit indifferentiam activam.

384. Dices III. S. Augustinus Lib. XII. de Civitate Dei, Cap. I. scribit: *Quam porro magna sit laus,*
(Ange-

(Angelorum) *adhærere Deo, ut ei vivat, inde sapiat, illo gaudeat, tantoque bono sine morte, sine errore, sine molestia perfruat, quis cogitare digne possit, aut eloqui?* Ergo juxta S. Doctorem laudari potest id, quod necessario fit. R. Angelos laude dignos appellat S. Doctor ob amorem beatificum, fumendo laudis nomen in ampliore significatione, nempe pro honore, qui non exhibetur propter actionem liberam, sed propter solam dignitatem suppositi. Quare id tantum Augustinus ibi vult dicere Angelos, propter indefectibilem illam adhæSIONem ad summum Bonum per constantem amorem, esse honorandos ac colendos.

385. Objic. II. Meritum Christi. *Fructus obtinendum meritum Christi.* Actiones Christi maximi ac infiniti fuerunt meriti, quamvis necessario Deum diligeret: item obedientia illius Patri præstita mortem pro nobis subeundo fuit meritoria, quamvis Christus non potuerit non implere quæ Pater præceperat. Ergo ad merendum vel demerendum non requiritur libertas indifferentiæ. *Confirmatur ex doctrina S. Thomæ, qui de libero Christi arbitrio disserens in III. Sententiarum, Dist. XVIII. Quæst. unica, Art. II. ad V. ait: Vel dicendum, quod etiam si esset determinatum ad unum numero, sicut ad diligendum Deum, quod non facere non potest; tamen ex hoc non amittit libertatem, neque rationem laudis sive meriti, quia in illud non coacte, sed sponte tendit: Et ita est actus sui dominus.* Ergo juxta S. Thomam ad meritum & laudem sufficit sola libertas a coactione. R. I. Nos loqui de merito puri hominis tantum, ad quod Scriptura & Patres libertatem indifferentiæ exigunt. R. II. N. C. Quamvis Christus ad diligendum Deum necessitatus fuisset quoad exercitium actus, mereri tamen potuisset ex eo capite, quod Deum actu valde intenso ac cum magna inclinatione diligeret, Patrisque voluntatem exequeretur; poterat enim ex actibus charitatis imperatis alios elicere, alios omittere pro arbitrio. R. III. probabilem esse, nec fundamento destitui illam sententiam Theologorum quorundam, qui dicunt, Sanctissimam Christi Humanitatem liberrime amasse Deum, ac Patri obtemperasse,

te, eoquod in ipso instanti Unionis hypostaticæ, sed pro priori signo rationis ad illam, habuerit potentiam proximam peccandi, peccato impeditivo Unionis hypostaticæ. Verum hæc ad forum nostrum non pertinent, sed ad Speculativæ Theologiæ tractatores. Ad *confirmat.* patet responsio ex alio loco S. Thomæ III. Parte, Quæst. XVIII. Artic. IV. ad III^{ium}. *Voluntas Christi, licet sit determinata ad bonum, non tamen est determinata ad hoc vel illud bonum. Et ideo pertinet ad Christum eligere per liberum arbitrium.* Quare per voces illas, *non coacte, sed sponte*, Angelicus Doctor idem significare voluit, ac non necessario quacunque necessitate, sed libere, libertate a quavis simplici & absoluta necessitate, ut patet ex verbis: *Et ita est actus sui dominus.* Etenim S. Thomas pluribus locis ad dominium actus requirit libertatem a quavis simplici & absoluta necessitate.

Argumentum ab inductione.

386. Objic. III. Argumentum ab inductione. Laus aut vituperatio, meritum ac demeritum tribuitur etiam actionibus necessariis. Ergo ad merendum vel demerendum necessaria non est libertas indifferentiæ. P. A. I. Bruta laudantur ac vituperantur, præmio aut pœna afficiuntur, quamvis solam habeant libertatem a coactione. II. Damnati gravissime peccant Deum blasphemando: nec excusantur consuetudinarii a peccato, quamvis a peccato abstinere nequeant ob pravi habitus vehementiam. III. Homo in statu naturæ lapsæ, ipsis etiam Catholicis fatentibus, vitare non potest omnia peccata venialia: neque tamen idcirco, si delinquat, a peccato excusatur, aut a pœna eximitur. IV. Mercenarius est dignus mercede sua, licet ad laborem illum adigatur, vel forsan mente captus sit. V. Amor, quo Beati Deum intuitive cognitum prosequuntur, est laudabilis. Ergo ad merendum vel demerendum non requiritur libertas indifferentiæ. R. N. A. Ad I. R. per laudes brutorum aliud nos non indicare, quam nostram de iis æstimationem, aut eorum ad hoc vel illud aptitudinem, non autem meritum aliquod proprie tale: *ferme sicut interdum laudamus res etiam inanimatas,*

v. g. horologium ad regulas artis exactum. Hinc bruta neque pœnis proprie afficiuntur, aut præmiis; sed tantum materialiter, aut quasi medicinaliter ut ex speciebus doloris aut voluptatis, suo tempore rursus excitandis, determinentur ad actiones aliquas vel eliciendas vel omittendas. Ad II. R. Si damnati physice necessitantur ad blasphemias, eos formaliter non peccare. Quia tamen communius Theologi existimant, necessitatem illam non physicam, sed moralem esse, blasphemiam illorum a peccato excusari nequeunt, quamvis non amplius illis imputentur ad novam pœnam; quia damnati non amplius in via, sed in termino sunt. Consuetudinarii possunt potentia physica abstinere a peccato, quamvis id non possint potentia morali. Et quamvis in illis non amplius detur indifferentia propensionis, datur tamen indifferentia electionis, quæ sola libertatem constituit. Non obstante enim inclinatione ad malum, quam consuetudinarii experiuntur, possent illi ac deberent cupiditatibus suis resistere. Præterea hæc ipsa inclinatio ad malum consuetudinario est libera, & volita, quia in eam se libere coniecit, ac in eadem libere perseverat. Ad III. D. A. Homo vitare non potest omnia peccata venialia, potentia physica, N. A. Potentia morali, C. A. N. C. Ut aliqua actio libera dicatur, sufficit si detur potentia physica illam eliciendi. Ad IV. D. A. Est dignus mercede sua propter meritum, seu propter obsequium moraliter imputabile, N. A; hoc enim obsequium exigit libertatem indifferentiæ. Est dignus mercede sua propter ipsam utilitatem operis, ex æquitate naturali, aut etiam ex contractu, fidelitate &c. C. A. N. C. Ad VI. D. A. Est laudabilis objective, quia conformis est naturæ rationali, habetque honestatem objectivam, C. A. Est laudabilis formaliter, ita ut hic amor Beato imputari possit ad meritum vel ad laudem proprie talem, quæ sit præmium hujus amoris, N. A. & Conseq.

387. Objic. IV. Voluntarietas actionis. Si impossibilitas fervendi mandata Dei est peccatori voluntaria, tunc illum non excusat a peccato, neque eximit a pœna.

Voluntarietatem actionis,

na. Atqui est voluntaria. Ergo. R. D. M. Si est voluntaria ita, ut peccator possit illam impossibilitatem pro arbitrio tollere vel non tollere, C. M. Si hoc non possit, N. M. Et sic distincta minore, N. C. Hæc impossibilitas, quam tamen dari constanter negamus, quamvis non foret contraria inclinationi peccatoris, necessitatem tamen inferret violandi mandata Dei, nec pro arbitrio suo eam a se propulsare posset peccator, adeoque liberum arbitrium everteret.

388. Dices. Peccator quamvis necessario agat, habet tamen potentiam faciendi oppositum. Ergo hæc impossibilitas non tollit liberum arbitrium. P. A. Peccator, si vellet, poneret oppositum. Ergo habet potentiam faciendi oppositum. R. D. A. Habet potentiam ligatam & impeditam, C. A. Completam & expeditam, quæ requiritur ad liberum arbitrium, N. A. & Conseq. In Systemate Janseniano impossibile est, ut fiante delectatione terrena superiore homo velit bonum. Ergo ad bonum non habet potentiam expeditam, sed ligatam. Ad *probat.* C. A, sed nego suppositum, quod peccator in systemate Jansenii possit velle oppositum; simpliciter enim impossibile est, ut in illis circumstantiis, possit homo velle oppositum illius quod necessario facit. Ergo homo non habet veram potentiam faciendi oppositum: nam quod non est possibile nisi sub conditione impossibili, est absolute & simpliciter impossibile.

De libertate in causa.

389. Objic. V. Libertas in causa. Quamvis homo necessario peccet, peccatum tamen merito illi imputari potest, quia liberum erat in voluntate Adami, quæ est moraliter nostra. Ergo ad merendum vel demerendum non requiritur personalis libertas indifferentiæ, sed sufficit libertas in causa. R. N. A. Replica hæc quam Jansenistis familiaris, tam absurda est, ac merito proscripta ab Alexandro VIII, qui propositionem hanc ordine I. damnavit: *In statu naturæ lapsæ ad peccatum formale & demeritum sufficit illa libertas, qua voluntarium & liberum fuit in causa sua, peccato originali, & libertate Adami peccantis.* Nam I. peccata

cata personalia debent procedere a libertate propriæ voluntatis, quæ sit physice nostra; ac per hoc præcipue personale differt a peccato originali, ad quod committendum sufficit voluntas physice aliena, ac moraliter tantum nostra. II. Deus non potest præcipere impossibilia, etiam cum hæc impossibilitas oritur ex aliqua nostra culpa personali, si non est in nostra potestate, ut pro arbitrio impedimentum tollamus vel non tollamus. Sic si quis sibi eruat oculos, ne Breviarium recitet: aut si mancipium pedes sibi amputet, currere ne cogatur ab hero; Deus atque herus poterunt quidem illi imputare, quod oculos sibi eruerit, aut pedes amputarit, & eruendo oculos, atque amputando pedes recitationem Breviarii, aut cursum sibi impossibilem effecerit; at non poterunt exigere ab eo, eique præcipere, ut erutis oculis Horas Canonicas legat, aut amputatis jam pedibus currat.

390. Præterea plura alia ex Janseniano hoc commento sequerentur absurda. Primo siquidem non posset Deus posteris Adæ præcipere, ut ab aliis peccatis abstineant, sicuti non potest ipsis præcipere, ut abstineant a motibus indeliberatis concupiscentiæ rebellis, quamvis motus isti fuerint posteris liberi in causa, in peccato nempe originali, & in Adami libertate. Deinde si non requireretur in posteris libertas indifferentiæ, sed satis esset libertas ejusmodi in causa, sive in Adamo, similiter non requireretur in posteris usus rationis ad peccandum; sed satis esset usus rationis, qui fuit in Adamo, quando commisit peccatum originale, & in ipso peccarunt poster; unde etiam mentis inopes, & phrenesi abrepti blasphemando vel furando peccarent. Demum deletio peccati originali per baptismum poster; evaderent impeccabiles; eorum siquidem actiones materialiter malæ non haberent unde traherent formalem malitiam, cum post deletum per baptismum originale peccatum nihil damnationis in eis supersit, atque adeo in iis nulla supersit formalis malitia contracta in Adamo: nisi dicere velint, quod Deus fide tantum in baptismo homini condonet peccata,

cum-

eumque in filium suum simulate tantum adoptet, atque ad amicitiam suam admittat. Insuper ipse Adam amisso per peccatum inobedientiæ statu integritatis, etiam si centies & millies peccasset, nullam contraxisset novam militiam, præter illam quam contraxit comedendo pomum vetitum.

CONTROVERSIA III.

AN SIMPLEX NECESSITAS VOLUNTARIA ET MUTABILIS, QUÆ JUXTA MENTEM JANSENII ORITUR EX DELECTATIONE SUPERIORI RELATIVA ET INDELIBERATA, TOLLAT LIBERTATEM QUÆ IN STATU NATURÆ LAPSE REQUIRITUR AD MERENDUM VEL DEMERENDUM?

CONTRA JANSENIANOS.

*Systema
Jansenia-
na delecta-
tionis ex-
plicatur.*

391. **P**rimum Janseniani Systematis fundamentum est, naturam humanam Adami peccato vitiatam non aliter bonum operi posse quam impulsu delectationis cœlestis prævalentis; nec aliter malum, quam prævalentis terrenæ delectationis impulsu, eo ferme pacto, quo homo viribus penitus destitutus ac semivivus non aliter quam alieno impulsu ad sinistram vel dexteram verti potest. Hoc fundamento præfacto Jansenius explicat, quomodo voluntas a prædictis delectationibus moveatur ac determinetur; idque fieri docet lege quasi mechanica, atque adeo delectationem illam, quæ vividior est, pluresque habet virtutis gradus, movere ac determinare voluntatem ad prosecutionem objecti vel boni, vel mali, quod magis delectat; eo ferme pacto, quo in balance pondus plus habens gravitatis movet ac determinat lancem cui superincumbit, ad descensum: & sicuti non potest non descendere lanx illa cui pondus gravius superincumbit, quia ponderi graviori nequit pondus minus grave præponderare: ita non posse voluntatem non operari id, ad quod a majori delectatione inclinatur, quia delectatio minor præponderare nequit delectationi majori. Docet insuper delectationem vividio-
rem.

rem, pluresque habentem virtutis & activitatis gradus, inevitabiliter ac insuperabiliter voluntatem movere & determinare: *inevitabiliter*, quia est actus indeliberatus, advertentiam omnem & consensum antevertens: *insuperabiliter*, quia tam impossibile est voluntatem non operari id quod magis delectat, quam impossibile est majori delectationi minorem præponderare.

392. Delectatio cœlestis major ac vividior terrena delectatione opposita juxta Jansenium est gratia Christi Reparatoris sufficiens simul & efficax, ultra quam nullam in statu naturæ lapsæ gratiam pure sufficientem admittit. Nam nisi cœlestis delectatio sit major delectatione terrena, est vel minor vel æqualis. Si minor: non est sufficiens; quia impossibile est voluntatem non amplecti quod magis delectat, atque adeo amplecti quod delectat minus. Si vero sit æqualis, voluntas nihil operari potest, eamque suspensam hærere necesse est, non aliter ac necesse est bilancem hærere suspensam, si pondera utrinque sint æqualia. Delectatio major ac vividior appellatur a Jansenio *victrix*, & ideo victrix, quia gradibus superior; qua docet non indigniſſe Adamum in statu integritatis, etiam ad recte operandum, quia tunc concupiscentia non dominabatur voluntati, peccatum enim Adami sine impulsu terrenæ delectationis indeliberatæ perpetratum est, cum opposita delectatio terrena nihil aliud sit, quam concupiscentia carens freno, quo illa coercebatur in Adamo nondum lapso.

393. Delectatio illa Janseniana, indeliberata, superior ac relativa, centrum est ex quo quinque illæ Jansenii propositiones ab Ecclesia proscriptæ, quasi totidem lineæ necessario derivantur. Ex hoc enim principio necessario infertur 1^{mo}. aliqua Dei præcepta a justis etiam volentibus & conantibus, impleri non posse secundum præſentes quas habent vires: in justis enim non raro major est indeliberata delectatio terrena quam cœlestis, etiam tunc quando præceptum urget: atque hinc transgressio erit necessaria, cum impossibile sit

juxta

*Conservatio
hujus
Systematis*

juxta Jansenium, ut minor delectatio cœlestis superare possit in his circumstantiis terrenam majorem.

394. Infertur II^{do}. interiori gratiæ in statu naturæ lapsæ numquam resisti. Si enim cœlestis delectatio major fuerit terrena, plenum suum effectum ac perfectum obtinebit, scilicet opus bonum, ad quod ex natura sua ordinatur, & ex natura sua tendit. Si vero minor fuerit terrestri, inefficaces solum & imperfectos ad bonum motus excitabit, effectumque obtinebit imperfectum, ad quem solum a Deo ordinatur. Neque enim Deus gratiam parvam seu delectationem cœlestem terrena minorem ordinare potest ad plenum effectum in his circumstantiis obtinendum, quod impossibile esse Deus cognoscit. Ergo gratia interior semper est efficax, quia semper aliquid efficit, & numquam frustratur eo effectû, ad quem a Deo proxime datur. Ergo illi numquam potest resisti, quia semper est efficax, licet non semper sit victrix, quando nimirum minor est terrena delectatione.

395. Infertur III^{io}. ad merendum vel demerendum in statu naturæ lapsæ non requiri in homine libertatem a necessitate, sed sufficere libertatem a coactione; eoquod delectatio illa superior, indeliberata ac relativa, necessitatem agendi inducat quidem, non tamen advertentiam tollat, judicium rationis, & approbationem voluntatis. Secus si libertas indifferentiæ ad meritum vel demeritum requireretur, homo in statu naturæ lapsæ hac libertate spoliatus, nec mereri nec demereri posset.

396. Infertur IV^{to}. Semipelagianos in hoc hæreticos fuisse, quod vellent interiorem gratiam talem esse, cui posset humana voluntas pro libito suo resistere vel obtemperare. Si enim voluntas eo semper necessario trahitur, quo major delectatio eam ducit; & si fieri non potest, ut minor delectatio indeliberata superiorem vincat, omnino consequens est, ut delectatio superior motione insuperabili & indeclinabili voluntatem ad unum determinet, nec possit voluntas eo in statu tali determinationi non consentire.

397. Infertur V^{to}. Christum pro omnibus omnino hominibus mortuum non esse, nec sanguinem fudisse, ut nimirum omnibus hominibus gratias vere sufficientes mereretur, quibus salvari possent. Vel enim delectatio cœlestis major est terrena, vel minor, vel æqualis. Si major; necessario plenum ac perfectum effectum obtinet: si minor; impossibile est voluntatem amplecti illud quod minus delectat: si æqualis; voluntas suspensa hæret. Ergo juxta Jansenium nulla datur gratia vere sufficiens, sed tantum efficax. Ergo Christus mereri non potuit reprobis gratias vere sufficientes, multoque minus promeritus illis fuit gratias efficaces ad obtinendam salutem. Ergo pro illorum salute mortuus non est.

398. Janseniani ut a solidissimo, sibi que molestissimo Catholicorum argumento se expediant, quo illi invictè probant, hominem justum sola gratia parva, seu delectatione cœlesti minore instructum, veram & expeditam non habere potentiam ad superandam tentationem, sed irresistibiliter ad peccatum necessitari reponunt, necessitatem illam quam infert præponderans delectatio, non absolutam esse & totalem sed relativam & partialem; quatenus nimirum homo gratia parva instructus posset quidem absolute sequi delectationem cœlestem, nisi adesset delectatio terrena præponderans, adeoque *relate* tantum ad illam necessitari hominem. *Partialem* vocant hanc necessitatem, quia hæc vincit quidem, at non tollit omnem potentiam. Duplici huic necessitati duplex pariter juxta Jansenianos respondet potentia, absoluta nimirum, & relativa, quibus duobus vocabulis innumeras fraudes ac fallacias tegunt. Per *absolutam* intelligunt illam, quæ a circumstantiis, ac subiecti præsentibus dispositionibus præscindit; per *relativam* vero eam intelligunt, quæ hic & nunc datur, attendendo ad præsentem circumstantias. Jam vero hominem parva gratia instructum absolutam dicunt habere potestatem & potentiam superandi tentationem, non vero potentiam relativam. Atque hac unica potentie æquivocatione se involventes, quinque pro-

Jansenianorum æquivocationes.

proscriptas Jansenii propositiones verbis damnant, at re ipsa tuentur. Si enim rogas, an justis impossibilia sint Dei mandata: respondent, non esse impossibilia, intelligendo impossibilitate absoluta, non autem relativa. Si quæris an possit gratiæ interiori resisti: respondent, posse; scilicet quoad effectum ulteriorem, quem habere potest absolute, at non relative. Si rogas, an a libertate excludant necessitatem: respondent se excludere; at absolutam, non relativam: item voluntatem resistere posse gratiæ vel obtemperare, si absolute spectetur, non si relative, hoc est, si cælestis delectatio gradibus inferior sit terrena. Denique Christum mortuum esse pro omnibus, & Deum velle omnes homines salvos fieri, ob gratias illas parvas & sufficientes, quæ quidem absolute possent homines ad salutem perducere, non vero relate ad præsentis hominum dispositiones. Ex quo vides quam facile etiam solo potentiæ vocabulo incautis fucum faciant Janseniani, videanturque verbis idem docere, quod Catholici. Atque inde est, quod potentiam absolutam, quæ totius mysterii iniquitatis arcanum est, ac quasi nucleus, Janseniani multis aliis nominibus involvant & implicent. Vide Tournely de Gratia Christi, Parte I. Quæst. III. Jos. Carpani in Disputatione Polemica de Delectationibus cælesti ac terrena, Sectione II. Nos in præsentiarum omisissis aliis, quæ suo loco ac tempore plenius discutientur, hoc unum examinabimus, num simplex ac relativa hæc necessitas, quæ oritur ex delectatione superiore indeliberata, liberum tollat voluntatis arbitrium, quod ad merendum vel demerendum in statu naturæ lapsæ requiritur.

In hoc Systemate librorum arbitrium subvertitur.

399. Conclusio. Necessitas, licet voluntaria & mutabilis, quæ juxta Jansenium oritur ex delectatione superiore relativa & indeliberata, tollit libertatem, quæ in statu naturæ lapsæ requiritur ad merendum vel demerendum. Prob. Hæc necessitas, quæ in systemate Janseniano oritur ex delectatione superiore relativa & indeliberata, tollit libertatem indifferentiæ. Atqui libertas indifferentiæ, ut priore Controversia ostendimus,

mus, requiritur etiam in statu naturæ lapsæ ad merendum vel demerendum. Ergo hæc necessitas tollit eam libertatem, quæ etiam in statu naturæ lapsæ requiritur ad meritum vel demeritum. Major propositio a Jansenio facile admittitur, qui libertatem indifferentiæ seu electionis Adami peccato deperditam fuisse contendit, solamque ad liberum arbitrium sufficere ac requiri immunitatem a coactione. At præfractæ negatur ab aliis, qui vel bona fide, sed incaute, Jansenianum hoc principium adoptant, putantes id in Augustini doctrina fundari; vel ab iis, qui occultis cuniculis id agunt, ut & Jansenii systema erroresque renouent, & Catholicis Catholici videantur, dum proscriptas quinque Jansenii propositiones, quas ex hoc principio tamquam ex fonte promanare ostendimus, damnare se fingunt; utque se a Jansenio differre ostendant, nescio quæ doctrinæ commenta illi falso affingunt.

400. Probaturn itaque major illa propositio Imo. In hoc systemate delectatio indeliberata relative superior, insuperabiliter & inevitabiliter trahit secum unum extremum libertatis, atque æque insuperabiliter & inevitabiliter impedit extremum oppositum. Ergo tollit libertatem indifferentiæ & arbitrii. Consequentia est certa, quia libertas indifferentiæ est facultas voluntatis, quæ positis omnibus ad agendum requisitis potest agere vel non agere. Quod si vero voluntas ab alio necessario determinetur, evidens est voluntatem facultate hac agendi vel non agendi spoliari. Prob. itaque Antecedens. Delectatio illa non potest a voluntate evitari, quia indeliberata est, omnem advertentiâ rationis antecedens, atque independens a libitu voluntatis, & cum uno extremo libertatis inseparabiliter connectitur; nimirum delectatio cælestis superior cum actu bono, prævalens vero terrena cum actu malo, adeo ut impossibile sit superiorem delectationem vinci ab inferiore. Ergo delectatio indeliberata relative superior infallibiliter atque inevitabiliter trahit secum unum libertatis extremum, atque alterum impedit.

401. Prob. II. Id quod in voluntatem inducit necessitatem antecedentem ad unum extremum libertatis, tollit libertatem indifferentiæ. Atqui delectatio relative superior inducit in voluntatem necessitatem antecedentem ad unum extremum libertatis. Ergo. P. M. Stante necessitate antecedente ad unum, voluntas non est proxime expedita ad utrumlibet. Ergo stante necessitate ad unum non datur libertas indifferentiæ. Prob. etiam minor prioris syllogismi. Delectatio relative superior est causa, cur sit & ponatur unum libertatis extremum, estque inevitabilis & inseparabiliter connexa cum uno extremo libertatis. Ergo inducit necessitatem antecedentem ad unum extremum.

402. Prob. III. Extremum libertatis, quod ex delectatione relative superiore infallibiliter sequitur, est a voluntate inimpedibile. Ergo manifeste sublata esset libertas indifferentiæ; quia voluntas ad unum libertatis extremum coarctata esset, nec amplius haberet proximam & expeditam potentiam ad utrumlibet, in qua tamen consistit libertas indifferentiæ. P. A. Quod sequitur per necessariam consequentiam ex inimpedibili, est inimpedibile. Sed extremum, quod infallibiliter sequitur ex delectatione relative superiore, per necessariam consequentiam sequitur ex inimpedibili. Ergo tale extremum est a voluntate inimpedibile. Minor propositio est certa; voluntas enim creata in systemate Jansenii impedire non potest delectationem indeliberatam & inseparabiliter connexam cum uno extremo libertatis. Major est evidens, ulterius tamen sic demonstratur. Quod per necessariam consequentiam ex inimpedibili sequitur, impediri non potest, nisi vel impediendo id ex quo sequitur, vel impediendo id quod sequitur, vel impediendo ne sequatur. Sed nihil horum potest a voluntate fieri. Ergo. P. m. Non potest fieri primum; quia in terminis implicat impediri id quod est inimpedibile: non secundum; quia impediri non potest id quod necessario sequitur, nisi impediatur id, ex quo necessario sequitur: non tertium; quia si impediri posset ne sequatur, non per necessariam
riam

riam consequentiam sequeretur, eoquod posset non sequi.

403. Altero, eoque non minus decretorio argum-
to Conclusio nostra stabilitur. Patres, præcipue S. Au-
gustinus, Manichæos tamquam violatæ & extinctæ li-
bertatis reos damnabant, eoquod in homine dari liber-
tatem a necessitate negarent, quamvis eam quæ a co-
actione est, admitterent. Contendebant enim Manichæi
duo esse domestica principia, quæ actus suos neces-
sario quidem, sed sponte depromerent, animam bonam
alteram, alteram malam: Bonam animam eadem neces-
sitate virtutem amplecti, qua Deus ipse, cujus illam
fragmentum esse delirabant, bonum amat: item malam
animam eadem necessitate in vitium ruere, qua malum
principium, a quo decisam esse fingeant, in malum
fertur. At vero necessitas illa, qua Deus necessario
bonum amplectitur, & qua malum principium, si quod
daretur, necessario malum amaret, non est interna co-
actio, sed necessitas dumtaxat simplex, & ad unum par-
tem determinatio. Manichæi igitur non coactionem,
sed simplicem tantum necessitatem induxerunt. Jam
vero Janseniana hæc necessitas, quamvis a Manichaica
discrepet causa & origine; eo quod non ex concreta
malitia vel bonitate, sed ex dominio gratiæ vel con-
cupiscentiæ oriri dicatur; quoad effectum tamen & mo-
dum determinationis invincibilis ad unum, illi omnino
simillima est. Neque enim magis fieri potest, ut vo-
luntas sub dominio gratiæ vel concupiscentiæ in alte-
ram partem flectatur, quam ut anima mala ex Mani-
chæorum mente flectatur ad bonum. Parum vero re-
fert unde ea sit necessitas, modo vera sit, antecedens,
& ineluctabilis, ut revera est Janseniana, quæ ex de-
lectatione indeliberata relative superiore oritur.

*Jansenius
idem docet
quoad sub-
stantiam,
quod olim
Manichæi.*

Argumenta contraria refutantur.

364. Objicitur I. Iniquitas accusationis. Neces-
sitas quæ oritur ex delectatione indeliberata relative
superiore, facillime conciliari potest cum libero arbi-
trio.

*Fallaces
Jansenia-
norum ex-
ceptiones*

omni-
um.

trio. Ergo systema Jansenii non evertit libertatem. P. A. Delectatio illa relative superior inducit tantum necessitatem infallibilitatis, aut tantum consequentem, quia necessitas hæc oritur ex prædicta delectatione, quæ se tenet ex parte actus secundi. Ergo non evertit libertatem. R. N. A. Ad *probat.* D. A. Inducit tantum necessitatem infallibilitatis, absolutam tamen & antecedentem, C. A. Hypotheticam & consequentem, N. A. & Conseq. Omnis necessitas, sive antecedens sive consequens, est necessitas infallibilitatis: prior tollit liberum arbitrium, non vero secunda, quia hæc supponit liberum exercitium voluntatis. Jam vero delectatio relative superior veram infert necessitatem antecedentem, quia hæc necessitas oritur ex motione prævia & indeliberata, cui voluntas in iis, quibus versatur circumstantiis, plane resistere non potest. Ratio addita optimo jure negatur; delectatio enim prævalens ex parte actus primi se tenet, eoquod voluntas per illam potentiam & vires ad operandum acquirat. Quod si etiam Jansenianis daretur, eandem ex parte actus secundi se tenere, negatio saltem delectationis relative superioris, tamquam impedimenti ad agendum vel non agendum a voluntate inaufertibilis, actum primum proximum constituet. Cum igitur in eodem instanti, quo voluntas operatur, totus actus primus proximus completus dari debeat, neque simul duo contradictoria, affirmatio nempe & negatio ejusdem rei dari queant; si delectatio relative superior ex parte actus secundi se tenet, actus primus proximus completus non erit, ideoque potentia non dabitur proxime expedita ad agendum vel non agendum, sed ad unum necessario determinata. Ergo voluntas libero spoliabitur arbitrio.

405. Dices I. Necessitas hæc a delectatione relative superiore inducta, non est nisi accidentalis voluntati humanæ, quæ non nisi propter aggritudinem contractam ex peccato originali indiget moveri ad operandum a delectatione prævalente. Ergo non lædit liberum arbitrium. P. C. Oculus, licet hic & nunc ad videndum aliquo adjumento indigeat ob aliquam accidentalem

talem ægritudinem, potentiam videndi retinet. Ergo etiam voluntas retinet nativam suam libertatem, licet per accidens hic & nunc indigeat delectatione ad operandum. R. T. A. N. C. Necessitas amandi Deum inducitur per visionem beatificam, accidentalis est voluntati Beatorum; neque tamen idcirco Beati in statu beatifico retinent libertatem indifferentiæ ad amandum vel non amandum Deum. Ergo necessitas voluntati inducitur, five essentialis five accidentalis fuerit, tollit libertatem indifferentiæ, siquidem voluntas in his circumstantiis illam tollere, aut resistere nequeat. Ad *probat.* C. A. N. C. & paritatem. Oculus ponitur indigere adjuvamento, ut melius & facilius videat: At vero in systemate Janseniano voluntas absque delectatione relative superiore, absolute & simpliciter agere nequit. Quod si vero aqua ponatur esse utriusque conditio, paritas hæc nobis subserviet. Sic enim ratiocinamur: Quamvis oculum habeam optime a natura formatum, & sol lucidissimos radios spargat; si tamen ex infirmitate, vel alia quacunque de causa palpebras aperire non valeo, verum est quod videre non possim, atque hanc impotentiam mihi in his circumstantiis vitio vel culpæ verti non posse, quamvis sit mere accidentalis. Ergo etiam si terrena delectatio indeliberata relative superior est, nec potentiam accidentalem habeo ei resistendi, id nullo pacto mihi imputari poterit.

406. Dices II. Juxta Jansenium datur indifferentia flexibilitatis in alterutram partem: & necessitas quam infert delectatio relative superior, est mutabilis. Ergo non tollitur per illam liberum arbitrium. R. D. A. Datur indifferentia flexibilitatis, & necessitas illa est mutabilis hic & nunc in occurrentibus circumstantiis, N. A. In aliis circumstantiis, C. A. N. C. Voluntas in occurrentibus circumstantiis, five hic & nunc, tam parum potest operari oppositum, quam parum opposita delectatio inferior juxta Jansenium prævalere potest delectationi cui opponitur, gradibus superiori. Ergo voluntas nullo modo potest operari oppositum; sed solum posset, nisi obstaret impedimentum insuperabi-

rabile. Cum tali igitur flexibilitate successiva fiat actualis necessitas determinans sive ad bonum per gratiam, sive ad malum per concupiscentiam; ita ut tota libertatis humanæ prærogativa in eo sit, ut una necessitate excusa, jugum alterius fubeat. Pari modo mutabilitas illa successiva Janseniana non importat immunitatem a necessitate, sed mutationem dumtaxat necessitatis; cum nempe voluntas a iugo cupiditatis transit ad dominium gratiæ, cui necessario servit, sicut servierat cupiditati: adeoque mutabilitas illa successiva non tollit a præsentis voluntatis actione necessitatem, quam tamen removendam esse Ecclesia definivit, ut salva & incolumis sit actionis humanæ libertas. Et profecto si necessitas, quantumcunque mutabilis independentem a libito voluntatis, liberum arbitrium non tollit, absolventi erunt etiam Manichæi, juxta quos homo non semper bonum, aut semper malum operabatur, sed modo unum, modo aliud, prout ex bona vel mala agebat anima: Liber etiam ad ambulandum dici poterit ille, qui vinculis constrictus ab illis expedire se nequit, eoquod remota præsentis hac necessitate, potentiam haberet expeditam ambulandi.

407. Dices III. Voluntas prævalente delectatione affecta, habet potestatem dissentendi, si velit. Ergo non amittit libertatem. R. D. A. Ita tamen, ut juxta Jansenium voluntas id non possit velle, C. A. Ut hoc ipsum possit velle, N. A. & Conseq. Ad salvandam libertatem requiritur ut voluntas possit velle dissentire gratiæ, vel delectationi. Hinc Tridentinum quando contra Lutherum & Calvinum definivit voluntatem posse dissentire gratiæ, eamque abjicere si velit, utrumque affirmavit ac definivit; voluntatem scilicet posse dissentire gratiæ, eamque abjicere, & posse id ipsum velle. Nam juxta communem loquendi modum, quando quis dicit se posse hoc vel illud si velit, simul affirmat se posse velle. Alioquin definitiones illæ Tridentini Concilii contra Novatores ineptæ fuissent ac supervacaneæ. Neque enim Calvinus & Lutherus negabant, posse voluntatem dissentire & resistere sub conditione impos-

impossibili quod velit. Cæterum quod juxta Jansenium impossibile sit, ut voluntas possit velle dissentire, patet ex eo, quia voluntas impeditam habet facultatem, eoquod destituatur opposita superiore delectatione, quæ plane necessaria est, ut voluntas possit velle oppositum.

408. Dices IV. Necessitas agendi oritur ex delectatione prævalente. Ergo est necessitas mere consequens, quæ libertati non repugnat. P. C. Necessitas consequens dicitur illa, quæ datur ex suppositione. Atqui hæc necessitas datur ex suppositione delectationis prævalentis. Ergo. R. C. A. N. C. Ad *probat.* D. A. Quæ datur ex suppositione libera illi qui necessitatem fubit, C. A. Secus, N. A. Tali enim pacto nulla daretur necessitas antecedens, sed omnis foret mere consequens, ut patet exemplo vinculis ligati, qui necessitatem habet omnino antecedentem omittendi ambulationem, quamvis hæc necessitas oriatur ex suppositione, quod vinculis sit constrictus.

309. Dices V. Voluntas potest prævalenti delectationi resistere, non quidem in sensu composito, sed diviso. Ergo voluntas libere agit. R. N. C. Talem libertatem ineptam omnino & ridiculam Calvinus, Lutherus, alique omnes liberi arbitrii hostes ultro admittunt; numquam enim v. g. Calvinus negavit, quod voluntas humana possit omittere amorem in absentia gratiæ necessitantis ad amorem. Ut igitur voluntas possit resistere delectationi relative superiori, requiritur potentia conjungendi dissensum cum illa; nemo enim proprie resistit hosti non existenti. Ergo si voluntas habet potentiam resistendi delectationi prævalenti, debet eam habere in sensu composito. P. C. Actū obedire præcepto, atque actū dissentire delectationi, dicit conjungi actionem cum præcepto, & conjungi dissensum cum delectatione. Ergo etiam potentia dissentiendi delectationi relative superiori dicit potentiam conjungendi seu componendi dissensum cum delectatione prævalente. Atqui hoc juxta Jansenium est impossi-

possibile. Ergo in systemate Janseniano voluntas nullam habet potentiam resistendi delectationi superiori.

410. Dices VI. Omnes Theologi etiam Catholici, fatentur ad libertatem sufficere potentiam operandi vel omittendi operationem in sensu diviso. Ergo cum voluntas superiori delectatione affecta retineat potentiam omittendi operationem in sensu diviso, si nimirum delectatio prævalens hic & nunc non daretur, hoc ipso voluntas ponendo actionem illam libere agit. R. D. A. Si simul sit potentia ad faciendum sensum divisum, hoc est, si ipse operans possit se ab hoc dividere, & impedire sensum compositum, C. A. Secus, N. A. & Conseq. Justus habet libertatem ad peccandum, quia licet peccare non possit in sensu composito gratiæ sanctificantis, potest tamen pro suo libito se dividere a gratia sanctificante, & impedire sensum compositum. Sedens habet libertatem ad ambulandum, quia licet non possit sedere simul & ambulare, potest tamen pro suo libito relinquere sessionem. Contra Beati licet possint, non amare Deum, si Deus auferat ab ipsis visionem beatificam, liberi tamen non sunt ad Deum amandum vel non amandum: ligatus vinculis ab ipso insolubilibus, licet currere posset si vincula removerentur, liber tamen non est ad currendum; quia nec Beati, nec vinculis ligatus sensum divisum facere, seu a visione beatifica aut vinculis dividere se possunt. Jam vero in systemate Jansenii voluntas sub delectatione relative superiori constituta dividere se nullo modo potest a delectatione, aut illam impedire, eoquod illa sit indeliberata, atque independens a libito voluntatis. Ergo voluntas nullo modo erit libera.

411. Dices VII. Necessitas quæ oritur ex delectatione relative superiore, non est absoluta, sed relativa tantum. II. Non est necessitas physica, sed moralis tantum. Ergo non lædit liberum arbitrium voluntatis. R. ad I. O. A. N. C. Necessitas hæc, sive absoluta sive relativa vocetur, est talis naturæ, ut voluntas in his circumstantiis constituta, atque hac relative superiore delectatione affecta resistere ei non possit, aut illam impe-

impedire. Ergo voluntas in his determinatis circumstantiis constituta, non habet libertatem indifferentiæ, quia potentia non est proxime expedita ad alterum membrum contradictionis. Caterum dixi, O. A. quia hæc necessitas absoluta vocari potest, si per hanc vocem intelligatur necessitas propria, vera ac realis, cui voluntas non potest non obtemperare. Ad II. R. nisi terminis abuti velint Janseniani, N. A. Necessitas quæ oritur ex delectatione prævalente, est omnino physica, quia voluntatem ita physice movet, & applicat ad unum, ut expedita non sit relative ad oppositum. Quod si vero Janseniani eam moralem vocent, quia delectando operatur, vel quia ad mores pertinet, fucum incautis faciunt: siquidem necessitas moralis nil aliud esse passim definitur, quam potentia naturaliter quidem aliud agendi, sed cum magna difficultate: quæ definitio profecto non convenit necessitati ortæ ex prævalente delectatione. Nam I. Deus in delectatione prævalente infallibiliter cognoscit actus bonos & malos creaturarum futuros. Ergo delectatio prævalens inseparabiliter conjuncta & connexa sit oportet cum actu bono vel malo creaturarum, ita ut voluntas simpliciter & absolute in præsentibus circumstantiis oppositum eligere aut facere nequeat; secus infallibilis non foret Dei cognitio, qua Deus actus nostros futuros cognoscit, cum sæpe voluntas nostra necessitati morali resistat. II. Voluntas a superiore delectatione ita rapitur & ligatur, ut actum contrarium in illis circumstantiis omnino elicere nequeat. Ergo necessitas illa non est moralis, sed physica, & libertatis humanæ eversiva.

412. Obje. II. Infirmitas argumenti a nobis Num. 402. propositi. Quamvis extremum libertatis, quod ex delectatione relative superiore infallibiliter sequitur, sit inimpedibile, non tamen idcirco tollitur libertas. Ergo. P. A. Hæc propositio Petri de Rivo Doctoris Lovaniensis, *Quod ex inimpedibili sequitur per necessariam consequentiam, est inimpedibile*, damnata fuit a Sixto IV. A. 1476, ut refert Franciscus Sylvius in I. Part. Quæst. XIX. Art. VIII. Ergo. R. N. A. Ad probat.

Quod necessario sequitur ex inimpedibili, est inimpedibile

probat. iterum N. A. Card. de Lugo de Incarnat. Dominica. Disput. XXVI. Sect. VI. ex Archivo Academia Lovaniensis luculenter ostendit, non priorem illam, quæ ipso lumine naturæ evidenter innotescit; sed aliam Petri de Rivo propositionem à Dominico Domenichi Episcopo Brixiensi, Papæ Vicario in Urbe, ex commissione & mandato ipsius Pontificis Sixti IV. damnatam fuisse, nimirum istam: *Quod ex præcedenti, ordine successivæ durationis, per necessariam consequentiam sequitur, est necessarium & inimpedibile*. Quo falso principio deceptus Petrus de Rivo negavit in Deo dari præscientiam nostrorum actuum liberorum, eoquod cum hæc præcæserit ab æterno, & ad præteritum non detur actio, adeoque voluntas humana impedire nequeat ne fuerit id quod fuit, sequeretur hominem non habere libertatem ad impediendos suos actus, eosque omittendos. Cæterum quod, detecta adeo perspicue veritate, aliqui Doctores etiam Catholici damnationem propositionem propositionis illius, *Quod ex inimpedibili sequitur per necessariam consequentiam, est inimpedibile*, adeo frequenter oggerant, causam quidem facile divinaverot: qui id fieri possit absque impudentiæ nota, sane non perspicio.

*Sola indifferentia
iudicii non
sufficit ad
libertatem.*

413. Objic. III. Indifferentia iudicii. Ubi datur indifferentia iudicii, datur etiam libertas indifferentiæ, seu indifferentia potentiæ liberæ. Atqui quando voluntas afficitur delectatione superiore, datur indifferentia iudicii. Ergo. *Confirm.* Actus elicited dependenter a cognitione necessaria, non est liber. Ergo vicissim actus elicited dependenter a cognitione indifferente non est necessarius. R. D. M. Datur etiam indifferentia potentiæ liberæ, ordinariè loquendo, & si adsint etiam reliqua requisita ad libertatem, C. M. Semper, & si reliqua requisita absint, N. M. Iudicium indifferens est radix libertatis, atque hæc ad illud consequitur, nisi aliunde impediatur, ut de facto impeditur a delectatione victrice in systemate Jansenii. Ad *confirm.* C. A. N. C. Ad libertatem indifferentiæ non tantum requiritur cognitio indifferens, verum etiam negatio omnis impedimen-

dimenti inaufertibilis a voluntate: quorum unum si desit, non dabitur amplius libertas indifferentiæ, seu potentia proxime expedita ad agendum vel non agendum, ut patet exemplo hominis vinculis ab ipso insolubilibus ligati, qui licet cognitionem habeat indifferentem de ambulatione, motivaque pro & contra illam consideret, numquam tamen liber dici poterit ad eam ambulationem ponendam vel omittendam. Quamvis igitur in casu nostro voluntati non desit libertas ex defectu iudicii indifferentis, quod ultro concedimus, deest tamen ex alio capite, nimirum per delectationem relative superiorem & victricem, quæ insuperabiliter & inevitabiliter trahit secum unum libertatis extremum, atque insuperabiliter & inevitabiliter impedit alterum. Profecto si ad salvandam libertatem sufficeret iudicium indifferens, facillimum foret explicare concordiam libertatis cum gratia efficaci; quod tamen Augustino difficillimum explicatu semper visum est. Præterea facillimum fuisset SS. Patribus, ac Theologis impugnare Fatalistas, Manichæos, Calvinum, Lutherum, ceterosque liberi arbitrii hostes, qui numquam negarunt dari in homine iudicium indifferens: potuissent enim ex iudicio indifferenti ab ipsis admisso inferre contra ipsos evidentem libertatem arbitrii quam negabant: hanc viam tamen numquam illi tentarunt, optime gnari, ex sola iudicii indifferentia liberum arbitrium nequitiam evinci posse.

414. Objic. IV. Autoritas Catholicorum. Systema utriusque delectationis relative victricis traditur ac defenditur a multis Catholicis. Ergo hoc systema innoxium est, nec libertati actuum humanorum derogat. R. id fieri ab aliquibus fide non quidem mala, sed parum prudenter, minusque caute; quia principium adoptant, ex quo quinque damnatæ propositiones Jansenii tamquam ex fonte profluunt necessario: at vero doctiores ex illis, qui hoc principium defendunt, jure merito Jansenismi suspecti sunt, quamvis forte magnificentius quam verius glorientur, Jansenistarum tela a se contrita fuisse, in multis dissidere se a Jansenii doctrina.

*Systema
utriusque
delectationis
male a
quibusdam
Catholicis
defenditur*

doctrina, & quæ sunt ejusmodi ad fucum imperitis faciendum peropportuna. Verum quidquid sit de antecedente, absque ullo scrupulo negamus consequentiam, donec adversarii rationes a nobis in probatione allatas solida responsione enervarint.

*Implicite
enim vide-
tur dam-
natum a
Sede Apo-
stolica.*

415. Dices I. Quamvis damnatæ fuerint a Sede Apostolica quinque Jansenii propositiones non tamen damnatum fuit systema utriusque delectationis relative victricis. Ergo frustra huic systemati ex eo capite conflatur invidia. R. D. A. Non fuit damnatum explicite, eoque modo, quo quinque propositiones, C. A. Implicite & æquivalenter, N. A. & Conseq. Cum Ecclesia quinque propositiones illas damnaverit in sensu Jansenii, vel ostendi debet, Jansenium ex principio delectationis relative superioris perperam intulisse quinque propositiones, velut totidem conclusiones: vel necesse est illas damnatas fuisse in ipso Jansenii systemate, delectationis scilicet superioris ac relative victricis, quæ totius systematis basis, clavis, ac fundamentum est. Prius dici non potest, eoquod quam optime cohæreant & necessario fluxu dimanent ex illo principio, ut ostendimus Num. 393. & seq. Ergo dicendum est posterius, implicite nimirum reprobatum fuisse principium ex quo damnatæ propositiones tamquam totidem corollaria necessario deducuntur.

*Ac re ipsa
idem illi
videntur
docere cum
Jansenio.*

416. Dices II. Catholici prætensi illius Augustiniani systematis Patroni, rejiciunt & damnant proscriptas quinque Jansenii propositiones, licet principium illud admittant. Ergo propositiones illæ ex eo principio non deducuntur necessario. R. D. A. Damnant verbis, C. A. Damnant re ipsa, ex qualicunque demum ignorantia id contingat, vincibili vel invincibili, aut etiam affectata, de qua re certam ferre sententiam nostrum non est, N. A. & Conseq. Damnant nimirum & admittunt quinque propositiones, in quo eas damnant vel admittunt ipsi Janseniani. Nam I. prætensi hujus Augustiniani systematis patroni docent, transgredienti præcepta divina conferri gratiam parvam, quæ dat quidem potentiam resistendi, sed impeditam a terrena delecta-

lectatione, quacum impossibile est conjungi consensum salutarem. II. Hominem non posse resistere gratiæ magnæ, sed parvæ tantum; nec in hominis potestate esse gratiam magnam obtinere, aut impedire. III. Ad merendum vel demerendum necessariam esse libertatem indifferentiæ, quæ excludat necessitatem essentialem tantum & absolutam, non vero accidentalem & relativam. IV. Christum non esse mortuum pro omnibus hominibus, quia nec meruit nec obtinuit omnibus per mortem suam gratiam magnam, qua ipsis æterna salus reddatur possibilis: ut patet in reprobis, qui ad finaliter perseverandum non habent ex meritis Christi prædictam gratiam, consistentem in cælesti delectatione relative superiore, sine qua voluntas non potest superare oppositam concupiscentiam, illique renitendo salutriter operari. Atqui hæc omnia etiam Janseniani admittunt, neque alio modo quinque propositiones defendunt. Ergo eadem est horum Theologorum & Jansenianorum doctrina. Verum est equidem, quod Jansenius ferme numquam, ac non nisi valde raro gratiam parvam *gratiam* vocaverit: quamquam hac in re non incongrue egit; capi enim difficile potest, quod tale auxilium, quocum impossibile est homini ponere actum bonum, sit donum misericordis ac liberalis divinæ manus, pretio sanguinis sui a Christo emptum. Attamen, præterquam quod perinde sit ad rei substantiam, sive gratia parva sive gratia cælestis relative inferior nuncupetur, agnovit tamen Jansenius gratiam parvam, eamque aliquando vocavit *gratiam*. Scribit enim Lib. II. de Gratia Christi, Cap. XXVII. *multos divinitus mente collustrari, immo vero & in ipsa voluntate motibus divinæ gratiæ percelli, qui tamen ab interna ejus suasionem & inclinationem dissentiant.* Et paulo post: *Videmus plurimos, qui necdum ab immunditiis carnis se abstinere possunt, vehementer tamen optare continentiam: cujusmodi vota divinæ gratiæ sunt munera, & majoris gratiæ provocativa.* Ex quibus verbis colligitur falsum esse, quod quidam asserunt, Jansenium docuisse,

se, has gratias parvas a Deo conferri, ut ille cui conferuntur, fiat peior, magisque inexcusabilis.

CONTROVERSIA IV.

AN ETIAM IN STATU NATURÆ LAPSE DETUR
LIBERTAS INDIFFERENTIÆ?

CONTRA MANICHÆOS, PRÆDESTINATIANOS, LUTHERUM,
CALVINUM, JANSENIUM.

Errores. 417. Primus contra liberum hominis arbitrium vexillum erexisse dicitur Simon Magus, hæreticorum omnium coryphæus, quem longo ordine Novatores secuti sunt communi consilio, sed ex causa diversa. Bardesanes Syrus syderum influxus obtendebat: Marcion, Manichæi, Priscillianus, aliæque Manichæorum propagines, concreatam animæ duplici bonitatem vel malitiam. Prædestinatiani, quos inter Lucidus erat in Galliis Presbyter, Gothescalcus Monachus Orbacensis, aliique, homines ex æterna Dei prædestinatione ineluctabiliter ad bonum vel malum rapi asseriebant. Petrus Abailardus docuit omnia ex absoluta rerum necessitate evenire, & Deum, ne dicam hominem, non posse res aliter facere quam facit: dementiæ hujus sectatorem habuit Joannem Wicklessum Anglum. Nostrorum temporum Sectarii, Calvinus, Bucerus, Oecolampadius, aliique, hominem in statu naturæ lapsæ nulla in re liberum habere arbitrium contendunt, ne in civilibus quidem & indifferentibus, rerum omnium quæ sunt necessitatem rejicientes in præscientiam Dei, & efficaciam gratiæ. Id ipsum docuerant Melancthon & Lutherus in Lib. adversus Regem Angliæ, & in Assertionem Articuli XXXVI. hæc scribens: *Liberum arbitrium est figmentum in rebus, Et titulus sine re, quia nulli est in manu quidpiam cogitare boni vel mali; sed omnia, ut Wicklessi articulus Constantiæ damnatus recte docet, de necessitate absoluta eveniunt. --- Non est dubium, Satana magistro, in Ecclesia venisse hoc nomen, liberum arbitrium. Uterque tamen post modum sententiam suam mutavit,*
admi-

admisitque libertatem arbitrii in actionibus civilibus tantum & externis, ut patet ex Lutheri libro de Visitatione Saxonica, Melanchtonis Locis communibus, ac Confessione Augustina in Articulis fidei, Cap. XVIII. *De libero arbitrio docent, (Confessionistæ) quod humana voluntas habeat aliquam libertatem ad efficiendam civilem justitiam, Et deligendas res rationi subiectas, Sed non habet vim sine Spiritu Sancto efficiendæ justitiæ Dei, seu justitiæ Spiritualis, quia animalis homo non percipit ea, quæ sunt Spiritus Dei.*

418. De libero arbitrio præterea, quod nova & inaudita phrasi *servum arbitrium* vocabat, absone prorsus & incomposite scripsit Lutherus, asserens in libro, cui titulus: *Operationes in Psalmos*, hominem ad regenerationem, seu conversionem mere passivè se habere. *Error est, inquit, quod liberum arbitrium habeat aliquam activitatem in bono opere, quando de interno opere loquimur. -- Ecce Jerem. XVIII. Sicut lutum in manu figuli, ita Et domus Israel in manu mea. Quid, obsecro, activitatis habet lutum, quando figulus formam ei affigit? Nonne mera passio ibi cernitur?* Durum hunc atque in-compositum loquendi modum temperarunt Melanchton & Kemnitius, Lutheri verba in alium sensum detorquendo. Et profecto nihil hac Lutheri sententia absurdius excogitari potest: Velle enim est actus immanens & vitalis, sicut intelligere & videre; proinde principium activum ejus actus debet esse ipsa voluntas. Ergo voluntas non mere passivè se habet, sicut lutum in manu figuli.

419. Bajus & Jansenius liberum arbitrium verbis admittunt, mutatis nimirum illius notionibus jam receptis, ut errorem suum occultent; re ipsa autem negant, eoquod hominem a sola coactione, non vero a necessitate antecedente & inimpedibili liberum esse velint. Admittunt quidem indifferentiam ad bonum & malum; sed per illam intelligunt indifferentiam passivam, quæ juxta illos est capacitas quam habet voluntas, ut a gratia intensiore ad bonum, vel a motu concupi-

cupiscentiæ intensiore ad malum insuperabiliter determinetur: at constanter denegant voluntati veram indifferentiam activam, & potentiam eligendi libere & absque necessitate bonum aut malum.

*Per peccatum
sum Adami
sublatum non
fuisse liberum
arbitrium o-
stenditur
ex Scrip-
turis.*

420. Conclusio. Etiam in statu naturæ lapsæ habet homo liberum arbitrium, seu libertatem a quacunque antecedente & inimpedibili necessitate, tam quoad actiones civiles, quam morales, pias & salutares. Prob. I. Authoritate Scripturarum. Nam I. Scripturæ multa continent præcepta, quibus omnes in conscientia obligantur, qualia sunt præcipue illa Exodi Cap. XX. ab ipso Christo dein in nova lege confirmata: *Non habebis Deos alienos: non assumes nomen Domini Dei tui in vanum &c.* Atqui præcepta non imponuntur a Legislatore, nisi iis qui liberi sunt, ut illa observent. P. m. quia omnium consensu Legislator ille tyrannus esset vocandus, qui subditis suis sub pœna mortis impossibilia præciperet, v. g. ut cursum Solis fistant. II. In Scripturis Deus nobis aliqua promisit sub conditione si voluerimus. Amos. Cap. V. *Quærite bonum, & non malum, ut vivatis.* Matth. Cap. XIX. *Si vis ad vitam ingredi, serva mandata.* Ergo cum sine blasphemia dici nequeat, has promissiones esse irrisorias, conditio sub qua fiunt, vere est in potestate hominis. III. Scriptura sæpius aperte testatur, per hominem stare ac stetisse, quo minus bonum egerit, vel agat. Jerem. Cap. II. *Hæc est gens, quæ non audivit vocem Domini Dei sui, nec recepit disciplinam.* Isaia Cap. V. *Quid est, quod debui ultra facere vineæ meæ, & non feci ei?* Matth. Cap. XXIII. *Quoties volui congregare filios tuos, & noluiisti?* Ergo cum per hominem steterit, quo minus bene ageret, potuit ille malum vitare: ergo habet liberum arbitrium. IV. Scriptura docet, Deum quasi recedere & explorare quid homines faciant. Deuteron. Cap. XIII. *Tentat vos Dominus Deus vester, ut palam fiat, utrum diligatis eum an non, in toto corde, & in tota anima vestra.* At frustra quasi exploraret Deus, quid homines facere velint, nisi possent illi rem eandem facere,

facere, aut non facere; nemo enim prudens explorat eventum rei determinatæ ad unum, v. g. an ignis sit calidus, vel frigidus. V. Scriptura ait, hominem sui actus dominium habere & potestatem: posse bonum vel malum eligere: nulla ipsum necessitate ad hoc vel illud agendum impelli. Gen. Cap. IV. ait Deus ad Cain: *Quare iratus es, & cur concidit facies tua? Nonne si bene ageris, recipies; sin autem male, statim in foribus peccatum aderit? Sed sub te erit appetitus ejus, & tu dominaberis illius.* Quibus verbis post peccatum Adami, atque in statu naturæ lapsæ prædicatur liberum arbitrium. Ecclesiastici Cap. XV. *Deus ab initio constituit hominem, & reliquit illum in manu consilii sui. Adjecit mandata & præcepta sua. Si volueris mandata servare, conservabunt te --- Apporuit tibi aquam & ignem; ad quod volueris, porrige manum tuam. Ante hominem vita & mors, bonum & malum: quod placuerit ei, dabitur illi.* His verbis significatur, non modo Adamum cum libero arbitrio conditum fuisse, sed etiam idem liberum arbitrium in posteris remansisse. Ecclesiasticus enim l. c. monet homines, ne causam sui peccati in Deum rejiciant: *Non dixeris, per Deum abest: quæ enim odit ne feceris. Non dicas: ille me implanavit.* Et continuo rationem adjungit: *Deus ab initio constituit hominem, & reliquit illum in manu consilii sui &c.* Si autem solus Adamus ante lapsum habuisset liberum arbitrium, inepta foret hortatio Ecclesiastici; hunc enim sensum haberet: Adamus ante lapsum, quia liberum habebat arbitrium, non potuit rejicere causam sui peccati in Deum. Ergo etiam homines in statu naturæ lapsæ causam peccati sui in Deum rejicere nequeunt, quamvis libero arbitrio sint spoliati. Quid autem ineptum magis hac argumentatione?

421. Prob. II. Autoritate Patrum. S. Justinus *Patribus*
M. Apologia I. ad Antoninum Imp. *Supplicia & crucia-* *Græcis.*
tus, nec non remunerationes optatas, pro operum meritis
unicuique retribui, per Prophetas edocti, id quod in vero
est, constituimus. Nam si hoc non fit, sed fato omnia fiant,
nihil

nihil etiam plane in nostra fuerit potestate situm. Si enim fatale sit hunc quidem esse bonum, illum vero malum; neque ille fuerit probandus, neque hic reprehendendus. Ac nisi arbitrio libero, & ad turpia fugienda, & ad honesta diligenda facultatem habeat mortalium genus, non fuerit in causa sive culpa qualiumcunque demum factorum. Sed enim libero id delectu, tum recte per virtutem vivere, tum per peccatum labi, ad hunc demonstramus modum. Athenagoras in Apologia ad Antoninum Imp. Liberi arbitrii in ipsis quoque Angelis in utramque partem constituerat Deus, sicut & in hominibus liberam & pravitatis & virtutis diligendæ potestatem habentibus cernere est. Clemens Alexandrinus Lib. I. Stromatum; Quæ cum ita sint, & liberari ab ignoracione, & a mala & delectabili electione, & ante omnia non assentiri fallacibus illis phantasiis & visis, situm est in nostra potestate. S. Irenæus Lib. IV. adv. Hær. Cap. LXXII. Non tantum in operibus, sed etiam in fide liberum, & suæ potestatis arbitrium homini servavit Dominus, dicens, Secundum fidem tuam fiat tibi, propriam fidem homini ostendens, quoniam propriam suam habet sententiam. S. Basilius Serm. de Lib. arbitrio: Quod in hominis potestate situm est liberum arbitrium, in eligendo & non eligendo situm est. S. Chrysost. Hom. LX. in Matth. explicans illud, Neceſse est ut veniant scandala, scribit: Neceſſitatem dicit, non quia libertatem voluntatis, potestatemque liberi arbitrii tollat: nec quia neceſſitati rerum humanarum vitam subjiciat; sed quod omnino venturum est, pronuntiat. Et infra: Non quia futura scandala prædixit, idcirco veniunt, sed quoniam futura erant, idcirco prædixit.

Et Latinis

422. Græcis suffragantur communi consensu Latini Patres. Tertullianus Lib. II. contra Marcionem, Cap. VI. *Tota ergo libertas arbitrii in utramque partem concessa est illi (homini) ut sui Dominus constanter occurreret, bono sponte servando, & malo sponte vitando.* S. Cyprianus Epist. LV. ad Cornelium de Christo a quibusdam suorum Discipulorum deserto ait: *Et tamen ille non increpuit recedentes, aut graviter comminatus est; sed*

sed magis conversus ad Apostolos suos dixit, Numquid & vos vultis ire? servans scilicet legem, qua homo libertati suæ relictus, & in arbitrio proprio constitutus, sibi ipse vel mortem appetit, vel salutem. Lactantius Lib. IV. Divin. Instit. Cap. XXIV. Qui dat præcepta, amputare debet omnium excusationum vias, ut imponat hominibus parendi necessitatem, non vi aliqua, sed pudore; & tamen libertatem relinquat, ut & præmium sit constitutum parentibus, quia poterant non parere, si vellent. S. Optatus Milevitanus Lib. VII. adversus Parmenianum: Quidquid necessitas peccat, non potest magnis viribus accusari. Voluntas habet pœnam, necessitas veniam. Homicida scelus potest facere, potest & non facere: adulterium moechus potest admittere, potest & non admittere, & cætera hujusmodi, in quibus liberum habetur arbitrium. S. Ambrosius in Psal. XL. Homini dedit eligendi arbitrium quod sequatur. Ante hominem vita & mors. Si deliqueris, non natura in culpa est, sed eligentis affectus. S. Gaudentius Brixiensis Tract. III. Homini concessa semel voluntatis libertas non aufertur, ne nihil de eo judicari possit, qui liber non fuerit in agendo. S. Hieronymus Dial. III. adv. Pelagianos: Hoc est, quod tibi in principio dixeram, in nostra esse potestate peccare vel non peccare, ut liberum servetur arbitrium. Profecto clarioribus verbis liberum arbitrium exprimi non poterat a Patribus Græcis & Latinis, adeo ut Calvinus ipse Lib. II. Institut. Cap. II. fateatur, se in præsentī materia aliud sentire, quam Græci Latinique Patres hæcenus senserint.

423. Prob. III. Autoritate Conciliorum & Pontificum. Arausicanum II. Cap. XXV. ait: *Hoc secundum fidem Catholicam credimus, quod accepta per baptismum gratia, omnes baptizati, Christo auxiliante & cooperante, quæ ad salutem animæ pertinent, possint & debeant, si fideliter laborare voluerint, adimplere. Constantiense Joannis Wickleffi propositionem ordine XXVII. Omnia de necessitate absoluta eveniunt, proscripsit, hancque Constantiensium Patrum censuram ratam habuit Martinus*

*Ex Con-
cilio, &
Pontifici-
bus.*

V. Tridentinum Sefs. VI. Canone IV. ait: *Siquis dixerit, liberum hominis arbitrium a Deo motum & excitatum nihil cooperari assentiendo Deo excitanti atque vocanti, quo ad obtinendam justificationis gratiam se disponat ac præparet, neque posse dissentire, si velit, sed veluti inanimè quoddam nihil omnino agere, mereque passivè se habere; anathema sit.* Can. V. *Siquis liberum hominis arbitrium post Adæ peccatum amissum & extinctum esse dixerit, aut rem esse de solo titulo, immo titulum sine re, figmentum denique a Satana inventum in Ecclesiam; anathema sit.* Can. VI. *Siquis dixerit non esse in potestate hominis vias suas malas facere, --- anathema sit.* Leo X. articulum Lutheri XXXVI. damnavit: *Liberum arbitrium post peccatum est res de solo titulo: & dum facit (homo) quod in se est, peccat mortaliter.* Baji, Jansenii, & Quesnelli propositiones proscriptæ fuerunt solemni decreto a Pio V, Gregorio XIII, Urbano VIII, Innocentio X, Alexandro VII, Clemente XI.

Ex universali fere omnium consensu.

424. Prob. IV. Ex constanti ac universali omnium ferme hominum consensu, qui merito vox naturæ appellari potest, & fundamentum omnis probitatis. Omnes enim nationes fenserunt, hominem in actionibus suis ab omni inimpedibili necessitate immunem esse, quamquam id pauci flagitiosi homines inficiati sint, ut sine conscientiae remorsu vitiis indulgerent, & concupiscentiam tamquam regulam moralitatis sequerentur. Horum tamen paucorum impudentia non officit sensui communi: Sicut Deum existere, animamque immortalem esse res dicitur universali omnium gentium consensu firmata, licet pauci quidam sceleribus infames tum Dei ipsius existentiam, tum animæ rationalis immortalitatem in dubium vocaverint.

Ac rationes Theologice.

425. Prob. V. Ratione, eaque multiplici. I. Si in homine non esset libertas arbitrii, nullus foret præmio aut pænæ locus, ut ostendimus Num. 376. II. Homo teneretur ad impossibile, & quidem sub reatu æternæ damnationis. III. Deus prohibendo malum sub gravissimis pœnis, hominemque inermem sine culpa
sua

sua ad illud necessitando, crudelius ageret cum creaturis suis, quam sævissimi Tyranni cum mancipiis. IV. Omnes deliberationes, consilia, præcepta, hortationes, monita, frustra & inepte adhiberentur, siquidem homo aliud facere non posset quam quod facit. V. Homines projecti ac profligati pudoris, gravissimis peccatis onerati, rationabilem ac legitimam haberent excusationem. VI. Deus frustra homini dedisset iudicium indifferens, seu potentiam comparandi unum cum alio. VII. Sensus intimus, & quotidiana experientia, quæ libertatis nostræ nos certos reddunt, in errorem turpissimum nos inducerent. VIII. Omnis virtutis cura & studium, tamquam prorsus inutile, ei set intermittendum. Quæ omnia tam absurda, impia, ac fatua sunt, ut nihil magis.

Argumenta contraria refutantur.

426. Objicitur I. *Authoritas Scripturarum.* Jerem. Cap. X. dicitur: Scio Domine, quia non est hominis via ejus: nec viri est, ut ambulet, & dirigat gressus suos. Proverb. Cap. XVI. *Homini est animam præparare: & Domini gubernare linguam.* Proverb. Cap. XX. *A Domino diriguntur gressus viri: quis autem hominum intelligere potest viam suam?* II. Ad Rom. Cap. XI. *Quoniam ex ipso, & per ipsum, & in ipso sunt omnia.* I. ad Cor. Cap. XII. *Omnia in omnibus operatur.* Ad Ephes. Cap. I. *Qui operatur omnia secundum consilium voluntatis suæ.* III. Proverb. Cap. XXI. *Cor Regis in manu Domini: quocunque voluerit, inclinabit illud.* Psal. CXVIII. *Inclina cor meum in testimonia tua.* IV. Isaia Cap. XLI. *Bene quoque aut male, si potestis, facite.* V. Joan. Cap. VIII. *Omnis, qui facit peccatum, servus est peccati.* II. ad Timoth. Cap. II. *Et resipiscant a diaboli laqueis, a quo captivi tenentur ad ejus voluntatem.* VI. ad Rom. Cap. VII. *Video aliam legem in membris meis -- captivantem me in lege peccati.* II. ad Cor. Cap. III. *Non quod sufficientes simus aliquid cogitare a nobis, quasi ex nobis.* VII. Ezechielis Cap. XXXVI. *Auferam cor lapide.*

T. IV. Theol. Dogm. Pol. Y

pideum de carne vestra, Et dabo vobis cor carneum. Et Spiritum meum ponam in medio vestri, Et faciam ut in præceptis meis ambuletis. VIII. I. Joan. Cap. III. *Qui natus est ex Deo, peccatum non facit: quoniam semen ipsius in eo manet, Et non potest peccare, quoniam ex Deo natus est.* Matth. Cap. VII. *Non potest arbor bona malos fructus facere: neque arbor mala bonos fructus facere.* Ergo juxta Scripturas homo non habet liberum arbitrium. R. ad I. Scriptura locis citatis indicat, magis in potestate nostra esse cogitationem & voluntatem, quam ipsam operis executionem; quamvis enim homo mature deliberet & proponat, progressus tamen negotii non est plene in ejus potestate, cum multis variisque modis impediri possit. Deus itaque dirigit gressus nostros, non tamen ita, ut non etiam nos divina gratia adjuti eos dirigamus, juxta illud Proverb. Cap. XV. *Vir prudens dirigit gressus suos.* Ad II. R. Deum operari omnia in omnibus, sed non sine nobis: operari omnia secundum consilium voluntatis suæ; sed ita suaviter, ut finat etiam res creatas agere motus suos, neque cooperando tollat aut destruat, sed adjuvet perficiatque naturam. Ad III. R. Deum inclinare corda & voluntates hominum, non eas necessitando, sed vocando eas & movendo, quomodo scit congruere ut vocantem non respuant, sed Deo libere consentiant. Ad IV. R. Isaiam l. c. non loqui de hominibus, sed de idolis & simulacris gentium, quæ oculos habent, & non vident: aures habent, & non audiunt. Ad V. R. sensum esse, quod peccator necessario subiectus sit pœnis peccati, nec possit sine gratia a peccato ejusque pœnis se liberare, & justitiam adipisci. Apostolus asserit, impios captivos teneri ad voluntatem diaboli, non quia ab illo ad peccatum necessitantur; sed quia ob pravos habitus difficillime eis resistunt. Ad VI. R. hominem captivari in lege peccati improprie dicti, seu concupiscentiæ, quæ ad peccatum inclinat, atque effectus est peccati. Homo enim, rebellis concupiscentiæ motus etiam contra voluntatem suam sæpe experitur; numquam vero invitus, ac contra voluntatem suam,

concupiscentiæ obsequitur. Alter Apostoli locus non negat nos esse sufficientes, sed affirmat tantum sufficientiam nostram non ex nobis esse, sed ex Deo, qui gratia sua nos roborat. Ad VII. R. ex verbis illis Ezechielis inferri tantummodo gratiam congruam quæ a Deo prævidetur coniungenda cum consensu, ita ut sensus sit: Dabo vobis auxilia congrua cælestis gratiæ, quæ prævideo coniungenda cum consensu libere a vobis ponendo, atque adeo cum innovatione cordis, & observatione meorum præceptorum. Ad VIII. R. Justum peccare non posse in sensu composito justitiæ; eoquod peccatum conjungi non possit cum gratia sanctificante. Sic etiam homo habens efficacem voluntatem bonam, quæ hic per arborem bonam intelligitur, quamdiu illam habet, non potest malum agere, & vicissim.

427. Objic. II. Autoritas Conciliorum & Pontificum. Milevitanum Can. IV. ait: *Utrumque donum Dei est, & scire quid facere debeamus, & diligere ut faciamus.* II. Arausicanum II. Cap. XIII. *Arbitrium voluntatis in primo homine infirmatum, nisi per gratiam baptismi, non potest reparari: quod amissum, nisi a quo potuit dari, non potest reddi. Unde veritas ipsa dicit: Si vos Filius liberaverit, tunc vere liberi eritis.* III. Idem Arausicanum Cap. XXII. *Nemo habet de suo nisi mendacium & peccatum. Siquid autem habet homo veritatis atque justitiæ, ab illo fonte est, quem debemus sitire in hac eremo; ut ex eo quasi guttis quibusdam irrorati, non deficiamus in via.* S. Cælestinus I. in Epistola ad Episcopos Galliarum, credere jubet cum Catholicis, & dicere, in prævaricatione Adæ omnes homines naturalem possibilitatem & innocentiam perdidisse, & neminem de profundo illius ruinæ per liberum arbitrium posse consurgere, nisi cum gratia Dei miserantis erexerit. Ergo homo in statu naturæ lapsæ non habet liberum arbitrium. R. C. A. N. C. Et ad I. quidem Milevitanum, aut potius Carthaginense A. 418, cui Canon ille est adscribendus, ait contra Pelagianos, non tantum cognitionem divinæ

*Ad Con-
cilia & Pon-
tifices.*

légis, ut illi fatebantur, verum etiam ac longe magis ipsam Dei dilectionem, quod Pelagiani negabant, liberale esse donum Dei gratia sua nos adjuvantis. Ex quo minime inferri potest, Deum libere a nobis non diligere; sed tantum liberum hominis arbitrium absque gratia Dei expeditum non esse ad Deum amandum. Ad II. R. Arausicanum non loqui de libero arbitrio, ut est facultas naturalis, quæ positis omnibus ad agendum requisitis potest agere vel non agere; sed ut est potentia iis omnibus instructa, quæ necessaria sunt ad operandum supernaturaliter, & sicut oportet ad salutem. Hæc autem potentia operandi ad salutem restituitur nobis in prima justificatione, quæ fit per baptismum vel in re, vel saltem in voto susceptum, Deo infundente gratiam sanctificantem, aliosque habitus supernaturales. Ad III. R. Arausicanum non negat liberum arbitrium posse actus moraliter bonos elicere, aut a peccato etiam abstinere, quando in contrarium tentatio urget, idque fieri posse viribus naturalibus tantum; sed solum asserit contra Semipelagianos, qui admettebant quædam salutis initia ex folis naturæ viribus profecta, hominem, quantum ad æternam salutem obtinendam attinet, & ad salutariter operandum, de suo nihil habere nisi mendacium & peccatum, nihilque omni ex parte bonum operari posse sine adiutorio divinæ gratiæ. Ad IV. R. per possibilitatem naturalem non intelligi a S. Cælestino potentiam quomodocunque libere agendi, sed potentiam salutariter agendi, quæ amissa est per Adæ peccatum, & per Christum reparata. Hæc autem potentia *naturalis* dicitur, quia eam Adamus, si a peccato abstinuisset, cum natura ad posteros transmisisset.

*Ad ratio-
nem.*

428. Objic. III. Ratio. Si daretur in homine libertas indifferentiæ, tunc maxime daretur, quando homo actu operatur. Atqui tunc non datur. Ergo. P. m. In eo instanti, in quo homo actu operatur, tollitur hæc indifferentia, quia per ipsum actum causa operans determinatur ad unum extremum libertatis. R. C. M. N. m. Ad *prob.* D. A. Tollitur indifferentia in actu
secun-

secundo, sive sumpta secundum negativum, C. A. Tollitur indifferentia positiva, & in actu primo, N. A. Indifferentia in actu secundo dicit negationem actus, quæ negatio utique tollitur per ipsum actum. Indifferentia in actu primo dicit tantum actum primum proximum liberum, sive ipsam potentiam proxime expeditam ad agendum vel non agendum: hæc autem potentia remanet, etiam dum actus ipse ponitur, eoquod actus non destruat potentiam suam.

429. Dices I. Humana voluntas vel bonum prosequitur, vel malum aversatur. Atqui utrumque facit necessario. Ergo. P. m. Voluntas bonum ita prosequitur, ut illud aversari non possit: malum vero ita aversatur, ut illud non possit velle. Ergo utrumque agit necessario. R. C. M. N. m. Ad *prob.* D. A. Vult bonum ita, ut illud aversari nequeat sub ratione boni; atque ita malum aversatur, ut non possit illud velle sub ratione mali, C. Ut bonum aversari nequeat sub ratione mali, & malum non possit velle sub ratione boni, N. A. & Conseq. Bonum ferme semper proponitur voluntati ut mixtum aliquo malo, ac vicissim malum ut mixtum aliquo bono, v. g. virtus ut honesta, sed tamen simul ardua: vitium ut turpe, simul tamen delectabile.

430. Dices II. Saltem voluntas tunc non est libera, quando pro una parte plura ac graviora dantur motiva, quam pro altera. Ergo. P. A. Si bilanx quæ est indifferens ad producendum motum sursum vel deorsum, inæquali pondere prematur, majus pondus determinat lancem cui incumbit, ad motum deorsum; oppositam vero lancem una cum minori pondere ad motum sursum. Ergo etiam voluntas a majori pondere motivorum necessario determinatur: ergo non est libera. R. N. A. Ad *prob.* C. A. N. C. Bilanx non est causa agens ex electione arbitrii, sed passive se habet, estque tantum determinabilis. At vero voluntas, quamvis motivo indigeat ut agat, est tamen indifferens indifferentia activa, quæ non ex defectu, sed abundantia virtutis nascitur; estque principium suæ volitionis, ac se ipsam movet. Præterea voluntatis est motiva pondera-

derare, quæ afferuntur, potestque voluntas motivis suum pondus adimere, ita ut non adeo gravia & convincentia videantur; mentem nimirum avertendo ab intuitu majoris boni, eamque inducendo ad contemplandam amabilitatem minoris boni, utpote minus ardui. Quo fiet, ut bonum in se minus majori præferat.

431. Dices III. Cum voluntas sit potentia cæca, necessario debet illam præcedere dictamen aliquod intellectus. Ergo voluntas necessario illud sequitur. R. C. A. D. C. Voluntas necessario sequitur aliquod dictamen intellectus, nempe vel hoc, vel illi oppositum, C. C. Sequitur necessario hoc potius dictamen intellectus, quam huic oppositum, N. C. Cum nihil sit volitum nisi præcognitum, ut voluntas libere agat hoc vel illud, aut actionem omittat libere ac meditato, requiritur cognitio motivorum in utramque partem, ac dictamen aliquod intellectus, quo judicat hanc vel illam actionem ponendam aut omittendam esse. Igitur voluntas, posito quod libere agat, vel actionem omittat, necessario sequi debet vel hoc dictamen intellectus, vel huic oppositum. Hæc tamen vaga necessitas sequendi hoc vel illud dictamen intellectus, non obstat libertati; quia voluntatis est eligere cui præ altero velit obtemperare.

432. Dices IV. Voluntas non tantum quaecunque dictamen intellectus, sed ultimum etiam dictamen practicum intellectus necessario sequitur, quo intellectus voluntati indicat, in his determinatis circumstantiis hoc vel illud esse faciendum, vel omittendum. Ergo voluntas non est libera. R. N. A. Intima cujusque experientia ostendit, bonum ex se mere finitum tantum ex se non habere efficaciam, ut voluntatem necessario ad operandum determinet. R. II. D. A. Necesario sequitur, ita tamen ut illud ipsum judicium practicum in potestate voluntatis sit, hæcque qualiscunque necessitas sit impedibilis a voluntate, ac mere consequens, T. A. Ut illud ipsum judicium practicum non sit in potestate voluntatis, atque ab ea impedi-

non possit, non sinendo se ab illo moveri, aut mentem ad alia convertendo, N. A.

433. Dices V. Ultimum iudicium practicum, quod voluntati dicat ita hic & nunc esse agendum, indicat illud esse voluntati in his circumstantiis melius. Ergo voluntas se non potest determinare ad oppositum, seu ad bonum minus. P. C. Bonum minus cum maiore comparatum habet rationem mali. Ergo. R. C. A. N. C. Ad *prob.* N. A. Bonum minus etiam in comparatione maioris retinet rationem boni, potestque a voluntate majori bono preferri, vel ut voluntas sua libertate utatur, vel quia illud minori difficultate se sperat consecuturam: vel denique quia mentem ab attentata maioris boni consideratione avertit.

434. Objic. IV. a Calvino Præscientia Dei. Deus infallibiliter cognoscit ac prævidet actus nostros futuros. Ergo homo non habet libertatem. P. C. Quidquid Deus prævidet esse futurum, necessario est futurum. Sed Deus omnes actus voluntatis humanæ, qui aliquando sunt futuri, prævidet esse futuros. Ergo. P. M. Si talis actus non esset necessario futurus, præscientia Dei vel posset falsificari, vel mutari, vel tolli. Atqui illa nec potest falsificari, nec mutari, nec tolli, cum sit essentialiter vera, immutabilis, atque æterna. Ergo. R. C. A. N. C. Ad *probat.* D. M. Est necessario futurum, necessitate semper antecedente, N. M. Necessitate consequente, quæ a libero exercitio creaturæ dependet, C. M. Et sic dist. minore, N. C. Nimirum quia voluntas humana in tempore existens libere ponet hunc actum, Deus ob infinitam perfectionem intellectus sui, vi cuius est essentialiter determinatus ad cognoscendam omnem veritatem, actum illum futurum prævidet, non prævisurus actum, sed omissionem illius, si voluntas humana in tempore hanc potius quam illum esset electura. Hinc sicut præscientia Dei logice præsupponit actum libere futurum tamquam objectum, quo non posito non daretur præscientia illa: ita logice præsupponit liberam determinationem voluntatis humanæ, atque inducit necessitatem mere consequentem. Sane quam

Præscientia Dei non ob est hominum libertati.

quam ineptum sit hoc Calvinii sophisma, patet in re obvia. Vel enim Deus v. g. prævidet hunc morbum fatalem fore agroto, vel non. Si prævidet fatalem fore, omnia medicamenta nihil proderunt, atque ita moriendum erit agroto: si prævidet morbum non fore fatalem, sanabitur agrotus etiam absque medicamentis. Ergo in nulla ægritudine advocandus est medicus, aut ulla adhibenda sunt medicamenta. Ad hujus *prob.* N. M. Præscientia Dei nec falsificari, nec mutari, nec tolli, sed impediri potest.

435. Dices I. Quod est ab æterno, impediri nequit ab eo quod primum est in tempore. Sed præscientia Dei est ab æterno, & actus voluntatis primum est in tempore. Ergo. P. M. I^{mo}. Antichristus non potest impedire peccatum Judæ, quia illud extitit pluribus sæculis ante Antichristum. Ergo multo minus homo impedire potest præscientiam Dei, quæ tota æternitate est prior. *Prob.* eadem major propositio II^{do}. Si id quod primum est in tempore, impedire potest præscientiam ab æterno existentem, deberet habere ad hanc aliquam prioritatem. Atqui homo nullam habere potest prioritatem ad præscientiam Dei. Ergo. R. D. M. Impediri non potest physice per existentiam rei physicam & actualem, C. M. Impediri non potest logice per existentiam rei objectivam, seu cognoscibilitatem illius, quæ cognoscibilitas ab æterno jam extitit, cum logice prius sit esse cognoscibile quam cognosci, N. M. Et sic dist. minore, N. C. Voluntas humana vi libertatis a Deo sibi concessa potest facere, ut non detur objectum hujus præscientiæ, utque illud ab æterno non fuerit cognoscibile. Si autem voluntas directe facere potest, ut non detur objectum hujus præscientiæ, hoc ipso indirecte etiam facere potest, ut data ab æterno non fuerit hæc præscientia. Voluntas igitur indirecte & logice impedire potest præscientiam Dei; non quod removeat scientiam in Deo semel datam, sed quod faciat ne illa data umquam ab æterno fuerit in Deo. Ad I. *probat.* C. A. N. C. Præscientia Dei habet connexionem consequentem & impedibilem cum actio-

ne ab homine ponenda, tamquam objecto suo, quam non habet peccatum Judæ cum Antichristo; ac proin ab hoc nec directe, neque indirecte impediri potest. Ad II. *probat.* D. M. Debet habere prioritatem physicam & realem, N. M. Logicam & objectivam C. M. Et sic dist. minore, N. C.

436. Dices II. Saltem de facto homo actu existens non poterit amplius impedire præscientiam Dei de suo peccato. Ergo non amplius est liber. P. A. Quidquid in Deo semel datur, semper datur. Ergo cum in Deo jam detur hæc præscientia, homo actu existens non poterit illam amplius impedire. R. D. A. Non potest illam amplius impedire potentia antecedente, N. A. Potentia consequente, C. A. N. C. Ad *probat.* C. A. D. C. Non poterit illam amplius impedire, hoc est, non potest efficere ut scientia quæ data semel est, non amplius detur, C. C. Ut numquam data fuerit hæc præscientia, N. C. Prius illud non dicit impedire, sed tollere præscientiam Dei: atque hoc tam parum homo potest efficere, quam parum potest peccare simul & non peccare. Posterius vero tantum dicit, quod in homine illo actu existente detur plena & completa potentia omittendi peccatum: adeoque non ponendi objectum illius præscientiæ, quo non posito, data ab æterno numquam fuisset illa præscientia.

437. Dices III. Si homo stante nunc præscientia Dei de peccato posset adhuc omittere peccatum, posset præscientiam falsificare. Atqui hoc efficere nequit. Ergo. P. M. Si homo nunc stante præscientia Dei de peccato, omitteret peccatum, præscientiam Dei actu falsificaret. Ergo si stante præscientia Dei de peccato, potest omittere peccatum, potest illam falsificare. R. N. M. Ad *prob.* C. A. N. C. vel D. C. Potest præscientiam falsificare, si stante illa posset omittere peccatum in sensu composito præscientiæ, & potentia consequente, C. C. Si tantum in sensu diviso præscientiæ, & potentia antecedente, N. C. Si homo posset nunc facere, ut dum jam datur præscientia Dei de peccato, simul non detur peccatum, tunc posset præscientiam falsificare:

care: si autem efficere tantum potest, ut non detur peccatum, eoque non dato etiam data non fuerit præscientia de peccato, non quidem falsificare, sed impedire hanc præscientiam potest. Quare hoc tantum sensu potest homo præscientiam non verificare, quod antecedenter possit non ponere objectum præscientiæ, non autem quod cum præscientia possit conjungere objectum eidem difforme.

438. Dices IV. Si præscientia Dei posset impediri a libertate creata, tunc impediretur in tempore, vel ab æterno. Neutrum horum dici potest. Ergo. P. m. Non ab æterno, quia liberum arbitrium hominis ab æterno non extitit: non in tempore, quia quod datur ab æterno impediri non potest ab eo quod est in tempore. R. C. M. N. m, & dico, præscientiam impediri posse indirecte & logice a libertate creata in tempore, quatenus homo omittendo peccatum pro illo instanti potest efficere, ut Deus pro illo instanti non præviderit peccatum, sed potius illius omissionem.

439. Dices V. Præscientia Dei antecedit actum futurum, quia est ab æterno. Ergo infert necessitatem antecedentem, adeoque nequit impediri. P. C. Si posset impediri, tunc quod factum est, posset fieri infectum. Atqui hoc implicat. Ergo. R. D. A. Antecedit tempore, C. A. Causalitate, determinatione, aut prioritate naturæ, ita ut sit illius causa, N. A. Præscientia Dei non determinat ad actum v. g. peccaminosum futurum; sed hic actus est conditio, sine qua non datur præscientia peccati. Sicut igitur objectum hujus præscientiæ impediri potest: ita etiam præscientia ad peccatum extitutum, tempore prior, ab homine impediri potest potentia antecedente. Ad *prob.* N. M. & suppositum, quod si præscientia illa impediatur, factum fieret infectum; sed duntaxat id quod factum est, factum non fuisset: id est, si præscientia de peccato impediretur, numquam illa in Deo data fuisset.

440. Dices VI. Præscientia Dei non potest determinari ab objecto futuro. Ergo non potest impediri. P. A. Si præscientia Dei posset determinari ab actu libero

bero futuro, tunc actus liber creaturæ foret causa præscientiæ. Atqui hoc fieri nequit. P. m. Præscientia Dei est ipse Deus. Atqui nullus actus liber creaturæ potest esse causa Dei, qui est Ens necessarium. Ergo nullus actus liber creaturæ potest esse causa præscientiæ divinæ. R. D. A. Non potest determinari physice, & in sensu proprio, ac si objectum futurum præstaret influxum physicum in præscientiam Dei, C. A. Non potest determinari logice, quatenus actus liber creaturæ in tempore futurus per suam cognoscibilitatem terminat præscientiam Dei, N. A. Ad *probat.* D. M. Si præscientia Dei posset physice determinari ab actu libero futuro, C. M. Si logice tantum potest determinari, N. M. Peccatum v. g. futurum non influit physice in præscientiam Dei, non est causa, non dat suum esse præscientiæ divinæ; sed est tantum purus illius terminus, sive præcise tantum terminat præscientiam divinam, estque ratio logica, cur Deus ex natura sua determinatus ad cognoscendam omnem veritatem, concipiatur a nobis cognoscere peccatum potius quam omissionem peccati.

CONTROVERSIA V.

AN S. AUGUSTINUS HOMINEM OB PECCATUM
ADAMI LIBERO ARBITRIO SPOLIATUM FUISSE
DOCUERIT?

CONTRA JANSENIANOS.

441. Antiqua est ac pervulgata Hæreticorum fraus, *Novato-*
ut Vincentius Lerinensis Commonitorii Cap. XL. *rum cona-*
testatur, Qui cum sub alieno nomine hæresin concinnare *tus in vin-*
dicando si-
machinentur, captant plerumque veteris cujuscumque viri scrip-
ta paulo involutius edita, quæ pro ipsa sui obscuritate do-
gmata suo quasi congruant: ut illud nescio quid, quodcum-
que proferunt, neque primi, neque soli sentire videantur.
Quorum ego nequitiam duplici odio dignam judico: vel eo,
quod hæreseos venenum propinare aliis non pertimescunt:
vel eo etiam, quod Sancti cujusque viri memoriam tamquam
sopi-

sopitos jam cineres profana manu ventilant, & quæ silentio sepeliri oportebat, rediviva opinione diffamant. Horum vestigiis strenue institere posteriorum temporum Sectarii. Confidentissime jactabat olim Wickleffus apud Waldensem Tomo I. Lib. I. Art. II. Cap. XXXIV. *A modernis dissentio; sed cum multis Sanctis antiquis, & specialiter Augustino convenio.* Si Luthero credimus, Augustinus totus Lutheranus est; ait enim Lib. de sermo Arbitrio contra Erasmus Roterodamum: *Fateor, mi Erasme, non immerito te istis omnibus moveri. --- Videbam omnium illorum auctoritatem, quos recensuisti, super caput meum velut diluvium inundaturum. Verum Augustinus, quem præteris, totus meus est.* Calvinus initio libri de æterna Dei Prædestinatione scribit: *S. Augustinus adeo totus noster est, ut si mihi confessio scribenda sit, ex ejus scriptis contextam proferre abunde mihi sufficiat. --- Constat, quam solide omni ex parte mihi suffragetur.* Michael Bajus identidem repetebat, se semper atque ex animo facere cum Augustino. Cornelius Jansenius, Iprensis postea Episcopus, teste Valerio Andrea in ejus Vita, *unum fere e SS. Patribus vitæ suæ ducem, Auditorumque Magistrum Sanctum delegerat Augustinum, cujus Opera omnia fere decies, libros vero de gratia divina & libero arbitrio plus quam trigesies a capite ad calcem evolaverat.* Hinc famosum opus suum non alio insigniri voluit titulo, quam *Augustinus Cornelii Jansenii.* Sectatores ac pedissequi Jansenii non alio cupiunt appellari nomine, quam *Discipulorum S. Augustini*, illud sibi quasi proprium antonomastice vendicantes. Quesnellus in præfatione explicationis apologeticæ ait, se doctrinam in Observationibus moralibus expressam ex SS. Augustino & Thoma hausisse, ratus se sub talium umbra Magistrorum adversus quaslibet Pontificum censuras sat esse tutum. *Ubi quis invenerit doctrinam in Augustino clare fundatam, illam absolute potest tenere & docere, non respiciendo ad ullam Pontificis Bullam,* ajebat Macarius Havermans Doctor Lovaniensis, Jansenianæ factionis Theologus, author propositionis ordine XXX. ab Alexandro VIII. proscriptæ.

442. Verum enimvero etiamsi Jansenians daretur, *Augustinus præponenda est auctoritas Ecclesiæ.* (quod nullo tamen pacto ipsis conceditur,) Sanctum Augustinum de libero arbitrio duriuscule scripsisse, aut etiam in errorem lapsum esse; neutiquam tamen sequeretur, solum Augustinum præponendum esse auctoritati Ecclesiæ, ac Tridentinæ Synodi decretis, nisi Janseniani ipsius Augustini ac Thomæ doctrinam ever- sam velint. S. Thomas II^{da}. II^{da}. Quæst. XI. Artic. II. ad III. scribit: *Postquam autem essent auctoritate uni- versalis Ecclesiæ determinata, si quis tali ordinationi perti- naciter repugnaret, hæreticus censeretur. Quæ quidem au- thoritas principaliter residet in summo Pontifice, . . . contra cuius auctoritatem nec Hieronymus nec Augustinus, nec ali- quis sacrorum Doctorum suam sententiam defendit.* S. Au- gustinus Epist. CXLVIII. alias CXI. ad Fortunatian- um scribit: *Neque enim quorumlibet disputationes, quam- vis Catholicorum & laudatorum hominum, velut Scripturas canonicas habere debemus, ut nobis non liceat salva honori- ficientia, quæ illis debetur hominibus, aliquid in eorum scrip- tis improbare atque respuere, si forte invenerimus quod ali- ter senserint quam veritas habet divino adjutorio vel ab aliis intellecta, vel a nobis. Talis ego sum in scriptis alio- rum, tales esse volo intellectores meorum.* Et Lib. de ve- ra Religione, Cap. X. *Quæ vera esse perspexeris, tene, & Ecclesiæ Catholicæ tribue; quæ falsa, respue, & mihi qui homo sum, ignore: quæ dubia, crede; donec aut re- spuenda esse, aut vera esse, aut semper credenda esse vel ratio doceat, vel præcipiat auctoritas.* Si Augustinus u- nus ille irrefragabilis est Magister, quid demum cau- sæ est, quod Janseniani non omnibus subscribant Au- gustini pronunciatis, seseque auctoritati Ecclesiæ, ejus- que supremo Capiti submittant, quando id toties do- cuit, fierique præcepit Augustinus? Exploratum est, causam ipsum existimasse absolutam, cum suam de ea Sedes Apostolica sententiam ferebat. Pelagianis, qui Innocentii anathemate irritati cælum terramque misce- bant, ora obturavit Serm. CXXXI. de verbis Evange- lii S. Joannis, Cap. X. verbis illis: *Jam enim de hac causa*

causa duo Concilia missa sunt ad Sedem Apostolicam: inde etiam rescripta venerunt. Causa finita est. Ad Julianum vero identidem obstrepentem ait Lib. II. Operis imperfecti, Num. CIII. *Quid adhuc quæris examen, quod jam factum est apud Apostolicam Sedem?* Epist. CLXXIII. alias (V. ad Donatum scribit: *Foris ab Ecclesia constitutus, & separatus a compage unitatis & vinculo charitatis, æterno supplicio punireris, etiamsi pro Christi nomine vivus incendereris.*

*Quæ non
Augustini
tantum,
sed alio-
rum etiam
Patrum
doctrinam
approba-
vit.*

443. Quod si Janseniani dicant, doctrinam Augustini approbatam fuisse a Conciliis, Ephesino in causa Pelagianorum, CPolitano II. Arausicano II. Romano sub S. Gelasio I. atque ab ipsis Romanis Pontificibus, Cælestino I. in Epist. ad Episcopos Galliarum: *Augustinum Sanctæ recordationis virum, pro vita sua atque meritis in nostra communione semper habuimus, nec unquam hunc sinistrae suspicionis saltem rumor adpersit: quem tantæ scientiæ olim fuisse meminimus, ut inter Magistros optimos etiam ante a meis Decessoribus haberetur. Bene ergo de eo omnes in commune senserunt, utpote qui utique cunctis & amoris fuerit & honori. Unde reseratur talibus, quos male crescere videmus. Item S. Hormisda in Epist. ad Possessorem, & Joanne II. Epist. III. Hujus (Augustini) doctrinam, secundum Prædecessorum meorum statuta, Romana sequitur, & servat Ecclesia. R. I. Si Pontifices in materia fidei falli possunt, ut volunt Janseniani, cur in commendando Augustino infallibiles erunt? R. II. a Conciliis & Pontificibus non Augustini libros tantum, verum etiam aliorum Patrum, Hieronymi, Ambrosii, Basilii &c. approbatos fuisse, ut liquet ex V. Synodo, sive CPolitana II. quæ Collatione III. ait: *Super hæc sequimur per omnia & Sanctos Patres & Doctores Ecclesiæ, Athanasium, Hilarium, Basilium, Gregorium Theologum, Gregorium Nyssenum, Ambrosium, Augustinum, Theophilum, Joannem CPolitenum, Cyrillum, Leonem, Proclum. Et suscipimus omnia, quæ de recta fide, & condemnatione hæreticorum exposuerunt. Neque ex verbis Pontificum plus evinci potest, quam quod**

quod Augustinus irreprehensibiliter fidem Catholicam docuerit, præcipue contra Pelagianos; quin tamen omnia, quæ Augustinus scripsit, ad fidem Catholicam pertineant. Profecto si Ecclesia tamquam fidei articulum definire voluisset, quidquid in Augustini libris continetur, ad fidem Catholicam pertinere, iisdem ferme verbis usa fuisset, quibus Patres Concilii Romani sub S. Gelasio I. A. 494. S. Leonis Epistolam commendarunt. *Item (Ecclesia suscipit) Epistolam Beati Leonis Papæ ad Flavianum CPolitanum, de cujus textu quispiam si usque ad unum jota disputaverit, Et non eam in omnibus venerabiliter receperit, anathema sit.*

444. Verum quamvis Ecclesia de libris S. Augustini ita locuta fuisset, ut Patres Synodi Romanæ de Epistola S. Leonis ad Flavianum, ne tum quidem Janseniani Augustini auctoritatem auctoritati Ecclesiæ præferre possent. Nam I. si Ecclesia fallitur juxta Jansenianos, dum definit in libro Jansenii impias hæreses contineri, cur Ecclesia falli non poterit Augustini libros approbando? Si falluntur Innocentius X. Alexander VII. & Clemens XI. cur falli non potuere Joannes II. Hormisdas, & Cælestinus? II. Quamvis Ecclesia declarasset, omnia verba Augustini infallibilem, immo divinam habere auctoritatem, confugiendum tamen nihilo fecius foret ad Ecclesiam, tamquam columnam veritatis, ut illa doceat ac declaret, quo sensu Augustini verba intelligenda sint; eaque loca, quæ nobis favere ipsi Janseniani non inficiantur, cum aliis in speciem oppositis quomodo sint concillianda. Numquid enim Evangelia divinam habent auctoritatem? Nihilo tamen minus Nicænum I. litem cum Arianis exortam dirimere debuit statuendo, quis gemini loci in speciem oppositi, *Pater major me est. Ego Et Pater unum sumus*, sit sensus, & quo pacto inter se conciliari debeant? Jam vero Ecclesia tum in Pontificum Constitutionibus, tum in Tridentina Synodo aperte docuit, hæresin esse asserere, quod gratiæ divinæ in statu etiam naturæ lapsæ resisti non possit, aut quod nullus libero arbitrio locus in hoc statu relinquatur, & quæ sunt
hujus-

*Ad Eccle-
siam con-
fugiendum
foret,
quamvis
Augustini
doctrina
foret in-
fallibilis.*

hujusmodi. Ecclesia propositionem hanc per Alexandrum VIII. publico decreto proscripsit: *Ubi quis invenerit doctrinam in Augustino clare fundatam, illam absolute potest tenere & docere, non respiciendo ad ullam Pontificis Bullam.*

*Adoque
Jansenia-
ni causa
scciderunt*

445. Neque dicant Janseniani, Magistrum suum a Pontificibus tantum damnatum fuisse. Ut enim nihil dicam de infallibili Romanorum Pontificum in quæstionibus fidei & morum authoritate, Tridentinum aperte gratiam necessitantem, ac libero hominis arbitrio extialem, ut hæreticam damnavit. II. Decretum Innocentii X, ac Bulla *Unigenitus* Clementis XI. acceptata sunt ab universa Ecclesia, cui Christus non eo, tantum exiguo tempore, quo in Concilio congregata est, sed etiam dispersæ inerrantiam promissit. III. Etiamsi Oecumenicum Concilium convocaretur, non alia tamen expectari posset sententia, quam ea, quæ a tot Pontificibus, & Episcopis per orbem dispersis lata est. Janseniani vero Conventum illum Ecclesiæ, tamquam a Christo Sponso suo derelictæ, pari audacia ac temeritate spernerent, qua olim Lutherus, aliique Sæculi XVI. Novatores Tridentinam Synodum.

446. Hæc quæ de Augustini authoritate disseruimus, non præsentī modo, verum etiam aliis materiis inservire poterunt, in quibus de mente Augustini disceptatur. Maximi haud dubie est ponderis authoritas Augustini, etiam in illis quæ ab Ecclesia clare non sunt decisa; attamen non est infallibilis, aut tanta, ut authoritati Ecclesiæ præponi possit, aut debeat, maxime si Ecclesia opinionem aliquam damnet, quæ in Augustino satis expressa ac tradita videretur. Qui Augustini authoritatem altius extollunt, aut decipere amant solito hæreticorum more, aut splendide decipiuntur, fortassis zelo quidem ducti, sed non secundum scientiam. Verumtamen ne Janseniani hæc a Catholicis ex desperatione dici autument, quod Augustinum sibi ereptum cernant, solide ac perspicue ostendemus, Jansenianos pessima fide, atque inani conatu Augustinum sibi vindicare.

447. Conclusio. S. Augustinus constanter docuit, homini etiam in præsenti statu naturæ lapsæ inesse libertatem ab omni necessitate simplici & antecedente. Præter ea, quæ Controversia I. & II. ex Augustino deprompsimus, probatur Conclusio ex aliis libris & locis S. Doctoris, quibus mentem suam perspicue hac de re aperuit. Ac I. quidem Lib. de duabus Animabus, Cap. XI. ait: *Peccatum est voluntas retinendi vel consequendi quod iustitia vetat, Et unde liberum est abstinere.* Ergo ab homine exclusit omnem necessitatem simplicem, antecedentem; hac enim posita jam non amplius liberum esset abstinere.

S. Augustinus Catholicam de lib. arbitrio doctrinam in velle propugnauit.

448. II. Libro de Natura & Gratia, Cap. LXV. approbans verba S. Hieronymi: *Liberi arbitrii nos condidit Deus, nec ad virtutem nec ad vitia necessitate trahimur; alioquin ubi necessitas, nec corona est,* subjungit illico: *Quis non agnoscat? Quis non toto corde suscipiat? Quis aliter conditam humanam neget esse naturam? Sed in recte faciendo ideo nullum est vinculum necessitatis, quia libertas est charitatis.* Lib. II. contra Faustum, Cap. V. *Liberum arbitrium voluntatis, quo vel bene vel male vivitur, propter justum iudicium Dei ab omni necessitatis vinculo vindicamus.* Lib. III. de Libero arbitrio, Cap. XX. affirmat, *animam in ignorantia Et difficultate natam, nulla tamen necessitate comprimi ad permanendum in eo, quo nata est.* Lib. I. Retractationum Cap. IX. istos de Libero arbitrio libros censoria virgula recognoscens, non retractat quod de immunitate a necessitate & indifferentiæ libertatē dixerat; sed monet dumtaxat necessitatis gratiæ mentionem esse faciendam, de qua pauca tunc dixerat, quod institutæ contra Manichæos disputationis ratio plura non postularet.

449. III. Libro de Spiritu & litera, Cap. III. scribit: *Nos autem dicimus humanam voluntatem sic divinitus adjuvari ad faciendam iustitiam, ut præter, quod creatus est homo cum libero arbitrio voluntatis, præterque doctrinam qua ei præcipitur quemadmodum vivere debeat, accipiat Spiritum Sanctum, quo fiat in animo ejus delectatio, dilectio-*
T. IV. Theol. Dogm. Pol. z que

que summi illius atque incommutabilis boni quod Deus est. Epist. CLXXVII. alias XCV. ad Innocentium: *Ad non peccandum, id est, ad non male faciendum, quamvis esse non dubitetur arbitrium voluntatis, tamen ejus potestas non sufficit, nisi adjuvetur infirmitas.* Lib. II. de Nuptiis & Concupisc. Cap. III. Juliano querenti, quod si quis aut liberum in hominibus arbitrium, aut Deum nascentium esse Conditorem dixerit, illico Cælestianus aut Pelagianus vocaretur, Augustinus ita respondet: *Non est ita ut loqueris, quicumque ista dixisti; non est ita: multum fallere meditaris: non liberum negamus arbitrium. --- Liberum itaque in hominibus esse arbitrium, & Deum esse nascentium Conditorem, utrique dicimus; non hinc estis Cælestiani & Pelagiani. Liberum autem esse quemquam ad agendum bonum sine adjutorio Dei, & non erui parvulos à potestate tenebrarum, & sic transferri in regnum Dei hoc vos dicitis; hinc estis Cælestiani & Pelagiani. Quid obtendis ad fallendum communis dogmatis tegmen, ut operiar proprium crimen, unde vobis inditum est nomen?* Ergo Augustinus agnovit communem esse secum Pelagii & Juliani sententiam de libero arbitrio, nisi quod ad bene ac salutariter agendum necessitatem divinæ gratiæ adstrueret, quam inficiabantur Pelagiani. Certe id ipsum innumeris fere locis testatur Augustinus, admittere se pariter cum illis liberum hominis arbitrium; non posse tamen sine gratia actum poni salutarem. Quod si Augustinus libertatem a coactione, non vero a necessitate simplici & absoluta admisisset, ut Jansenius contendit, & Pelagianos & totam Ecclesiam deciperisset scribendo: *Liberum itaque in hominibus esse arbitrium utrique dicimus.* Quam enim ætate aut sæculo liberum arbitrium aliud umquam significavit, quam libertatem ab omni necessitate simplici & antecedente? Ergo Augustinus in eo sensu admisit liberum arbitrium, quo id mittebant Pelagiani, & quo ipse Augustinus id defendit contra Manichæos, qui non negabant liberum arbitrium a coactione, sed tantum a necessitate. Vide dicta Controversia I. hujus Articuli.

450. IV. Lib. II. de Actis cum Felice Manichæo, Cap. IV. ait: *Habet unusquisque in voluntate, aut eligere quæ bona sunt, & esse arbor bona; aut eligere quæ mala sunt, & esse arbor mala.* Lib. X. de Genesi ad litteram, Cap. XIV. *Potest (homo) per voluntatem bonam eligere vitam bonam; quod quidem non poterit, nisi adjuverit gratia Dei per Mediatorem.* Enarratione in Psalm. LI. *Benignitas ante te, iniquitas ante te: compara & elige.* Atqui verbum *eligere* juxta omnes significat indifferentiam ad opposita: neque enim electionem habet, qui inimpedibili necessitate ad unum determinatur. Ergo.

451. V. Lib. I. Retractat. Cap. XXII. *In potestate quippe hominis est mutare in melius voluntatem, sed ea potestas nulla est, nisi a Deo detur.* Lib. de diversis Quæstionibus LXXXIII. Quæstione LXVIII. *Ad illam cœnam, quam Dominus dicit in Evangelio præparatam, nec omnes qui vocati sunt, venire voluerunt, neque illi qui venerunt, venire possent, nisi vocarentur. Itaque nec illi debent sibi tribuere qui venerunt quia vocati venerunt: nec illi, qui noluerunt venire, debent alteri tribuere, sed tantum sibi; quoniam ut venirent, vocati erant in libera voluntate.* Lib. de Spiritu & littera ad Marcellinum, Cap. XXXI. examinat, utrum fides ipsa in nostra constituta sit potestate: & postquam explicavit, quid sit rem aliquam in nostra esse potestate: *Hanc dicimus potestatem, ubi voluntati adjacet facultas faciendi. Unde hoc quisque in potestate habere dicitur, quod si vult facit; si non vult, non facit,* affirmat fidem in nostra esse potestate, quamvis ad fidem necessario requiratur donum liberale gratiæ; hancque affert rationem, quia qui vult, credit, qui non vult, non credit: *Vide nunc, utrum quisque credat, si noluerit; aut non credat, si voluerit. Quod si absurdum est: quid enim est credere, nisi consentire verum esse quod dicitur? Consensus autem utique volentis est: profecto fides in potestate est.* Ac paulo post Cap. XXXIV. subjungit: *His ergo modis (suasionibus) quando Deus agit cum anima rationali, ut ei credat, neque enim credere potest quodlibet libero arbitrio, si nulla sit suasio vel vocatio cui cre-*

dat; profecto & ipsum velle credere Deus operatur in homine, & in omnibus misericordia ejus prævenit nos: consentire autem vocationi Dei, vel ab ea dissentire, sicut dixi, propriæ voluntatis est. Ubi notandum est, Augustinum dixisse propriæ, non alienæ voluntatis esse, quod ad Simplicianum Lib. I. Quæst. II. Num. X. adhuc clarius explicat. *Ut velimus, & suum voluit esse & nostrum; suum vocando, nostrum sequendo.* Inspiratio, quamvis & ipsa sit actus voluntatis nostræ, non tamen ab Augustino nobis tribuitur, sed Deo, qui solus eam infundere potest: sequi vero inspirationem vel non sequi, nobis imputatur; quia quamvis in alicujus arbitrio non sit credere sine inspiratione, præsentem tamen inspirationem liberum est credere, vel non credere. Denique Lib. V. Operis imperfecti, Num. XLVIII. scribit adversus Julianum S. Doctor: *Tam bonum certe quam malum ex propria homo, sicut dicis, voluntate facit, & utriusque in illo possibilitas æqua lance libratur: & ad bene faciendum Deus adjutorium subministrat.* Vide plura apud Petavium Theolog. Dogmatum Tomo III. de Opificio sex dierum, Lib. IV. Nicolaum Ghezzi Principi della Filosofia, Tomo I. Parte II. Illustrissimum Scipionem Maffei Historiæ Theologicæ Lib. IX. & XIV. Natalem Alexandrum Dissertat. XXVI. in Hist. Eccles. Sæculi III. Laurentium Alticotium Summæ Augustinianæ Parte I. Quæst. VII. & Parte IV. Quæst. II. Artic. IV.

Argumenta contraria refutantur.

*Exceptiones Janse-
nianorum
eliduntur.* 452. Objicitur I. contra Imam probat. Definitio peccati, quam dedit S. Augustinus Lib. de duabus Animabus, Cap. XI. spectat Adami peccatum, non vero personalia, in quæ homines prolabantur. Ergo ex illa definitione nihil evincitur. P. A. S. Doctor Lib. I. Operis imperfecti contra Julianum, qui hac ipsa definitione peccati Augustinum premere, ac parvulos sine peccato Originali nasci probare conabatur, Num. XLIV. ita scribit: *Hic peccatum definitum est, quod tantummodo*
pec-

peccatum est, non quod etiam pœna peccati. De hoc quippe agendum fuit, quando mali origo quærebatur: quale commissum est a primo homine ante omne hominis malum. Sed tu aut non potes intelligere, aut non vis. Et Num. XLVII. ait: Ipse est Adam, quem nostra illa definitio, quæ tibi placuit, intuebatur, cum dicerem, Peccatum est voluntas retinendi vel consequendi quod iustitia vetat, Et unde liberum est abstinere. Adam quippe omnino quando peccavit, nihil in se habebat mali, quo nolens urgeretur ad operandum malum, Et propter quod diceret, Non quod volo facio bonum, sed quod nolo malum hoc ago: ac per hoc id egit peccando, quod iustitia vetabat, Et unde liberum illi fuerat abstinere. Nam ei qui dicit, Quod nolo malum hoc ago, abstinere inde, liberum non est. Ergo cum definitio illa ad illud peccatum pertineat, quod tantummodo peccatum est, non autem pœna peccati, definitio illa Augustiniana se non extendit ad peccata hominum personalia, quæ non modo peccata sunt, sed etiam pœna peccati. R. N. A. Ad probat. C. A. N. C. Quamvis Augustinus l. c. cum Manichæis disputans ad peccatum Adami præcipue respexerit, unde omnis mali origo fluxit, in libris tamen contra Julianum editis numquam ab illa definitione exclusit peccata hominum personalia, vere ac proprie talia; sed tantum peccatum originale, ac motus indeliberatos concupiscentiæ, qui sunt quidem pœna peccati, at non peccata vere, proprie ac formaliter talia, modo eis resistatur, ut dictum fuit Artic. I. huius Tractatus, Controversia II, eoquod liberum nobis non sit iis carere.

453. Dices. S. Augustinus ab illa definitione peccati excludit illud, quod est peccatum & pœna peccati. Atqui omnia personalia hominis lapsi sunt peccata, & pœna peccati originalis. Ergo ab illa definitione excludit omnia personalia peccata hominis in statu naturæ lapsæ. R. D. M. Quod est pœna peccati immediate, qualis est ignorantia invincibilis, & indeliberati motus concupiscentiæ, C. M. Quod pœna peccati mediate, qualia sunt peccata hominum personalia, quæ

quæ sunt effectus rebellis concupiscentiæ, N. M. Et D. m. Personalia peccata hominum sunt pœna peccati Originalis immediate, N. m. Mediate, Transeat min. Dixi, *Transeat*; universaliter enim verum non est, omnia personalia peccata hominis lapsi pœnas esse peccati originalis, etiam mediate tantum. Non infrequenter enim accidit, ut homo ex mera malitia peccet, quamvis legem Dei optime perspectam habeat, nullisque concupiscentiæ stimulis, aut certe modicis urgeatur, quod expresse agnovit Augustinus Lib. I. Operis imperfecti Num. CV. *Cum igitur & illa fateatur in hominibus esse peccata, quæ committuntur, non necessitate, sed voluntate, quæ tantummodo peccata sunt, unde ab eis liberum est abstinere.* Quare per peccatum, quod etiam pœna peccati est, & a quo S. Augustinus negat liberum esse abstinere, non intelliguntur peccata personalia, quæ deliberate in hoc statu a nobis committuntur; sed ea solum, quæ ex omnium opinione caveri non possunt, videlicet originale peccatum, quod proprie peccatum est, & concupiscentia cum motibus ejus indeliberatis, atque ea peccata, quæ ex ignorantia invincibili committuntur; quæ licet proprie peccata non sint, vocantur tamen peccata, quod primi peccati fructus sint & pœnæ.

454. Objic. II. contra reliquas probationes. Libros de Libero arbitrio, aliosque contra Manichæos S. Augustinus scripsit ante suum Episcopatum: atate autem provector hanc suam de libero arbitrio doctrinam damnavit in Libris contra Pelagianos, & in libris suarum Retractionum. II. Sermones illius, & Enarrationes in Psalmos levioris sunt momenti, quod alius omnino a se fuerit, dum pro concione diceret. Ergo ex illis solidum argumentum instrui nequit. R. ad I. Libros quidem de Libero arbitrio, & quædam alia contra Manichæos ante Episcopatum suum scripsit Augustinus; plura tamen contra eosdem scripsit jam Episcopus, ut v. g. librum contra Epistolam Manichæi, de Natura boni, contra Faustum & Felicem Manichæos, Petilianum, Secundinum &c. Quæ vero contra Manichæos

chaos tum ante tum post Episcopatum suum scripsit, tantum abest ut in libris Retractionum damnaverit, ut etiam ea confirmaverit Lib. I. Retractat. Cap. IX. Num. VI. scribens: *Ecce tam longe antequam Pelagiana hæresis extitisset, sic disputavimus, velut jam contra illos disputaremus.* Pro modestia sua & veritatis amore damnat S. Doctor Lib. I. Retractat. Cap. XXIII, quæ olim ante exortos Semipelagianos incautius scripserat, docetque ipsum etiam initium fidei non ex nobis, sed ex Deo esse; At vero dum libros de libero arbitrio, aliaque quæ contra Manichæos scripsit, incudi iterum subicit Augustinus, numquam negat liberum hominis arbitrium etiam in statu naturæ lapsæ ab omni necessitate inimpedibili immune esse; quod singuli fere versus horum librorum tam luculenter docent, ut nec Augustinus aliter illos explicare potuisset; sed eos integros spongia, ut dicitur, delere, aut omnino igni tradere debuisset, siquidem mentem suam quam in libris illis tam manifeste prodiderat circa liberum hominis arbitrium, postea mutasset. Ad II. R. has esse de causa sua desperantium voces, quæ sine luculenta Sancti Doctoris injuria proferri nequeunt. Enarrationes in Psalmos Cassiodorus alique Veteres cæteris omnibus Augustini lucubrationibus anteponunt; Sermones vero ad populum habuit jam Episcopus, plene utique illo tempore a Deo collustratus: neque fas sibi esse putavit vir Sanctissimus e suggestu verba faciendo disseminare dogmata minus sana ac periculosa.

455. Objic. III. S. Augustinus expressis ac clarissimis verbis ait, liberum arbitrium per peccatum Adam periisse. Ergo. P. A. I. Lib. contra Fortunatum, Disput. II. Num. XXII. scribit S. Doctor: *Liberum voluntatis arbitrium in illo homine fuisse dico, qui primus formatus est. Ille sic factus est, ut nihil omnino voluntati ejus resisteret, si vellet, Dei præcepta servare.* Postquam autem libera ipse voluntate peccavit, nos in necessitatem præcipitatis sumus, qui ab ejus stirpe descendimus. Et Lib. de Perfectione justitiæ, Cap. IV. Respondetur, per arbitrii li-

berta-

bertatem factum, ut esset homo cum peccato; sed jam pœnalis vitiositas subsecuta, ex libertate fecit necessitatem. II. In Enchiridio Cap. XXX. scribit: Libero arbitrio male utens homo & se perdidit, & ipsum. --- Cum libero peccaretur arbitrio, victore peccato amissum est liberum arbitrium. Lib. de Perfect. justitiæ, Cap. IV. Victa enim vitio in quod cecidit voluntate, caruit libertate natura. Hinc alia Scriptura dicit: A quo enim quis devictus est, huic & servus additus est. Et Epist. CCXVII. alias CVII. ad Vitalem: Liberum arbitrium ad diligendum Deum primi peccati granditate, perdidimus. III. Sermone CLVI. Num. XI. ait, nos non agere, sed agi. R. D. A. Periisse per peccatum Adami liberum arbitrium, id est, periisse libertatem indifferentiæ, oppositam necessitati, seu inimpedibili determinationi ad unum, N. A. Periisse libertatem, seu immunitatem a peccato, ejusque pœnis, morte nimirum & concupiscentia, C. A. N. C. Fatemur ultro libertatem hanc a peccato periisse, neque posse nos ab ea servitute liberari, nisi per Christum liberatorem nostrum, juxta illud Joan. Cap. VIII. Si vos Filius liberaverit, vere liberi eritis.

456. Ad I. R. C. A. N. C. Per liberum arbitrium non intelligitur ibi simpliciter libertas indifferentiæ, sed libertas sana ac robusta, seu facultas prompte facile, & hilariter se determinandi ad bonum, quacum primus homo conditus fuit, & quam Augustinus dicit nos amisisse per Adami peccatum. Per necessitatem illam intelligitur necessitas patiendi motus inordinatos concupiscentiæ ad peccatum inclinantes, nascendi in peccato originali, & manendi sub captivitate dæmonis, donec per baptismum liberemur: aut etiam necessitas peccandi, non vere ac proprie talis, nempe inimpedibilis & physica, sed moralis tantum, quæ consistit in magna difficultate aliquid agendi vel omittendi. Porro certum est, necessitatis nomen, cui hominem subesse dicit Augustinus, vario sensu ab illo usurpari. Aliquando loquitur S. Doctor de necessitate consequente liberam voluntatis determinationem, quæque ab ipso homi-

homine impediri potest: quandoque de necessitate, non absoluta quidem & plena, sed tantum secundum quid modo necessitatem sumit pro simplici molestia, aut difficultate in operando, ita ut vocis hujus significatio ex subiecta materia, atque aliis clarioribus textibus desumi debeat.

457. Ad II. Respondet ipse S. Augustinus Lib. I. ad Bonifacium contra duas Epistolas Pelagianorum, Cap. II. *Quis autem nostrum dicat, quod primi hominis peccato perierit liberum arbitrium de humano genere? Libertas quidem periit per peccatum, sed illa quæ in paradiso fuit, habendi plenam cum immortalitate iustitiam; propter quod natura humana divina indiget gratia.* Ex quibus verbis manifeste sequitur, Augustinum non negasse libertatem a necessitate, sed tantum immunitatem a peccato ac pœnis peccati, & præcipue a concupiscentia, cujus rebelles motus sæpe inviti experimur. Citatis itaque in objectione locis arguit S. Doctor Pelagianos, qui asseriebant liberi arbitrii virtute concupiscentiam extirpari atque aboleri posse: hominem ex se suisque viribus absque interioris gratiæ adiutorio fidem obtinere, ac Deum supernaturali amore diligere posse: liberum arbitrium hominis post peccatum Adami tam plenum esse, ac fuerat ante peccatum, adeoque pari facilitate hominem operari bonum, ac illud antea operabatur, & quæ plura alia sunt Pelagianæ doctrinæ flagitia. Demonstrat itaque Augustinus, homines per Adami peccatum gratia supernaturali spoliatos fuisse, sine qua liberum arbitrium nihil omnino potest in ordine ad salutem; atque hinc liberum arbitrium ad bonum supernaturale amissum esse dicit, non quod ipsa naturalis facultas volendi aut non volendi sublata sit; sed quia liberum arbitrium gratia supernaturali spoliatum fuit, tamquam complemento necessario, ut salutariter possit operari. Hunc sensum clarissime indicat ipse S. Augustinus Lib. II. ad Bonifacium contra duas Epistolas Pelagianorum, Cap. V. *Peccato Adæ liberum arbitrium de hominum natura periisse non dicimus: sed ad peccandum valere in hominibus subditis diabolo; ad*
bene

bene autem pieque vivendum non valere, nisi ipsa voluntas hominis Dei gratia fuerit liberata, Et ad omne bonum actionis, sermonis, cogitationis adjuta. Sexcenties repetit Augustinus, hominem non esse liberum, nisi liberetur; liberatio autem, quæ per primam nobis gratiam obvenit, sublevat, extollit, & perficit arbitrium, non evertit. Epist. CLVII. alias LXXXIX, ad Hilarium ait: Non enim voluntatis arbitrium ideo tollitur, quia juvatur; sed ideo juvatur, quia non tollitur. Et Lib. de Correptione & Gratia, Cap. XII. Per secundum Adam Dei gratia liberati, Et ista liberatione habentes liberum arbitrium, quo serviant Deo.

458. Ad III. R. Id non sine incredibilis impudentiæ nota a Jansenianis nobis objici. Verba Augustini hæc sunt Sermone CLVI. Num. XI. *Dicit mihi aliquis, ergo agimur, non agimus. Respondeo, immo Et ageris; Et tunc bene agis, si a bono agaris. Spiritus enim Dei, qui te agit, agenti adjutor est tibi. Ipsum nomen adjutoris præscribit, quia Et tu ipse aliquid agis. Agnosce quid postcas; agnosce quid confitearis, quando dicis, Adjutor meus esto, ne derelinquas me, Adjutorem utique invocas Deum. Nemo adjuvatur, si ab illo nihil agatur. --- Si non esses operator, ille non esset cooperator.*

459. Dices I. Juxta S. Augustinum in statu naturæ lapsæ homo peccator est subiectus servituti damonis & concupiscentiæ: immo ipsum liberum arbitrium redactum est in servitutem & captivitatem peccati. Ergo in statu naturæ lapsæ sublatum est ex Augustini sententia liberum arbitrium. R. C. A. C. Juxta S. Augustinum homo peccator est subiectus servituti damonis, quia graviores patitur tentationes, quibus ut plurimum cedit, destitutus potentioris gratiæ auxilio; quamvis si vellet, posset non cedere, cum Deus nemini, adeoque etiam nec peccatoribus gratiam sufficientem deneget. Dominatui concupiscentiæ pari modo subditur homo peccator, quia vehementiores illius motus experitur, quibus ut plurimum obtemperat, nulla constrictus necessitate physica, sed morali tantum, quæ

quæ libertatem simpliciter non tollit. Per servitutem & captivitatem liberi arbitrii Augustinus nil aliud intelligit, quam magnam propensionem ad malum propter rebellionem concupiscentiæ ex peccato Adami ortam, quæ absolute superari quidem potest, at non sine magna difficultate.

460. Dices II. S. Augustinus contra Pelagianos contendit, ad salutariter operandum necessarium esse in statu naturæ lapsæ auxilium gratiæ actualis. Ergo in statu naturæ lapsæ homo non amplius indifferens est ad bonum vel malum amplectendum. R. C. A. N. C. Necessitas auxilii divini non impedit, quo minus eo nobis oblato possimus pro arbitrio agere vel non agere: neque libertas indifferentiæ est facultas agendi independentem ab omni auxilio superaddito; sed solum est facultas, qua positis omnibus ad agendum prærequisitis possumus agere vel non agere. Ergo necessitas divini auxilii non tollit libertatem indifferentiæ. Rem hanc explicat S. Augustinus Lib. de Spiritu & litéra ad Marcellinum, Cap. XXX. scribens: *Liberum arbitrium non evacuatur per gratiam, sed statuitur, quia gratia sanat voluntatem, qua iustitia libere diligatur*: potestque paritate non incongrua illustrari. Certum est, quod sine luce nullum objectum videri possit; neque tamen idcirco ullus auferet, a lucis necessitate potentiam visivam destrui: quin immo ultro omnes fatebuntur, corroborari illam magis a luce, atque expeditam reddi ad videndum, ac visionem ipsam liberriam esse, quia homo etiam præsentem lucem videre potest objecta, aut si nolit, ea non videre, oculos nimirum non aperiendo. Pari modo gratia divina ad salutariter operandum necessaria non aufert, sed complet ac perficit libertatem humanam; illa enim præsentem liberum est homini consentire piæ inspirationi ac motioni, vel dissentire: atque ideo gratia dicitur ab Augustino sanare voluntatem, ut possit, quod ante sine gratia non poterat, libero amore in iustitiam ferri.

461. Dices III. Juxta S. Augustinum homo in statu naturæ lapsæ indiget potentiori gratia ad salutari-

ter

ter operandum, quam indiguerit in statu naturæ innocentis. Atqui ideo indiget potentiore gratia, quia homo per peccatum Adami indifferentiam activam amisit. Ergo. R. C. M. N. m. Homo quamvis indifferentiam activam seipsum determinandi retinuerit, tantam tamen ægritudinem ac infirmitatem per peccatum Adami contraxit propter rebellionem concupiscentiæ, ut sine gratia medicinali, qua sanatur & corroboratur, neque ad bonum agendum sicut oportet, neque ad malum meritorie fugiendum, seipsum ulla ratione determinare valeat. Ergo in statu naturæ lapsæ potentiore indiget adjutorio, quam in statu innocentiae, in quo, utpote firmo & robusto propter donum integritatis, sufficiebat gratia illustrationis. At vero in præsentī statu indiget homo non solum illustratione, sed etiam inspiratione, seu adjutorio interno voluntatem ejus immediate afficiente, sine quo non amplius potest velle bonum, aut nolle malum, sicut oportet ad salutem.

462. Dices IV. Saltem peccatores & infideles juxta Augustinum non habent liberum arbitrium. Ergo. P. A. Peccatores & infideles nec ex se ipsis habent quod ad volendum vel non volendum requiritur, nec possunt pro libito illud obtinere. Ergo non sunt liberi ad bene operandum; quia gratiam non habent ex se, nec illam pro libito obtinere possunt, cum gratia donum sit gratuitum & liberale. Hinc S. Augustinus Lib. de Spiritu & litera, Cap. XXX. scribit: *Ubi Spiritus Domini, ibi libertas. Si ergo servi sunt peccati, quid se jactant de libero arbitrio?* R. N. A. Ad prob. N. C. Quando actus salutaris a Deo præcipitur, vel malus prohibetur, cum nemo ad impossibile obligetur, ut sexcenties Augustinus monet, certum est, quod Deus cuilibet auxilium det sufficiens, cui posset homo cooperari, si vellet. Ergo in illo casu peccatores & infideles libere peccant, quamvis non sine magna difficultate a peccato abstinere possint. Augustinus citatis verbis loquitur de libertate a peccato, & Pelagianos arguit, qui ad bene & salutariter operandum necessitatem divinæ gratiæ excludebant.

463. Dices V. Juxta Augustinum homo non fit liber ad bonum faciendum, aut malum vitandum, nisi per gratiam liberantem. Atqui infideles & peccatores non habent gratiam liberantem, quia non habent gratiam justificantem. Ergo. R. D. M. Homo non nisi per gratiam liberantem, id est, justificantem fit liber libertate majore & potentiore, quacum facile vincit concupiscentiam, C. M. Libertate sufficiente & idonea ad vincendam concupiscentiam, N. M. Homo, etiam sine gratia justificante, habet libertatem per alia minora auxilia vere sufficientia, quibus adjutus concupiscentiam vincere posset, si vellet, quamvis non sine difficultate. Quod si vero homo gratia sanctificante sit ornatus, longe facilius resistit concupiscentiæ; quia gratia sanctificans confert homini jus ad auxilia frequentiora, ac potentiora.

464. Objic. IV. S. Augustinus Lib. I. Operis imperfecti, Num. C. definitionem libertatis, quam Julianus ita statuerat: *Liberum non est, nisi quod duo potest velle, id est, bonum & malum*, his verbis impugnat: *Si liberum non est, nisi quod duo potest velle, id est, & bonum & malum; liber Deus non est, qui malum non potest velle, de quo ipse dixisti, Deus esse nisi justus non potest: Siccine Deum laudas, ut ei auferas libertatem?* Ergo juxta S. Augustinum ad liberum arbitrium non pertinet libertas indifferentiæ. R. C. A. D. C. Libertas indifferentiæ, id est, agendi bonum vel malum non pertinet ad liberum arbitrium generice spectatum, C. C. Non pertinet ad liberum arbitrium, quale habent homines viatores, N. C. Quia Julianus, ut scribit S. Augustinus Lib. III. contra eundem Cap. VII. amabat *Dialecticorum quasi jaculis oneratus in certamen procedere*, ideo illum tamquam ineptum Dialecticum explodit S. Doctor, quod definitionem liberi arbitrii statuerit, quæ non omnibus liberum arbitrium habentibus, nimirum Deo & Beatis convenit. Ostendit igitur Augustinus plures libertatis species distinguendas esse, Deumque ac Beatos habere libertatem ac potestatem, quatenus libertas & potestas sunt perfectio, non quatenus includunt

ac supponunt imperfectionem: Liberum arbitrium, si sumatur generaliter, ac secundum rationem essentialem, nihil aliud esse, quam facultatem eligendi hoc vel illud, hoc eligendi vel non eligendi, servato ordine finis. Verumtamen quamvis Augustinus Deum & Beatos liberos esse asseruerit, licet peccare non possint, nequaquam tamen ex eo intulit, homines quoque viatores liberos fore, meriti aut demeriti capaces, licet unum tantum ex duobus possent, In eodem enim libro, in quo Juliani definitionem rejecit, nempe Lib. I. Operis imperfecti, Num. XCVIII. sapius docet, *hominem, ex quo incipit uti voluntatis arbitrio, & peccare & non peccare posse.* Et Num. LXXIV. contra definitiones & argumenta, quibus evincere se putabat Julianus, esse etiam in homine potestatem actus boni & meritorii, responsio Augustini alia non fuit, quam non negare se liberum arbitrium; sed dicere, quod esset in homine per Filium Dei liberantem: dixisse se tantum, neminem esse liberum ad bene operandum sine adjutorio Dei.

CONTROVERSIA VI. DE STATU NATURÆ PURÆ.

AN HOMO POTUERIT A DEO CREARI, QUIN PER
GRATIAM SANCTIFICANTEM ELEVARETUR AD
FINEM SUPERNATURALEM?

CONTRA LUTHERANOS, CALVINISTAS, BAJANOS,
JANSENIANOS.

*Quid sit
Status?*

465. **U**t facilius intelligantur, quæ de statu naturæ puræ dicturi sumus, notiones quædam necessario præmittendæ sunt. *Status* prout hic a Theologis consideratur, est certa quædam conditio seu modus se habendi naturæ humanæ, relate ad ultimum finem, secundum divinæ providentiæ ordinationem. Duplex generatim distinguitur, nimirum *status viæ*, quo tenditur ad beatitudinem, & *status patriæ*, in quo beatitudo possidetur. Status viæ, de quo solum in præsentiarum
agi-

agimus, dividitur in statum naturæ puræ, integræ, ac lapsæ, per Christum tamen reparatæ. *Status naturæ puræ* foret ille, in quo homo conderetur cum proprietatibus & facultatibus sibi debitis, absque ordinatione ad finem supernaturalem per dona supernaturalia, & absque corruptione naturæ per peccatum originale. Certum est hunc statum nec fore umquam, nec fuisse. Nam primi parentes nostri cum dono integritatis creati fuerunt, & in ipsa creatione, vel saltem paulo post creationem acceperunt a Deo dona supernaturalia gratiæ sanctificantis, fidei, spei, & charitatis ad consequendam beatitudinem supernaturalem, ad quam a Deo fuerant gratuito ordinati, ut constat ex communi doctrina ac traditione Patrum adversus Pelagianos, qui primum hominem a Deo talem fuisse conditum asserabant, quales nunc nascimur sine virtute nimirum, & sine vitio. Hoc ipsum, quod Patres tradiderant, manifeste supponit Tridentinum Sess. V. in Decreto de peccato Originali, Can. I. *Siquis non confitetur, primum hominem Adam, cum mandatum Dei in paradiso fuisset transgressus, statim sanctitatem & iustitiam, in qua constitutus fuerat, amisisse; anathema sit.*

466. *Status naturæ integræ* est, qui naturæ puræ futuræ addit donum quoddam speciale ac indebitum, scilicet carentiam fomitis & effrænata concupiscentiæ, siue subjectionem appetitus sensitivi ad rationalem, ita ut inferior contra superiorem moveri, & rationem prævertere non possit. Hic status secundum se spectatus, & præscindendo ab hac providentia, non involvit necessario ordinationem ad finem supernaturalem. Unde bene subdividitur in statum naturæ integræ non elevatæ, & elevatæ ad beatitudinem supernaturalem. *Status naturæ integræ elevatæ & innocentis*, in quo fuit Adamus ante peccatum, præter negationem peccati & plura alia dona, triplex præcipue donum importat, nempe gratiam sanctificantem, subjectionem perfectam appetitus sensitivi ad rationem, & immunitatem a morte, morbis ac doloribus, quæ omnia S. Thomas complectitur sub nomine Justitiæ originalis. Ultimus denique status

Status naturæ puræ.

Status naturæ integræ.

Innocentis & elevatæ.

est

Lapsa & reparata. est natura lapsa, & corrupta per Adami peccatum, per Christum autem *reparata*: atque hic status datur hodie; est enim homo ordinatus quidem ad beatitudinem supernaturalem: quoniam autem peccavit Adamus, non tantum ipse donum illud integritatis & innocentiae amisit, sed propter illud ipsum peccatum, quod in Adamo morali posterorum omnium capite commisimus, his privilegiis spoliati nascimur. Reparavit autem hunc statum Christus, per cujus merita liberamur a noxa peccati originalis, cæterisque personalibus, & restituimur gratiæ sanctificanti, ac primævo illi juri ad æternam felicitatem; ita tamen, ut non omnia per peccatum Adami inflicta vulnera sanentur, sed omnes fere pœnalitates in nobis remaneant ad exercitium virtutis.

*Status
quæstio-
nis.*

467. Quæritur modo, an status naturæ puræ fuerit possibilis? Numquam enim extitisse, aut extitutum esse, apud omnes in comperto est. Quæstio hæc sic proposita tria involvit, quæ in controversiam cadunt. I. An Deus potuerit hominem creare, quin per gratiam sanctificantem eundem elevarer ad finem supernaturalem. II. An homo innocens potuerit a Deo creari cum aliqua rebellionem concupiscentiæ. III. An obnoxius morti, morbis ac doloribus. Sive ut paucis rem complectamur, an Deus salva justitia, bonitate, providentia, aliisque divinis suis perfectionibus potuerit hominem creare innocentem, & tamen obnoxium morti, doloribus, morbis, concupiscentiæ motibus, quin illum umquam admitteret ad visionem beatificam, seu intuitivam? Possibilitatem hujus status admittunt Catholici; Novatores illam negant, contenduntque, elevationem hominis per gratiam sanctificantem ad eam felicitatem, ad quam modo est ordinatus a Deo, cæteraque dona justitiæ originalis fuisse homini innocentis naturalia: ac proin hominem sine illis donis procreari a Deo non potuisse.

Errores.

468. Lutherus in Cap. III. Genes. de originali justitia primi hominis scribit: *Quare statuamus, justiti-
am non fuisse quoddam donum, quod ab extra accederet se-
para-*

paratum a natura hominis; sed fuisse vere naturalem, ut natura Adæ esset diligere Deum, credere Deo, agnoscere Deum. Hæc tam naturalia fuere in Adamo, quam naturale est, quod oculi lumen recipiunt. Et infra: Porro hæc probant, originalem justitiam esse de natura hominis; ea autem per peccatum amissa, non mansisse integra naturalia, ut Scholastici delirant. Calvinus Lib. I. Institut. Cap. XV. repugnantiam flatus naturæ puræ, in quo primitus homo conderetur sine originali justitia, unice repetere videtur ex justitia, bonitate, ac providentia Dei. Atque hinc tria colligunt Novatores, I. Hominem per peccatum in donis naturalibus læsum fuisse, libero in primis arbitrio, cujus non nisi vanum in nobis relictum est nomen. II. Lucam illam carnis ac spiritus, quam vel ipsi Sancti experiuntur, verum ac proprium esse peccatum. III. Hominem non potuisse talem initio creari, qualis nunc nascitur; quia videlicet semper ac necessario ex ipsa sui institutione peccasset: unde sequeretur ejus peccata in Deum naturæ authorem esse refundenda.

469. Huic Novatorum doctrinæ subscripsit Michael *Baji ini-*
 Bajus Doctor Lovaniensis, Melini in Territorio Athen-
 si apud Belgas natus A. 1513. vir præfidentis ingenii,
 sui que immodicus æstimator, adeo ut Ruardus Tappe-
 rus vir antiqui moris atque excellentis doctrinæ, quo
 Magistro utebatur Bajus in Theologia, dicere solitus
 fuerit, se ab illo Juvene nil nisi *Schisma* expectare.
 Institutus jam Regius Professor Sacrarum Litterarum
 a Carolo V, nova cum Hefselio, qui Joannes a Lova-
 nio dicebatur, disseminare cœpit dogmata, non sine
 animorum æstu ac tumultu, quæ a Sacra Facultate Pa-
 risiensi, censurâ notata fuerunt. Anni 1563. initio a
 Philippo II. Hispaniarum Rege Tridentum ad Concili-
 um cum Hefselio Collega suo missus est, judicante Com-
 mendono Cardinale id expedire, ut illic a novitatibus
 uterque deterreretur. Bajus doctrina sua multos e Tri-
 dentinis Patribus ita offensos deprehendit, ut, nisi Mar-
 tinus Rithovius Iprensium Episcopus obstitisset, Patres-
 que Concilio, quod jam XVIII. annis duraverat, finem

aliquando imponere properassent, Baji doctrina a Concilio Patribus damnata fuisset, ut Morillonius testatur in Epistola ad Granvellanum Cardinalem. Lovanium • Concilio redux opuscula quædam typis vulgavit, ex quibus propositiones quasdam excerptas, apud Pontificem Maximum denuntiarent tum Minoritæ, tum Lovanienses etiam Theologi. S. Pius V. A. 1567. data *A Pio V. damnatus.* solemnī Constitutione, tacito tamen Baji nomine ad preces Cardinalis Granvellani, propositiones numero LXXIX. damnavit in globo *tamquam hæreticas erroneas, suspectas, temerarias, scandalosas, & in pias aures offensionem immittentes.* Quæ Constitutio jussu Pii V. a Maximiliano Morillonio, Granvellani Cardinalis & Archiepiscopi Mechliniensis Vicario Generali, coram Facultate Theologica Lovaniensi promulgata fuit, Doctores Bullæ obsequentissimos se fore promittentibus.

Post longam tergiversationem tandem obsequium spondet. 470. Bajus A. 1569. die VIII. Januarii, ut censuræ Pontificiæ se subduceret, ad Pium V. litteras dedit, quibus exposuit, se nullum Bullæ transumptum neque Romæ neque Lovanii obtinere potuisse: misit præterea doctrinæ suæ apologiam, in qua contendebat, ex sententiis damnatis plurimas sibi falsò imputari, aliquas verò ad mentem S. Augustini veras esse: Tum demum Pontificem rogat, ut perlecta attentius apologia cogitet, utrum Bullam ut legitimam & sufficienter discussam haberi vellet, an tamquam subreptitiam rescindere. Bajo rescripsit S. Pius V. die XIII. Maji ejusdem anni: *Quæ super hoc ipso jam decreveramus, nisi antea a nobis decreta fuissent, eadem, prout facimus, de integro decernenda statuendaque esse judicavimus. Itaque tibi, & cæteris prædictarum propositionum assertoribus ac defensoribus pro earum assertionem perpetuum silentium imponimus.* Deinde eum serio admonet, ut Apostolicæ Constitutioni quantocius se submittat. Bajus a Morillonio interpellatus, num damnatas propositiones ejurare vellet, post longam tergiversationem respondit tandem, paratum se esse absolute parere, flexoque genu, ejurataque doctrina, a censuris quas incurrisse dicebatur, absolutus est: nullum tamen obtinuit tunc Bullæ transumptum.

sumptum, quod Pontifex rem istam silentio sopiri cuperet, omnemque tumultum caveret. A. 1570. jussu Synodi Provincialis Mechliniensis, Bullam Pii V, quam coram Theologica tantum Facultate legerat, ritu solemni in scholis publicis Lovaniensibus promulgavit Morillonius, omnibus consentientibus, ac Bullæ se sub-jicientibus.

471. Cum vero Gregorius XIII. intellexisset Bajanos errores a Pio V. Prædecessore suo damnatos ab aliquibus Lovanii pertinaciter defendi, spe fretis, Pianam constitutionem aliquando revocandam fore, præfatam Pii V. Bullam sua autoritate confirmavit, damnatosque in illa errores iterato proscripsit Anno 1579. misso Lovanium Francisco Toletio Pontificio tunc Theologo & Concionatore, postea S. R. E. Cardinale, qui Bullam promulgaret. Promulgata ea fuit in frequentissimo totius Academiæ consensu clara & intelligibili voce per Conradum Sylvium Universitatis Notarium A. 1580. Mense Martio, dictumque ab omnibus Doctoribus & Studiosis fuit consona voce: *Articulos damnamus, Bullam reverenter suscipimus, atque obedientiam pollicemur.* Bajus scripto publico dato die XXIV. Martii A. 1580. ac propria manu subscripto agnovit ac declaravit, *se plene persuasum habere, earum omnium sententiarum damnationem atque prohibitionem jure meritoque, ac non nisi maturo judicio, ac diligentissima discussione præmissis, factam atque decretam esse. Fateri insuper plurimas ex iisdem sententiis in nonnullis libellis a se olim & ante emanatam Sedis Apostolicæ super eis censuram conscriptis, & in lucem eiditis contineri & defendi, etiam in eo sensu, in quo reprobantur. Denique se in præsentiarum ab iis omnibus recedere, & damnationi a Sancta Sede factæ acquiescere, neque posthac ullam earum docere, aut defendere velle.* Anno 1585. Facultas Theologica Lovaniensis, urgente Joanne Bonhomio Episcopo Vercellensi, & per utramque Germaniam Nuntio Apostolico, jussa est non solum a damnatis articulis abstinere, sed etiam sententias singulis quoad doctrinam contradictorias

*Ad inge-
ntum reali-
ens compe-
scitur a
Gregorio
XIII.*

definire, quarum indicem contexuit Lensacus, cæteri-
que Doctores una cum Bajo probaverunt.

*Doctrina
Baji.*

472. Propositiones Baji a Pontificibus damnatae, quæ de elevatione hominis agunt, sunt istæ XXI. *Humana naturæ sublimatio, & exaltatio in consortium divinæ naturæ; debita fuit integritati primæ conditionis, & proinde naturalis dicenda est, & non supernaturalis. XXIII. Absurda est eorum sententia, qui dicunt hominem ab initio, dono quodam supernaturali & gratuito, supra conditionem naturæ suæ fuisse exaltatum, ut fide, spe, & charitate Deum supernaturaliter coleret. XXIV. A vanis & otiosis hominibus, secundum insipientiam Philosophorum, excogitata est sententia, quæ ad Pelagianismum rejicienda est; hominem ab initio sic constitutum, ut per dona naturæ superaddita fuerit largitate Conditoris sublimatus, & in Dei filium adoptatus. XXVI. Integritas primæ creationis non fuit indebita humanæ naturæ exaltatio, sed naturalis ejus conditio. LXXIX. Falsa est Doctorum sententia, primum hominem potuisse a Deo creari & institui sine justitia naturali.*

*A Disci-
pulis post
mortem
Magistri
renovata.*

473. Bajo demortuo Anno 1589. die XVI. Septembris, non defuere Discipuli, qui Magistri doctrinam renovarent. Hos inter præcipue numerandus est Jacobus Jansonius Amstelodamus Batavus, quem constat Baji alumnum fuisse præ cæteris longe charissimum. Huic discipulus obtigit Cornelius Jansenius Leerdamensis Batavus, cui, Baji dogmatumque ejus amorem & venerationem facile instillavit, adeo, ut in Augustino suo nil nisi Bajum spiret. Tomo II. Editionis Lovaniensis, columna 797. insuperhabitis Pii V. & Gregorii XIII. Constitutionibus, ausus est scribere Jansenius: *Beatitudo supernaturalis, & regnum cælorum non potest a creatura rationali innocente separari sine injustitia.* Gabriel Gerberonius Janseniano furore percitus, novam Baji librorum editionem adornavit, virulentis additis vindictis, quibus in Pium V. Gregorium XIII. & Urbanum VIII. intolerabili petulantia debacchatur. Paschasius Quesnellus, post Antonii Arnaldi mortem

Jan-

Jansenianæ factionis caput, Bajanam hac in quæstione doctrinam expresseit propositione XXXV. inter damnatas a Clemente XI. in Constitutione Unigenitus, quæ sic habet: *Gratia Adami est sequela creationis, & erat debita naturæ sanæ & integræ.*

474. Conclusio. Homo potuit a Deo creari, quin per gratiam sanctificantem elevaretur ad finem supernaturalem. Prob. I. Autoritate Scripturarum. Ad Rom. Cap. VI. ait Apostolus: *Gratia autem Dei, vita æterna, in Christo Jesu Domino nostro.* Ergo vita æterna, seu exaltatio hominis ad amicitiam divinam, & visionem intuitivam Dei, naturaliter eidem non debetur, sed est gratia quæ omne debitum excludit, & gratuito confertur. Certe nomen *gratiæ* simpliciter prolatum in Scripturis regulariter denotat gratiam strictè sumptam; alias contra Pelagianos probari amplius solide non posset, gratiam strictè dictam necessariam esse ad actus salutares. Neque officit Conclusioni nostræ, quod vita æterna vocetur in Scripturis *corona justitiæ*; Deus enim bene operantibus tenetur illam vel ex justitia, vel ex fidelitate reddere consequenter ad gratuitam promissionem, quæ si non existeret, Deus ex nullo titulo teneretur illam hominibus largiri.

475. Prob. II. Autoritate Patrum. S. Basilius Lib. de Spiritu Sancto, Cap. XVI. scribit de Angelis: *Sanctificatio non est absque Spiritu: non enim naturæ sanctæ sunt cælorum virtutes, sed juxta proportionem eminentiæ inter ipsas, sanctificationis mensuram a Spiritu Sancto habent.* Ergo multo minus homo naturæ suæ gratiam sanctificantem habuit. S. Augustinus Lib. II. ad Bonifacium contra duas Epistolas Pelagianorum, Cap. VI. ait: *Dei gratia non solum omnia sidera & omnes cælos, verum etiam omnes Angelos supergreditur.* Ergo non potuit esse debita Adamo, sive ex parte Dei conditoris, sive ex parte hominis conditi, sed ex mera liberalitate Dei manavit. Hæc duo enim verba *res indebita*, & *gratia* apud Augustinum expressione vocis dumtaxat discrepant, sed tamen unum idemque penitus sonant. Hinc Lib. de Gestis Pelagii, Cap. XIV. *Ipsam, inquit, gra-*

Hominem potuisse ad finem supernaturalem non elevari docent Scripturæ.

Patres.

gratiæ nomen, Et ejus nominis intellectus aufertur, si non gratis datur. --- Si autem debitum est, gratia non est: gratia quippe donatur, debitum redditur. Et rursus Lib. de Gratia Christi, Cap. XXIII. Quomodo est ergo gratia, si non gratis datur? Quomodo est gratia, si ex debito redditur? S. Cyrillus Alexandrinus Lib. I. in Joannem, Cap. IX. Participatione luminis splendet super naturam suam glorificantis Dei gratia, Et variis donorum ornamentis ascendens. --- Misericors enim Dominus est, qui creaturam parvam atque obiectam secundum naturam, magnam atque mirabilem sua efficit bonitate. Et Cap. XIII. Creatura cum serva sit, nutu solum Et voluntate Patris ad supernaturalia vocatur, non debito naturæ.

Pontifices.

476. Prob. III. Autoritate Pontificum Romanorum. S. Pii V. Gregorii XIII. Urbani VIII. Clementis XI, qui errores Baji, Jansenii, Quesnelli, damnarunt. Prob. IV. Argumento negativo. Adversarii nulla solida ratione probare possunt, ut ex solutione objectionum patebit, Deum non potuisse homini quantumvis innocenti visionem intuitivam ac supernaturalem illam felicitatem denegare. Ergo frustra negant ejus rei possibilitatem.

Argumenta contraria refutantur.

*Bajanis
non patro-
cinatur
Augusti-
nus.*

477. Objicitur I. Autoritas S. Augustini, qui Pelagianis ostendit, parvulos sine baptismo decedentes excludi non posse a regno cælorum, seu visione Dei, nisi essent peccato originali infecti; ait enim Lib. III. contra Julianum, Cap. XII. Quare nihil male merentes tot in parvulis imagines Dei, si non baptizentur, non admittitis ad regnum Dei? --- Qua justitia, quæso, a regno Dei, a vita Dei alienatur imago Dei, in nullo transgressa legem Dei? II. Idem Sermone CCXCIV. alias XIV. de verb. Apost. scribit, inauditum esse in Ecclesia, & a mente fidelium extirpandum errorem eorum, qui statuunt vitam beatam præter regnum cælorum. Ergo Augustinus judicavit non dari aliam beatitudinem, quam visionem intuitivam Dei eamque naturæ ratio-

rationali innocenti deberi. R. C. A. N. C. Augustinus utroque loco non loquitur de possibilitate aut impossibilitate status naturæ puræ, sed de parvulis in statu naturæ elevatæ: quo supposito, merito scribit Augustinus parvulos sine injustitia excludi non posse a visione beatifica absque eorum demerito; & contra Pelagianos concludit dari peccatum originis, ac commentitiam proin esse beatitudinem, quam illi parvulis extra cælum pollicebantur.

478. Objic. II. Providentia Dei. Deus pro omni statu naturæ humanæ debet esse providus illius Gubernator. Ergo hominem necessario elevavit ad finem supernaturalem. P. C. si Deus hominem non ordinasset ad finem supernaturalem, non ordinasset illum ad beatitudinem. Atqui Deus non potuit hominem non ordinare ad beatitudinem; alias homo non habuisset medium præcæpæ sufficiens ad sectandam virtutem, & vitia fugienda. Ergo Deus non potuit hominem non ordinare ad finem supernaturalem. P. M. Sola Dei visio intuitiva est vera ac perfecta hominis beatitudo, in qua sola conquiescit & satiatur hominis desiderium, juxta illud Augustini Lib. I. Confessionum, Cap. I. *Fecisti nos ad te, & inquietum est cor nostrum donec requiescat in te.* Ergo. R. C. A. N. C. Ad probat. N. vel D. M. Non ordinasset illum ad beatitudinem supernaturalem & omnino indebitam, C. M. Ad beatitudinem naturalem, N. M. Et sic dist. minore, N. C. Deus tamquam providus naturæ humanæ gubernator non ad supernaturalem, quæ omnino indebita erat, sed ad naturalem tantum beatitudinem ordinare hominem tenebatur, quam ille post vitam innocenter transactam, tempore a Deo statuto consecutus fuisset. Hæc vero naturalis beatitudo nihil aliud foret, quam cognitio Dei abstractiva, in suo genere clara & perfecta ac numquam interitura, ex qua consurgeret amor Dei naturalis pariter in suo genere perfectus, cum immunitate a peccatis, ab omni dolore & tristitia, conjunctus cum plena certitudine felicitatis hujus numquam turbandæ. Ad hujus probat. D. A. Est beatitudo supernaturalis, atque

*Frustra
confugit
illi ad Dei
providen-
tiam.*

atque in præsentī statu, C. A. Naturalis, ac pro omni statu possibili, N. A. & Conseq.

479. Dices I. Si status naturæ puræ foret possibilis, homo beatitudinem suam etiam mere naturalem tantum non posset consequi. Ergo natura humana foret pessime constituta. P. A. Beatitudo non potest obtineri nisi per actus bonos & meritorios. Atqui in statu naturæ puræ nulli darentur actus boni & meritorii. Ergo. P. m. Non potest dari actus bonus & meritorius sine gratia. Sed in statu naturæ puræ non daretur gratia. Ergo in statu naturæ puræ non darentur actus boni & meritorii. Ergo vel implicat status naturæ puræ qui gratiam excludit; vel obtineri ab homine non posset beatitudo naturalis. R. N. A. Ad *prob.* C. M. N. m. Ad hujus *prob.* D. M. Non potest dari actus supernaturalis & meritorius præmii supernaturalis sine gratia, C. M. Præmii mere naturalis, subdist. Sine gratia ordinis supernaturalis, N. M. Sine gratia ordinis tantum naturalis, C. M. Et sic dist. minore, N. C. In statu naturæ puræ nulla darentur hominis merita supernaturalia, sed mere tantum naturalia; quia illa non elicerentur viribus gratiæ, sed viribus liberi arbitrii in illo statu non depravati, quin influeret charitas supernaturalis, aut aliud ejusmodi principium. Porro in statu etiam naturæ puræ Deus contulisset gratias naturalis ordinis, necessarias & sufficientes; quia voluntas etiam in illo statu amare non potuisset honestum qua honestum, nisi per cognitionem actualem repræsentaretur ut honestum: qua cognitione prælucente potuisset pro sua libertate bonum illud honestum amare aut repudiare. Hæc tamen auxilia fuissent ordinis tantum naturalis, quia Deus ea in nobis produxisset per concursum generalem, ut author naturæ rationalis; fuissentque gratia in sensu latiore, prout nempe gratia dicit quodcunque donum Dei gratis collatum. Quod si Deus in statu naturæ puræ contulisset aliqua auxilia, non mere sufficientia, sed efficacia; talia auxilia, etsi ordinis tantum naturalis, fuissent favor specialis, quia

Deus

Deus etiam ut author naturæ potuisset illa negare cui-
libet homini in particulari.

480. Dices II. In quocunque statu sit homo, de-
bet esse capax remissionis peccatorum; secus in de-
sperationem actus, omnibus flagitiis se inquinaret. Sed
in statu naturæ puræ dari non potuisset remissio pec-
catorum. Ergo. P. m. Remissio peccatorum obtineri
non potest sine influxu gratiæ sanctificantis. Sed in
statu naturæ puræ numquam infusa fuisset gratia san-
ctificans. Ergo. R. C. M. N. m. Ad *prob.* D. M. Remis-
sio peccatorum obtineri non potest sine infusione gra-
tiæ sanctificantis in hac providentiā, C. M. Etiam in
alia providentiā, N. M. In statu naturæ puræ remissio
peccatorum obtineri potuisset vel per condonationem
mere extrinsecam, vel per infusionem doni alicujus
naturalis.

481. Objic. III. Natura beatitudinis. Beatitudo est
status omnium bonorum aggregatione perfectus. Ergo
non est possibilis status naturæ puræ. P. C. Vel homo
in statu naturæ puræ sciret visionem Dei intuitivam ef-
se possibilem, vel id ignoraret. Si primum; eam ef-
ficaciter desideraret: si secundum; tunc beatus esset
ob errorem & ignorantiam. Ergo. R. Hominem prob-
abilius cognitionem beatitudinis supernaturalis habi-
turum non esse: neque tamen idcirco mancā, ac po-
sitive imperfectā fore hominis beatitudinem, eoquod
ille cognitione careret sibi prorsus indebita. Quod si
etiam visionis intuitivæ cognitionem haberet, neuti-
quam tamen idcirco turbaretur; quia cognito divinæ
voluntatis decreto eam nemini concedendi, homo fa-
cile acquiesceret, neque efficaciter illam appeteret:
sicut Beati in cælis cum Christo regnantes non appe-
tunt Unionem hypostaticam.

*Ad natu-
ram beati-
tudinis.*

482. Objic. IV. Appetitus naturalis. Illud bo-
num naturaliter homini debetur, quod ille naturaliter
appetit. Atqui homo naturaliter appetit visionem bea-
tificam. Ergo visio beatifica naturaliter homini debe-
tur. P. m. S. Thomas Lib. III. contra Gentes, Cap.
L. & I. Parte, Quæst. XII. Artic. I. docet inesse ho-
mini

*Ad appe-
titum na-
turalem.*

mini naturalem appetitum videndi Deum. R. D. M. Quod homo naturaliter appetit appetitu innato, C. M. Appetitu elicitu, N. M. Et D. m. Atqui homo naturaliter appetit visionem beatificam appetitu innato, N. m, Elicito appetitu, & quidem supposita fide ac gratuita promissione Dei, C. m. Appetitus innatus est propensio vel ordinatio rei in bonum sibi naturaliter debitum, nulla præsupposita cognitione illius rei quæ appetitur. Appetitus elicitus est actus voluntatis, quo homo fertur in bonum cognitum, sive hoc naturaliter debeatur sive non debeatur. Appetitus innatus semper efficax est & absolutus; atque ideo homo necessario quarit beatitudinem in genere, nec vult, nec potest velle esse miser: contra appetitus elicitus potest esse conditionatus & inefficax, potestque ferri quandoque in bonum chimæricum & impossibile, ut patet v. g. ex eorum Principum Ethnicorum superbia, qui inter Deos referri, ac pro Diis haberi voluerunt. Jam vero homo appetitu innato appetit beatitudinem in genere, atque eam efficaciter ac necessario desiderat; beatificam autem visionem non nisi appetitu elicitu, inefficaci ac conditionato appetere potest, præscindendo a notitia per fidem supernaturalem hausta, dicendo nempe, *vellem, si fieri posset, frui visione beatifica*. Rem hanc explicat S. Thomas in IV. Sentent. Dist. XLIX. Quæst. I. Art. III. his verbis: *Quamvis ex naturali inclinatione voluntas habeat, ut in beatitudinem feratur secundum communem rationem, tamen quod feratur in beatitudinem talem, vel talem, hoc non est ex inclinatione naturæ, sed per discretionem rationis, quæ adinvenit in hoc vel in illo summum bonum hominis constare. Ad probat. R. Appetitum illum videndi Deum a S. Thoma naturalem appellari, non quod per solas vires naturales eliciatur; sed quia supposita fidei notitia supernaturali, quæ visionis beatificæ & præstantiam & possibilitatem detegit, natura hominem efficaciter stimulat ad talem appetitum per vires gratiæ eliciendum, cum sit actus spei Theologicæ.*

483. Objic. V. Neceſſitas amoris Dei. Homo in quocunque naturæ ſtatu fuerit, indiſpensabiliter tenetur diligere Deum. Atqui ſine gratia Deum diligere non poteſt. Ergo in quolibet ſtatu indiget gratia. Ergo ſtatu puræ naturæ eſt impoſſibilis. P. m. S. Auguſtinus ad amorem Dei ſuper omnia ſexcenties docuit neceſſariam eſſe Dei gratiam; hicque capitalis fuit error Pelagii, quod aſſereret, ſolis naturæ viribus Deum ſuper omnia amari poſſe. R. D. M. Tenetur diligere Deum dilectione vel naturali vel ſupernaturali, C. M. Dilectione ſupernaturali, ſubdiſt. In hac providentia, C. In ſtatu naturæ puræ, N. M. Et D. m. Atqui ſine gratia Deum diligere non poteſt ſuper omnia dilectione ſupernaturali, C. m. Dilectione naturali, N. m. In ſtatu naturæ puræ homo teneretur Deum amare amore naturali tantum, ad quem non ſupernaturalis gratia, ſed naturale dumtaxat auxilium ſufficeret. *Ad probat.* R. S. Auguſtinum loqui de amore Dei ſupernaturali in præſenti ſtatu elevationis, & Pelagium in eo erraſſe, quod vellet amorem Dei ſupernaturalem, filialem & amicabilem, ad quem tenemur in hoc ſtatu naturæ elevata, haberi poſſe ſolis naturæ viribus. At vero in ſtatu naturæ puræ longe alius eſſet amor hominis erga Deum, nimirum mere naturalis; benevolus quidem, at non amicabile aut filialis.

484. Dices I. Dei amor naturalis fictitiuſ eſt & impoſſibilis. Ergo. P. A. S. Auguſtinus pluribus in locis docet, omnem amorem creaturæ rationalis eſſe charitatem vel cupiditatem. Ergo Auguſtinus judicavit amorem mere naturalem erga Deum locum non habere in creaturis R. N. A. Præterquam enim, quod hæc implicantia ab adverſariis non poſſit oſtendi, Pius V. & Gregorius XIII. damnarunt hæc Baji proſitiones, XXXIV. *Diſtinctio illa duplicis amoris, naturalis videlicet, quo Deus amatur ut Author naturæ, & gratuiti, quo Deus amatur ut beatificator, vana eſt & commentitia, & ad illudendum ſacris litteris, & plurimis veterum teſtimoniis excogitata.* XXXVI. *Amor naturalis, qui ex viribus naturæ exoritur, ex ſola Philoſophia, per elationem præſumptio-*

ptionis humanæ, cum injuria Crucis Christi defenditur a non nullis Doctoribus. Ad probat. R. S. Augustinus nomine charitatis non intelligit amorem Dei super omnia propter se dilecti, sed charitatem late sumptam, quæ complectitur amorem omnium virtutum moralium, seu bonam voluntatem & amorem boni, prout hic quemcunque affectum honestum significat: cupiditas ex S. Augustino quemlibet affectum inhonestum denotat; adeoque in hac latissima usurpatione ex omnibus affectibus, qui ad mores pertinent, nullus est medius affectus inter charitatem & cupiditatem. Omnis enim ordinatus amor superioris boni charitas est apud S. Augustinum: & e contrario omnis amor inordinatus boni inferioris a S. Doctore cupiditas dicitur. Verum hac de re uberius redibit sermo Tract. V. Num. CCCLIII. Porro cum S. Doctor asserit amorem justitiæ inspirari atque infundi per Spiritum Sanctum, non de quolibet amore loquitur, sed de dilectione supernaturali, ad vitam æternam conducente.

485. Dices II. Explicari non potest, in quo amor ille naturalis differat a supernaturali. Ergo amor ille naturalis commentitius est. R. N. A. Amor supernaturalis triplici ex capite differt a naturali. Ac 1^{mo} quidem ex parte principii necessarii & concurrentis; quia ad amorem Dei supernaturalem requiritur gratia actualis supernaturalis, qua adjutus homo cognoscit Deum ut authorem supernaturalium. Contra ad amorem Dei naturalem sufficit cognitio ordinis mere naturalis; neque ad illum requiritur habitus charitatis infusæ, vel omnipotentia Dei specialiter præparata. II. Ratione modi tendendi. Amor supernaturalis, quo Deus propter se super omnia diligitur, est amor amicitiae, quo bene volumus Deo tamquam intimo amico ac Patri, qui nos per gratiam in filios adoptavit. Amor naturalis non est amor amicitiae, sed solius benevolentiae, qualem habere potest servus ad Dominum. III. Ratione objecti indirecti; quia amor supernaturalis includit propositum efficax servandi omnia mandata Dei etiam supernaturalia: amor vero naturalis includeret tantum
effi-

efficax propositum fervandi totam legem naturalem, quæ sola pro illo statu daretur.

486. Dices III. Homo in statu naturæ puræ non haberet bonam voluntatem. Ergo non posset amore naturali justitiam sive Deum prosequi. P. A. Bona voluntas esse non potest sine gratia supernaturali, ut scribit S. Augustinus Lib. de Gratia Christi, Cap. XXI. *Quasi vero aliud sit bona voluntas quam charitas, Scriptura nobis esse clamat ex Deo, Et a Patre datam, ut filii ejus essemus.* Atqui in statu naturæ puræ non datur gratia supernaturalis. Ergo. R. D. A. Non haberet bonam voluntatem bonitate supernaturali, C. A. Bonitate morali ac naturali, N. A. & Conseq. Homo in statu naturæ puræ voluntatem haberet a peccato liberam, ideoque voluntas hominis foret naturaliter bona & honesta, possetque diligere justitiam naturalis ordinis, & Deum tamquam fontem omnis virtutis moralis, non vero tamquam fontem justificationis. Ad *probat.* eadem est responsio. Voluntas potest esse bona bonitate morali & naturali absque gratia supernaturali: at bona esse non potest bonitate supernaturali sine gratia supernaturali: atque de hac tantum bonitate agit l. c. S. Augustinus contra Pelagianos.

487. Dices IV. Si homo in statu naturæ puræ posset justitiam naturalem diligere absque gratia, posset a se ipso fieri melior. Atqui hoc fieri nequit. P. m. S. Augustinus Lib. XII. de Civit. Dei, Cap. XXIX. docet, Angelos bona voluntate a divina gratia factos esse, nec meliores a se ipsis fieri potuisse. R. D. M. Posset a se ipso fieri melior in ordine supernaturali, N. M. Posset absque gratia supernaturali a se ipso fieri melior in ordine naturali, C. M. Et sic dist. minore, N. C. Ad *probat.* C. A. N. C. S. Augustinus loquitur de Angelis, qui non in statu naturæ puræ, sed elevata conditi fuerunt, in quo proinde necessarium erat auxilium gratiæ supernaturalis.

488. Objic. VI. Infirmitas probationis ex damnatione Propositionum Baji petitæ. Gabriel Vasquius, *Invidiosus est argumentum,* de partium studio minime suspectus, testatur in Imam *petitum,*
IIde

*ex damna-
tione pro-
positionum
Baji.*

Idæ S. Thomæ Disp. CXC. Cap. XVIII. Num. CLXXVI. aliquas Baji propositiones, non ob doctrinam, sed ob acrem censuram, qua non nullorum Catholicorum sententias perstringebat, fuisse damnatas, idque ipsum asseruisse sibi Franciscum Toletum, qui in Bajana causa a Gregorio XIII. Lovanium missus fuerat. Ergo ex damnatis Baji propositionibus evinci non potest, Deum creare potuisse hominem, quin illum per gratiam sanctificantem elevarer ad finem supernaturalem. R. C. A. N. C. Propositio Baji XXIII. & XXIV. censuram aliquam continet; at vero in XXI. XXVI. LXXIX, quibus eadem prorsus doctrina traditur, nullum omnino censuræ alicujus vestigium apparet. Ergo illæ damnatæ fuerunt ob doctrinam, non ob censuram. Idem omnino dicendum est de propositione XXXV. Quesnelli a Clemente XI. damnata.

*Quæ dam-
natæ sunt
in proprio
verborum
sensu, ab
assertori-
bus inten-
to.*

489. Dices I. Pius V. & Gregorius XIII. non damnarunt omnes propositiones Baji in rigore ac proprio verborum sensu a Bajo intento, sed prout ab aliis in sensu improprio exponi poterant. Ergo ex Bulla Piana nihil probatur. P. A. Post recensitas Baji propositiones subjungit Pontifex; *Quar quidem sententias stricto coram nobis examine ponderatas, quamquam nonnullæ sustineri possent in rigore ac proprio verborum sensu ab assertoribus intento, hæreticas, erroneas, suspectas &c. damnamus.* Ita ut post verba illa, *sustineri possent*, nulla fuerit collocata virgula seu comma. Ergo aliquæ illarum propositionum possunt sustineri in rigore, ac proprio verborum sensu a Bajo intento. R. N. A, quo nihil absurdius, aut Pontificibus injuriosius excogitari potest. Nam I. Pontifex sine manifesta prævaricationis nota non potest sententias Theologicas in proprio sensu veras proscribere, & consequenter earum contradictorias in proprio sensu falsas approbare, atque definire. II. Tali pacto Pontifex posset etiam v. g. Epistolas Apostolicas condemnare; non quod in sensu proprio hæresin aut errorem contineant, sed quia hæretici eas prave interpretantur. III. Constans Ecclesiæ praxis est, ut, quando propositiones aliquas con-
dem-

demnat, eas in se ipsis absolute non consideret, sed relative ad mentem authoris, & sensum libri; quia sæpe absolute in se ipsis spectata nullam videntur mereri censuram, sed tantum respectu ad mentem & sensum authoris. IV. Ipse Bajus semel coram Morillonio, atque iterum coram Toletio agnovit, propositiones damnatas suas esse, seque censuræ subjecit. Ad probat. N. A. Et transmisso etiam antecedente, N. C. Etiam si ex incuria Scribæ Romani post illa verba, *sustineri possent*, omiſsa fuisset virgula seu comma, sufficienter tamen ex iis quæ paulo ante diximus, constat de mente Pontificis, atque ex ipso contextu manifeste colligitur, post verba illa *sustineri possent*, virgulam debere poni. Dicitur enim: *Quamquam nonnullæ aliquo pacto sustineri possent, in rigore ac proprio verborum sensu ab assertoribus intento, hæreticas: erroneas &c. respective damnamus.* Jam vero si verba illa, *in rigore ac proprio &c.* Ad priorem constructionem *quamquam nonnullæ* pertinerent, non diceretur *aliquo pacto*, sed *omni pacto* sustineri, aut omnino omitti debuissent. Quis enim umquam citra risum audivit dici, propositiones aliquas sustineri posse aliquo pacto in proprio earum sensu? Profecto sustineri in sensu proprio, non est aliquo tantum pacto sustineri.

490. Dices II. Jansenius Lib. IV. de Statu naturæ lapsæ, Cap. XXVII. hæc habet: *Jacobus Jansenius palam contestatus est, Pontificis Bullam adulteratam esse ab iis, qui distinctionem ponerent inter illa verba, sustineri possent, et in proprio verborum sensu. Nullius enim distinctionis in originali Bulla, quam tenebat manibus, & legebat, vestigium esse asseribat. Et revera nullum esse distinctionis vestigium ego ipse sæpe meis oculis vidi.* II. Petrus Cuneri, adversarius Baji, in Opusculo ad Pontificii diplomatis defensionem A. 1571. elaborato, verba Bullæ ita refert: *Quas quidem sententias stricto coram nobis examine ponderatas, quamquam earum nonnullæ aliquo pacto in rigore & proprio verborum sensu ab assertoribus intento sustineri possent, tanquam erroneas*

*Famosa
lis de Ba-
jano com-
mate.*

roneas tamen & hæreticas &c. damnamus & abolemus. III. In Decreto Sacre Facultatis Lovaniensis circa Bullam S. Pii V. a Morillonio intimatam die XXIX. Decembris A. 1567. dicitur. *Comparuit Maximilianus Morillonus, -- qui exposuit se accepisse Bullas Apostolicas -- quibus certa sententia -- damnantur respective tamquam erroneæ, -- quamquam earum nonnullæ aliquo pacto sustineri possent in rigore & proprio verborum sensu ab assertoribus intento.* IV. Urbanus VIII. A. 1643. rursus eandem Bullam Romæ imprimi iussit, in qua pariter famosum illud comma post ea verba, *sustineri possent*, desideratur. Ergo etiam in Bulla Piana post verba illa nulla fuit posita virgula.

491. Resp. ad I. C. A. N. C. Bulla, de qua testatur Jansenius, erat exemplar manuscriptum Roma missum ad Michaellem Bajum, in quo nec comma illud, nec aliqua alia interpunctio notabatur. Moris est enim in Romana Curia, cum aliquid manu describitur, omnes interpunctionum notas omittere. Ergo ex illo manuscripto exemplari nihil evincitur. Ad II. N. A. Inter edita Petri Cunerii Opera non reperiuntur citata verba, sed a mendacissimo Bajanorum Operum editore Gabriele Gerberonio, solita Jansenistarum fraude, conficta fuere. Ad III. N. C. Quamvis forsitan eo tempore aliqui Doctores Lovanienses Bajo addicti in ea fuerint opinione, aliquas sententias ex damnatis in proprio verborum sensu a Bajo intento posse defendi, idque Morillonius dissimulandum esse censuerit, ut rem citius perficeret, utque lenito vulnere facilius Bajum induceret ad acquiescendum; certum tamen est, Bajum & Academiam Lovaniensem ab hac sententia recessisse, cum Franciscus Toletus Anno 1580. Bullam Gregorii XIII. Lovanii promulgavit. Ipse enim Bajus falsus est, plurimas sententias etiam in eo sensu, in quo a Pontifice reprobantur, in libellis a se editis defendi: & Academia sententias singulis Bajanis quoad doctrinam contradictorias definivit A. 1585. Ad IV. R. Comma illud tanti momenti Typographi incuria omisum fuisse; sed in altera editione Romana, jussu Urbani VIII.

errorem emendatum esse. Cum enim Sinnichius & Papius, Doctores Lovanienses, apud Pontificem querebantur, Bullam illam in Belgio vitiatam fuisse, eoquod in exemplaribus illic impressis restitutum fuerit comma illud in Editione Romana omisum; iussit Urbanus, ut ex Archivo generalis Inquisitionis, & ex matrice Actorum, quæ in eodem Archivo conservantur, extraheretur exemplar Bullæ prædictæ, atque cum eo commate, prout in Archivo Congregationis Sancti Officii continetur, denuo imprimatur, impressumque exemplar consignari mandavit Sinnichio & Papiro, cum Apostolico mandato, ut eidem exemplari sic consignato fides adhibeatur. Vide, quæ de Janseniana hac cavillatione circa famosum illud comma scripserunt Theodorus Eleutherus, seu Livinus de Meyer in Hist. Controversiarum de Auxiliis Divinæ Gratiæ, Lib. VI. Cap. XXV. Tournely de Gratia Christi, Parte I. Dominicus Viva in Trutina ad propositionem XXXI. inter damnatas ab Alexandro VIII.

492. Dices III. Condemnatio propositionum Baji, & Quesnelli, a Pontificibus facta, est omnino inutilis, contra morem Ecclesiæ, & fidelibus noxia. Ergo nullius est roboris. P. A. Propositiones illæ damnatæ fuerunt in cumulo, seu in globo ut vocant, nulla ipsis assignata specialis censuræ nota, ita ut dignosci nequeat, quodnam sit uniuscujusque propositionis singulare vitium; an nimirum hæc determinata propositio sit hæretica, aut tantum temeraria, vel piarum aurium offensiva. Atqui hic modus damnandi est inutilis, contra morem Ecclesiæ, ac fidelibus noxius. Ergo. R. N. A. Ad probat. C. M. N. m. Modus propositiones acervatim seu in globo damnandi, non a recentioribus Pontificibus Pio V, Gregorio XIII. ac Clemente XI. in Ecclesiam invehctus est, sed diu ante in Ecclesia erat usitatus. Sic Joannes XXII. A. 1317. in Bulla sua contra Fratricellos edita definivit, aliquas eorum opiniones esse hæreticas, alias insensatas, alias fabulosas. Facultas Theologica Parisiensis A. 1347. quadraginta malæ doctrinæ articulos damnavit in globo tamquam

*Modus
propositio-
nes in glo-
bo dam-
nandi, an-
tiquus est,
ac maxime
utilis.*

erroneos, suspectos, male sonantes in fide. A. 1382. Facultas Theologica Oxoniensis in Anglia Articulos Wickleffi, & Concilium Constantiense Sess. VIII. ejusdem Wickleffi articulos XLV. Sessione vero XV. articulos XXX. Joannis Hus in globo ac generatim damnavit, nulla ipsis singillatim inusta censura nota. Modum hunc ferendæ generalis censuræ, velut communem & ordinarium, adversus libros & propositiones ex iis extractas secuti sunt Sixtus IV. A. 1478. contra Petrum de Osma, Leo X. A. 1520. contra Lutherum, Alexander VII. A. 1665. & A. 1666. atque Innocentius XI. A. 1679. contra laxas aliquorum Theologorum opiniones. Idem Innocentius XI. A. 1688. contra Michaellem Molinosium, Alexander VIII. A. 1690. contra Jansenianos quosdam Doctores, atque Innocentius XII. A. 1699. contra librum, cui titulus: *Placita Sanctorum*. Neque ullus umquam modum hunc propositiones noxias proscribendi damnavit, præter manifestos hæreticos, aut de hæresi vehementer suspectos, nimirum Marcum Anton. de Dominis, Paulum Sarpium in falsa ac mendaci Hist. Conc. Tridentini, Franciscum Le Courayer, Quesnellum, aliosque Jansenianos, qui non tam dolent a Romanis Pontificibus propositiones singulas determinata censura non fuisse confixas, quam easdem simpliciter fuisse reprobatas. Si enim illi determinatas fixasque amant censuras, cur quinque propositiones Jansenii non rejiciunt, de quibus certam, perspicuam ac determinatam censuram tulit Innocentius X? Utilitatem quod attinet, quæ ex damnatione noxiarum propositionum in fideles redundat, ea certe maxima est; genuini enim Ecclesiæ filii facile agnoscunt, doctrinas illas, quantumvis in globo damnatas, perniciosas esse in docendo, periculosas in credendo ac sequendo; admonenturque illas sollicitè devitare, velut profanas novitates. Sufficit profecto pro Fidelium instructione, modo sciatur hanc vel illam doctrinam esse malam, quamvis species ac gravitas erroris, malitiæ, aut periculi in qualibet parte illius doctrinæ contenti non cognoscatur. Ut enim

Sfor-

Sfortia Card. Pallavicinus observat Lib. I. Hist. Conc. Tridentini, Cap. XXI. ut quis ex urbe pellatur, necessarium non est, eum declarari hostem publicum, aut peste evidenter infectum; sed sufficit eum de prava machinatione aut contagioso morbo graviter esse suspectum. Pari modo ut quis a venenato fructu abstinendum sibi esse decernat, sufficit si cibum illum veneno infectum esse resciat, quamvis veneni in eo latentis speciem ignoret. Vide Instructionem Pastoralem Illustrissimi Archiepiscopi Parisini Anno 1756. Num. CXXXI.

CONTROVERSIA VII.

AN DEUS POTUERIT HOMINEM INNOCENTEM CONDERE, MORBIS, MORTI, ALIISQUE VITÆ MISERIIIS OBNOXIUM?

CONTRA BAJANOS, ET JANSENIANOS.

493. Certum ac Catholicis omnibus exploratum est, ut Num. 53. ostendimus, primum hominem a Deo ita conditum fuisse, ut moriturus numquam, aut hujus vitæ miseriis obnoxius fuisset, si peccatum numquam perpetrasset. In præsentī itaque Controversia non quaeritur, quid factum fuerit, sed quid fieri potuerit: an nimirum Deus in alia providentia, salvis Bonitatis, Justitiæ, aliarumque suarum perfectionum legibus, hominem a se conditum, nulloque inquinatum peccato, morti, morbis, doloribus, aliisque hujus vitæ miseriis subicere potuerit absque ullo ejus demerito? Quid Bajus hac de re fenserit, fati produnt aliquæ ejus propositiones ab Ecclesia proscriptæ, nimirum VI. *Naturali lege constitutum fuit homini, ut, si in obedientia perseveraret, ad eam vitam pertransiret, in qua mori non posset.* LV. *Deus non potuisset ab initio talem creare hominem, qualis nunc nascitur.* LXXII. *Omnes omnino justorum afflictiones sunt ultiones peccatorum ipsorum: unde Et Job, Et Martyres, quæ passi sunt, propter peccata sua passi sunt.* LXXVIII. *Immortalitas primi hominis non erat*

*Status
questio-
nis.*

*Error
Baji &
Jansenii.*

gratiæ beneficium, sed naturalis conditio. Aberrantem Bajum pro more suo secutus est Jansenius Tomo II. Edit. Lovaniensis, columna 938. scribens: *Ex ipsis terminis crudelitatem & injustitiam spirat, innocentem animam, nulli peccato obnoxiam, ad miserias status præsentis condemnare.* Et columna 883. *Mors corporis nequit innocenti creaturæ sine merito præcedentis iniquitatis a Deo infligi.* Columna 945. *Ex miseriis puræ naturæ cogimur ad diversas impietates, ad blasphemiam in Deum, ad Manicheismum.* Eodem collimat Quesnellus propositione LXX. damnata asserens: *Numquam Deus affligit innocentes: & afflictiones semper serviunt vel ad puniendum peccatum, vel ad purificandum peccatorem.*

*Hominem
innocen-
tem condi-
potuisse,
morti &
miseriis
obnoxium
docet Au-
gustinus.*

494. Conclusio. Deus potuisset hominem innocentem condere, morti, morbis, ac doloribus obnoxium. Prob. I. Autoritate S. Augustini, qui Lib. VI. de Genesi ad literam, Cap. XXV. de mortalitate corporis primi parentis scribit: *Illud quippe (corpus Adæ) ante peccatum, & mortale secundum aliam, & immortale secundum aliam causam dici poterat: id est, mortale, quia poterat mori; immortale, quia poterat non mori. Aliud est enim non posse mori, sicut quasdam naturas immortales (id est, Angelos humanasque animas) creavit Deus: aliud est autem posse non mori, secundum quem modum primus creatus est homo immortalis; quod ei præstatur de ligno vitæ, non de constitutione naturæ: a quo ligno separatus est cum peccasset, ut posset mori, qui nisi peccasset posset non mori. Mortalis ergo erat conditione corporis animalis, immortalis autem beneficio Conditoris.* Jam vero auctore Augustino, immortalitas primi hominis non erat de constitutione naturæ, non de conditione naturæ, non de conditione corporis animalis, sed de beneficio Conditoris. Contra autem auctore Bajo in damnata propositione LXXVIII. immortalitas primi hominis non erat gratiæ beneficium, sed naturalis ejus conditio. Ergo Bajana doctrina de primi hominis immortalitate pugnat omnino cum Augustini doctrina. Neque dici potest, primi hominis immortalitatem ju-

xta Augustinum ex una parte mirabilem Dei gratiam fuisse; ex altera vero parte primo homini ratione aliqua debitam fuisse. Etenim apud S. Doctorem hæc duo pugnant inter se quam maxime, nec conciliari simul ulla ratione possunt, id est, Dei gratiam tale quid esse, quod supra naturam est; atque illud ipsum debitum quavis ratione naturæ esse, ut ex S. Augustino ostendimus Num. 475.

495. Prob. II. Authoritate Pontificum, qui propositiones Baji & Quesnelli damnarunt. III. Ratione positiva. Corpus humanum componitur ex elementis inter se contrariis. Ergo sicut cætera animalia ob hanc elementorum contrarietatem sunt morti & morbis natura sua obnoxia: ita etiam illis homo natura sua foret subjectus, nisi per indebitum privilegium a Deo redderetur immunis. IV. Argumento negativo. Adversarii nullam ostendere possunt repugnantiam five ex parte Dei, five ex parte hominis, ut patebit ex solutione objectionum. Ergo frustra negant hominem non potuisse a Deo creari absque ullo suo demerito morti, morbis, ac doloribus obnoxium.

*Idque aliis
momentis
ostenditur.*

Argumenta contraria refutantur.

496. Objicitur I. Authoritas Patrum & Conciliorum, ac præcipue Augustini. S. Augustinus Lib. IV. contra Julianum, Cap. ult. scribit: *Quid restat, nisi ut causa istorum malorum sit iniquitas vel impotentia Dei, aut pœna primi veterisque peccati? Sed quia nec iniustus, nec impotens est Deus: restat quod non vis, sed cogere confiteri, quod grave jugum super filios Adam a die exitus de ventre matris eorum usque in diem supulturæ in matrem omnium non fuisset, nisi delicti originalis meritum præcessisset.* Et Lib. VI. Operis imperfecti, Num. XXVII. *Ipsi (infantes) nullum, sicut putatis, trahentes peccatum; immeritas, si hoc ita est, procul dubio sustinent pœnas. --- Ubi est justitia Dei? quam si cogitares, numquam crederes sine ullo merito peccati originalis tam miseros esse nascentes.* Augustino suffragatur S. Gelasius I. Epist. VII.

*Patres illi
non de pos-
sibili, sed
præsenti
statu lo-
quuntur.*

ad

ad Episcopos Piceni scribens: *Ideo de felicitatis suæ claritate seclusus, atque ad spinas & tribulos, miserasque multiplices cœlesti voce damnatus est, quæ utique pœna iusti iudicii tam gravis & aspera in bono perseveranti nullatenus esset inflicta, & nisi malo non convenienter illata probaretur.* Et S. Anselmus Lib. II. Cur homo Deus, Cap. II. *Sapientiæ & iustitiæ repugnat, ut cogeret mortem pati sine culpa, quem iustum facerat ad æternam beatitudinem.* Patres Africani in Sardinia exules Lib. de Incarnatione & Gratia, quem eorum nomine conscripsit S. Fulgentius, Cap. XIV. ajunt: *Qua igitur iustitia Deus iustus infantibus sine peccato nascentibus ingerit pœnam, in quibus pœnæ non invenit causam?* Arausicanum II. Cap. II. *Siquis soli Adæ prævaricationem suam, & non ejus propagini asserit nocuisse, aut certe mortem tantum corporis, quæ pœna peccati est, non autem & peccatum, quod mors est animæ, per unum hominem in omne genus humanum transisse testatur, injustitiam Deo dabit.* Ergo Augustinus, Gelasius, Anselmus, Patres Africani, & Arausicani sensere, hominem innocentem a Deo, salva sua iustitia ac bonitate, non potuisse creari obnoxium morti, morbis ac doloribus.

497. R. C. A. D. C. Sensere hominem innocentem non potuisse a Deo creari obnoxium morti, morbis ac doloribus, in hac providentia, ac supposita gratuita promissione Dei hominem ab his miseriis immunem fervandi quamdiu in iustitia perseveraverit, C. C. In alia providentia possibili, & præscindendo a gratuita promissione Dei, N. C. Augustinus cum Pelagianis dimicans de præsentis tantum providentia loquitur, ostenditque, Adamum ex beneficio Conditoris sui creatum fuisse in gratia, immunem a concupiscentia, atque immortalem, si non peccasset. Id tum alibi frequenter, tum Lib. I. de peccat. meritis & remissione, Cap. II, & Lib. I. contra Julianum, Cap. V. probat, scribens: *Tu interim habes in conspectu non solum Occidentis, verum etiam Orientis Episcopos. Nam qui nobis deesse videbantur, plures Orientis invenimus.* Omnes uno eodemque modo

do credunt; per unum hominem peccatum intrasse in mundum, & per peccatum mortem. Supposita hac Dei promissione, ut existentiam peccati originalis evinceret S. Doctor, Pelagianos stringit, eosque interrogat, cur infantes nullius peccati personalis rei nascantur morti ac morbis obnoxii? aitque Deum aut impotentem fore, quia quæ promiserat implere non potuit: vel iniquum fore & injustum; eoquod non sine justitiæ, aut fidelitatis suæ dispendio promissis stare nolit hominem tamdiu immunem servandi a morte & miseriis, quamdiu ille justitiam diligeret. Ex quo manifeste patet, supponi hic ab Augustino gratuitam Dei promissionem, sermonemque illi esse non de quacunque possibili, sed de præsentis tantum providentia. Porro eadem, quæ Augustini, fuit etiam Gelasii, Anselmi, PP. Africanorum, & Arausicanæ Synodi mens ac sententia.

498. Dices I. S. Augustinus Lib. XIII. de Civit. Dei, Cap. XV. scribit: *Constat inter Christianos veraciter Catholicam tenentes fidem, etiam ipsam nobis corporis mortem, non lege naturæ, quia nullam mortem homini Deus fecit, sed merito inflictam esse peccati.* Ergo Augustinus censuit hominem innocentem natura sua immortalem esse. R. C. A. N. C. Verbis illis S. Doctor id unum significat, moriendi necessitatem, quæ ex natura hominis de se secutura erat, per Dei gratiam fuisse sublatam: & ideo mortem, quæ nunc regnat in nobis, non lege naturæ, sed merito inflictam esse peccati. Atque hanc fuisse mentem Augustini invictè probatur ex ejus Libro VI. de Gen. ad lit. Vide dicta Num. 494.

499. Dices II. S. Augustinus docet, seclusa etiam Scripturarum autoritate, ex solis hujus vitæ miseriis colligi posse existentiam peccati originalis: atque ex sola miseriarum hujus vitæ consideratione Philosophos Gentiles peccatum aliquod toti naturæ humanæ commune suspicatos esse. Lib. IV. contra Julianum, Cap. ult. ita scribit S. Doctor: *Hujus evidentia potest. miseriarum Gentium philosophos, nihil de peccato primi hominis sive scientes, sive credentes, compulit dicere, ob aliqua scel-*

Ex miseriis hujus vitæ existentia peccati originalis non certo, sed probabiliter inferri potest.

assignatur; Ergo. R. N. A. Augustinus non vult eo argumento evincere, Deum non posse hominem innocentem subicere morti & doloribus; sed probabiliter tantum ac conjecturaliter infert, Deum conditurum non fuisse hominem morti & miseriis obnoxium, si a peccato semper abstinuisset. Posterius hoc valde probabile esse fatemur; prius autem illud omnino improbabile est, falsum, erroneum, atque a Pontificibus in Bajo damnatum. Neque argumentatio hæc ullo modo legitima est: Deus probabiliter, præscindendo etiam a gratuita promissione illi facta, innocentem hominem non subiecisset morti ac miseriis, si in justitia perseverasset. Ergo Deus non potuit hominem innocentem condere morti & miseriis obnoxium.

501. Dices IV. Non absque injuria S. Doctoris dicitur, eum contra Pelagianos usum fuisse argumento conjecturali. Ergo. R. N. A. Importunus atque immodicus Augustini laudator dicendus est, qui omnia Augustini argumenta, quibus Donatistas, Manichæos, Pelagianos, aliosque hæreticos, aut etiam Catholicos aliter sentientes in materiis dubiis impugnat, demonstrativa ac decretoria esse contendit. In præsentia itaque materia contra Pelagianos utitur potissimum Augustinus argumentis certis, ex Scriptura, traditione ac consensu Ecclesiæ petitis; quandoque vero argumentum adhibet conjecturale ac probabile, quale illud est, quod superius objiciebatur. Sane S. Thomas Lib. IV. contra Gentes, Cap. LII. absque injuria Augustini docet, miseras humanæ naturæ esse peccati Originalis signa quædam probabilia, non autem manifesta, certa, aut evidentia.

502. Objic. II. Infirmitas argumenti, quod ex damnatione propositionum Baji ducitur. Propositio Baji LV. & LXXVIII. damnatæ fuerunt a Pontificibus, quia in illis id denegatur Omnipotentia divina. Ergo qui docent vel de sola justitia, vel de sola sanctitate, vel etiam de sola bonitate sua, non potuisse Deum talem ab initio creare hominem, qualis nunc nascitur, cum Bajo minime sentiunt, neque proscriptam propositionem-

*Aut S.
Augustino
injuria in-
feratur.*

*Absurda
adversa-
riorum
replica
enervatur.*

sitionem tuentur. II. Multæ propositiones Baji damnatæ fuerunt, non ob falsitatem doctrinæ, sed ob acerbilitatem censuræ. Ergo ex damnatione illarum propositionum solidum argumentum instrui non potest. R. ad I. Replica hæc quam familiaris quibusdam, tam absurda est. Dei attributa unum quid simplex & idem reipsa sunt: nec aliter quam propter plures diversasque perceptiones: quibus summam infinitamque Dei perfectionem cognoscimus, plura illa & diversa nostris mentibus, parvis admodum & angustis, apparent. Quam ob rem manifestum est, si Dei potentia non repugnat creare hominem morti, morbis, ac doloribus obnoxium sine suo demerito; neque id ipsum a Dei justitia, bonitate, aliisque Dei perfectionibus alienum esse. Sin autem a Dei justitia esset alienum, a Dei quoque potentia illud abhorrere necesse foret. Hinc S. Anselmus Lib. I. Cur Deus homo, de rebus divinis magnifice scribens ait: *In Deo, quamlibet parvum inconveniens, sequitur impossibilitas.* Ad II. N. C. Propositio Baji LV. & LXXVIII. nullam Pelagianæ hæreseos accusationem exprimunt, nullamque continent censuræ acerbilitatem. Ergo propositiones illæ non sunt ex earum numero, quæ propter acerbilitatem censuræ; sed ad earum pertinent classem, quæ propter falsitatem doctrinæ a Sede Apostolica sunt damnatæ. Porro ex LXXIX. damnatis propositionibus Baji, non plures quam VIII. enumerantur, quæ acerbam Pelagianismi censuram exhibent. Quod si semel licentia hæc concedatur interpretandi suo cujusque arbitrato damnatas Baji propositiones, poterit unusquisque pro libito totam doctrinam Baji propugnare, ac tueri. De singulis enim in Bajo proscriptis ab Apostolica Sede propositionibus simili licentia affirmari poterit, illas non propter falsitatem doctrinæ, sed propter acerbilitatem dumtaxat censuræ fuisse damnatas. Vide hac de re plura apud Laurentium Alticotium Summæ Augustinianæ Parte IV. Quæst. I. Artic. VI.

503. Objic. III. Ratio. Deus, quando homines affligit, non alium sibi præfigit finem, quam ut præterita peccata congruis pœnis castiget. Ergo cum in statu puræ & innocentis naturæ Deus hunc finem sibi præfigere non potuerit, pariter neque potuit hominem innocentem morti & doloribus subicere. R. N. A, quod in Bajo & Quesnello damnatum fuit a Pontificibus, quodque manifestæ falsitatis arguunt afflictiones B. Virginis Mariæ, Sancti Josephi ejusdem Sponsi, Jobi, aliorumque piorum hominum, quorum eximiam sanctitatem commendant divinæ Scripturæ & Patres. Fines quos Deus homines affligendo sibi præfigit, varii ac diversi sunt. Ut enim Ven. Beda apud Cornelium à Lapide Comment. in Cap. II. Marci ait: *Affliguntur homines corporis maleficiis aut ad augmentum meriti, ut Job & Martyres: aut ad humilitatis conservationem, ut Paulus: aut ad correctionem peccati, ut soror Moysis, & hic paralyticus: aut ad Dei gloriam, ut cæcus natus: aut ad initium damnationis, ut Herodes.* Atque hi sunt præcipui fines, quos in diversorum hominum afflictionibus divina providentia sibi præfigit; ita ut non in omnibus sint aut punitio peccati, aut peccatoris purgatio. Sic Tobie Cap. XII. ait Angelus ad eundem: *Ego obtuli orationem tuam Domino. Et quia acceptus eras Deo, necesse fuit ut tentatio probaret te.* Neque dicit, quia peccator eras, necesse fuit ut immixta cæcitas esset punitio tuorum peccatorum, vel ab iisdem purgatio. Similiter de Jobo loquens S. Augustinus Lib. II. de peccatorum meritis & remissione, Cap. XII. scribit: *Novimus non propter peccata, sed propter ejus demonstrandam justitiam illa omnia fuisse perpesum.*

504. Dices I. Sapientiæ Cap. XII. dicitur: *Cum ergo sis justus, juste omnia disponis: ipsum quoque, qui non debet puniri, condemnare, exterum æstimas a tua virtute.* Ergo juxta Scripturas, Deus non potuit hominem innocentem miseriis hujus vitæ subicere. R. C. Miseriæ hujus vitæ sunt pœnæ. Atqui homo innocens non est dignus pœna. Ergo. R. C. A. N. C. Magnum

est

Deus sæpe non ob peccata, sed ob alios fines, homines affligit

Et tunc afflictio non est pœna, sed pœnalitas.

est afflictionem inter & condemnationem discrimen: condemnatio supponit culpam; non item afflictio, quæ a Deo dirigente longe ob alias causas obvenire potest, quam ob peccata. S. Thomas Parte III. Quæst. LXIX. Artic. III. ex Sacris literis ostendit, convenientius non auferri per baptismum pœnalitates hujus vitæ: quod tribus confirmat argumentis, inter quæ neque punitio peccati est, neque peccatoris purificatio. *Primo quidem*, inquit, *quia per baptismum homo incorporatur Christo, & efficitur membrum ejus, ut supra dictum est. Et ideo* conveniens est, *ut id agatur in membro incorporato, quod est actum in capite. Christus autem a principio suæ conceptionis fuit plenus gratia & veritate: habuit tamen corpus passibile, quod post passionem & mortem est ad vitam gloriosam resuscitatum. Unde & Christianus in baptismo gratiam consequitur, quantum ad animam: habet tamen corpus passibile, in quo pro Christo possit pati, sed tandem resuscitabitur ad impassibilem vitam. --- Secundo hoc est conveniens propter spirituale exercitium, ut videlicet contra concupiscentiam & alias passibilitates pugnans homo victoriæ coronam acciperet. --- Tertio hoc fuit conveniens, ne homines ad baptismum accederent propter impassibilitatem præsentis vitæ, & non propter gloriam vitæ æternæ.* Ad prob. D. M. Miseriæ hujus vitæ sunt pœnæ in hac providentia, saltem sæpissime, quamvis non semper, C. M. In omni providentia, N. M. In statu naturæ puræ miseriæ hujus vitæ non essent pœnæ, quæ necessario supponunt peccatum; cum pœna nihil aliud sit, quam malum inflictum propter peccatum: sed forent meræ pœnalitates naturales, quæ naturæ humanæ conditionem sequerentur, sicut rubigo sequitur naturam ferri. Ex quo colligitur male ab adversariis opponi nobis Augustinum, qui Lib. III. de Libero arbitrio, Cap. XVIII. scribit: *Omnis pœna si justa est, peccati pœna est, & supplicium nominatur.* Patet enim S. Doctorem loqui de pœna, non de pœnalitate naturali: de præsentī providentia, non de alia.

505. Dices II. S. Augustinus Lib. I. Operis imperfecti, Num. XXXIX. scribit: *Neque enim sub Deo justo miser esse quisquam nisi mereatur potest.* Ergo homo innocens subijci non potest morti & doloribus. P. C. Homo innocens morti & doloribus obnoxius foret miser. Ergo. R. C. A. N. C. Ad probat. N. A. Nemo sapiens, & Christianæ perfectionis æstimator Apostolum tunc miserum fuisse affirmabit, quando in tribulationibus & persecutionibus pro Dei gloria toleratis superabundare se gaudio fatebatur. Neque cæteros Apostolos quis jure miseros vocaverit, de quibus dicitur Act. Cap. V. *Ibant (Apostoli) gaudentes a conspectu concilii, quoniam digni habiti sunt pro nomine Jesu contumeliam pati.* Ipse Christus Dominus Matth. Cap. V. non miseros, sed beatos pronuntiat, *qui persecutionem patiuntur propter justitiam: quoniam ipsorum est regnum cælorum.* Miseria igitur proprie ac vere talis est malum beatitudini oppositum, quod ea nos privat; vel ab ea nos abstrahit: aut saltem afflictio, in qua sistitur absque relatione aut utilitate ad bonum superius. Tales autem non essent afflictiones hujus vitæ, innocenti homini a Deo immixtæ ad charitatis & tolerantia, aliarumque virtutum probationem. Vide plura apud Jacobum Fontaine in Constitutione Unigenitus Theologicæ propugnata Tomo III. ad Proposit. LXX.

*Neque qui
sic affliguntur,
sunt
miseri.*

CONTROVERSIA VIII.

AN DEUS POTUERIT HOMINEM INNOCENTEM CONDERE CUM ALIQUA SALTEM REBELLIONE CONCUPISCENTIAE?

CONTRA BAJANOS ET JANSENIANOS.

506. **C**oncupiscentia in sensu latiore sumpta, est appetitus sensitivus, sive inferior, qui concupiscere potest objecta sensibilia, quæ ipsi remote per sensus externos, & proxime per phantasiam proponuntur. Quod si hic appetitus versetur circa bonum & malum sensibile secundum se consideratum, & non prout conjunctum

*Quid sit
concupiscentia?*

ctum est cum difficultate, dicitur *concupiscibilis*. Si autem versatur circa bonum & malum sensibile ut arduum, sive cum aliqua difficultate obtinendum aut amovendum, vocatur *irascibilis*. Porro uterque appetitus, tam irascibilis quam concupiscibilis, sumi potest vel pro potentia appetendi, vel pro ipso actu. Potentia appetendi importat ipsam animam, & organum corporeum, in quo eliciuntur & recipiuntur actus qui procedunt a tali appetitu. Actus appetitus sensitivi vocantur passionēs, quas comitatur certa aliqua, & passioni proportionata corporis immutatio, seu motus sanguinis.

Quid re-
bellis con-
cupiscen-
tia?

507. Per rebellionem concupiscentiæ intelliguntur actus illi inordinati appetitus inferioris tam irascibilis quam concupiscibilis, quibus incitamur ad malum, aut retardamur a bono, & qui in nobis oriuntur citra advertentiam rationis, atque accedente etiam ea advertentia perdurant, tametsi voluntas eisdem positive resistat. Hæc rebellis concupiscentia sumi potest vel pro potentia, vel pro actu. Si pro ipsa potentia sumatur, involvit duo, I^{mo} ipsum appetitum sensitivum, qui de se prodire potest in actus rectæ rationi, & appetitui rationali reluctantes. II^{do} dicit negationem doni indelicti, per quod appetitus sensitivus ex imperio rationis posset impediri a suis actibus alias necessariis. Si vero appetitus rebellis pro actu sumatur, dicit ipsos motus rationi & voluntati reluctantes.

Status
questionis

508. Ut ad præsentem quæstionem propius accedamus, noto I^{mo}. sermonem non esse de præsentem in qua vivimus providentia; certum est enim, Adamum in gratia conditum, eumque Conditoris beneficio immunem fuisse ante lapsum a rebellionem concupiscentiæ; quæ proinde in statu naturæ lapsæ est pœna peccati originalis, orta non a Deo, sed a peccato, ut Augustinus contra Pelagianos invictè ostendit, nosque ipsi docuimus Num. LVI. II^{do}. Quæri hic tantum, num Deus salvis divinis suis perfectionibus, potuerit innocentem hominem creare cum aliqua saltem rebellionem concupiscentiæ. Certum est enim, quod hæc rebellio & incli-

natio

natio ad malum de facto sit multo major, quam fuisset in statu naturæ puræ, partim ob proprios habitus vitiosos, partim ob habitus vitiosos parentum, qui non raro suas propensiones æquæ ac morbos in prolem transfundunt. III. Juxta omnes certum esse, quod concupiscentia qua rebellis, atque ipsi etiam motus appetitus sensitivi rectæ rationi reluctantes, non possint esse a Deo ut specialiter eos procurante aut intendente; secus Deus esset author mali moralis, saltē materialis, si nimirum consensus creaturæ non accederet: sed hoc tantum Catholici contendunt, posse esse in statu naturæ puræ a Deo motus illos permittente ex imperfectione naturæ exortos, atque ad illos concurrente concursu generali ex officio causæ primæ, non aliter quam nunc ad entitatem actus mali concurrat.

509. Bajani & Janseniani negant innocentem hominem potuisse a Deo creari cum aliqua rebellionē concupiscentiæ, aut cum ignorantia; quia juxta eorum principia ignorantia juris naturæ quantumvis invincibilis, & concupiscentia quamvis non victrix, sunt peccata mortalia; ideoque si Deus hominem cum aliqua rebellionē concupiscentiæ, aut ignorantia crearet, Deus esset author peccati. Hinc damnatæ fuerunt a S. Pio V. & Gregorio XIII. Baji propositiones XXVI. *Integritas primæ creationis non fuit indebita humanæ naturæ exaltatio, sed naturalis ejus conditio.* Et LV. *Deus non potuisset ab initio talem creare hominem, qualis nunc nascitur.* Quarum propositionum sensus a Bajo intentus, ipso fatente Jansenio Lib. III. de Statu puræ naturæ, Cap. ult. non alius est, quam non potuisse hominem aliter creari quam creatus est, scilicet in justitia originali cum immunitate a rebellionē concupiscentiæ: neque potuisse creari, uti nunc nascitur, absque justitia originali, & cum infirmitatibus hominem nunc comitantibus.

510. Conclusio. Potuit Deus hominem innocentem condere cum aliqua saltem rebellionē concupiscentiæ. Prob. I. Autoritate Pii V. & Gregorii XIII. qui Baji propositiones XXVI. & LV. paulo ante cita-

*Error
Baji &
Jansenii.*

*Potuisse
hominem a
Deo creari
cum aliqua
rebellionē
concupiscentiæ.*

scientia,
ostenditur
authorita-
te Pontifi-
cum.

citatas, in sensu ab eodem intento damnarunt, non ob censuræ acerbicatem, cum nullam omnino censuram contineant; sed ob doctrinæ falsitatem. Præterea damnatio unius propositionis est definitio alterius contradicentis. Ergo cum propositio Baji LV. *Deus non potuisset ab initio talem creare hominem qualis nunc nascitur*, damnata fuerit, definita fuit a Pontificibus tamquam vera & Catholica propositio illi contradicens: *Deus potuisset ab initio talem creare hominem qualis nunc nascitur*. Atqui si Deus non potuisset hominem innocentem condere cum aliqua saltem rebellionem concupiscentiæ, propositio Bajana foret verissima, altera vero ei contradicens manifestam contineret falsitatem, ut patet consideranti; cum nullus ex Adæ posteris, præter B. Virginem, ab omni rebellis concupiscentiæ motu immunis fuerit. Ergo ex mente Pontificum & Ecclesiæ Deus potuit hominem innocentem condere cum aliqua saltem rebellionem concupiscentiæ.

S. Augu-
stini.

511. Prob. II. Autoritate S. Augustini, qui Lib. IV. contra Julianum, Cap. XVI. scribit: *Quid est gustato cibo prohibito nuditas indicata, nisi peccato nudatum quod gratia contegebat? Gratia quippe Dei magna ibi erat, ubi terrenum & animale corpus bestialem libidinem non habebat. Qui ergo vestitus gratia non habebat in nudo corpore quod pueret, spoliatus gratia sensit quod operire deberet.* Lib. I. de peccat. meritis & remis. Cap. XVI. *Quando ergo peccavit Adam non obediens Deo, tunc ejus corpus, quamvis esset animale & mortale, gratiam perdidit, qua ejus animæ omni ex parte obediebat.* Lib. XIV. de Civit. Dei, Cap. XVII. *Patebant ergo oculi eorum, sed ad hoc non erant aperti, hoc est, non attenti, ut cognoscerent quid eis indumento gratiæ præstaretur, quando membra eorum voluntati repugnare nesciebant. Qua gratia remota, ut pœna reciproca inobedientia plecteretur, exstitit in motu corporis quædam impudens novitas, unde esset indecens nuditas. --- Cognoverunt ergo quia nudi erant: nudati scilicet ea gratia, qua fiebat ut nuditas corporis nulla eos lege peccati menti eorum repugnante confunderet.* Ergo ju-

xta

xta S. Augustinum obedientia illa & subiectio, quæ & integritas dicitur, donum Dei mere gratuitum fuit, gratis omnino a Deo datum, quavis ratione indebitum, quod ex nulla decentia, five ex parte Dei Conditoris, five ex parte hominis conditi, sed ex mera Dei bonitate & liberalitate manavit; cum *res indebita* & *gratia* exprefione vocis dumtaxat discrepent, ut ostendimus Num. 475. Idem S. Doctor Lib. III. de Libero arbitrio, Cap. XX. ex hypothesi, quam utique impossibilem non iudicavit, impugnat Manichæos, qui ignorantiam & difficultatem non esse in homine nisi ab æterna quadam natura mala asseriebant; aitque, quod si ignorantia & difficultas, non præcedentis ullius peccati supplicium, sed naturæ primordia forent, non parvum bonum haberet homo, unde Conditori suo gratias ageret, Deumque has ob causas non culpandum, sed laudandum fore. I. Quia anima a Deo sic creata, id est, cum naturali ignorantia & difficultate, adhuc vi & natura sua quovis perfecto corpore longe perfectior esset. II. Quia anima huiusmodi vim facultatemque a Deo haberet, qua Creatore suo eam naturaliter adjuvante, apta & idonea esset ad comparandas sibi virtutes illas, quibus ignorantiam difficultatemque magis magisque in dies proficiendo minueret, ac superaret. III. Quia naturalis ignorantia & difficultas tali animæ forent & proficiendi admonitio, & perfectionis exordium. IV. Quia anima huiusmodi sic creata, nulla obstricta esset necessitate permanendi in ea ignorantia & difficultate, in qua exorta esset: utramque enim naturalibus auxiliis sui Conditoris adjuta, paulatim debilitare & vincere posset, & ad sapientiam iustitiamque, ac naturalem quamdam beatitatem pervenire. Confirmat hanc suam doctrinam S. Augustinus Lib. I. Retractat. Cap. IX. *Quamvis ignorantia & difficultas, etiamsi essent hominis primordia naturalia; nec sic culpandus, sed laudandus esset Deus sicut in eodem tertio libro disputavimus. Quæ disputatio contra Manichæos habenda est, qui non accipiunt Scripturas sanctas veteris instrumenti, in quibus originale peccatum narratur; & quidquid inde in*
 T. IV. Theol. Dogm. Pol. Cc lte.

litteris Apostolicis legitur, detestabili impudentia immisum fuisse contendunt a corruptoribus Scripturarum, tanquam non fuerit ab Apostolis dictum. Et Lib. de Dono perseverantiae, Cap. XI. Etiam si verum esset quod dicunt Pelagiani, ignorantiam & difficultatem, sine quibus nullus hominum nascitur, primordia, non supplicia esse naturae; vincerentur tamen Manichæi, qui volunt duas, boni scilicet & mali coæternas esse naturas. Atqui manifestum est, Manichæos non fore vincendos, neque Deum ideo laudandum fore, siquidem Deus, salvis divinis suis perfectionibus, hominem creare non posset absque dono integritatis cum ignorantia illa ac difficultate. Ergo manifestum est juxta Augustinum, Deum salvis divinis suis perfectionibus, posse hominem condere cum aliqua saltem rebellionem concupiscentiae.

S. Thomæ. 512. Prob. III. Authoritate S. Thomæ, qui I. Parte, Quæst. XCV. Art. I. ait: Manifestum est, quod illa subiectio corporis ad animam, & inferiorum virium ad rationem non erat naturalis: alioquin post peccatum mansisset, cum etiam in dæmonibus data naturalia post peccatum permanserint. --- Unde manifestum est, quod & illa prima subiectio, qua ratio Deo subdebatur, non erat solum secundum naturam, sed secundum supernaturale donum gratiæ. Et in II. Sentent. Dist. XXXI. Quæst. I. Artic. II. ad IIIum. Poterat Deus a principio quando hominem condidit, etiam alium hominem ex limo terræ formare, quem in conditione suæ naturæ relinqueret, ut scilicet mortalis & passibilis esset, & pugnam concupiscentiæ ad rationem sentiens: in quo nihil humanæ naturæ derogaretur, quia hoc ex principiis naturæ consequitur. Non tamen iste defectus in eo rationem culpæ aut pænæ habuisset, quia non per voluntatem iste defectus causatus fuisset.

*Et ratio-
ne.* 513. Prob. IV. Ratione. Ima est. Nihil Omnipotentiae divinæ denegandum est, nisi manifesta ostendatur implicantia. Atqui, ut ex solutione objectionum patebit, nulla ostendi potest implicantia, quod Deus hominem innocentem creare possit cum aliqua saltem rebellionem concupiscentiæ. Ergo. II. Concupiscentia
in

in statu naturæ puræ foret causa pugnandi & admonitio non superbiendi, homo enim admoneretur suæ infirmitatis, ejusque virtus in infirmitate perficeretur; quia clare animadverteret, divino auxilio se indigere, sicque justam Deo daret gloriam obedientiâ & precibus. Ergo concupiscentia in statu naturæ puræ foret utilis, hancque utilitatem posset Deus intendere. III. Homo ex una parte naturaliter impedire non potest, ne phantasie umquam occurrat bonum sensibile ac delectabile, inhonestum ac prohibitum: ex altera parte non potest naturaliter impedire, quo minus appetitus sensitivus moveatur a tali objecto sufficienter proposito; quia appetitus sensitivus non est minus potentia necessaria, quam sensus externi: nec minus est determinatus ad amandum objectum sensibile ac delectabile, quam v. g. oculus sit determinatus ad videndum. Ergo appetitus sensitivus etiam in statu naturæ puræ sæpius insurgeret adversus potentiam superiorem, nisi aliunde impediretur. Atqui ostendi non potest, quomodo aliunde impediri debuerit semper: neque enim magis credibile est in statu naturæ puræ Deum id impedire debuisse, quam quod Deus debuisset omnes causas naturales impedire, ne homini ullam molestiam inferrent.

Argumenta contraria refutantur.

514. Objicitur I. Perfectio Dei. Si Deus posset creare hominem cum aliqua rebellionē concupiscentiæ, tunc concupiscentia rebellis esset a Deo. Atqui hoc dici nequit. Ergo. P. m. Concupiscentia rebellis est peccaminosa, & ex mundo, juxta illud I. Joan. Cap. II. *Quoniam omne quod est in mundo, concupiscentia carnis est, & concupiscentia oculorum, & superbia vitæ: quæ non est ex Patre, sed ex mundo est.* Ergo. R. D. M. Concupiscentia quæ est rebellis, esset a Deo, prout est potentia concupiscendi bona sensibilia, C. M. Concupiscentia ut rebellis esset a Deo, & sumpta pro actu concupiscendi mala, subdist. Esset a Deo ut authore, illam volente ac procurante, N. M. A Deo ut permit-

*Contrari-
um neque
perfectio
Dei.*

tente illam ad majus meritum hominis, C. M. Et sic dist. minore, N. C. Concupiscentia, prout dicit potentiam concupiscendi bona sensibilia, esset a Deo ut auctore etiam in statu naturæ puræ; sic enim sumpta non est mala, nec pugnat contra sanam rationem: immo est perfectio & bonum naturæ, quatenus est principium actuum ad naturæ functiones & conservationem necessariorum, ac rectæ rationi non adversantium; licet quatenus erumpere potest in motus inordinatos & rectæ rationi dissentaneos, non sit perfectio, sed defectus naturæ connaturalis, & a Deo permixtus: quemadmodum voluntas est perfectio naturæ, si spectetur secundum suam entitatem, & in quantum prosequi potest objecta licita & honesta; in quantum vero objecta illicita & inhonesta prosequi potest, est defectus perfectionis. At vero concupiscentia sumpta pro ipso actu inordinate concupiscendi, Deum auctorem habere non potest; quia ad malum incitat, & Deus ad illam mere permissive se habet, ac concursu tantum generali ex officio causæ primæ ad illam concurrit. Ad *probat.* D. A. Concupiscentia rebellis est peccaminosa, si adjunctum habeat voluntatis consensum, C. A. Secus, N. A. vel subdist. Est peccaminosa in sensu proprio, N. In sensu improprio, quia in hac providentia ex peccato originali oritur, & ad peccatum inclinatur, C. A. N. C. Pari modo concupiscentia carnis sumpta pro actu concupiscendi objecta inhonesta dicitur a S. Joanne non esse ex Patre, sed ex mundo; sumpta vero pro potentia concupiscendi illicita, est defectus naturalis.

515. Dices I. Si Deus hominem crearet cum aliqua rebellionem concupiscentiæ, homo absque aliqua inordinatione non prodiret e manibus sui Conditoris. Atqui id repugnat divinis perfectionibus. P. M. Est inordinatum, quod potentia inferior non subjiciatur superiori, & quod Deus condatur hominem cum stimulo ad peccatum. Ergo. R. D. M. Homo non prodiret e manibus sui Conditoris absque inordinatione tenente se ex parte Dei, & proveniente a Deo, N. M. Proveniente ex defectibilitate & nihilo creaturæ, C. M. Omnis

creatura, ut pote ex nihilo producta, est per se defectibilis, multaque imperfectiones idcirco ei conveniunt. Ad *probat.* D. A. Ita tamen, ut hæc inordinatio proveniat a Deo, N. A. Ut proveniat ex nihilo, & imperfectione creaturæ, C. A. N. C. Alterum membrum pariter Dist. Est inordinatum ut Deus condat hominem cum stimulo efficaci, physice vel moraliter necessitante ad peccatum, C. A. Cum stimulo inefficaci, neque physice neque moraliter necessitante ad peccatum, subdist. Si Deus id faceret eo fine, ut inde sequatur peccatum, C. A. Si id faciat eo fine: ut referatur victoria, N. A. & Conseq. Propterea quod Deus hominem conderet cum aliqua rebellionem concupiscentiæ, defectus aliquis in Deum non caderet; quia Deus author quidem foret rebellantis concupiscentiæ, at non author foret rebellionis illius: quemadmodum Deus producit quidem fatuos homines, nec tamen est author fatuitatis, cum sit sapientissimus, ut scribit S. Augustinus Lib. III. Operis imperfecti, Num. CLX.

516. Dices II. Est impossibile ut Deus producat aliquid, quod est obex sapientiæ & virtutis. Atqui concupiscentia est obex sapientiæ & virtutis. Ergo est impossibile ut Deus producat concupiscentiam. R. D. M. Si illud sit per se obex sapientiæ & virtutis, vel ex intentione operantis, vel ex conditione operis, C. M. Si est obex per accidens tantum, præter conditionem operis, & intentionem operantis, N. M. Et sic dist. minore, N. C. Concupiscentia de se, ut dictum fuit superius, in quantum est potentia prosequendi objecta honesta & licita, est perfectio naturæ, Deumque habet authorem: in quantum vero est potentia prosequendi objecta illicita & inhonesta, est defectus perfectionis, naturæ rationali connaturalis, ac malum aliquod naturale, non tamen culpabile, nisi in actum exeat cui voluntas consentiat: neque Deum habet authorem, sed a Deo tantum permittente existit.

517. Dices III. Si concupiscentia prout est potentia prosequendi objecta illicita, non esset a Deo, esset a natura. Atqui a natura esse non potest. P. m.

Cau-

Causa efficiens omnium rerum est Deus. Ergo. R. C. M. N. m. Ad *prob.* D. A. Deus est causa efficiens omnium rerum quæ perfectionem aliquam involvunt, C. A. Prout illæ imperfectionem includunt, N. A. & Conseq. Concupiscentia sumpta pro potentia prosequendi objecta illicita, est imperfectio ex conditione naturæ consequens: imperfectio autem proprie non efficientem, sed deficientem causam habet; & idcirco non in Deum Creatorem, sed in ipsam creaturam rejicitur. Bonitas responsionis patet in peccato, quod certe Deum non habet tamquam causam efficientem.

518. Dices IV. Si concupiscentia in statu naturæ puræ non esset malum morale, sed tantum naturale, liceret consentire motibus concupiscentiæ. Atqui hoc aperte falsum est. Ergo. Prob. M. Imo. Morti & morbis licet consentire, quia malum sunt mere naturale. Ergo etiam liceret consentire concupiscentiæ. Prob. eadem M. IIdo. In statu naturæ puræ licerent ea omnia, ad quæ naturaliter propenderet natura. Atqui natura in eo statu propenderet ad turpia. Ergo. P. M. Omnis propensio naturalis naturæ bonæ est bona. Sed propensio ad illicita, esset propensio naturæ bonæ, utpote non depravatæ per peccatum. Ergo. R. N. M. Ad Imam *prob.* C. A, at nego rationem additam. Idcirco licet consentire morti ac morbis, quia consensus iste nullum ex sese adjunctum habet peccandi periculum, cum natura ab illis malis vehementer abhorreat: at vero periculum illud præsentissimum est in motibus concupiscentiæ propter fragilitatem hominis, & propensionem in res sensibiles. Ad II. *prob.* D. M. Ad quæ naturaliter propenderet natura qua bona est, C. M. Qua defectibilis est, N. M. Et sic dist. minore, N. C. Ad hujus *prob.* simili modo D. M. Omnis propensio naturalis naturæ bonæ a defectu immunis, est bona, C. M. Naturæ bonæ, ut defectu hæc vitiatur, N. M. Et sic dist. minore, N. C. Propensio naturæ in puris naturalibus conditæ ad turpia, quantumlibet naturalis, non esset bona; sed defectus quem homo etiam in illo statu teneretur quantum posset cohibere.

519. Dices V. Saltem in statu naturæ puræ homo nullam juxta nos haberet causam erubescendi ob concupiscentiam. Atqui hoc dici nequit, quia concupiscentia semper est opus pudendum. Ergo. P. M. Opus Dei non potest esse causa justi pudoris. Atqui concupiscentia in statu naturæ puræ esset opus Dei. Ergo non posset esse causa justi pudoris. R. N. M. Concupiscentia, prout est potentia prosequendi objecta illicita, in omni statu esset opus pudendum; non quidem in ordine mali moralis culpabilis, quamdiu voluntas his motibus non consentit, sed in ordine mali naturalis. Ergo in statu naturæ puræ daretur aliqua necessitas erubescendi ob concupiscentiam. Ad *probat.* C. M. D. m. Concupiscentia in statu naturæ puræ esset opus Dei, sumpta pro potentia prosequendi objecta honesta & licita, C. m. Sumpta pro potentia prosequendi objecta inhonesta & illicita, N. m. Concupiscentia prout dicit potentiam prosequendi objecta honesta, esset a Deo, nec causa foret ullius pudoris, quia perfectio esset naturalis: prout vero dicit potentiam prosequendi objecta illicita, non esset a Deo, sed foret defectus naturalis, proveniens ex nihilo creaturæ, & causa justi pudoris. Homo igitur idcirco erubescens, non erubesceret de opere Dei, neque ingratus esset erga Deum; sed solum suam naturalem imperfectionem, suumque in regendis ejusmodi motibus defectum agnosceret.

520. Dices VI. Si homo in statu naturæ puræ creari potuisset a Deo cum aliqua rebellionē concupiscentiæ, creari etiam potuisset cum pravo aliquo habitu. Atqui id dici nequit. Ergo. P. M. Habitus peccaminosus, quem Deus homini infunderet, non magis esset stimulus ad peccandum, quam concupiscentia. Ergo. R. Imo. Multi, iique graves Theologi admittunt, quod Deus absolute loquendo posset hujusmodi habitum, vel qualitatem, ut vocant, infundere eo fine ut homo eam superando victoriam referat. R. II. N. M. Ad *probat.* N. A. Habitus peccaminosus ex natura sua inclinatur animam directe atque unice ad culpam; quia

eam

eam inclinât ad repetendos illos actus, ex quibus contractus est habitus, vel ad quos incitat habitus infusus. At vero naturalis concupiscentia animam per se & directe tantum inclinât ad proseguenda objecta sensibilia, quæ sæpe honesta sunt & licita.

Neque naturalitas persuadet.

521. *Objic. II. Paritas.* Deus non potuit hominem innocentem condere in eo statu, in quo laboraret ignorantia invincibili, Ergo neque potuit creare hominem obnoxium concupiscentiæ. *Prob. A. Imo.* Ignorantia invincibilis est causa multorum peccatorum. *II^{do}.* Ignorantia & notitiam tollit & potentiam ea adhibendi media, quæ necessaria sunt ad obtinendum finem, ad quem natura rationalis creata est. Ergo natura humana in tali statu esset pessime constituta, quod sine injuria Creatoris dici nequit. *Confirm.* Ea quæ tunc fierent ab hominibus ex ignorantia invincibili, merito tribuerentur Deo ut authori. Ergo. *R. N. A. Ad I. probat. D. A.* Esset causa multorum peccatorum materialium, *C. A. Formalium, N. A. Ad II. probat. iterum D. A.* Ignorantia totalis, perpetua, & ita cæca, ut nullum prorsus lumen præbeat, quo anima suas tenebras cognoscat, & quo exstimuletur ad quærendam lucem, hæc, inquam, ignorantia & notitiam tollit & potentiam, *C. A.* Ignorantia tantum quoad aliqua, eaque nec perpetua, nec ita cæca, *N. A. & Conseq.* Ignorantia illa superius descripta, non tantum locum non habuisset in statu naturæ puræ, sed ne in statu quidem naturæ lapsæ invenitur. Quamvis enim hæc ignorantia initio sit maxima; posteaquam tamen homo ad usum rationis pervenit, minuuntur tenebræ illæ, & veritates morales clarius ac luculentius percipiuntur. Profecto nec Bajus nec Jansenius facile dicent, quod in statu naturæ integræ quilibet homo primo nativitatis momento, vel quando anima corpori infusa est, perfectam habiturus fuisset scientiam & cognitionem omnium, quæ ad consequendum ultimum finem, Deumque cognoscendum pertinent; sed eo modo rerum harum scientiam acquisivisset, quo nunc; hoc tamen discrimine, quod in acquisitione illius summum gaudium

dium expertus fuisset, omni labore ac tadio liberum. Ad *confirm.* N. A. Cum homo intellectum habeat ex natura sua valde limitatum, ignorantia foret defectus homini connaturalis. Quæ igitur ab homine fierent ex ignorantia invincibili, non essent a Deo nisi ut permittente & concurrente concursu generali ex officio causæ primæ; ideoque Deo ut auctori tribui non possent.

522. Dices. S. Augustinus sapissime in suis libris contra Pelagianos scribit, ignorantiam esse pœnam peccati. Ergo innocens homo non potuit a Deo creari ignorantia obnoxius. R. S. Augustinum non loqui de statu possibili, sed de præsentī, in quo certum est tum ignorantiam tum concupiscentiam effectus esse & pœnas peccati originalis; cum Deus ex mera liberalitate sua, non ex debito, primum hominem creaverit a rebellionē concupiscentiæ immunem, atque omnigena scientia ornatum: ex quo ipso contendit Augustinus contra Pelagianos dari peccatum originis, eoquod posterī Adæ tis donis destituti nascantur.

523. Objic. III. Pelagianismus. Julianus Eclanensis, Pelagianæ factionis signifer, id ipsum de concupiscentia docuit, quod a nobis superius traditum fuit. Ergo doctrina nostra merito Pelagianismi accusatur. P. A. Julianus docuit, concupiscentiam, prout est inclinatio in bonum sensibile, esse bonam, ac perfectionem naturalem; libidinem vero ipsam, seu excessum concupiscentiæ esse malum. Hinc illæ voces Juliani: *Concupiscentiæ naturalis qui modum tenet, bono bene utitur: qui modum non tenet, bono male utitur: qui autem etiam ipsum modum sanctæ virginitatis amore contempserit, bono melius non utitur.* Contra Augustinus novam hanc insaniam irridens, concupiscentiam vocat *pulcherrimam Pelagianorum famulam*, & Lib. III. contra Julianum, Cap. XXI. Adversario suo ita respondet: *Ego vero sic ad tua ista respondeo: Concupiscentiæ carnalis qui modum tenet, malo bene utitur; qui modum non tenet, malo male utitur; qui autem etiam ipsum modum Sanctæ Vir-*
gini;

Janseniani frustra nobis Pelagianismum.

ginitatis amore contempserit, malo melius non utitur. --
In hac controversia de bene utendo isto, utrum bono an malo, tota inter nos causa versatur. Ergo doctrina nostra Pelagianæ simillima est, & Augustino contraria. R. N. A. Ad probat. C. A. N. C. Præterquam quod Julianum inter & Augustinum lis numquam fuerit de concupiscentia in statu naturæ puræ, sed tantum de eadem in statu naturæ lapsæ, per Christum reparatæ, multiplex doctrinam inter Juliani & nostram datur discrimen. Ac Imo quidem Julianus in concupiscentia potentiali, seu in ipsa facultate concupiscendi illicita nullum defectum, nullum vitium agnoscebat, modo illi ratio non consentiret extra matrimonium; in hoc enim solo consensu reponebat ejus excessum, quem damnabat. Hinc inferebat, primum hominem, quem rectum a Deo conditum fuisse profitebatur, fuisse a Deo creatum cum effrænata concupiscentia, qualis nunc est. II. In laudes concupiscentiæ, præsertim carnalis, impudentius se effundebat, ut ipsi sæpius exprobrat Augustinus. III. Non satis distinguebat inter concupiscentiam & libidinem; unde utramque bonam esse videbatur affirmare, ut patet ex Augustino Lib. IV. contra Julianum, Cap. XIV. Contra fatemur nos, concupiscentiam, non actuale modo, verum etiam potentialem, quoties ratione non regitur, seu prout dicit potentiam prosequendi objecta inhonesta, esse malam, neque Deum habere authorem, sed ab imperfectione naturæ proficisci: rebellionem concupiscentiæ originali peccato tribuimus: libidinem a concupiscentia fecernimus, neque in illius laudes excurrimus. Ergo doctrina nostra toto cælo a Juliani doctrina distat, & intimo nexu cum Augustiniana conjungitur.

*Aut ratio-
nem oppo-
nunt.*

524. Obje. IV. Ratio. Si homo in statu naturæ puræ a Deo creatus fuisset cum rebellionem concupiscentiæ, habuisset moralem impotentiam servandi totam legem naturalem, saltem diu & constanter. Hoc dici non potest, quia natura rationalis pessime fuisset constituta, utpote morali necessitate adducta ad excidendum sine suo ultimo. Ergo. P. M. Homo in statu natu-

naturæ lapsæ ob rebellionem concupiscentiæ non potest viribus suis absque gratiæ auxilio moraliter servare totam legem naturalem, saltem diu & constanter. Ergo etiam homo in statu naturæ puræ, siquidem concupiscentiæ foret obnoxius, non haberet potentiam moralem diu & constanter servandi totam legem naturalem. P. C. In statu naturæ puræ non daretur gratia; solæ autem animæ vires non sufficerent ad totam legem diu & constanter implendam. Ergo. R. N. M. Ad *prob.* C. A. N. C. Ad hujus *prob.* D. A. In statu naturæ puræ non daretur gratia supernaturalis, quæ iam præsentī providentiā datur, C. A. Non daretur gratia ordinis naturalis, N. A. & Conseq. In hac providentiā cum ex divina liberalitate evecti simus ad statum adoptionis, atque ad finem supernaturalem ordinati, dantur etiam nobis auxilia iupernaturalia, vi quorum actiones non tantum moraliter honestas, sed salutares etiam & vitæ æternæ meritorias eliciamus. In statu autem naturæ puræ, quia finis esset mere naturalis, auxilia etiam forent inferioris ordinis ac mere naturalia.

525. Dices I. Hanc gratiam ordinis naturalis vel libere Deus cuilibet homini in statu naturæ puræ conferret, vel necessario. Quidquid dicatur, data a nobis responsio evertitur. Ergo. P. m. Si libere a Deo confertur; Deus posset illam negare, adeoque innocentem hominem in necessitatem moralem conjicere excidendi sine suo ultimo, quod fane barbariem sapit Deo indignam: Si necessario confertur; auxilium illud ordinis naturalis non esset gratia, eoquod gratia omne debitum excludat. Ergo. R. C. M. N. m. Ad *prob.* dico, Deum vi divinarum perfectionum suarum teneri homini innocenti conferre auxilium, quo ille per aliquod tempus legem Dei servare posset: hocque ipsum auxilium sufficiens esset simul potentia moralis inchoata, qua posset eandem legem servare diu & constanter. Si enim homo faceret quantum posset, & per aliquod tempus legem Dei fervaret, teneretur Deus pro tempore proxime sequente rursus conferre aliud auxilium sufficiens, quo adjutus etiam per illud tempus

mora-


moraliter posset servare legem, & sic deinceps. Atque in hoc sensu primum illud auxilium sufficiens dicitur potentia moralis inchoata legem diu & constanter servandi quia scilicet homo dependenter a primo illo auxilio acquirere posset potentiam moralem completam servandi diu & constanter totam legem naturalem. Homini itaque in statu naturæ puræ necessario Deus conferret auxilium sufficiens, & potentiam moralem inchoatam, quæ non esset gratia strictè dicta, sed gratia ex gratia, seu donum Dei homini debitum ex supposito, quod hic creatus sit a Deo; hæc ipsa tamen creatio est donum Dei gratuitum & indebitum. At vero auxilium congruum & efficax, atque ipsa potentia moralis completa diu & constanter servandi totam legem naturalem, esset favor Dei specialis, atque omnino indebitus.

526. Dices II. Etiam hæc potentia moralis completa deberetur homini innocenti. Ergo non esset gratia vere ac proprie talis. P. A. Si homo per aliquod tempus servaret legem naturalem, Deus teneretur pro alio tempore proxime sequente rursus conferre aliud auxilium sufficiens, vi cuius etiam per illud tempus moraliter posset servare legem. Ergo potentia moralis completa deberetur homini innocenti. R. N. A. Ad probat. C. A. N. C. Hoc debitum conditionatum, si homo per aliquod tempus servaret legem naturalem, non impedit quo minus potentia moralis completa sit favor Dei omnino specialis; quia hæc conditio numquam purificaretur, nisi Deus auxilium congruum & efficax dedisset præ alio, quod ex malitia hominis inefficax futurum fuisset præviderat. Deus autem nulla lege tenetur dare tale auxilium, quo lex actu impleatur; sed tantum quo impleri possit, licet hic & nunc ex malitia hominis lex non observetur.

527. Neque dicas, si potentia moralis completa favor est specialis, homini imputandum non esse, quod illa careat. Respondeo enim, hominem habere auxilia sufficientia ad faciendum id, quod Deus ab ipso exigit per modum conditionis ad ulteriora auxilia ordinis naturalis. Ergo homo in causa est, quod careat istis auxiliis, & consequenter potentia morali completa ad observandam diu & constanter legem Dei graviter obligantem. Vide Antonium Ziegler in Disputatione Theologica de Gratia Christi, Quæst. II. Art. II. Paragrapho III.

O. A. M. D. G.

INDEX



INDEX RERUM PRÆCIPUARUM,

quæ

in Tractatu IV. de Peccatis, Bonis Operibus,
& Libero Arbitrio continentur.

A.

Abstinentia a carnibus tamquam natura sua malis, est
superstitiosa. 326.

Abstinentia a carnibus ex bono fine, Judaismum non
redolet. 329.

Apud Catholicos non ideo fervatur, quod carnes
natura sua malæ sint. 344.

Academiarum studia erga Immaculatam Conceptionem.
87.

Adamus numquam mortuus fuisset, si in statu innocen-
tiæ perseverasset. 53.

Quomodo immortalitas in statu innocentiae morien-
di necessitatem exclusisset? 54. 71.

Adami corpus erat immortale, non natura sua, sed Dei
beneficio. 494.

Concupiscentiæ carebat, beneficio Conditoris. 511.

Afflictio sæpe ob alios fines quam ob peccata a Deo im-
mittitur. 503.

Non est semper pœna, sed quandoque pœnalitas.
504.

Non semper facit miseros. 505.

Alcibiadis factum inepte a Protestantibus adducitur
contra legem Jejuni. 347.

Alexandri VII. Constitutio in causa Immaculatæ Con-
ceptionis. 85.

Alexandri Natalis monitum ad Fratres sui Ordinis. 112.

S. Ambrosius numquam negavit pœnarum æternitatem
apud Inferos. 222.

Amor

I N D E X.

- Amor naturalis Dei in quo differat a supernaturali? 485.
- Animæ licet per traducem propagaretur, non tamen felicius explicaretur transfusio peccati originalis. 28.
- S. Anselmus Cantuariensis non adversatur piæ sententiæ. 108.
- Appetitus naturalis & elicited quid sit? 482.
- S. Augustinus docuit parvulos sine baptismo decedentes æterno igne cruciandos esse. 62. & seq.
- Deiparæ immunitatem ab omni peccato agnovit. 78. 79.
- Cur expressis verbis Deiparam a peccato originali immunem fuisse diserte non asseruerit? 101.
- Docet humanam libertatem immunem esse ab omni necessitate, & esse potentiam electivam. 359.
- Quam necessitatem peccandi in homine lapsa agnovit? 366.
- Ad merendum vel demerendum requirit libertatem indifferentiæ. 378.
- Augustinum irrita conatu vindicare sibi nituntur Novatores. 441.
- Augustino præponenda est authoritas Ecclesiæ. 442.
- Augustini doctrinam approbavit Ecclesia; at non solius, sed etiam aliorum Patrum. 443.
- Augustini doctrina quamvis foret infallibilis, ad Ecclesiam tamen recurrendum foret. 444.
- Augustinus constanter docuit, homini etiam in statu naturæ lapsæ inesse libertatem ab omni necessitate simplici & antecedente. 447. & seq.
- Libros de libero arbitrio non retractavit. 454.
- Ejus Enarrationes in Psalmos quanti sint ponderis? 454.
- Ejus argumenta contra hæreticos non semper certa ac decretoria sunt, sed quandoque conjecturalia. 501.

B.

- Baalismus inepte objicitur decantatibus Officium divinum. 304. 315.

I N D E X.

Baji Michaelis errores. 168. 259. 357. 375. 419. 472.
493. 509.

Baji initia. 469. a Pio V. damnatus, post longam tergiversationem obsequium spondet. 470.

Ad ingenium rediens compescitur a Gregorio XIII.

471.

Bajanismus a discipulis post mortem Baji renovatur. 473.

De Bajano commate famosa lis. 490.

Baji propositiones damnatae sunt in proprio verborum sensu a Bajo intento. 489.

Baji propositiones non modo damnatae sunt ob acrem censuram, sed etiam ob falsam doctrinam. 488.

502.

Baptismi natura, necessitas, ac caeremoniae comprobant dari peccatum originale. 7. 8. 9.

Beatitudinis aeternae jactura est poena peccati originalis. 57.

Beatitudo naturalis quid sit? 478.

Benedictiones carnum cur tempore Paschali ab Ecclesia adhibeantur? 344.

S. Bernardus Immaculatam Deiparam Conceptioni non ad-versatur. 106. 107.

Bucerus novam liberi arbitrii definitionem cudit. 357.

C.

Calvini Joannis errores. 36. 52. 126. 145. 168. 180.
199. 227. 245. 259. 324. 417. 468.

Cantus Ecclesiasticus antiquissimus est, justisque de causis ab Ecclesia introductus. 309.

Ejus utilitas. 312.

Cantus quinam ab Ecclesiis sit proscribendus? 316.

Cassiodorus in Historia Tripartita saepe errata Socratis describit. 336.

Charitas amittitur per quodlibet peccatum mortale. 181.

S. Chrysostomus existentiam peccati originalis agnovit, & asseruit. 20.

Clemens Alexandrinus peccatum originale admisit. 22.

Cle-

I N D E X.

Clemens XI. non adversatur Immaculatæ Conceptioni.

113.

Conceptio quid & quotuplex? 74.

Quæstio de immaculata Deiparæ Conceptione est maximi momenti. 75.

Conceptio Immaculata B. V. M. ostenditur auctoritate Ecclesiæ. 76. Patrum 78.

Tridentini. 80. **Pontificum,** Sixti IV. 81. **Pii V.** & **Gregorii XV.** 83.

Alexandri VII. 85. **Auctoritate Theologorum** 86.

Academiæ 87. **Ex sensu fere universali Fidelium.** 88.

Pia Sententia de Immaculata Conceptione est strictè moraliter certa. 90.

Neque amplius a Sede Apostolica potest damnari tamquam hæretica, aut peccaminosa. 92.

Conceptionis immaculatæ cultûs antiquitas ostenditur in Ecclesia Græca & Latina. 89.

Concupiscentia non est peccatum originale. 41.

Qua ratione dicatur peccatum? 47. 50.

Concupiscentia rebellis est mala. 55.

Atque a peccato originali proficiscitur. 56.

Concupiscentia quid sit? 506.

Concupiscentiæ rebellio quid sit? 507.

Concupiscentia quo sensu possit esse a Deo? 514.

D.

Dæmones pœnas inferni sustinent. 216.

Quamvis eorum multi in aère versentur. 217.

Damnati, vide *Infernus*.

Debitum remotum & proximum contrahendi originale quid sit? 121.

Deus pactum cum Adamo iniit de transfundenda in posterios justitia, eumque caput morale posterorum constituit. 26.

In voluntate Adami inclusit voluntates posterorum, salva sua Sanctitate, Bonitate, ac Justitia. 31.

Deus non est author peccati. 146. & seq.

Impios

I N D E X.

Impios creat ad sempiternum interitum consequenter ad prævisionem absolutam demeritorum. 156.

Quo sensu impellere vel incitare dicatur ad peccatum? 159.

Quo sensu dicatur indurare & excacare peccatores? 16.

Influit in peccata, quin sit author peccati. 165. & seq.

Deus potuit hominem non elevare ad statum supernaturalem. 474.

Hominem innocentem condere morti ac miseriis obnoxium. 494.

Ac cum aliqua rebellionē concupiscentiæ. 510.

Deus sæpe non ob peccata, sed ob alios fines hominem affligit. 503.

E.

Ecclesia non potest Sanctitati falsæ decernere cultum sacrum. 76.

Ecclesia colit ipsam Conceptionem formalem Deiparæ. 120.

Evangelii & Legis veteris discrimen. 277.

Eustathius cur ab Ecclesia damnatus fuerit? 347.

F.

Fidelium consensus in tuenda Immaculata Conceptione quanti sit ponderis? 88.

Fides potest simpliciter amitti. 185.

Non tamen amittitur per quodlibet peccatum mortale. 186.

Per quodnam mortale amittatur? 190.

G.

Gratia sanctificans prima non cadit sub meritum de condigno. 241.

Gratia prima actualis neque cadit sub meritum de condigno, neque de congruo. 244.

Gratia excludit debitum. 474.

Gratia ordinis naturalis quid sit? 479.

Gratia efficax & indebita locum habuisset etiam in statu naturæ puræ. 525.

T. IV. Theol. Dogm. Pol.

Dd

Gr

I N D E X.

Gregorii XV. Constitutio in causa Conceptionis Deiparae. 83.

Quæ sint Constitutionis illius consecutaria? 84.

S. Gregorius Nazianzenus æternitati poenarum non refragatur. 222.

S. Gregorii Nysseni opera aliqua ab hæreticis corrupta. 222.

H.

S. Hieronymus numquam docuit poenas inferni finem habituras. 219. 220. 221.

Hilarius tantum Ecclesiasticum insectatur. 304.

Homo potuit a Deo creari, quin per gratiam sanctificantem elevaretur ad finem supernaturalem. 474.

Homo innocens potuit a Deo condi morti ac morbis obnoxius. 494.

Et cum aliqua rebellione concupiscenciæ. 510.

Horarum Canonicarum usus antiquissimus ac Deo gratissimus est. 305.

Horarum Canonicarum cur facta fuerit divisio. 308.

Horarum Canonicarum prætensi abusus. 313.

I.

Jansenianorum errores. 180. 245. 357. 259. 375. 391. & seq. 419. 473. 493. 509.

Augustinum sibi conantur vindicare. 441.

Eorum æquivocationes. 398.

Exceptiones putidæ. 404. & seq.

Idem circa libertatem quoad substantiam docent, quod Manichæi. 403.

Jansenii Systema mechanicum utriusque delectationis. 391.

Hujus Systematis consecutaria. 393. & seq.

In hoc Systemate liberum arbitrium penitus subruitur. 399.

Ipsam Systemam a Sede Apostolica implicite est damnatum. 415.

Hujus Systematis patroni idem reipsa docent, quod Jansenius. 416.

Jejunium Ecclesiasticum quid sit? 317.

Quæ

INDEX.

- Quæ ejus utilitas? 318.
- Jejunii Quadragesimalis origo. 319.
- Non ubique eadem die inchoabatur. 320.
- Cur institutum sit? 321.
- Jejunium Hebdomadarium. 322.
- Jejunium quatuor Temporum. 323.
- Jejunii tempore abstinencia servabatur a carnibus & a vino. 338.
- Jejunium ex malo fine est inutile ac pravum. 327.
- Ex bono fine susceptum, est opus bonum & Deo gratum. 328.
- Jejunii lex obligat fideles in conscientia. 330.
- Etiam justos. 336.
- Jejunium præcipiendo Ecclesia non excedit limites suæ potestatis. 334.
- Jejunii lex vigeat etiam in antiqua Ecclesia. 334. 335.
- Recte & utiliter lata est ab Ecclesia. 337.
- Per jejunium mercedem a Deo promeremur. 339.
- Ac pro peccatis Deo satisfacimus. 340.
- Ignis inferni quo sensu a Patribus dicatur incorporeus? 204.
- Est ejusdem cum elementari nostro speciei 205.
- Qua ratione agat in corpora, explicari nequit. 206.
- Ignis vox in Scripturis fumitur pro vero igne. 214.
- Illyrici Matthiæ absona de natura peccati Originalis opinio. 34. Confutatur. 39.
- Infernus datur etiam in lege gratiæ. 200.
- Est locus materialis, determinatus, ac subterraneus. 201.
- In eo damnati torquentur vero igne. 202.
- Apud Inferos puniuntur peccata gravia, etiam occulta, nondum expiata. 207.
- Ad Inferos statim post mortem detruduntur animæ in statu peccati mortalis ex hac vita decedentes. 208.
- Infernales pœnæ sunt æternæ, nullum umquam finem habituræ. 209.
- Indifferentia circa salutem æternam inepta est & noxia. 298.
- Indifferentia judicii sola non sufficit ad libertatem. 413.

INDEX.

- Inimpedibile est, quod necessario sequitur ex inimpedibili. 398. 412.
 S. Irenæi locus de jejuniis Veterum perperam intelligitur a Protestantibus. 335.
 Julianus Imp. Christianos proponit ad imitandum Gentilibus. 307.
 Juliani Eclanensis Pelagiani doctrina de concupiscentia. 523.
 Justitia originalis quid dicat? 37.

L.

- Libertas a coactione & necessitate. 348.
 Contradictionis & contrarietatis. 349.
 Contrarietatis non semper requiritur ad libertatem a necessitate. 350.
 Ut libera sit potentia, & ad agendum proxime expectata, quid requiratur? 351.
 Libertas ad appetendam in genere beatitudinem non datur. 356.
 Libertas a coactione necessario convenit voluntati humanæ. 355.
 Non sufficit ad liberum arbitrium. 358.
 Libertas indifferentiæ etiam in statu naturæ lapsæ est necessaria ad merendum vel demerendum. 376.
 Libertas in causa, seu in Adamo, non sufficit ad liberum arbitrium. 389.
 Liberum arbitrium datur etiam in statu naturæ lapsæ. 420.
 Lutheri Martini errores. 36. 126. 168. 180. 227. 245. 259. 269. 279. 303. 324. 417. 418. 468.

M.

- B. V. Maria cur mortua? 72.
 Non contraxit peccatum originale. Vide *Conceptio*.
 Habuit debitum remotum contrahendi originale. 122.
 Non tamen debitum proximum. 124.
 Semper fuit immunis ab omni labe peccati personalis. 127.
 Habuit tamen potentiam peccandi. 132.

Con-

I N D E X.

- Confessionem Sacramentalem numquam peregit. 142.
 Fomittem peccati numquam habuit. 143.
 Mariana innocentia a criminationibus Protestantium
 vindicatur. 136. & seq.
 Matrimonii usus non est causa peccati originalis. 29.
 Meritum de condigno, & de congruo quid sit? 237.
 Ad meritum de condigno quid requiratur? 238.
 Ad meritum de congruo? 239.
 Sub meritum de condigno & de congruo quid cadat?
 240.
 Sub meritum de condigno quid non cadat? 241. & seq.
 Merita nostra nullam inferunt injuriam meritis Chri-
 sti. 256.
 Mercedis aternæ intuitu licitum est bonum agere. 260.
 Miseriæ hujus vitæ non certo, sed probabiliter osten-
 dunt existentiam peccati originalis. 499.
 Moniales prudenter ab Ecclesia obligantur ad recitan-
 dum latina lingua Officium divinum. 314.
 Montani jejunia cur ab Ecclesia fuerint improbata?
 334.
 Montesono Joan. propositiones proscriptæ ab Acade-
 mia Parisina. 87.
 Mors corporis est pœna peccati originalis. 53. 68.
Multi in Scripturis sæpe dicuntur omnes. 16.

N.

- Narratio Evangelica Divitis & Mendici non est para-
 bolica, sed historica. 215.
 Nativitas B. M. fuit sancta, & unde id constet? 77.
 Naturæ puræ status quid sit? 465.
 Naturæ integræ, innocentis & elevatæ, lapsæ & repa-
 ratæ status quid sit? 466.
 Naturæ puræ status possibilis est. 474.
 Necessitas antecedens & consequens quid sit? 352.
 Perpetua & transiens. 353.
 Metaphysica, physica, & moralis. 354.

O.

- Obduratio & excæcatio peccatorum quid sit? 161.
 Officium Divinum quid sit? 301.

Varia

INDEX.

- Varia ejus nomina. 302.
- Officiū parvum Immaculatæ Conceptionis cur olim
proscriptum fuerit? 113.
- Omnipotentia Dei omne id repugnat, quod a perfe-
ctionibus divinis alienum est. 502.
- Opera vere ac perfecte bona possunt effici a iustis. 228.
- Opera quamvis in Scripturis dicantur pannus mensura-
ta? 233.
- Opera bona Justorum merentur vitam æternam. 246.
- Et quidem de condigno. 249.
- Sunt necessaria ad obtinendam salutem. 272.
- Non tantum ratione præsentia, sed etiam efficien-
tia. 274.
- Ex operibus bonis nascitur fiducia. 250.
- In illis potest poni fiducia. 251.
- Tutius tamen illa in sola Dei misericordia reponi-
tur. 252.
- Oratio sola ad salutem non sufficit, neque non inter-
rupta requiritur. 283.
- Oratio ad salutem est necessaria. 285.
- Licite & honeste fit etiam pro aliquo in specie. 291.
- Etiam privata recte peragitur in Templis. 293.
- Orantibus multa largitur Deus, quæ absque oratione
non concederet. 289.
- In Oratione æterna salus determinate est petenda. 297.
- Bona vero temporalia sub conditione. 299.
- In Oratione Dominica nomine *panis*, & *malis* quid ve-
niat? 300.
- Origenes an peccatum Originale admiserit, merito am-
bigitur. 22.
- Ejus error circa penas Dæmonum & damnatorum.
199.
- Damnatur in V^{ta} Synodo. 211.
- P.
- Parvuli sine baptismo decedentes non fruuntur natu-
rali beatitudine. 59.
- Dolorem internum patiuntur. 60.
- An æterno igne sint cruciandi? 62. & seq.
- Patres quo sensu carnem Deiparæ vocent *carnem pecca-*
ti? 102.
- Quo

INDEX.

- Quo sensu Deiparam dicant *mundatam purgatam, sanctificatam* fuisse? 103.
- Peccatum quid & quotuplex sit? 1.
- Quo sensu sit pœna alterius peccati? 155.
- Peccatum Originale datur. 3. & seq.
- Unicuique ex posteris Adæ est proprium. 11.
- Per naturalem generationem in singulos derivatur. 12.
- Quamvis anima non generetur a parentibus. 28.
- Non tamen alia Adami aut parentum peccata derivantur. 13.
- Originale transfunditur, quando anima corpori unitur. 14.
- Peccatum non imitatione, sed propagatione in mundum intravit. 16.
- Originale qua ratione sit voluntarium? 23.
- Hujus vera causa non sunt parentes, sed instrumenta. 25.
- Peccati originalis natura explicatu difficilis. 32.
- Male explicatur ab Illyrico. 34.
- A veteribus quibusdam Scholasticis. 35.
- Atque a Protestantibus. 36.
- Quid Catholici Doctores de illa sentiant? 37.
- Peccati Originalis pœna est mors corporis. 53.
- Concupiscentia rebellis. 56.
- Exclusio ab æterna gloria. 57.
- Peccata mortalia & venialia differunt inter se intrinsece, & ex natura sua. 170.
- Peccati mortalis a veniali differentia undenam sit desumenda? 173.
- Pelagii errores circa peccatum originale. 2. ejusque pœnas. 52.
- Perseverantia finalis non cadit sub meritum de condigno, sed de congruo. 242.
- S. Pius V. cur Officium Conceptionis immutaverit? 82.
- Pontifices Romani sæpe damnarunt propositiones noxias *in globo*. 492.
- Pontificum Romanorum favor erga piam sententiam. 81. 82. 83. 84. 85. 89.
- Præscientia Dei non tollit libertatem actuum humanorum. 434. & seq.
- Pro-

INDEX.

Processio Spiritus Sancti a Patre & Filio quo sensu dicatur a quibusdam libera? 374.

Q.

Qualitas morbida, veterum quorundam Scholasticorum commentum. 40.

Quietistarum error. 282.

R.

Redemptio, alia reparativa, alia præservativa. 97.

De Rivo Petri propositio damnata. 412.

S.

Samosateni Pauli impudentia. 303.

Sanctificari quo sensu dicatur vir infidelis per mulierem fidelem? 19.

Scriptura quandonam in proprio, aut figurato sensu sit intelligenda? 150.

Sixti IV. gemina Constitutio in causa Conceptionis. 81.

Socratis hallucinatio de jejuniis Romanæ Ecclesiæ. 336.

Spes Theologica non amittitur per quodlibet mortale. 189. Per quod mortale amittatur? 190.

T.

Theodoretus peccatum originale numquam negavit. 22.

Theologi fere omnes a Sæculo XIII. immaculatam B.

V. Conceptionem propugnant. 86.

S. Thomas pluribus in locis perspicue docuit immunem fuisse Deiparam a noxa originaria. 109.

Conciliantur textus, qui videntur contrarii. 110.

Non inanis suspicio est, textus contrarios fuisse vitiatos. 111.

Ex principiis S. Thomæ infertur, Deiparam non contraxisse originariam noxam. 111.

Thomistæ complures Immaculatam Deiparæ Conceptionem tuentur. 112.

Trajani Imp. liberatio ab inferno prorsus commentitia est. 223.

Tridentini Concili declaratio, addita ad finem Decreti de peccato originali, est genuina. 80.

V.

Votum tuendi Immaculatam Deiparæ Conceptionem, etiam profuso sanguine, est pium & laudabile. 95.

O. A. M. D. G.



Biblioteka Główna UMK
300020637782

493914

K

Biblioteka
Główna
UMK Toruń

493914